

唐詩紀事



# 唐詩紀事 第一冊

明·洪楸校



第一輯

第四十四種

依原刊本排印

貝葉山房張氏藏版

# 重刻唐詩紀事序

明中憲大夫浙江提刑按察副使

敕理學政汾陽孔天胤汝錫甫撰

唐詩紀事若干卷。舊敍是臨邛灌園居士計敏夫字有功所集。而爲懷安假守王禧字慶長鏡置郡齋。時記嘉定甲申。年代既遠。印板磨滅。或無再刻之者。故其書罕存。卽有傳者。但鈔本爾。嗜文之士。意恆闕如也。嘉靖乙巳。錢塘洪子美氏。釋宮窠玉絳之班。理家園竹素之業。得笥藏懷安初本。遂爲雕繕。久之成書。余覽而嘉之。且善其紀事之意。敏曰。夫詩以道情。疇弗恆言之哉。然而必有事焉。則情之所繇起也。辭之所爲綜也。故觀于其詩者。得事則可以識情。得情則可以達辭。譬諸水木。事其源委本末乎。辭其津涉林叢乎。情其爲流爲鬯者乎。是故可以觀已。故君子曰。在事爲詩。又曰。國史明乎得失之迹。夫謂詩爲事。以史爲詩。其義輒哉。然自性情之說拘。而狂簡或遂略于事。則猶不窮水木。而徒迷驚乎津涉。蔽虧乎林叢。其于流鬯。蓋已疎矣。故孔父言知在于格物。孟子誦詩。必論其世。且如虞有卿雲之歌。弗稽大傳。曷知其爲禪夏。漢盛五篇之詩。非考兩都。又焉得其鴻典也。故善學者大通而無闕。不善學者小見而多離。

詩從刪後。豈展無之。顧大雅雖闕。然歌詠之事。可考而釋焉。唐俗尙詩。號專盛。至其摛藻命章。逐境紆翰。皆情感事而發。杼辭緣情而綺麗。卽情事之合一。詎觀覽之可偏。宋興理學。儒者偏鄙薄詞華。覆又推杜甫等。而以格調聲律爲品裁。然但言理而不及事。豈與古人說詩之旨同哉。今高材切慕其成說。競依憑其籬下。掇拾其緒餘。及博討唐篇。如窮水木。或不喻其時代與人物。是既不曉事。又安識所謂道情者。與夫所謂聲調者。亦竅言也已。然則紀事一書。其藝流之源委。文苑之本末。利涉之方航。發蒙之朗若者矣。嘗觀集唐詩者。奚啻什數集。紀事如有功者少。刻唐詩者。奚啻伯數刻。紀事如子美者少。予故嘉善。作此敍詞。詩三百篇。毛傳蓋其紀事。今爲考亭所緝。然欲究遺經。當必攷之。子美名榭。歷詹事府主簿。



## 唐詩紀事序

唐人以詩名家。姓氏著于後世。殆不滿百。其餘僅有聞焉。一時名輩。滅沒失傳。蓋不可勝數。敏夫閑居尋訪。三百年間。文集雜說。傳記遺史。碑誌石刻。下至一聯一句。傳誦口耳。悉搜採繕錄。間捧窰牒。周遊四方。名山勝地。殘篇遺墨。未嘗棄去。老矣無所用心。取自唐初首尾。編次姓氏。可近紀一千一百五十家。篇什之外。其人可考。卽略紀大節。庶讀其詩。知其所恨。家貧缺簡籍。地僻罕聞見。聊據所得。先成八十一卷。目曰唐詩紀事云。灌園居士臨卽計敏夫有功。敘。

慶元辛酉。禧從大諫傅公。游于凌雲。邂逅灌園季子次陽。總幹。蓋禧戊午類試坐主也。因得是書。立命數十吏傳錄。其間不能無魯魚亥豕之誤。繙閱累年。手自讎校。十是正其七八。餘則傳疑。不敢妄加損也。夫文章與時高下。而詩發於情。帝王盛時。採之以觀民風。在治忽春秋之時。趙孟請賦詩以觀鄭七子之志。季札請觀樂以知列國之風。世之君子。欲觀唐三百年文章人物風俗之污隆邪正。則是書不爲無助。乃鏡之懷安郡齋。與世共之。嘉定甲申。懷安假守王禧慶長書。

# 唐詩紀事目次

## 第一冊

第一卷 太宗 高宗 中宗

第二卷 明皇 德宗 文宗 宣宗

第三卷 武后 徐賢妃 上官昭容 越王貞 韓王元嘉

孔紹安 鄭世翼 董思恭 沈叔安 陸敬

袁助 牛鳳及 朱子奢 庾抱 張文恭

陳叔達 薛收

第四卷 王珪 褚亮 虞世南 蔡允恭 許敬宗

劉孝孫 魏徵 楊師道 岑文本 李伯藥

來濟 長孫無忌 杜正倫 馬周 李義府

陳子良 杜之松 崔善爲 王績

第五卷

蕭德言 顏師古 杜淹 裴守真 胡元範

元萬頃 李敬玄 張文琮 薛元超 鄭蜀賓

王德真 楊思玄 鄭義真 徐珩 蕭翼

張執恭 鄭軌 王勣 竇咸

第六卷

上官儀 郭正一 喬知之 喬侃 員半千

任希古 蘇味道 杜審言 郭利正 吳少微

富嘉謨 李福業 王適 李崇嗣

第七卷

高正臣 崔知賢 韓仲宣 周彥昭 高球

弓嗣初 高瑾 王茂時 徐皓 長孫真隱

高紹 郎餘令 陳嘉言 周彥暉 高嶠

周思鈞 劉友賢 于季子 東方虬 略賓王

盧照隣 王勃 楊炯 田遊巖

第八卷

陳子昂 邵大震 李日知 李景伯 劉禕之

王無競 袁恕已 郭元震 崔融 張昌齡

第九卷

李適 張錫 徐彥伯 宗楚客 韋承慶

蕭至忠 李迥秀 劉憲 崔湜 岑羲

第十卷

趙彥昭 崔日用 李乂 盧藏用 馬懷素

薛稷 劉元濟 李元紘 李嶠

蘇頲 李元紘 李嶠 蘇瓌

第十一卷

韋嗣立 趙彥伯 閻朝隱 鄭愔 沈佺期

宋之問 徐堅 盧懷慎 武平一 李行言

韋元旦

第十二卷

畢乾泰 辛替否 王景 韋安石 竇希玠

李咸 陸景初 鄭南金 于經野 解琬

麴瞻 樊忱 孫佺 李從遠 周利用

楊廉 張景源 李恒

第十三卷

崔液 張元一、劉希夷 鄭遂初 王熊

房融 張敬忠 崔珪 沈祖僊 盧崇道

徐安期 張紘 薛曜 袁暉 李休烈

邵士彥 吳大江、劉幽求 賈會 楊齊哲

魏元忠 李夔 司馬承禎

第十四卷 張說 宋璟 王丘 崔翹 王光庭

席豫 梁昇卿 源乾曜 張嘉正 盧從愿

韓休 徐知仁 崔禹錫 裴漼 韋玩

程行謚 李昂 蕭嵩 劉昇 裴光庭

宇文融 崔沔 崔尙 陸堅 崔泰之

崔日和 魏奉古

第十五卷 王灣 魏知古 許景先 姚崇 姜皎

姜晞 王岳靈 楊顏 鄭絲 張諤

趙仁獎 張暉 金昌緒 蘇晉 張九齡

崔國輔

第十六卷 王維 王縉 裴迪 崔輿宗

第十七卷

賀知章

賀蘭進明

李邕

陰行光

李伯魚

趙冬曦

尹恣

崔成甫

李昂

殷遙

徐延壽

苑咸

丘爲

第十八卷

杜甫

李白

房瑄

蘇源明

第十九卷

崔宗之

敬括

房瑄

蘇源明

第二十卷

鄭虔

嚴武

史俊

李適之

祖詠

李傾

綦毋潛

趙謙光

李元操

薛令之

張諲

陶翰

顏舒

王琚

王熊

薛維翰

崔巨

朱琳

王泠然

萬楚

胡皓

袁瓘

柳識

高力士

高霽

息夫牧

崔曙

# 唐詩紀事卷第一

錢塘 洪楹 校

太宗 高宗 中宗

帝京篇序云。余以萬機之暇。遊息藝文。觀列代之皇王。考當時之行事。軒吳舜禹之上。信無間然矣。至于秦皇周穆。漢武魏明。峻宇雕牆。窮侈極麗。征稅殫於宇宙。轍跡徧於天下。九域無以稱其求。江海不能贍其欲。覆亡顛沛。不亦宜乎。余追蹤百王之末。馳心千載之下。慷慨懷古。想彼哲人。庶以堯舜之風。蕩秦漢之弊。用咸英之曲。變爛漫之音。求之人情。不爲難矣。故觀文教於六經。閱武功於七德。臺榭取其避燥濕。金石尙其諧人神。皆節之於中和。不係之於淫放。故溝洫可悅。何必江海之濱乎。麟閣可翫。何必山陵之間乎。忠良可接。何必海上神仙乎。豐鎬可游。何必瑤池之上乎。釋實求華。以人從欲。亂於大道。君子恥之。故述帝京篇。以明雅志云爾。

秦川惟帝宅。函谷壯皇居。綺殿千尋起。離宮百雉餘。連雲遙接漢。飛觀迥凌虛。雲日隱層闕。風煙出綺疏。(其一)巖廊罷機務。崇文聊駐輦。玉匣啓龍圖。金繩披鳳篆。韋編斷仍續。縹帙舒還卷。對此乃淹留。欵案觀墳典。(其二)移步出詞林。停輿欣載宴。瑤弓寫明月。駿馬疑

流電驚雁落虛弦。啼猿悲急箭。閱賞誠多矣。於茲乃忘倦。（其三）鳴笳臨樂館。眺聽歡芳節。急管韻朱絃。長歌凝白雪。威鳳肅來下。玄鶴分成列。去茲鄭衛聲。雅音方可悅。（其四）芳辰追逸趣。禁苑信多奇。橋形通漢上。峯勢接雲危。煙霞交隱映。花鳥自參差。何如肆轍跡。萬里賞瑤池。（其五）飛蓋去芳園。蘭橈遊翠渚。萍間日彩亂。荷處香風舉。桂楫滿中川。絃歌振長嶼。豈獨汾河曲。方爲歡宴所。（其六）日落雙闕昏。迴輿九重暮。長煙散初碧。皎月澄輕素。褰幌翫琴書。開軒引雲霧。銀漢耿層閣。清風搖玉樹。（其七）歡樂難再遇。芳晨良可惜。玉酒溢雲壘。蘭肴陳綺席。千鐘合堯禹。百獸諧金石。得志重寸陰。忘懷輕尺璧。（其八）建章歎賞夕。二八盡妖妍。羅綺昭陽殿。芳芬玳瑁筵。珮移星正動。扇掩月初圓。無勞上玄圃。卽此對神仙。（其九）以茲遊觀極。悠然獨長想。披卷覽前蹤。撫躬尋既往。望古茅茨約。曠今蘭殿廣。入道虛高。危。虛心誠益蕩。奉天竭誠敬。臨民思惠養。納善察忠諫。明科慎刑賞。六五誠難繼。四三非易仰。庶待淳化敷。方嗣云亭響。（其十）

帝製帝京篇。命李百藥並作。旣上。詔曰。卿何身老而才之壯。齒宿而意之新乎。

正月臨朝云。條風開獻節。灰律動初陽。百蠻奉還書。萬國朝未央。雖無舜禹跡。幸欣天地康。車軌同八表。書文混四方。赫奕儼冠蓋。紛綸盛服章。羽旌飛馳道。鐘鼓震脩廊。組練暉霞色。



霜戟照朝光。晨宵懷至理。終愧撫遐荒。

秋日垂清光。賜房元齡詩曰。秋露凝高堂。朝光上翠微。參差麗雙闕。照耀滿重闌。仙馭隨輪轉。靈鳥帶影飛。臨波無定彩。入隙有圓暉。還當葵藿志。傾葉自相依。

賦得白日傍西山詩曰。紅輪不暫駐。鳥飛豈復停。岑霞漸漸落。溪陰寸寸生。蒼葉隨光轉。葵心逐照傾。晚煙含樹色。棲鳥雜流聲。

賦得花庭霧詩云。蘭氣已薰宮。新蕊半粧叢。色含輕重霧。香引去來風。拂樹濃舒碧。繁花薄蔽紅。還當雜行雨。髣髴隱遙空。

詠小山詩云。近谷文縈蕊。遙峯對出蓮。徑細無全磴。松小未含煙。

弱柳鳴秋蟬詩云。散影玉階柳。含翠隱鳴蟬。微形藏葉裏。亂響出風前。

早雁出雲鳴詩云。初秋玉露清。早雁出雲鳴。隔雲時亂影。因風乍含聲。

秋日翠微宮詩曰。秋光凝翠嶺。涼吹肅離宮。荷疎一蓋缺。樹冷半帷空。側陣移鴻影。圓花釘菊叢。攄懷俗塵外。高眺白雲中。

春日望海詩云。披襟眺滄海。憑軾翫春芳。積流橫地軸。疏派引天潢。仙氣凝三嶺。和風散八荒。拂曉雲布色。穿浪日舒光。照岸花分彩。迷雲鴈斷行。懷卑運深廣。持滿守靈長。有形非易

測無源詎可量。洪濤經變野。翠鳥屢成桑。之罘思漢帝。碣石想秦皇。霓裳非本意。端拱且圖王。  
召侍臣。賜宴守歲云。四時運灰琯。一夕變冬春。送寒餘雪盡。迎歲早梅新。

洛水云。春蒐馳駿骨。總轡俯長河。霞處流縈錦。風前漾卷羅。水花翻照樹。隄蘭倒插波。豈必汾陰曲。秋雲發棹歌。

冬日臨昆明池詩云。石鯨分玉溜。劫燼隱平沙。柳影水無葉。梅心凍有花。寒野凝朝露。霜天散夕霞。歡情猶未極。落景遽西斜。

賦得浮橋詩云。岸曲非千里。橋斜異九星。暫低逢輦度。還高值浪驚。水搖文鷁動。纜轉錦花縈。遠近隨輪影。輕重應人行。

入潼關詩云。崑函稱地險。襟帶壯兩京。霜峯直臨道。冰河曲遶城。古木參差影。寒猿斷續聲。冠蓋往來合。風塵朝夕驚。高談先馬渡。僞曉預鷄鳴。棄繻懷遠志。封泥負壯情。別有真人氣。安知名不名。

春日玄武門宴羣臣詩云。韶光開令序。淑氣動芳年。駐輦華林側。高宴栢梁前。紫庭文珮滿。丹墀袞紱連。九夷籛瑤席。五狄列瓊筵。娛賓歌湛露。廣樂奏鈞天。盈樽浮綠醕。雅曲韻朱絃。粵余君萬國。還慚撫八埏。庶幾保正固。虛已厲求賢。

又置酒坐飛閣詩云。高軒臨碧渚。飛簷迥駕空。餘花攢漏檻。殘柳散雕櫳。岸菊初含蕊。園梨始帶紅。却慮崑山暗。不共盡杯中。

冬宵合爲四韻詩云。雕宮靜龍漏。綺閣宴公侯。珠簾燭燄動。繡柱月光浮。塵起將歌發。風停輿管逾。瑣池任多士。端辰竟何憂。

尚書詩云。崇文時駐步。東觀還停輦。輟膳玩三墳。輝燈披五典。寒心視肉林。飛目看沉湎。縱情昏主多。克己明君鮮。滅身資累惡。成名猶積善。既承百王末。戰兢隨歲轉。

詠司馬彪續漢志詩云。二儀初創象。三才乃分位。非惟樹司牧。固亦垂文字。綿代更膺期。芳圖無輟記。炎漢承君道。英謨纂神器。潛龍既可躍。術兔奚難致。前史殫妙詞。後昆沉雅思。書言揚盛跡。補闕興洪志。川谷猶舊涂。郡國開新意。梅山未覺朽。穀水誰云異。車服隨名表。文物因時置。鳳戟翼康衢。鸞輿摠柔辮。清濁必能澄。洪纖幸無棄。觀儀不失序。遵禮方由事。政宣竹律和。時平玉條備。文囿雕奇彩。藝門蘊深致。雲飛星共流。風揚月兼至。類禋遵今典。壇壝資良地。五勝竟無違。百司誠有庇。我皇承暇景。談叢引衆祕。討論窮義府。看覈披經笥。大辯良難仰。小學終先賈。聞道諒知榮。含毫孰忘愧。

出獵詩云。楚王雲夢澤。漢帝長楊宮。若時因農暇。閱武出輜嵩。三駟陳銳卒。七萃列材雄。

寒野霜氛白。平原燒火紅。瑠戈夏服箭。羽騎綠沉弓。佈獸潛幽壑。驚禽散翠空。長煙晦落景。灌木偃嚴風。所爲除民瘼。非是悅林叢。

冬狩詩云。烈烈寒風起。慘慘飛雲浮。霜濃凝廣隰。冰厚結清流。金鞍多上苑。玉勒騁平疇。旌旗四望吞。置羅一面求。楚蹄爭兕磴。秦亡解鹿愁。獸忙投密樹。鴻驚起礫洲。騎斂原塵靜。戈迴嶺日收。心非洛汭逸。意在渭濱游。禽荒非所樂。撫轡更招憂。

李詩云。玉衡流桂圃。成蹊正可尋。鸚啼綠葉外。蝶戲晚花心。麗景光朝彩。輕煙散夕陰。暫賴暉章側。還眺靈山林。

賦得櫻桃詩。春爲韻云。華林滿芳景。洛陽徧陽春。朱顏含遠日。翠色影長津。喬柯轉嬌鳥。低枝映美人。昔作園中實。今來席上珍。

春池柳詩。年柳變池臺。隋堤曲直迴。逐浪絲陰去。迎風帶影來。疎枝一鳥唳。半翠幾眉開。瑩雪臨春岸。參差間早梅。

臨池柳詩云。岸曲絲陰聚。波移帶影疎。還將眉裏翠。來就鏡中舒。

竹詩云。貞條彰曲砌。翠葉負寒霜。拂牖分寒影。臨池待鳳翔。

詠飲馬詩云。駿骨飲長涇。奔流灑絡繹。細紋連噴聚。亂荇遶蹄縈。水光鞍上側。馬影溜中

橫。纒似天池裏。騰波龍種生。

帝嘗作宮體詩。使虞世南。唐和。世南曰。聖作誠工。然體非雅正。上有所好。下必有甚。臣恐此詩一傳。天下風靡。不敢奉詔。帝曰。朕試卿爾。後帝爲詩一篇。述古興亡。旣而嘆曰。鍾子期死。伯牙不復鼓琴。朕此詩何所示耶。敕褚遂良卽世南靈坐焚之。

正觀六年九月。帝幸慶善宮。帝生時故宅也。因與貴臣宴。賦詩起居。郎請平宮商。被之管絃。命曰功成慶善樂。使童子八佾爲九功之舞。大宴會與破陣舞。偕奏於庭。

正觀二十年秋。帝幸靈州。破薛延陀。時迴紇諸部遣使入貢。乞置官司。上爲詩序其事曰。雪恥酬百王。除凶報千古。公卿請勒石於靈州。從之。

### 高宗

九月九日。雲端居臨玉辰。初律啓金商。鳳闕澄秋色。龍闈引夕涼。野靜山氣斂。林疎風露長。砌蘭虧半影。巖桂發全香。滿蓋荷彫翠。圓花菊散黃。揮鞭爭電烈。飛羽亂星光。柳空穿石碎。弓虛側月張。怯猿啼落岫。驚鴈斷分行。斜輪低夕影。歸旆擁通莊。

七夕宴玄圃云。羽蓋飛天漢。鳳駕越層巒。俱歎三秋阻。共敍一宵歡。璜虧夜月落。鬢碎曉星殘。誰能重操杼。纖手濯清瀾。

又云霓裳轉雲路。鳳駕儼天潢。虧星凋夜鬢。殘月落朝璜。促歎今夕促。長離別後長。輕梭聊駐織。掩淚獨悲傷。

過溫湯詩。溫渚停仙蹕。豐郊駐曉旌。路曲回輪影。巖虛傳漏聲。暖溜驚湍駛。寒空碧霧輕。林黃疏葉下。野白曙霜明。眺聽良無已。煙霞斷續生。

太子納妃。太平公主出降詩云。龍樓光曙景。魯館啓朝扉。艷日濃粧影。星低降婺輝。玉庭浮瑞色。銀榜藻祥徽。雲轉花綵蓋。霞飄葉綴旗。

雕軒回翠陌。寶駕歸丹殿。鳴珠珮曉衣。鏤壁輪初扇。華冠列綺筵。蘭醕申芳宴。環階鳳樂陳。玳席珍羞薦。蝶舞袖香新。歌分落素塵。歡凝歡懿戚。慶叶慶初姻。暑闌炎氣息。涼早吹疎蘋。方期六合泰。共賞萬年春。

太平公主。武后所生。后愛之傾諸女。帝擇薛紹尚之。假萬年縣爲婚館。門隘不能容翟車。有司毀垣以入。自興安門設燎相屬。道樾爲枯。當時羣臣劉禕之詩云。夢梓光青陛。穠桃萬紫宮。元萬頃云。離元應春夕。帝子降秋期。任奉古云。帝子升青陛。王姬降紫宸。郭正一云。桂宮初服冕。蘭掖早升笄。皆納妃出降之意也。

立春日游苑迎春云。神臯福地三秦邑。玉臺金闕九仙家。寒冰猶戀甘泉樹。淑景催臨建始花。綵蝶黃鶯未歌舞。梅香柳色已矜誇。迎春正啓流霞席。整囑曦輪勿遽斜。

九月九日幸臨渭亭登高作云。九日正乘秋。三杯興已周。泛桂迎罇滿。吹花向酒浮。長房萸早熟。彭澤菊初收。何藉龍沙上。方得恣淹留。（得秋字）時景龍三年也。御製序云。陶潛盈把。既浮九醞之觀。畢卓持螯。須盡一生之興。人題四韻。同賦五言。其最後成。罰之引滿。

韋安石得枝字云。金風飄菊蕊。玉露泫萸枝。

蘇瓌得暉字云。恩深答劾淺。留醉奉宸暉。

李嶠得歡字云。令節三秋晚。重陽九日歡。

蕭至忠得餘字云。寵極萸房遍。恩深菊耐餘。

竇希玠得明字云。九晨陪聖膳。萬歲奉承明。

韋嗣立得深字云。願陪歡樂事。長與歲時深。

李迥秀得風字云。霧雲開晚日。仙藻麗秋風。

趙彥伯得花字云。簪挂丹萸蕊。杯滿紫菊花。

楊廉得亭字云。遠日瞰秦堦。重陽坐灞亭。

岑羲得淡字云。爰豫颺秦垌。昇高臨瀟涘。

廬藏用得開字云。萸依珮裏發。菊向酒邊開。

李咸得直字云。菊黃迎酒泛。松翠凌霜直。

閻朝隱得筵字云。簪紱趨皇極。笙歌接御筵。

沈佺期得長字云。臣歡重九慶。日月奉天長。

薛稷得曆字云。願陪九九辰。長奉千千曆。

蘇頲得時字云。年數登高日。延齡命賞時。

李乂得濃字云。捧篋萸香遍。稱觴菊氣濃。

馬懷素得酒字云。蘭將葉布席。菊用香浮酒。

陸景初得臣字云。登高識漢苑。問道侍軒臣。

韋元旦得月字云。雲物開千里。天行乘九月。

李適得高字云。禁苑秋光入。宸遊霽色高。

鄭南金得日字云。風起韻虞絃。雲開吐堯日。

于經野得樽字云。桂筵羅玉俎。菊醴溢芳樽。



盧懷慎得還字云。鶴似聞琴至。人疑宴鎬還。

是宴也。韋安石蘇瓌詩先成。于經野盧懷慎最後成。罰酒。

幸秦始皇陵賦詩云。眷言君失德。驪邑想秦餘。政煩方改篆。愚俗乃焚書。阿房久已滅。閣道遂成墟。欲厭東南氣。讎傷掩鮑車。

十月帝誕晨。內殿宴羣臣。聯句云。潤色鴻業寄賢才。(帝云)叨居右弼貴。鹽梅(李嶠)運籌帷幄。荷時來。(宗楚客)職掌圖籍濫蓬萊。(劉憲)兩司謬忝謝鍾裴。(崖湜)禮樂銓管効塵埃。(鄭愔)陳師振旅青九垓。(趙彥昭)忻承顧問侍天杯。(李適)銜恩獻壽栢梁臺。(蘇頌)黃縑青簡奉康哉。(盧藏用)鯁生侍從忝王枚。(李乂)右掖司言實不才。(馬懷素)宗伯秩禮天地開。(薛稷)帝歌難續仰昭回。(朱之問)微臣捧日變寒灰。遠慙班左愧遊陪。(婕妤上官)帝謂侍臣曰。今天下無事。朝野多歡。欲與卿等詞人。時賦詩宴樂。可識朕意。不須惜醉。大學士李嶠宗楚客等跪奏曰。臣等多幸。同遇昌期。謬以不才。策名文館。思勵鷲朽。庶裨河嶽。既陪天歡。不敢不醉。此後每遊別殿。幸離宮。駐驂芳苑。鳴笳仙禁。或戚里宸筵。王門鶯席。無不畢從。

長甯公主。韋庶人所生。下嫁楊慎交。制曰。駙馬都尉。楊慎交。分榮戚里。藉寵公門。恭肅著

於立身。恪勤効於從政。鳳凰樓上。宛符琴瑟之歡。烏鵲橋前。載協松蘿之契。宜分覃茅土。式廣山河。造第東都。府財幾竭。又取西京高士廉第。左金吾衛廢營。合爲宅。作三重樓。築山浚池。帝及后數臨幸。置酒賦詩。羣臣屬和。故李嶠長甯公主東莊侍宴詩其末云。承恩咸已醉。戀賞未還鑣。崔湜云。席臨天女貴。杯接近臣歡。李適云。願奉瑤池駕。千春侍德音。李又云。地出東郊迴日馭。城臨南斗度雲車。徐元伯云。鳳辰憐簫曲。鸞閣念掌珍。

公主之生也。帝誕日而公主滿月。李嶠詩云。神龍見象日。仙鳳養雛年。大寶來天正。明珠對月圓。祚延金篋裏。歌奏玉箱前。今日宜孫慶。還參祝聖篇。

登驪山高頂詩云。四郊秦漢國。八水帝王都。闢闔雒里閭。城闕壯規模。貫渭稱天邑。含歧實奧區。金門披王館。因此識黃圖。帝自題序末云。人題四韻。後罰三盃。日暮成者五六人。餘皆罰酒。

劉憲詩云。驪阜鎮皇都。鑾遊眺八區。原隰旌門裏。風雲辰坐隅。直城如斗柄。官樹似星榆。從臣詞賦末。濫得上天衢。

蘇頲云。仙蹕御層氛。高高積翠分。巖聲中谷應。天語半空聞。豐樹連黃道。秦關入紫雲。聖圖恢寓縣。歌賦小橫汾。

武平一云。變輿上碧天。翠帟拖晴煙。絕嶠紆仙逕。層巖敞御筵。雲披丹鳳闕。日下黑龍川。更覩南薰奏。流聲入管絃。

景龍四年正月五日。移仗蓬萊宮。御大明殿。會吐蕃騎馬之戲。因重爲栢梁體連句。

帝曰。大明御寓臨萬方。皇后曰。顧慙內政翊陶唐。長甯公主曰。鸞鳴鳳舞向平陽。安樂公主曰。秦樓魯館沐恩光。太平公主曰。無心爲子輒求郎。溫王重茂曰。雄才七步謝陳王。昭容上官曰。當熊讓箠愧前芳。吏部侍郎崔湜曰。再司銓管恩可忘。著作郎鄭愔曰。文江學海恩濟航。考功員外郎武平一曰。萬邦考績臣所詳。著作郎闞朝隱曰。著作不休出中腸。時上疑御史大夫竇從一將作大匠。宗晉卿素不屬文。未卽令續。二人固請。許之。從一曰。權豪屏跡肅嚴霜。晉卿曰。鑄鼎開嶽造明堂。此外遺忘。時吐蕃舍人明佺獵。請令授筆與之。曰。玉醴由來獻壽觴。上大悅。賜與衣服。



唐詩紀事卷第二

明皇

德宗

文宗

宣宗

昭宗

軒遊宮十五夜云。行邁離秦國。巡方赴洛師。路逢三五夜。春色暗中期。關外長河轉。宮中淑氣遲。歌鐘對明月。不減舊遊時。

初入秦川路逢寒食詩云。洛川芳樹映天津。灞岸垂楊宰地新。宜爲經過行處樂。不知虛度兩京春。去年有閨今春早。曙色和風着花草。可憐寒食與清明。光輝併在長安道。自從關路入秦川。爭到何人不戲鞭。公子途中方蹴鞠。佳人馬上戲鞦韆。渭水長橋今欲渡。忽忽漸見新豐樹。遠看驪岫入雲霄。預想陽池起煙霧。煙霧氛氳水殿開。整拂香輪歸去來。今歲清明行已晚。明年寒食更相陪。

早渡蒲關云。鐘鼓嚴更曙。山河野望通。鳴鸞下蒲坂。飛旆入秦中。地險關逾壯。天平鎮尙雄。春深津樹合。月落戍樓空。馬色分朝景。鷄聲逐曉風。所希常道泰。非復俟繻同。

帝幸蜀。西至劍門題詩曰。劍閣橫雲峻。鑾輿出狩回。翠屏千仞合。丹嶂五丁開。灌木猿旗

轉仙雲拂馬來。乘時方在德。嗟爾勒銘材。至德二年。普安郡守賈深勒石。

開元間。河南參軍鄭銑。朱陽丞郭仙舟。投匭獻詩。敕曰。觀其文理。乃崇道法。至於今時。不切事情。宜各從所好。並罷官度爲道士。

裴寬除太原尹。帝賦詩餞之曰。德比俗雲布。心如晉水清。

早登太行山中言志云。清蹕渡河陽。凝笳上太行。火龍明鳥道。鐵騎遶羊腸。白露霜陰整。丹霞助曉光。澗泉含宿凍。山草帶餘霜。野老茅爲室。樵人薜作裳。宣風問耆艾。敦俗勸耕桑。涼德慚先哲。微猷慕昔皇。不因今展義。何必冒垂裳。

帝巡省。塗次上黨舊宮。賦詩序曰。朕昔在初九。佐貳此州。未遇扶搖之力。空俟海沂之詠。泊大橫入兆。出處斯易。一揮寶劍。遽履瑤圖。承曆數而順謳謠。着天衣而御區夏。嗟乎。向時沈默。駕四馬而朝京師。今日逍遙。乘六龍而問風俗。爰因巡省。途次舊居。山川宛然。人事無聞。忽其昇華。周遊館宇。觸目依然。雖迹異漢皇。而地如豐邑。擊筑慷慨。酌杯留連。空想大風。題茲短什。詩云。

三千初擊浪。九萬欲搏空。天地猶驚否。陰陽始遇蒙。存貞斯歷試。佐貳佇昭融。多謝時康理。良慚寶劍功。長懷問鼎氣。夙負拔山雄。不學劉崑舞。先歌漢祖風。英髦旣包括。豪傑自牢籠。

人事一朝異。謳謠四海同。如何昔朱邸。今此作離宮。雁沼澄瀾翠。猿峒落照紅。小山秋桂馥。長坂舊蘭橐。卽是淹留處。乘歡樂未窮。

答張說出雀鼠谷云。雷出騰乾象。風行順國人。川途猶在管。車馬漸歸秦。背陝關山險。橫汾鼓吹頻。草依陽谷變。花待北畝春。聞有鷓鴣客。清詞雅調新。求音思欲報。心迹竟難陳。

送張說巡邊云。端拱復垂裳。長懷御遠方。股肱申教義。戈劍靜要荒。命將綏邊服。雄圖出廟堂。三台入武帳。八座起文昌。寶胄匡韓主。華宗輔漢王。茂先慚博物。平子謝文章。盡節恢時佐。輸誠禦寇場。三軍臨朔野。駟馬卽戎行。鼓吹威夷狄。旌軒溢洛陽。雲臺先著美。今日更貽芳。

送張說集賢上學士云。廣學開書殿。崇儒引席珍。集賢招袞職。論道命台臣。禮樂洽今古。文章革舊新。獻酬鐔列。賓主位班陳。節變雲初夏。時移氣尙春。所希光史策。千載仰茲晨。

左丞相說。右丞相瓌。太子少傅乾曜。同上官命讌東堂。賜詩云。赤帝收三傑。黃軒舉二臣。由來丞相重。分掌國之鈞。我有握中璧。雙飛席上珍。子房推要道。仲子訝風神。復轍台衡老。將爲調護人。鷓鴣同拜日。車騎擁行塵。樂聚南宮宴。觴連北斗醇。俾子成百揆。垂拱問彝倫。

同二相已下羣臣宴樂遊園。賜詩云。撰日高廊暖。需雲宴樂初。萬方朝玉帛。千品會簪裾。地入南山遠。城分北斗餘。林塘垂柳密。原隰野花疎。密幕看逾暗。歌鐘聽自虛。興蘭歸騎轉。還

奏弼違書二相謂張宋也。

千秋節賜羣臣鏡詩云。臺上冰花澈。窻中月影臨。更銜長壽帶。留意感人深。是日賜宴詩云。月銜花綬鏡。露綴綵絲囊。張說應制云。珠囊含瑞露。金鏡抱僊輪。開元十六年。帝自擇廷臣爲諸州刺史。許景先治虢州。源光裕鄭州。冠泚宋州。鄭溫琦邠州。袁仁恭杭州。崔志廉襄州。李昇期邢州。鄭放定州。蔣挺湖州。裴觀滄州。崔誠遂州。凡十一人。行詔宰相諸王御史以上。祖道洛濱。盛具秦太常樂。帛舫水嬉。命高力士賜詩。令題座右。帝親書。且給筆紙。令自賦。賚絹三千。遣之。帝詩云。

眷言思共理。鑑寢想惟良。猗歟此推擇。聲績著周行。賢能旣俟進。黎獻實佇康。視人當如子。愛人亦如傷。講學試誦論。阡陌勸耕桑。虛譽不可飾。清知不可忘。求名迹易見。安直德自彰。獄訟必以情。教民貴有常。恤惻且存老。撫弱復綏強。勉哉各祇命。知子眷萬方。

帝爲趙法師別造精院。過院賦詩并序云。秋九月。聽政觀風。存乎遊息。退朝之後。歷西上陽。入清虛院。則法師所居之地也。法師得玄元之法。養浩然之氣。故法此僊家。特建眞宇。紫房對簞。綠竹羅生。旣親重其人。每經過其地。以怡神洗雪。進德脩業。何必齋心累月。遠在順風。因而賦詩。用適眞意云爾。詩云。



宗師心物外。爲道運虛舟。不戀巖泉賞。來從宮禁遊。探玄知幾歲。習靜更宜秋。煙樹辨朝色。風湍聞夜流。坐朝繁聽覽。尋勝在清幽。欲廣無爲化。因茲庶可求。

又送趙法師還蜀。因名山奠簡詩云。道家奠靈簡。自昔仰神仙。眞子今將命。蒼生福可傳。江山尋故國。城郭信依然。二室遙相望。雲迴洞裏天。（法師觀宇在今蜀州新津縣也。）

天寶十六年。又送忠州太守康昭遠等詩云。端拱臨中樞。緬懷其子理。不惟臺閣英。孰振循良美。分符候甸內。拜首明庭裏。誓節期飲水。調久方導水。嘉聲馳九牧。惠化光千祀。時雨侔昔賢。芳猷貫前史。佇爾頌中和。吾將令卿士。

### 德宗

元日退朝觀軍仗歸營云。獻歲視元朔。萬方咸在庭。端旒揖羣后。迴輦閱師貞。綵仗宿華殿。退朝歸禁營。分行左右出。轉旆風雲生。歷歷趨複道。容容映層城。勇餘矜捷技。令肅無喧聲。眷此戎旅節。載嘉良工誠。順時傾宴賞。亦以助文經。

中和節日宴百寮賜詩云。韶華啓仲序。初吉諧良辰。肇茲中和節。式慶天地春。歡酣朝野同。生德區宇均。雲開灑營露。草疏芳河津。歲華方載陽。東作方肆勤。慚非薰風唱。曷用慰吾人。中和節賜百官讌集。因示所懷云。至化常在宥。保和茲息人。推誠撫諸夏。與物長爲春。仲

月風景暖。禁城花柳新。芳時協金奏。錫燕周羣臣。絲竹豈云樂。忠賢唯所親。庶洽朝野意。曠然天下均。

帝移晦日爲中和節。故呂渭詩云。皇心不向晦。改節號中和。淑氣同風景。佳名自詠歌。滿裙移舊俗。賜尺下新科。曆象千年正。醜醜四海多。正元八年試宏詞。詩以中和節應詔。

重陽日卽事云。令節曉澄霽。四郊煙靄空。天青白露潔。菊散黃金叢。寡德荷天貺。順時休百工。豈懷歌鐘樂。思爲君臣同。至化在亭育。相成資始終。未知康衢詠。所仰惟年豐。

豐年多慶。九日示懷云。爽氣肅時令。早衣聞朔鴻。重陽有佳節。具物欣年豐。皎潔暮潭色。芬敷新菊叢。芳罇漏衢室。繁吹凝煙空。惠合信吾道。保和惟爾同。推誠至玄化。天下期爲公。

九日絕句云。禁苑秋來爽氣多。昆明風動起滄波。中流簫鼓誠堪賞。詎假橫汾發棹歌。重陽中外同歡。餘字韻。羣臣亦以其韻奉和。故權德輿云。宸衷在化成。藻思煥瓊瑤。微臣侍竊抃。豈足歌唐虞。

又重陽卽事。豐年多慶二詩。以同字韻。亦依以奉和。故德輿前章云。天道光下濟。容詞敷大中。後章云。澤均行葦厚。年慶華黍豐。武元衡前章云。重陽德澤振。萬國歡娛同。後章云。庶歌禹功盛。擊壤堯年豐。九奏碧霄裏。千官皇澤中。

重陽日中外同歡。以詩言志。因示羣官云。爽節在重九。物華新雨餘。清秋黃葉下。菊散金潭初。萬寶行就稔。百工欣所如。歡心暢遐邇。殊俗同車書。至化自敦睦。佳辰宜宴胥。鏘鏘聞絲竹。濟濟羅舞裾。此樂匪足耽。此誠期未孚。

七月十五日題章敬寺云。招提邇皇邑。複道連重城。法筵會早秋。駕言訪禪局。嘗聞大仙教。清淨宗無生。七物匪吾寶。萬行先求成。名和既雙寂。繁華奚所榮。金風扇微涼。遠煙凝翠品。松院靜苔色。竹房深磬聲。境幽真慮恬。道勝外物輕。適意本非說。含毫空復情。（正元七年）

正元五年。初置中和節。帝製詩寫本。賜戴叔倫於容州。詩云。東風變梅柳。萬葉生春光。中和紀月令。方與天地長。耽樂豈予尙。懿茲時景良。庶遂亭育恩。同致寰海康。君臣未終始。交泰符陰陽。曲沼水新碧。華林桃稍芳。勝賞信多歡。戒之在無荒。

送徐州張建封還鎮云。牧守寄所重。才賢生爲時。宣風自淮甸。授鉞膺藩維。入覲展遐戀。臨軒慰來思。忠誠在方寸。感激陳情詞。報國爾所尙。恤人予是資。歡宴不盡懷。車馬當還期。穀雨將應候。行春猶未遲。勿以千里遙。而云無已知。（正元後藩帥入朝。獨建封獲賜詩。）

帝善爲文。尤長於篇什。每與學士言詩於浴堂殿。夜分不寐。正元中。昭義節度李抱真薦貝州宋庭芬之女若昭。召入禁中試文。帝咨美。帝每與侍臣庶和。若昭姊若莘等五人皆預呼。

學士。

正元四年九月。賜宴曲江亭。帝爲詩序曰。朕在位僅將十載。實賴忠賢左右。克致小康。是以擇三令節。錫茲宴賞。俾大夫卿士。得同歡洽也。夫其戚者同其休。有其初者貴其終。咨爾羣寮。順朕不暇。樂而能節。職思其憂。咸若時則。庶乎理矣。因重陽之會。聊示所懷。詩云。

早衣對庭燎。躬化勤意誠。時此萬機暇。適與佳節并。曲池潔寒流。芳菊舒金英。乾坤爽氣澄。臺殿秋光清。朝野慶年豐。高會多歡聲。求懷無荒誠。良事同期情。因詔曰。卿等重陽會宴。朕想歡洽。欣慰良多。情發于中。因製詩序。令賜卿等一本。可中書門下簡定文詞。士三五十人應制。同用清字。明日內於延英門進來。宰臣李泌等雖奉詔簡擇。難於取捨。由是百寮皆和。上自考其詩。以劉太真及李紆等四人爲上等。鮑防于郡等四人爲次等。張蒙殷亮等二十三人爲下等。而李晟馬燧李泌三宰相之詩不加考第。

帝章敬寺詩。松院淨苔色。竹房深磬聲。時人傳誦。帝晚年工詩句。臣下莫及。每御製奉和。退而笑曰。排工俗有投石之戲。兩頭置標號曰排公。以中不中爲勝負也。杜太保在淮南進崔叔靖詩一百篇。帝曰。此惡詩。何用進。時云奉勅惡詩。

韋綬以內相感心疾。罷還第。帝九日作黃菊歌。顧左右曰。安可不示韋綬。遣使持往。綬遽

奉和。附使進。帝曰爲文不已。豈頤養耶。敕曰自今勿復爾。

文宗

上元日詩云。上元高會集羣仙。心齋何事欲祈年。丹誠儻徹玉帝座。且共吾人慶大田。

又云。莫生三五葉初齊。上元羽客出桃蹊。不愛仙家登真訣。願蒙四海福黔黎。

裴度拜中書令。以疾未任朝謝。上已曲江賜宴羣臣。賦詩。帝遣中使賜度詩曰。注想待元老。識君恨不早。我家柱石衰。髮來學丘禱。仍賜御札曰。朕詩集中欲得見卿唱和詩。故令示此。卿疾未差。可異日進來。御札及門而度薨。

常謂左右曰。若不甲夜視事。乙夜觀書。則何以爲人君耶。每試進士。多自出題目。及所司進所試。披覽吟詠。終日忘倦。常延學士於內庭。討論經義。較量古今。令宮女以下侍茶湯飲饌。李訓講周易。時方盛夏。遂命取水玉腰帶辟著犀如意以賜訓曰。如意足以與卿爲談柄也。讀高郢無聲樂賦。白居易求玄珠賦。謂之玄祖。

帝聽政暇。博覽羣書。一日延英顧問宰臣。詩云。啣啣鹿鳴。食野之苹。苹是何草。時宰相楊珪。楊嗣復。陳夷行相顧未對。珪曰。臣按爾雅。苹是籟蕭。上曰。朕看毛詩。疏葉圓而花白。蘂生野中。似非籟蕭。

又一日問宰臣古詩云輕衫襯跳脫。跳脫是何物。宰臣未對。上曰卽今之腕釧也。真誥言安妃有斲粟金跳脫是臂飾。

帝好五言。自制品格。多同肅代。而古調清峻。嘗欲置詩博士。貞穆李公曰。陛下遠慕堯舜。而置詩博士。況詩人多輕昧於識理。今翰林學士皆能文詞。而古今篇什。足可怡悅聖情。帝乃止。(李公珣也)

甘露事後。帝不樂。往往瞠目獨語云。須殺此輩。今我君臣間絕。後賦詩曰。輦路生春草。上林花滿枝。憑高無限意。無復侍臣知。翌日觀牡丹。誦賦吟罷。始憶舒元輿之詞。歎息泣下。因命作樂。柳自適。宮人沈翹翹者。歌河滿子。有浮雲蔽白日之句。其聲宛轉。上因歛歔問曰。汝知之耶。此文選古詩第一首。蓋忠臣爲姦邪所蔽也。乃賜金臂環。問其從來。則吳元濟女也。自陷掖廷。易姓沈氏。配樂籍。又奏曰。妾本藝方。響迺白玉也。搥則響。犀爲之。願賜臣妾。帝命賜之。既至。命奏涼州之曲。音韻清越。聽者無不凄然。嘗詔問元霓裳羽衣舞。參以雲韶肄于廷。太常少卿馮定。部諸工立。簾間。端凝若植。問李珣。珣以定對。帝喜曰。豈非能古章句者邪。親誦定送客西江詩。召升殿。賜禁中瑞錦。詔悉所著。以上嘗與宰相論詩之工拙。鄭覃曰。詩之工者無若三百篇。皆國人作之。以刺美時政。王者采之。以觀風俗耳。不聞王者爲詩也。後代辭人之詩。華而不

實無補於事。陳後主隋煬帝皆工於詩，不免亡國。陛下何取焉？覃篤於經術，上甚重之。常吟杜甫曲江篇云：江頭宮殿鎖千門，細柳新蒲爲誰綠。乃知天寶以前，樓臺之盛，鄭注乃命神策軍淘曲江昆明二池，許公卿立亭館，兩軍造紫雲樓彩霞亭，內出樓額賜之。

### 宣宗

宣宗十二年，前進士陳玩等三人應博學宏辭，選所司考定名第及詩賦論進訖，上於延英殿詔中書舍人李藩等對。上曰：凡考試之中，重用字如何？中書對曰：賦卽偏枯駁雜，論卽褒貶是非，詩卽緣題落韻（只如白雲起封中詩云：封中白雲起是也）其間重用文字，乃是庶幾，亦非常有例也。又曰：孰詩重用字？對曰：錢起湘露鼓瑟詩有二不字，上曰：善撫雲和瑟，常聞帝子靈馮夷，空自舞。楚客不堪聽，逸韻諧金石，清音發杳冥，蒼梧來怨慕，白芷動芳馨，流水傳湘浦，悲風過洞庭，曲終人不見，江上數峯青。

上覽錢公此年宏詞詩曰：且一種用文字，此詩似不及起，起則今之協律文字也，合於匏革宮商，卽變鄭衛之奏。雖謝朓云：洞庭張樂夜，瀟湘帝子遊，雲去蒼梧野，水還江漢流，未若此鼓瑟一篇，摛藻妍華，無以加其前。進士宏詞詩重字者登科，更待明年考校起詩，便付吏選。

帝好進士及第，每對朝臣問及第，苟有科名，對者必大喜，便問所試詩賦題目，并主司姓。

名。或佳人物。偶不中第。必歎惜移時。嘗於內自題鄉貢進士李道龍。白居易之死。帝以詩弔之。曰。綴玉聯珠六十年。誰教冥路作詩仙。浮雲不繫名居易。造化無爲字樂天。童子解吟長恨曲。胡兒能唱琵琶篇。文章已滿行人耳。一度思卿一愴然。帝製秦邊陲曲。其詞云。海岳咸通。及帝垂拱。而年號咸通焉。庶子裴惲進詩賀聖政。有太康字。帝怒曰。太康失邦。乃以比我。戶部韋燧奏云。晉平吳寇。改號太康。雖有失邦之言。乃見歸美之文。上曰。天子大須博覽。不然幾錯罪惲。舊制。盛春內殿賜宴三日。帝妙音律。每先裁製新曲。俾禁中女伶迭和教授。至是出宮女數百。分行連袂。而歌其曲。有曰。播皇猷者。率高冠方履。褒衣博帶。趨走俯仰。皆合規矩。于于然有唐堯之風焉。有曰。忿女踏歌隊者。率言忿嶺之士。樂河湟故地。歸國復爲唐民也。若霓裳曲者。皆執節幡。被羽服。態度凝澹。飄飄然有翔雲舞鶴見左右。如是數十曲。流傳民間。（出令狐澄正陵遺事）

## 昭宗

陝府唐昭宗有詩云。安得有英雄。迎歸大內中。或曰道遙樓有太宗詩云。昔乘馬匹去。今驅萬乘來。志意不侔矣。乾寧三年。李茂貞犯闕。帝次華山。韓建迎歸郡中。帝鬱鬱不樂。每登城西齊雲樓遠望。明年秋。制菩薩蠻二首云。登樓遙憶秦宮殿。茫茫只見雙飛燕。渭水一條流。千



山與萬丘。遠煙籠碧樹。陌上行人去。何處是英雄。迎奴歸故宮。又一曰。飄飄且在三峯下。秋風往往多霑灑。腸斷憶仙宮。朦朧煙霧中。思夢時時睡。不語長如醉。早晚是歸期。蒼穹知不知。

帝戊午年還京。庚申歲。劉季述爲變。册德王。帝明年正月一日返正。改元天復。十一月朱全忠領兵入河中。四日冬節。帝又爲鳳翔兵士擁幸岐城。帝在城中。忽一旦大雷雨。牛馬震死。街西古槐殿東。鴟吻立碎。帝爲詩曰。只解劈牛兼劈樹。不能誅惡復誅兇。朱全忠迎駕圍逼首。涉三載。癸亥正月。駕幸全忠軍。乃還京。甲子歲。全忠遣冠彥卿逼幸洛。四月改元天祐。帝在洛。嘗曰。訖于山頭凍死雀。何不飛去生處樂。



唐詩紀事卷第三

武后

徐賢妃

上官昭容

越王貞

韓王元嘉

孔紹安

鄭世翼

董思恭

何仲誼

沈叔安

陸敬

袁朗

牛鳳及

朱子奢

庚抱

張文恭

陳叔達

薛收

武后

天授二年臘。卿相欲詐稱花發。請幸上苑。有所謀也。許之。尋疑有異圖。乃遣使宣詔曰。明朝遊上苑。火急報春知。花須連夜發。莫待曉風吹。於是凌晨名花布苑。羣臣咸服其異。后託術以移唐祚。此皆妖妄不足信也。大凡后之詩文。皆元萬頃崔融輩爲之。

同太平公主遊九龍潭。則天御製云。山窗遊玉女。澗戶對瓊峯。巖頂翔雙鳳。潭心倒九龍。酒中浮竹葉。杯上寫芙蓉。故驗山家賞。唯有入松風。

萬歲通天元年。鑄九鼎成。置于東都明堂之庭。后自製曳鼎歌。令曳者唱和焉。開元二年。

太子賓客薛謙光獻東都九鼎銘。其蔡州鼎銘。武后所制文曰。犧農首出。軒昊膺期。唐虞繼踵。湯禹乘時。天下光宅。域內雍熙。上玄降監。方建隆基。紫微令姚元崇奏曰。聖人啓運。休兆必彰。請宣付史館。（明皇御名已兆於此）

徐賢妃

秋風兩谷應詔云。秋風起兩谷。勁氣動河山。假松千嶺上。雖雨二陵間。低雲愁廣隰。落日慘潼關。此時飄紫氣。應驗真人還。

長安崇聖寺有賢妃粧殿。太宗曾召妃。久不至。怒之。因進詩曰。朝來臨鏡臺。粧罷暫徘徊。千金始一笑。一召詎能來。

正觀二十三年上疏諫太宗息兵罷役。其略曰。大業者易驕。願陛下難之。善始者難終。願陛下易之。又曰。漆器非延叛之方。築造之而人叛。玉杯豈招亡之術。紂用之而國亡。侈麗之源。不可不遏。作法於儉。猶恐其奢。作法於奢。何以制後。

賢妃名惠。湖州人。生五月能言。四歲通論語。八歲曉屬文。父孝德。嘗試使擬離騷爲小山篇。曰。仰幽巖而流盼。撫桂枝以凝想。將千齡兮此遇。荃何爲兮獨往。孝德大驚。知不可掩。於是所論著遂傳。太宗知之。召爲才人。遷充容丞。徽元年卒。贈賢妃。弟齊聃子堅。皆以學名。

上官昭容

綵書怨云。葉下洞庭初。思君萬里餘。露濃香被冷。月落錦屏虛。欲奏江南曲。貪封薊北書。書中無別意。唯恨久離居。

九月九日。上幸慈恩寺。登浮圖。羣臣上菊花壽酒。賦詩。婕妤獻詩云。帝里重陽節。香園萬乘來。却邪萸入佩。獻壽菊傳杯。塔類承天湧。門疑待佛開。容詞懸日月。長得御昭回。

十月駕幸三會寺。婕妤獻詩云。釋子談經處。軒臣刻字留。故臺宜老識。殘簡聖皇求。駐驂懷千古。開襟望九州。四山緣塞合。二水夾城流。宸翰陪瞻仰。天杯接獻酬。太平詞藻盛。長願託鴻休。

中宗立春日遊苑迎春。昭容應制云。密葉因裁吐。新花逐剪舒。攀條雖不謬。摘藥詎知虛。春至由來發。秋還未肯疎。借問桃將李。相亂欲何如。

長寧公主流杯池六首

玉環騰遠劍。金埒荷殊榮。弗玩珠璣飾。仍留仁智情。鑿山便作室。憑樹卽爲楹。公輸與班爾。從此遂韜聲。(其一)

登山一長望。正遇九春初。結駟填街術。闔閭滿邑居。闔雪梅先吐。驚風柳未舒。直愁斜日

落不畏酒樽虛。(其二)

霽曉氣清和。披襟賞薜蘿。玳瑁凝春色。琉璃漾水波。跂石聊長嘯。攀松乍短歌。除非物外者。誰就此經過。(其三)

暫爾遊山第。淹留惜未歸。霞廳明月滿。澗戶白雲飛。書引藤爲架。人將薜作衣。此真攀斲所。臨院賞光暉。(其四)

放曠出煙雲。蕭條自不羣。漱流清意府。隱几避羶氛。石畫裝苔色。風梭織木文。山室何爲貴。唯餘蘭桂薰。(其五)

策杖臨霞岫。危步下霜蹊。志逐深山靜。途隨曲澗迷。漸覺心神逸。俄看雲霧低。莫怪人題樹。祇爲賞幽棲。(其六)

(七言三首) 沁水田園先自多。齊城樓觀更無過。倩語張鴛莫辛苦。人今從此識天河。(其一)

參差碧岫簷蓮花。潺湲綠水滄金沙。何須遠訪三山路。人今已到九仙家。(其二)

憑高瞰迴足怡心。菌閣桃源不暇尋。餘雪依林成玉樹。殘雲點岫卽瑤岑。(其三)

(五言九首) 攀藤招逸客。偃桂叶幽情。水中看樹影。風裏聽松聲。(其一)

攜琴待叔夜。負局訪安期。不應題石壁。爲記賞山時。（其二）  
泉石多仙趣。巖壑寫奇形。欲知堪悅耳。唯聽水泠泠。（其三）  
巖壑恣登臨。整目復怡心。風篁類長笛。統水當鳴琴。（其四）  
懶步天台路。惟登地肺山。幽巖仙桂滿。今日恣情攀。（其五）  
暫遊仁智所。蕭然松桂情。寄言棲遁客。勿復訪蓬瀛。（其六）  
瀑溜晴疑雨。叢篁晝似昏。山中真可翫。暫請報王孫。（其七）  
傍池聊試筆。倚石旋題詩。預彈山水調。終擬從鍾期。（其八）  
橫鋪豹皮褥。側戴鹿胎巾。借問何爲者。山中有逸人。（其九）  
（四言五首）檀欒竹影。颺颺松聲。不煩歌吹。自足娛情。（其一）  
仰循茅宇。俯眇喬枝。煙霜問訊。風月相知。（其二）  
枝條鬱鬱。文質彬彬。山林作伴。松桂爲隣。（其三）  
清波洶湧。碧樹冥蒙。莫怪留步。因攀桂叢。（其四）  
莫論圓嶠。休說方壺。何如魯館。卽是仙都。（其五）  
（三言二首）逐仙賞。展幽情。喻峴闌。邁蓬瀛。（一）

遊魯館陟秦臺。汗山壁。愧瓊瑤。(其二)

張說作昭容文集序云。古者有女史記功書過。有女尙書。決事宮閣。昭容兩朝專美。一日萬機。顧問不遺。應接如響。雖漢稱班媛。晉譽左嬪。文章之道不殊。輔佐之功則異。迹祕九天之上。身沒重泉之下。嘉猷令範。代罕得聞。庶幾後學。嗚呼何仰。然則大君據四海之圖。懸百靈之命。喜則九圍挾纜。怒則千里流血。靜則黔黎乂安。動則蒼甍能弊。入耳之語。諒其難乎。貴而勞大者疑賤。而禮絕者隔。近而言輕者忽。遠而意忠者忤。惟窈窕柔曼。誘掖善心。忘味九德之衢。傾情六藝之圃。故登峴巡海之意。寢剪胡刈越之威息。瑤臺珍服之態。消從禽嗜樂之端。廢獨使溫柔之教。漸於生人。風雅之聲。流於來葉。非夫元黃毓粹。正明助思。衆妙扶識。羣靈挾志。誕異人之寶。授興王之瑞。其孰能臻斯。懿乎鎮國太平公主。道高帝妹。才重天人。昔嘗共遊東辟。同宴北渚。條來忽往。物在人亡。憫雕瑄之殘言。悲素扇之空曲。上聞天子。求椒房之故事。有命史臣。叙蘭亭之新集。

中宗正月晦日。幸昆明池賦詩。羣臣應制百餘篇。帳殿前結綵樓。命昭容選一首爲新翻。御製曲。從臣悉集其下。須臾紙落如飛。各認其名而懷之。旣進。唯沈宋二詩不下。又移時。一紙飛墜。競取而觀。乃沈詩也。及聞其評曰。二詩工力悉敵。沈詩落句云。微臣彫朽質。羞覩豫章材。



蓋詞氣已竭。宋詩云不愁明月盡。自有夜珠來。猶陟健舉。沈乃伏不敢復爭。宋之問詩曰。春豫靈池近。滄波帳殿開。舟凌石鯨動。杳拂斗牛迴。節晦臺全落。春遲柳暗催。象溟看浴景。燒劫辨沉灰。鎬飲周文樂。汾歌漢武才。不愁明月盡。自有夜珠來。昭容名婉兒。西臺侍郎儀之孫。父廷芝。與儀死。武后時。母鄭方妊。夢巨人昇大秤曰。持此稱量天下。昭容生。踰月。每戲曰。稱量者豈爾耶。輒啞然應。後內乘機政。符其夢云。自通天以來。內掌詔命。中宗立。進拜昭容。帝引名儒賜宴賦詩。婉兒常代帝及后。長甯安樂二公主。衆篇並作。而采麗益新。又差第羣臣所賦。賜金爵。故朝廷靡然成風。當時屬辭。大抵浮靡。然皆有可觀。昭容力也。韋后之敗。斬闕下。

中宗幸溫湯。獻三絕句云。三冬季月景龍年。萬乘觀風出滿川。遙看電躍龍爲馬。迴颺霜原玉作田。

鸞旗掣曳拂雲迴。羽騎驂驄躡景來。隱隱灑山雲外發。迢迢御帳日邊開。  
翠幕朱帷敞月營。金鞵玉屐泛蘭英。歲歲年年常扈蹕。長長久久樂承平。

正元十四年。崔仁亮於東都買得研神記一卷。有昭容列名書縫處。呂溫感歎。因賦上官昭容書樓歌云。漢家婕妤唐昭容。上詩能賦千載同。自言才藝是天眞。不服丈夫勝婦人。歌闌舞罷閑無事。縱恣優游弄文字。玉樓寶架中天居。絨奇祕異萬卷餘。水精編帙綠鈿軸。雲母擣

紙黃金書。風飄花露清旭時。綺窗高挂紅綃帷。香囊盛煙繡結絡。翠羽拂案青琉璃。吟披嘯卷紛無已。皎皎淵機破研理。詞縈綵翰紫鸞迴。思耿寥天碧雲起。碧雲起。心悠哉。境深轉苦坐自催。金梯珠履聲一斷。瑤塔日夜生青苔。青苔祕仙關。曾比羣玉山。神仙杳何許。遺逸滿人間。君不見洛陽南市賣書肆。有人買得研神記。紙上香多蠹不成。昭容題處猶分明。令人惆悵難爲情。

高宗後苑雙頭牡丹昭容詩云。勢如連壁友。心似臭蘭人。

越王貞

和過溫湯詩。鳳輦騰宸駕。驪薰次乾遊。坎德疎溫液。山隈派暖流。寒氛空外擁。蒸氣沼中浮。林凋帷影散。雲斂蓋陰收。霜郊暢玄覽。參差落景遒。

貞善騎射。涉文史。有吏幹爲宗室材。王中宗廢居房陵。貞爲豫州刺史。垂拱四年八月起兵圖反正事。兵敗及禍。

韓王元嘉

奉和同太子監守遼戀詩云。乾象開層屋。離明啓少陽。卜征從獻吉。守器屬元良。逝矣凌周誦。遙哉掩漢莊。好士傾南洛。多才盛北場。地分丹竈嶺。途間白雲鄉。儲誠爰曉夕。宸愛積炎

涼。珠璧連霄漢。萬物仰重光。（高宗爲太子也）

元嘉高祖子。垂拱中刺絳州。與越王子冲圖舉兵。冲敗。元嘉至京師。謀泄。后逼令自殺。孟利正嘗稱其文曰。劉隣之周思茂。不過也。

### 孔紹安

石榴詩。可惜庭中樹。移根逐漢臣。只爲時來晚。開花不及春。

詠天桃云。結葉還隨影。飛香欲徧空。不意餘花落。灑沉露井中。

紹安大業末爲監察御史。高祖爲隋討賊河東。紹安監其軍。深見接遇。高祖受禪。紹安自洛陽間行來奔。高祖大悅。拜內史舍人。時夏侯端亦嘗爲御史。先來歸。紹安授祕書監。因侍宴。詠石榴。有祇爲時來晚。開花不及春之句。武德中。令狐德棻欲補正歷代史記。各差官主修一代。紹安以中書舍人與崔善爲。蕭德言。主梁。多歷年不能就。皆罷之。紹安在隋時與孫萬壽以文辭稱。時謂孫孔。

紹安贈蔡君詩云。疇昔同幽谷。伊爾遷喬木。赫奕盛青紫。討論窮簡牘。

賦結客少年場云。結客佩吳鉤。橫行度隴頭。雁在弓前落。雲從陣後浮。吳師驚燧象。燕將警奔牛。轉蓬飛不息。冰河結未流。若使三邊定。當封萬戶侯。

鄭世翼

過嚴君平古井詩云。嚴平本高尚。遠躡古人風。賣卜成都市。流名大漢中。舊井改人世。寒泉久不通。年多既罷汲。無禽乃遂空。如何屬秋氣。唯有雙井桐。

看新婚詩云。初筵夢桃李。新粧應標梅。疑逐朝雲去。讎隨暮雨來。雜珮含風響。叢花隔扇開。姮娥對此夕。何用久徘徊。

登北邙還至京洛詩云。步登北邙阪。踟躕寫望。宛洛盛皇居。規模窮大壯。三河分設儉。兩嶠資巨防。飛觀紫煙中。層臺碧雲上。青槐夾馳道。迢迢脩且曠。左右多第宅。參差居將相。清晨謁帝返。車馬相追訪。胥徒各異流。文物紛殊狀。囂塵暗天起。簫管從風颺。伊余忠且直。生平獨淪喪。山幽有桂叢。何爲坐惆悵。

世翼滎陽人。武德時爲揚州錄事參軍。數以言忤物。有崔信明者。嘗矜其文。謂過李百藥。世翼遇之江中。謂曰。聞公有楓落吳江冷。願見其餘。信明欣然多出衆篇。世翼覽未終曰。所見不逮所聞。投諸水。引舟去。正觀時坐怨謗流死。嵩州。

世翼巫山高云。巫山凌太清。崑嶠類削成。霏霏暮雨合。竊竊朝雲生。危峯入鳥道。深谷寫猿聲。別有幽棲客。淹留攀桂情。

董思恭

星詩云。歷歷東井舍。昭昭右掖垣。雲際龍文出。池中鳥色翻。流暉下月路。墮影入河源。方知穎川集。別有太丘門。

雪詩云。天山飛雪度。言是落花朝。惜哉不我與。蕭索徧風飄。鮮潔凌紈素。紛糝下枝條。良書竟何在。坐見容華銷。

虹詩云。春暮萍生早。日落雨飛餘。橫彩分長漢。倒色媚清渠。梁前朝影出。橋上晚光舒。願逐旌旗轉。飄飄侍直廬。

霧詩云。蒼山寂已暮。翠觀黯將沉。終南晨豹隱。巫峽夜猿吟。天寒氣不歇。景晦色方深。侍訪公超市。將予赴華陰。

詠日云。滄海十枝暉。玄圃重輪慶。葦華發晨檻。凌彩翻朝鏡。忽遇驚風飄。自有浮雲映。更也人皆仰。無待揮戈正。

昭君怨云。琵琶馬上彈。行路曲中難。漢月正南遠。燕山直北寒。髻環風拂破。眉黛雪沾殘。斟酌紅顏改。徒勞握鏡看。

詠月云。北堂未安寢。西園聊騁望。玉戶照羅幃。珠軒明綺幃。別客長安道。思婦高樓上。所

願君莫遺。清風時可訪。

野郊愴新別。河橋非舊餞。慘日映峯沉。愁雲隨蓋轉。哀笳時斷續。悲旌乍舒卷。望望情何極。浪浪淚空泫。無復昔時人。芳春共誰遣。

詠琵琶云。半月無雙影。金花有四時。權藏千里態。掩抑幾重悲。促節縈紅袖。清音滿翠帷。駛彈風響急。緩曲劍聲遲。空餘關隴恨。因此代相思。

詠弓詩云。上弦明月半。激箭流星遠。落雁帶書驚。啼猿映枝轉。

詠桃詩云。禁苑春光麗。花蹊幾樹裝。綴條深淺色。點露參差光。向日分千笑。迎風共一香。如何仙嶺側。獨秀隱遙芳。

詠李詩云。盤根植瀟渚。交榦橫倚天。舒華光四海。卷葉蔭三川。

守歲詩云。暮景斜芳殿。年華麗綺宮。寒辭去冬雪。暖帶入春風。階馥舒梅素。盤花卷燭紅。共歡新故歲。迎送一霄中。

又云。歲陰窮暮紀。獻節啓新芳。冬盡今宵促。年開明日長。冰銷出鏡水。梅散入風香。對此歡終宴。傾壺侍曙光。

思恭高宗時中書舍人。同撰瑤山玉彩。

何仲誼

七夕賦詠成篇云。日日思歸勤理鬢。朝朝佇望懶調梭。凌風寶扇遙臨月。映水仙車遠渡河。歷歷珠星疑拖珮。冉冉雲衣似曳羅。通霄道意終無盡。向曉離愁已復多。

仲誼。武德正觀間人也。

沈叔安

七夕賦詠成篇云。皎皎霄月麗秋光。耿耿天津橫復長。停梭且復留殘緯。拂鏡及早更新粧。彩鳳齊駕初成輦。調鵲填河已作梁。雖喜得同今夜枕。還愁重空明日牀。

關。南部新書云。武德七年。遣刑部尚書沈叔安攜天尊像賜高麗。後爲潭州都督。圖形凌煙閣。

陵敬

七夕詩云。夙駕鳴鑾啓閭闔。霓裳遙裔儼天津。五明霜紈開羽扇。百和香車動畫輪。婉孌夜分能幾許。靚粧冶服爲誰新。片時歡娛自有極。已復長望隔年人。敬有集十四卷。高祖時人也。初爲竇建德國子祭酒。秦王軍武牢。建德軍迫於武牢不得進。敬說令取懷州。踰太行入上黨。趨壺口。駭蒲津。乘唐國之虛。以取山北。建德不從。以及於敗。其僞官屬皆降唐。

袁朗

秋日應詔詩云。玉樹涼風舉。金塘細草萎。葉落商飈觀。鴻歸明月池。迎寒桂酒熟。含霧菊  
花垂。一奉章臺宴。千秋長願斯。

朗父樞。仕陳爲德教殿學士。陳亡。入隋。唐初朗爲秦王府文學。太宗時爲給事中。卒。帝曰。  
朗任淺而性謹厚。使人悼惜。

賦飲馬長城窟云。朔風動秋草。清蹕長安道。長安運不窮。所以隔華戎。規模唯聖作。荷負  
曉成功。烏庭已向內。龍荒更鑿空。玉關塵卷靜。金徽路已通。湯征隨北怨。舜詠起南風。盡野功  
初立。綏邊事云集。朝服踐狼居。凱歌旋馬邑。山響傳風吹。霜華藻瓊鍍。屬國擁節歸。單于款關  
入。日落寒風起。驚河被原隰。零落葉已寒。河流清且急。四時徭役靜。千載干戈戢。太平今若斯。  
汗馬意無施。唯當事筆硯。歸去草封禪。

牛鳳及

奉和受圖溫洛詩云。八神文玉瑩。六羽警瑤溪。戒道伊川北。通旌澗水西。御圖開洛賁。刻  
石與天齊。瑞日波中上。仙禽霧裏低。微臣矯弱翮。抃舞接鸞鷖。

劉軻與馬植論史官書云。文皇帝受命。有若魏鄭公。楊仁卿。牛鳳及。



朱子奢

文德皇后挽歌云。神京背紫陌。馳驅結行幘。北失橫橋道。西分清渭流。寒光向壘沒。霜氣入松楸。今日泉臺路。非是濯龍遊。

子奢蘇州人。正觀時爲諫議大夫。善文辭。爲人樂易。能劇談。以經誼緣飾。每侍宴。帝令論難羣臣。

庾抱

賦得宵臺露詩云。宵臺旣落室。荆棘稍侵扉。棟折連雲影。梁摧照日暉。翔鶴遂不反。巢燕反無歸。唯有團階露。承曉共霑衣。

抱仕隋爲元德太子學士。高祖起兵。太子封隴西公。以抱爲記室。文檄皆出其手。俄爲東宮學士。正觀初徙趙王友卒。

張文恭

七夕詩云。鳳律驚秋氣。龍梭靜夜機。星橋百枝動。雲路七香飛。映月迴雕扇。凌霞曳綺衣。含情向華幄。流態入重闈。歡餘夕漏盡。怨結曉驂歸。誰念分河漢。還憶兩心違。

文恭正觀時人。與房元齡辛丘馭李懷儼趙洪智劉禕之陽仁鄉上官儀李淳風等同修

晉書名爲御撰。

陳叔達

字子聰。陳宣帝子。武德初判納言。太宗時拜禮部尙書。明辯善爲容。

初年詩云。和風起天路。嚴氣銷冰井。索索枝未柔。厭厭漏猶永。

春首詩曰。雪花聯玉樹。冰彩散瑤池。翔禽遙出沒。積翠遠參差。

又早春桂林殿應詔詩曰。金鋪照春苑。玉律動年華。朱樓雲似蓋。丹桂雪如花。冰岸御塔轉。風條出柳斜。輕輿臨太液。仙露酌流霞。

聽隣人琵琶詩云。本自龍門桐。因妍入漢中。香由羅袖裊。聲逐朱絃中。離有相思韻。翻將入塞同。關山臨却月。花藥散迴風。爲將金谷引。添令曲未終。

薛收

琵琶賦云。惟茲器之爲宗。揔羣樂而居妙。應清角之高節。發號鐘之雅調。處躁靜之中權。執疎密之機要。遏浮雲而散彩。揚白日以垂耀。爾其狀也。龍腹鳳頭。熊據龍旋。戴曲履直。破觚成圓。虛心內受。勁質外宣。磅礴象地。穹崇法天。候八風而運軸。感四氣而鳴絃。金華徘徊而月照。玉桂的歷以星懸。

收字伯褒。蒲州人。善屬文。爲秦王府主簿。陝東大行臺金部郎中。武德七年卒。太宗卽位。語元齡曰。收若在。朕當以中書令處之。收與弟德音元欽齊名。號河東三鳳。收爲長雛。德音爲鷺鷥。元敬年最少爲鷓鴣。



唐詩紀事卷第四

王珪

褚亮

虞世南

蔡允恭

許敬宗

劉孝孫

魏徵

楊師道

岑文本

李百藥

來濟

長孫無忌

杜正倫

馬周

李義府

陳子良

杜之松

崔善爲

王績

王珪

詠漢高祖云。漢祖起豐沛。乘運以躍鱗。手奮三尺劍。西滅無道秦。十月五星聚。七年四海賓。高抗威宇宙。貴有天下人。憶昔與項王。契闊時未伸。鴻門既薄蝕。滎陽亦蒙塵。蟻虱生介冑。將卒多苦辛。爪牙驅信越。腹心謀張陳。赫赫西楚國。化爲丘與榛。

詠淮陰侯韓信云。秦王日凶慝。豪傑爭共亡。信亦胡爲者。劍歌從項梁。項羽不能用。脫身歸漢王。道契君臣合。時來名位彰。北討燕承命。時驅楚絕糧。斬龍堰淮水。擒豹潛夏陽。功成享天祿。建旗還南昌。千金答漂母。錢百酬下鄉。吉凶成糾纏。倚伏難預詳。弓藏狡兔盡。慷慨念心

傷。

珪字叔玠。相太宗。母李最賢。老杜詩有「我之曾老姑。爾之高祖母。謂李也。」

褚亮

字希明。錢塘人。警敏。工爲詩。正觀中爲散騎常侍。武德四年。太宗爲天策上將軍。宮城西開文館下教。以杜如晦房元齡于志寧蘇世長薛收褚亮姚思廉陸德明孔穎達李玄道李守素虞世南蔡允恭顏相時許敬宗薛元敬蓋文達蘇勗。並以本官爲學士。收卒。以劉孝孫補之。使亮爲贊。

奉和詠日午詩云。曦車日亭午。浮箭未移暉。日光無落照。樹影正中圍。草萎看靡稱。葉燥望疑稀。書寢慚經笥。暫解入朝衣。

燭花詩云。蘭徑香風滿。梅梁暖日斜。言是東方騎。來尋南陌車。鬢星臨夜燭。眉月隱輕紗。莫言春稍晚。自有鎖開花。

賦得蜀都詩云。列宿光輿井。分土跨梁岷。沉犀對江浦。駟馬入城闌。英圖多霸跡。歷選有名臣。連騎簪纓滿。含章詞賦新。得上僊槎路。無待訪嚴遵。

秋雁云。日暮霜風急。羽翮轉難任。爲有傳書意。翩翩入上林。

秋享送文舞用舒和歌云。御展合宮承寶曆。帝圖重館奉明靈。偃武修文九圍泰。沉烽靜  
拆八荒甯。

祀五方用舒和歌云。笙歌籥舞蜀年韶。鸞鼓鼉鐘展時豫。調露初迎綺春節。承雲遽踐蒼  
霄馭。

樂府詞云。高臺暫俯臨。飛翼聳輕音。浮光隨日度。漾響逐波深。洵瞰周平野。開懷暢遠襟。  
獨此三休上。還傷千里心。

奉和禁苑餞別廳令詩云。大蕃初錫瑞。出牧邇皇京。暫以綠車重。言承朱瑯榮。舒桃臨遠  
騎。垂柳映軍營。惠化宣千里。威風動百城。禁籞芳嘉節。神襟餞送情。金笳催別景。玉管切離聲。  
野花開且落。山鳥啼還驚。微臣夙多幸。薄官奉儲明。釣臺暫作賦。伊水濫聞笙。懷德良知久。酬  
恩識命輕。

和望月應魏王教詩云。層軒澄皎月。流照滿中天。色共梁珠遠。光隨趙壁圓。落影臨秋扇。  
虛輪入夜僊。所欣東館裏。預奉西園篇。

虞世南

和鸞輿頓戲下詩云。重輪依紫極。前耀奉丹霄。天經戀宸扆。帝命扈仙鑣。乘星開鶴禁。帶

日下虹橋。銀書含曉色。金輅轉晨飈。霧澈軒營近。塵暗苑城遙。蓮花分秀萼。竹箭下驚潮。撫已  
輒龍翰。承恩集鳳條。瑤山盛風樂。抽簡薦徒謠。

侍宴應詔詩云。芬芳禁林晚。容與桂舟前。橫空一鳥度。照水百花燃。綠野明斜日。青山澹  
晚煙。濫得陪終宴。握管類窺天。

奉和詠日午詩曰。高天淨秋色。長漢轉曦車。玉樹陰初正。桐圭影未斜。翠蓋飛圓影。明鏡  
發輕花。再中良表瑞。共仰璧輝賒。

奉和月夜觀星應令詩曰。早秋炎景暮。初絃月彩新。清風滌暑氣。零露淨囂塵。薄霧銷輕  
縠。鮮雲卷夕鱗。休光灼前曜。瑞彩接重輪。緣情摛聖藻。並作命徐陳。宿草誠淪濫。吹噓偶搢紳。  
天文豈易述。徒知仰北辰。

又春夜詩云。春苑月徘徊。竹堂侵夜開。驚鳥排林度。風花隔水來。

凌晨早朝云。萬瓦曙光曙。重簷夕霧收。玉花停夜燭。金壺送曉籌。日暉青鎖殿。霞生結綺  
樓。重門啓應路。通籍引王侯。

詠舞詩云。繁絃奏淥水。長袖轉迴鸞。一雙俱應節。還似鏡中者。

賦得吳都詩云。畫野通淮泗。星躔應斗牛。玉牒宏圖表。黃旗美氣浮。三分開霸業。萬里宅



神州高臺臨茂苑。飛閣跨沉流。江濤如素蓋。海氣似朱樓。吳越自有樂。還似鏡中遊。

賦飲馬長城窟云。馳馬渡河干。流深馬難渡。前逢錦車使。都護在樓蘭。輕騎猶御勒。疑兵尙解鞍。溫池下絕棧。澗道接危巒。拓地勳未賞。亡城律詎寬。有月關猶暗。經春隴尙寒。雲昏無復影。冰合不聞湍。懷君不可遇。聊待報一餐。

賦鶴云。飛來雙白鶴。奮翼達凌煙。俱棲集紫蓋。一舉背青田。颺影過伊落。流聲入管絃。鳴儔倒景外。刷羽闔風前。顧步已相失。徘徊各自憐。危心猶警露。哀響詎聞天。無因報六翮。輕舉復隨仙。

賦結客少年場云。韓魏各奇節。倜儻遺名利。共矜然諾心。各負縱橫意。結友一言重。相思千里至。淥沈明月絃。金絡浮雲轡。吹簫入吳市。擊筑遊燕肆。尋源博望侯。結客遠相求。少年垂一顧。長驅背隴頭。燄燄戈霜動。耿耿劍虹浮。天山冬夏雪。交河南北流。雲起龍沙暗。木落雁行秋。輕生徇知己。非是爲身謀。

怨歌行云。紫殿秋風冷。彫萳落日沉。裁絃悽斷曲。織素別離心。掖庭若改畫。長門不惜金。寵移恩稍薄。情疎恨轉深。香銷翠羽帳。絃斷鳳凰琴。鏡前紅粉歇。階上綠苔侵。誰言掩歌扇。翻作白頭吟。

門時車馬客。云陳遵重交結。田蚡擅豪華。曲臺臨上路。高門抵狹邪。赭汗千里馬。繡轂五香車。白鶴隨飛蓋。朱鷺入鳴笳。夏蓮開劍水。春桃發綬花。輕裙染回雪。浮蟻泛流霞。逢恩借羽翼。失路委泥沙。

擬古云。塗山烽候驚。弭節度龍城。冀馬樓蘭將。燕犀上谷兵。劍寒花不落。弓曉月逾明。凜凜嚴霜節。冰壯黃河絕。蔽日卷征蓬。浮天散飛雪。全兵值月滿。精騎乘膠折。結髮早驅馳。辛苦事旌麾。馬凍重關冷。輪摧九折危。漢有西山將。年年屬數奇。燿火發金微。連營出武威。孤城寒雪起。絕陣虜塵飛。俠客吸龍劍。惡少縵胡衣。胡摩骨都壘。夜解谷蠡圍。蕭關遠無極。蒲海廣難依。沙磧離旌斷。晴川候馬歸。克河梁已畢。燕山旆欲揮。方知萬里相。侯服有光輝。

顏師古隋朝遺事載洛陽獻合帝迎楚花。煬帝令袁寶兒持之。號司花女。時詔世南草征遼。指揮德音。敕於帝側。寶兒注視久之。帝曰。昔傳飛燕可掌上舞。今德寶兒方昭前事。然多憨態。今注目於卿。卿才人。可使嘲之。世南爲絕句曰。學畫鷗黃半未成。垂肩彈袖太憨生。緣憨却得君王惜。長把花枝傍輦行。

世南越州人。仕太宗。帝每稱其有五絕。德行忠直。博學文詞。書翰也。既卒。帝曰。世南於我猶一體。拾遺補闕。無日忘之。蓋當代名臣。人倫準的。今其云亡。石渠東觀中無復人矣。

蔡允恭

允恭在隋時。奉和出穎至淮詩云。久倦川涂曲。忽此望淮圻。波長泛淼淼。晚迥情依依。稍覺金烏轉。漸見錦帆稀。欲知仁化洽。謳歌遠路歸。

允恭荊州江陵人。工爲詩。在隋時煬帝有所賦。必令諷誦。遣教宮人。允恭恥之。授內史舍人。固辭。繇是疎斥。隋亡歸唐。正觀初。除太子洗馬卒。

許敬宗

奉和正月臨朝云。天上開初節。日觀上重輪。百靈滋景祚。萬土慶惟新。待日敷玄造。稽旒御紫宸。武帳臨光宅。文衛象鈞陳。廣庭揚九奏。大帛麗三辰。發生同化育。播物體陶鈞。霜空澄曉氣。鸞景瑩芳春。德暉覃率土。相賀奉還淳。

奉和七夕應制云。牛閨臨淺漢。鸞駟涉秋河。兩河縈別緒。一宿慶停梭。星模鈿裏曆。月寫黛中蛾。奈許令霄度。長嬰離恨多。

又應制。婺閨期今夕。蛾輪泛淺潢。迎秋伴暮雨。待暝合神光。薦寢低雲鬢。程態解霓裳。喜中怨漏促。別後怨天長。

七夕賦詠云。一年抱怨嗟長別。七夕含言始能歸。飄飄羅襪光天步。灼灼新粧鑒月輝。情

催巧笑聞星歷。不惜呈露解雲衣。所歎却隨更漏盡。掩泣還弄昨霄機。

敬宗字延族。杭州人。太宗時檢校黃門侍郎。高宗時中書令。在唐史姦臣傳。

劉孝孫

詠笛詩云。涼秋夜鳴笛。流風詠九成。調高時慷慨。曲變或淒清。征客懷離緒。鄰人思舊情。幸以知音願。千載有高聲。

早發成臯望河詩云。清晨發巖邑。車馬走轅轅。迴瞰黃河上。倘恍屢飛魂。鴻流導積石。驚浪下龍門。仙槎不辨處。沉壁想猶存。遠近洲渚出。颯沓鳧雁喧。懷古空延佇。歎逝將何言。

孝孫荊州人。正觀六年遷太子洗馬。未拜卒。

魏徵

正日臨朝應詔詩曰。百靈侍軒后。萬國會塗山。豈如今睿哲。邁古獨光前。聲教溢四海。朝宗別百川。鏘洋鳴玉珮。灼爍耀金蟬。淑景輝雕輦。高旌揚翠煙。庭實超王會。廣樂盛鈞天。旣傾東日戶。復泳南風篇。願奉光華慶。從斯萬億年。

出關作云。中原初逐鹿。投筆事戎軒。縱橫計不就。慷慨志猶存。杖策謁天子。驅馬出關門。請纓係南越。憑軾下東蕃。鬱紆陟高岫。出沒望平原。古木吟寒鳥。空山啼夜猿。旣傷千里目。還

驚久逝魂。豈不憚艱險。深懷國士恩。季布無二諾。侯嬴重一言。人生感意氣。功名誰復論。

徵字元成。魏州人。相太宗。致太平天下。既治。懼帝喜武功。嘗賦詩曰。終籍叔孫禮。方知皇帝尊。帝曰。徵言未嘗不約我以禮。徵亡。帝賦詩曰。望望情何極。浪浪淚空滋。無復昔時人。芳春其誰遣。

太宗在洛陽宮。幸積翠池。宴酣各賦一事。帝賦尙書曰。日吳翫百篇。臨燈披五典。夏康既逸豫。商辛亦流湏。恣情昏主多。克己明君鮮。滅身資累惡。成名由積善。徵賦西漢曰。受降臨軹道。爭長趣鴻門。驅傳渭橋上。觀兵細柳屯。夜宴經柏谷。朝遊出杜原。終籍叔孫禮。方知皇帝尊。帝曰。徵言未嘗不約我以禮。

### 楊師道

字景猷。清警有才思。正觀十年拜侍中。參預朝政。後爲太常卿。每與文士宴。歌詠自適。帝見其詩爲謔諷。嗟賞後賜宴。帝曰。聞公每酣賞。捉筆賦詩如宿成。試爲朕爲之。師道再拜。少選輒成。無所竄定。一坐嗟伏。春朝閑步詩云。偃沐乘閑豫。清晨步出林。池塘藉芳草。蘭芷襲幽衿。霧中分曉日。花裏啜春禽。野徑香常滿。山階筍屢侵。何須命輕蓋。桃李自成陰。

又初秋夜坐應詔詩云。玉琯涼初應。金壺夜漸闌。蒼池流稍潔。仙掌露方團。鴈聲風處斷。

樹影月中寒。爽氣長空淨。高吟覺思寒。

賦終南山用風字韻。應詔詩云。眷言懷隱逸。輟駕踐幽叢。白雲飛夏雨。碧嶺冠春虹。草綠長揚路。花疎五祚宮。登臨日將晚。蘭桂起香風。

詠硯云。圓池類璧水。輕翰染煙華。將軍欲見遠。見棄不應賒。

詠飲馬應詔詩云。寶馬權奇出未央。雕鞍照耀紫金裝。春草初生馳上苑。秋風欲動醉長楊。鳴珂屢度章臺側。細蹕經向濯龍傍。徒令漢將連年去。宛城今已獻名王。

詠弓詩云。霜重鱗膠勁。風高月影圓。鳥飛隨帝輦。鴈落逐鳴弦。

還山宅詩云。暮春還舊嶺。徙倚玩年華。芳草無遙徑。空山正落花。垂藤掃幽石。臥柳礙浮槎。鳥散茅簷靜。雲披澗戶斜。依然北泉路。猶是昔煙霞。

彈鳴琴詩云。北林鶻夜飛。南軒月馭進。調弦發清徵。蕩心祛褊恡。變作離鴻聲。還入思歸引。長歎未終極。秋風飄素鬢。

又詠琴詩云。久擅龍門質。孤竦嶧陽名。齊娥初發弄。趙女正調聲。嘉客勿遽反。繁弦曲未成。

詠笙詩云。短長插鳳翼。洪細摹鸞音。能令楚妃歎。復使荆王吟。切切孤竹管。來應雲和琴。

詠舞云。二八如回雪。三春類早花。分行向燭轉。一種逐風斜。

又詠飲馬應詔曰。清晨控龍馬。弄影出花林。躑躅依春澗。聯翩度碧潯。苔流染絲絡。水潔寫調音。一御瑤池駕。詎憶長城陰。

賦隴頭水云。隴頭秋月明。隴水帶關城。笳添離別曲。風送斷腸聲。映雪峯猶暗。乘冰馬屢驚。霧中寒鴈至。沙上轉蓬輕。天上傳羽檄。漢地急徵兵。陣門都護道。劍聚伏波營。於茲覺無渡。方共濯朝纓。

正日臨朝應詔云。皇猷被寰宇。端辰屬元辰。九重麗天色。千開臨上春。

### 岑文本

字景仁。鄧州人。中書侍郎。顏師古以譴罷。太宗曰。朕自舉一人。乃授文本侍郎。專典機要。奉和元日臨朝云。時雍表昌運。日正叶靈符。德兼三代禮。功包四海圖。踰沙紛在列。執玉儼相趨。清蹕喧輦道。張樂駭天衢。拂蜺九旗映。儀鳳八音殊。佳氣浮仙掌。薰風繞帝梧。天文光七政。皇恩被九區。方陪瘞玉禮。珥筆岱山隅。

奉述飛白書勢詩云。六文開玉篆。八體曜銀書。飛毫列錦繡。拂素起龍魚。鳳舉崩雲絕。鸞驚遊霧疎。別有臨池草。恩霑垂露餘。

李百藥

字重規。定州人。隋內史令德林子也。翰藻沈鬱。詩尤其所長。樵斲皆能諷之。

正月臨朝。應詔詩云。化曆昭唐典。承天順夏正。百樂警軒禁。三辰揚旆旌。克庭富禮樂。高譙齒簪纓。獻壽符萬歲。移風韻九成。

少年詞云。始酌文君酒。新吹弄玉簫。少年不歡樂。何以盡芳朝。千金笑裏面。一榻掌中腰。掛冠豈憚宿。迎拜不勝嬌。寄語少年子。無辭歸路遙。

郢城懷古云。客心悲暮序。登塘瞰平陸。林澤竹竿絲。山川鬱重複。王公資設險。名都拒江隩。方城疑北門。溟海窮南服。長策挫其豕。雄圖競周鹿。大蒐雲夢掩。壯觀章華築。人世更不競。西師日侵蹙。連圯屬驅馳。時屯恣敲朴。莫救夷陵火。無復秦庭哭。鄢郢遂丘墟。風塵俄慘黷。狐兔時遊踐。霜露日霑沐。鈞渚故池平。神臺層宇覆。陣雲埋夏首。窮陰慘荒谷。帳矣洲壑遷。悲哉年杞修。雖異三春望。終傷千里目。

百藥七歲能屬文。聞中書舍人陸父嘗其過父德林。有說徐陵文者云。劉瑯琊之稱。坐客並不識其事。百藥進曰。傳稱邴人藉稻。注云。邴國在瑯琊開陽縣。人皆驚喜云。此兒卽神童。百藥幼多疾。父母以百藥爲名。名臣之子。才行相繼。四海名流。莫不宗仰。藻思沉鬱。尤長五言。雖



樵童牧子亦皆吟諷。及懸車告老，怡然自得。穿池築山，文酒譚賓，以盡平生之志。年八十五，先是和太宗帝京篇手詔曰：卿何身之老而才之壯，齒之宿而意之新乎？子安期，永徽末遷中書舍人，自德林至安期，三代掌制誥。安期孫義仲，又爲中書舍人。（出譚賓錄）

### 來濟

楊州人。父護兒。濟，正觀十八年，初置太子司議郎。高其選，以濟爲之。永徽中爲相，世謂護兒。○兒作相，世南男作匠是也。

濟出玉關絕句云：斂轡遵龍漢，銜悽渡玉關。今日流沙外，垂涕念生還。

太宗餞中書侍郎來濟詩云：暖暖去塵昏，灞岸飛飛輕。蓋指河梁，雲峯衣結千重葉。雪岫花開幾樹粧，深悲黃鶴孤舟遠，獨歎青山別路長。聊將分袂霑襟淚，還用持添離席觴。

### 長孫無忌

無忌，嘲歐陽詢形狀猥陋云：聳膊成山字，埋肩畏出頭。誰家麟閣上，畫此一彌猴。詢應聲曰：索頭連背暖，漫褰畏肚寒。祇緣心渾渾，所以面團團。太宗笑曰：詢殊不畏皇后耶。

太宗嘗謂唐儉酒杯流行，發言可喜，是時天下初定，君臣俱欲無爲，酒杯善諧，理亦有之。高宗雖不君，然亦深察事機，當時諸王鬪鷄，王勃在沛王府戲爲文檄英王鷄，帝見之大怒曰：

此殆交結之漸。卽日竄勃。以太宗之賢。杯酒一時之樂。何足爲後世戒。及其弊也。中宗詔羣臣曰。天下無事。欲與羣臣共樂。於是迴波豔辭。妖冶之舞。作於文字之臣。而綱紀蕩然矣。創業之難也。一觴一詠。足以肇亂。况其甚焉者哉。

杜正倫

相州人。工屬文。嘗與中書舍人董思恭夜直論文。思恭歸謂人曰。與杜公評文。今日覺吾頓進。顯慶初爲相。

侍宴北門詩云。大君端展暇。容賞狎林泉。開軒臨禁籞。藉野列芳筵。參差歌管颺。溶洩羽旗懸。玉池流若釀。雲閣聚非煙。湛露晞堯日。薰風入舜絃。大德侔玄造。微物荷陶甄。謬陪瑤水宴。仍廁柏梁篇。闕名徒十月。鄭辯詎談天。旣喜光華旦。還傷遲暮年。猶冀升中日。簪裾奉肅然。  
(闕名徒十月、疑以傳疑)

馬周

凌朝浮江旅思詩云。太清上初日。春水送孤舟。山遠疑無樹。潮平似不流。岸花開且落。江鳥沒還浮。羈望傷千里。長歌遣四愁。

周字賓王。博州人。嗜學善詩。春秋天資曠邁。武德中補州助教。不治事。刺史達奚怒。數咎

賁。周乃去。客密州。趙仁本高其才。厚以資。使入關。留客汴。爲浚儀令。崔賢所辱。遂感激而西。至長安。客常何家。正觀五年。太宗召之。後爲中書令。

### 李義府

遙敍封禪詩云。天齊標巨鎮。日觀啓崇祠。崑嶠臨渤海。隱嶙控河沂。建岳誠爲長。升功亮在茲。帝猷符廣運。玄範暢文思。飛聲總地絡。載化撫乾維。瑞策開眞鳳。禎圖薦寶龜。東后方肆覲。西都道六師。肅駕移星苑。楊罕馭風司。沸鼓喧平陸。凝蹕靜通逵。汶陽馳月羽。蒙陰驚電輻。巖花飄曙曄。峯葉蕩春旗。石問環藻衛。金壇映黼帷。仙階溢秘柜。靈險耀祥芝。三始貽遐貺。萬歲受重釐。非質陶恩獎。趨迹奉軒墀。觸網淪幽裔。乘徼限明時。周南昔已歎。邛西今復悲。

詠鸚鵡詩云。牽弋辭重海。觸網去層巒。戢翼雕籠際。延思彩霞端。慕侶朝聲切。離羣夜影寒。能言殊可賞。相助憶長安。

高宗朝義府常賦詩曰。鏤月爲歌扇。裁雲作舞衣。自憐迴雪影。好取洛川歸。有棗強尉張懷慶。好偷竊名士文章。乃爲詩曰。生情鏤月爲歌扇。出性裁雲作舞衣。照鑑自憐迴雪影。來時好取洛川歸。時人爲之語曰。活剝張呂齡。坐吞郭正一。

義府初遇。以李大亮劉洎之薦。太宗召令詠鳥。義府曰。日裏颺朝彩。琴中間夜啼。上林如

許樹不借一枝棲。帝曰與卿全樹。何止一枝。

義府擅殺寺丞畢正義。王義方彈義府疏云。臣聞履霜堅冰。積小成大。請乞重勘。當畢正義致死之由。雪冤象於幽泉。誅姦臣於白日。對（伏叱）義府不退。義方三叱。上既無言。義府趨出。義方乃讀彈文。義府善柔成性。佞媚爲心。昔事馬周。分桃見寵。後交劉洎。割袖承恩。生其羽翼。長其光價。因緣際會。遂階通達。不能盡忠端節。對歎王休。策蹇勵驚。祇奉皇眷。而反憑附。城社蔽虧。日月請託。公行交遊。羣小貪治容之好。原有罪之淳。子恐漏洩其謀。殞無辜之正。羞雖挾山超海之力。望此猶輕。迴天轉日之威。方斯更劣。此如可恕。孰不可容。金風戒節。玉露啓途。霜簡與秋典共清。忠臣將鷹鷂並擊。請除君側。少益鴻私。碎首玉階。庶明臣節。伏請付法。推斷。以申典憲。

義府其先瀛州人。與來濟俱以文翰顯。時稱來李。永徽六年爲相。王義方庭劾之。帝陰德義府。故貸不問。爲抑義方。逐之。俄進中書令。後以罪流振州。朝野相賀。

陳子良

詠雪云。光映粧樓月。花承歌扇風。欲妬梅將柳。故落早春中。

七夕看新婦隔巷停車詩云。隔巷遙停幃。非復爲來遲。只言更尙淺。未是渡河時。

得妓詩云。微雨散芳菲。中園照落暉。紅樹遙歌扇。綠珠飄舞衣。繁絃調對酒。雜引動思歸。愁人當此夕。羞見落花飛。

新宮詞云。春色照蘭宮。秦女日窗中。柳葉來眉上。桃花落臉中。拂塵開扇匣。卷帳却熏籠。衫薄偏憎日。裾輕更畏風。

子良吳人。與蕭德言庾抱同爲太子學士。正觀六年卒。

### 杜之松

和衛尉寺柳詩云。漢將本屯營。遼河有戍城。大夫曾取姓。先生曾得名。高枝拂遠鴈。疎影度遙星。不辭攀折苦。爲入管絃聲。

之松正觀中爲河中刺史。答王績書云。辱書知不降。顧艱恨何已。僕幸恃故情。庶迴高躅。豈意康成道重。不許太守稱官。老萊家居。羞與諸侯爲友。延佇不獲。如何奇跡獨全。幸甚幸甚。敬想結廬人境。植杖山河。林壑地之所豐。煙霞性之所適。蔭丹桂。藉白茅。濁酒一杯。清琴數弄。誠足樂也。此真高士。何謂狂生。僕憑藉國恩。濫尸貴部。官守有限。就學無因。延頸下風。我勞何極。前因行縣。實欲祗尋。誠恐燉煌。孝廉守琴書而不出。酒泉太守。列鐘鼓而空還。所以遲迴。遂攬轡也。僕雖不敏。頗識前言。道旣知尊。榮何足恃。豈不能正平公之坐。敬養亥唐。屈文侯之膝。

恭師子夏。雖齊桓德薄。五行無疑。唯夸人一。來。何損蒙借。家禮今見披尋。微而精。簡而備。誠經傳之典略。閨庭之要訓也。（唯夸人疑以傳疑）

崔善爲

呂才序王無功文集云。君河中有渚田十數頃。又有隱士仲長子光。服食養性。君遂結廬河渚。正觀中。京兆杜之松。清河崔善爲。繼爲州刺史。皆召之。君曰。奈河坐召君平耶。

答無功冬夜載酒鄉館詩云。須條忝貴郡。懸榻久相望。處士同楊鄭。邦君謝李疆。詎知方擁篲。逢子敬惟乘。明朝蓬戶側。會白謁任棠。

答無功九日詩。秋來菊花氣。深山客重尋。露葉疑涵玉。風花似散金。摘來還汎酒。獨坐卽徐斟。王弘貪白醉。無復覓楊林。

善爲貝州人。武德中。歷尚書左丞。諸曹吏惡其聽察。嘲其短。偃曰。崔子曲如鉤。隨例得封侯。膊上全無頂。腦前別有頭。高祖勞之曰。齊末姦吏歌斛律。明月高緯昏不察。至滅其家。朕雖不德。幸免是。下令求謗者。謗遂止。卒於秦州刺史。

王績

晚年敘志示翟處士正師云。弱齡慕奇調。無事不兼修。望氣登重閣。占星上小樓。明經思

待詔學劍覓封侯。棄繻頻北上。懷刺幾西遊。中年逢喪亂。非復昔追求。失路青門隱。藏名白社遊。風雲私所愛。屠博暗爲儔。解紛曾霸越。釋難頗存周。晚歲聊長想。生涯太若浮。歸來南畝上。更坐北溪頭。古岸多磐石。春泉足細流。東隅誠已謝。西景懼難收。無謂退耕近。伏念已經秋。庾桑逢處跪。陶潛見人羞。三晨寧舉火。五月鎮披裘。自有居常樂。誰知身世憂。

建德破後入長安詠秋蓬示辛學士云。遇坎聊知止。逢風忽未歸。孤根何處斷。輕葉強能飛。辛答云。託根雖異所。飄葉早相依。因風若有便。更共入雲飛。（不知辛氏之名。今錄於此。）古意云。幽人在何所。紫岳有仙躅。月夜橫寶琴。此外將安欲。材抽嶧山幹。微點峴丘玉。漆抱蛟龍脣。絲纏鳳凰足。前彈廣陵罷。後以明光續。百金買一聲。千金傳一曲。世無鐘子期。誰知心所屬。

竹生大夏溪。蒼蒼富寄質。綠葉吟風勁。翠莖犯霄密。霜霞封其柯。鴛鸞食其實。寧知軒轅後。更有伶倫出。刀斧俄見尋。根株坐相失。裁爲十二管。吹作雄雌律。有用雖自傷。無心復招疾。不如山上草。離離保終吉。寶龜尺二寸。由來宅深水。浮遊五湖內。宛轉三江裏。何不深復深。輕然至溱洧。溱洧源流狹。春秋不濡軌。漁人遞往還。網罟相縈蒞。一朝失運會。剝腸血流死。豐骨輸廟堂。鮮腴藉籩簋。棄置誰怨尤。自我招此否。餘靈寄明卜。復來欽所履。

松生北巖下。由來人徑絕。布葉稍雲煙。插根擁巖穴。自言生得地。獨負凌雲潔。何時畏斤斧。幾度經霜雪。風驚西北枝。雹隕東南節。不知歲月久。稍覺枝幹折。藤蘿上下碎。枝幹縱橫裂。行當廢爛盡。坐其灰塵滅。甯關匠石顧。豈爲王孫折。盛衰自有時。聖賢未嘗屑。寄言悠悠者。無爲嗟大耋。

桂樹何蒼蒼。秋來花更芳。自言歲寒性。不知露與霜。幽人重其德。徙植臨前堂。連拳八九樹。假蹇二三行。枝枝自相糺。葉葉還相當。去來雙鴻鵠。栖息兩鴛鴦。榮蔭誠不厚。斤斧亦勿傷。赤心許君時。此意那可忘。采風欲將歸。提羅出郊訪。羅張大澤已。鳳入重雲颺。朝栖崑岡木。夕飲蓬壺漲。問鳳那遠飛。賢君坐相望。鳳言何深德。微禽安足尙。但使雛卵全。無令繒繳放。皇臣力牧舉。帝樂簫韶暢。自有來巢時。明年阿閣上。

春日詩云。前旦出園遊。林華都未有。今朝下堂來。池水開已久。雪被南軒梅。風催北庭柳。遙呼窻前妾。却報機中婦。年光恰恰來。蒲甕營春酒。

績字無功。絳州人。兄通大儒也。績誕縱典李播。呂才善。大業末。仕爲六合丞。嗜酒不任事。因解去。居河洛間。與仲長子光友。以周易老子置牀頭。他書罕讀也。著五斗先生傳。醉鄉記。無心子傳。豫知終日。自誌其墓。自號東臯子。



唐詩紀事卷第五

蕭德言

顏師古

杜淹

裴守真

胡元範

元萬頃

李敬立

張文琮

薛容感

張大安

薛元超

鄭蜀賓

王德眞

楊思玄

鄭義眞

徐珩

蕭翼

弘執恭

鄭帆

王勣

竇咸

蕭德言

詠舞詩云。低身鏘玉珮。舉袖拂羅衣。對簷疑燕語。映雪似花飛。

德音字文行。正觀中爲弘文館學士。兼侍讀。以年老致仕。太宗不許。詔曰。天下無事。方欲建禮作樂。偃武修文。卿年齒已衰。教將何恃。所冀才德猶茂。臥振高風。使濟南伏生。猶在茲日。

拜祕書少監。

顏師古

奉和正日臨朝云。七政璿衡始。三元寶律新。負展延百辟。垂旒御九賓。肅肅皆鷺鷥。濟濟盛彝紳。天涯重致譯。日域獻奇珍。

師古字籍。自之推以來居關中。性簡峭。自負其才。意望甚高。終於祕書監。諫議大夫。相時其弟也。師古叔父遊秦。武德初刺廉州。州人歌曰。廉州顏有道。性行同莊老。愛人如赤子。不煞非時草。高祖覽書勞勉之。

杜淹

杜淹始見袁天綱於洛。天綱謂曰。蘭臺成就。學堂寬廣。又語曰。二十年外。終恐責黜。暫去。卽還。武德六年。以善隱太子。俱配流雋州。淹至益州。見天綱曰。洛邑之言。何其神也。天綱曰。不久卽回。至九年六月召入。天綱曰。杜公至京。卽得三品要職。淹至京。拜御史大夫。檢校吏部尚書。贈天綱詩曰。伊呂深可慕。松喬定是虛。繫風終不得。脫屣欲安如。且珍執素美。當與薜蘿疎。旣逢楊得意。非復久閑居。

淹字執禮。隋時隱太白山。文帝惡之。謫戍江表。秦王引入爲天策府曹參軍。賦詩尤工。賜銀鐘。楊文幹反。辭連太子。歸罪淹。流雋州。太宗踐阼。召爲御史大夫。後檢校吏部尚書。參預朝政。卒。

裴守真

和太子納妃詩曰。瑜珮升青殿。纓華降紫微。還如桃李發。更似鳳凰飛。金屋貞離象。瑤臺起婺徽。綵纓紛碧坐。積羽泛榆衣。

雲路移凋釐。天津轉明鏡。仙珠照乘歸。寶月重輪映。望園喜宴洽。主第懽娛盛。絲竹楊帝薰。簪裾奉宸慶。葉雲藹曉光。淇露晞朝陽。天文大景麗。容藻春詞芳。玉庭散秋色。銀宮生夕涼。太平起遂古。萬壽樂無疆。

守真絳州人。高宗時太常博士。天授中爲司憲府丞。覈詔獄多裁恕不合。武后旨出刺成州。徙寧州卒。

胡元範

奉和太子納妃詩云。帝子威儀絕。宮妃禮慶優。疊鼓陪山觀。凝笳翼畫輜。鬱鬱神香滃。弈弈彩雲浮。排空列錦屬。勝觀溢皇州。

金閨未息火。玉樹鍾天愛。月路飾還裝。星津動歸珮。紫極流宸眷。清規佇慈誨。恩波洽九流。光輝軼千載。側席詔親賢。式宴坐神仙。聖文飛聖筆。天樂奏鈞天。曲池涵雅景。文字孕祥煙。小臣同百獸。率舞悅堯年。

高宗子洪爲太子納妃。有司奏費用白鴈。適苑中獲之。帝喜曰。漢獲朱鴈。爲樂府歌。今得白鴈。爲婚贊。婚乃人倫首。我則無慚。太子後諡孝欽皇帝。裴炎請武后歸政。后以炎有異圖。捕送詔獄。元範爲鳳閣侍郎。曰。炎有功於國。臣明其不反。后曰。炎有反端。顧卿未知耳。元範曰。若炎反。臣輩亦反矣。后曰。朕知炎反。卿輩不反。遂斬炎。

元範中州義陽人。介廉有才。以炎故。流死嶺州。

元萬頃

春日池臺詩云。日影飛花殿。風紋積翠池。鳳樓通夜敞。虬輦望春移。

春日詩云。花輕葉亂仙人店。葉密鸚鵡帝女桑。飛雲閣上春應至。明月樓中夜未央。

又曰。鳳輦迎風乘紫閣。鸞車避日轉彤闈。中塘促管淹春望。後殿清歌開夜扉。

奉和太子納妃公主出降詩云。高元應春夕。帝子降秋期。鳴璦合清響。冠玉麗濃輝。和聲

躋風掖。清影步鸞墀。

從李勣征高麗。爲遼東道管記。勣令別將赴平壤糧。不及期。萬頃作離合詩密報勣。勣曰。軍機切遽。何以詩爲。欲斬之。言狀乃免。勣令作文檄高麗。其語有不知守鴨綠之險。莫離支報。云。謹聞命矣。遂移兵鴨綠。軍不得入。萬頃坐是流嶺外。遇赦。還爲北門學士。累遷鳳閣侍郎。坐

事誅。

李敬玄

奉和別魯王詩云。綠車旋楚服。丹蹕佇秦川。珠泉轉歸騎。金岸引行旂。一朝限原隰。千里間風煙。鸚噉上林右。鳧響御溝前。斷雲移魯蓋。離歌動舜絃。別念凝神辰。崇恩洽玳筵。顧惟慚叩寂。徒自仰鈞天。

又奉和別越王詩云。飛蓋迴蘭坡。宸襟佇柏梁。別館分涇渭。歸路指衡漳。關山通曉色。林籓徧春光。帝念紆千里。詞波照玉潢。

敬玄亳州人。該覽羣籍。尤善於禮。高宗在東宮。馬周薦其材。召入崇賢館侍讀。後相高宗。儀鳳中。劉仁軌奏。河西鎮守非敬玄不可。帝強遣之。由是大敗於湟川。魯王靈夔。高祖子也。歷五州刺史。越王正。太子。武后時爲豫州刺史。

張文琮

水詩云。標名資上善。流派表靈長。地圖羅四瀆。天文載五潢。方流涵玉潤。圓折動珠光。獨有蒙園吏。棲假玩濠梁。

賦橋詩云。造舟浮渭日。鞭石表秦初。星文遙瀉漢。虹勢尙凌虛。已授文成履。空題武騎書。

別有臨濠上。棲偃獨觀魚。

和陽舍人詠中書有花樹詩云。初曉映春叢。參差間早紅。因風時落砌。雜雨乍浮空。影照鳳池水。香飄鷄樹風。豈不愛攀折。希君懷袖中。

文琮同潘屯田冬日早朝云。假寐懷古人。夙興瞻曉月。通辰禁門啓。冠蓋趨朝謁。霜靄清九衢。霞光照雙闕。紛綸人物紀。煥爛聲明發。腰劍動陸離。鳴玉和清越。

文琮高宗宰相。文瓚弟也。貝州人。好自寫書。正觀中爲治書侍御史。永徽中拜戶部侍郎。出爲建州刺史卒。

文琮賦蜀道難云。梁山鎮地險。積石阻雲端。深谷下寥廓。層嶺上鬱盤。飛梁架絕嶺。棧道絕危巒。攬境猶長息。方知斯路難。

薛（孝宗御諱）惑

進船於洛水詩云。禁園紆春覽。仙棹叶宸遊。洛北風花樹。江南彩畫舟。榮生蘭蕙草。春入鳳凰樓。興盡離宮暮。烟光起夕流。

世傳（孝宗諱）惑善投壺。背後執矢投之。龍躍隼飛。百發百中。

張大安

奉別越王詩云。盛藩資右戚。連萼重皇情。離襟愴離苑。分途指鄴城。麗日開芳甸。佳氣積神京。何時驂駕入。還見謁承明。越王太子。武后時爲豫州刺史。大安公謹之子。上元中。同中書門下三品。章懷太子令與劉訥言等共註范曄漢書。太子廢。故貶普州刺史。終橫州司馬。

### 薛元超

和同太子監守違戀詩云。儲禁銅扉啓。宸行玉輶遙。空懷壽街吏。尙隔寢門朝。北首瞻龍戟。塵外想鸞鑣。飛文映仙誥。濟惠叶神飈。帝念紆蒼陸。乾文煥紫霄。歸塘橫筆海。平圃振詞條。欲應重輪曲。鏘洋韻九韶。

元超收之子也。高宗時爲給事中。轉中書舍人。薦士若任希古。郭正一。崔融等。皆以才白名。上元初。同中書門下三品。政出武后。因陽暗乞骸骨卒。

高宗爲太子也。元超爲舍人。太宗親征時。元超韓王元嘉同太子監守。賦違戀詩。

### 鄭蜀賓

蜀賓滎陽人。善五言。年老爲江左一尉。親朋餞於上東門。蜀賓賦詩曰。畏途方萬里。生涯近百年。不知將白首。何處入黃泉。酒酣詠歌聲。調哀戚。竟卒於官。時長壽中也。

### 王德真

和過溫湯詩云。握圖開萬寓。屬聖啓千年。驪阜疎緹騎。驚鴻映彩旃。玉霜明鳳野。金陣藻龍川。祥烟聚危岫。慶水溢飛泉。停輿興睿覽。還舉大風篇。

德真武后時爲納言。房先敏以罪貶。訴於相府。內史竊味道曰。太后旨。劉禕之曰。乃上從有司所奏云。后聞貶味道而以禕之爲忠臣。德真推順曰。戴至德無異才。惟能歸善於君。爲時所服。后曰善。

楊思玄

湯泉詩云。豐城觀漢迹。溫谷幸秦餘。地接幽王壘。塗分鄭國渠。風威肅文衛。日彩鏡雕輿。遠岫凝氛重。寒叢樹影疎。迴瞻建章闕。佳氣滿宸居。

奉和別魯王詩云。元王詩傳奏。文后寵靈優。未若動宸眷。龍章送遠遊。潼關疎別道。灞岸引行舟。北林分苑樹。東流溢御溝。鳥聲含吹咽。騎影曳花浮。聖澤九垓遍。天文七曜周。方翹獻雅樂。簪帶奉鳴球。

高宗時人

鄭義真

溫湯詩云。洛川方佇蹕。豐野暫停鑾。湯泉常獨涌。溫谷豈知寒。漏鼓依巖畔。相風出樹端。



嶺烟遙聚草。山月迴臨鞍。日用誠多幸。天文遂仰觀。

高宗時人。

徐珩

日暮望涇水詩云。導源經隴阪。屬汭貫羸都。下瀨波常急。迴圻溜亦紆。毒流秦卒斃。泥糞漢田腴。獨有迷津客。懷歸輒暮途。

高宗時人。

蕭翼

太宗以翼爲監察御史。克使取羲之蘭亭序真蹟於越僧辯才。翼初作北人南遊。一見款密留宿。設缸而酒。江東缸而猶何北。曰甕頭。蓋初熟酒也。酣樂之後。探韻賦詩。才探來字詩云。初醞一缸開。新知萬里來。披雲同落莫。步月共徘徊。夜久孤琴思。風長旅鴈哀。非君有祕術。誰照不燃灰。翼探招字詩云。邂逅款良霄。慙慙荷勝招。彌天俄若舊。初地豈成遙。酒蟻傾還泛。心猿躁似調。誰憐失羣翼。長苦業風飄。既而以術取其書以歸。〔本名世翼〕

南部新書曰。蘭亭序武德四年歐陽詢就越詐求之。始入秦王府。麻道嵩奉教榻兩本。一送辯才。一王自收。道嵩私榻一本。正觀二十三年。褚遂良請入昭陵。

弘執恭

和平涼公觀趙郡王妓詩云。小堂羅薦陳。妙妓命燕秦。翠眉凝假黛。紅臉自含春。合舞俱迴雪。分歌共落塵。齊竿不可屈。空願上龍津。

賦劉生云。英名振關右。雄氣逸江東。遊俠伍都內。來去三秦中。劍照七星影。馬控千金驄。縱橫方未息。因茲定武功。(劉生不知何代人。齊梁以來。歌爲三秦遊。)

鄭軌

觀兄弟同夜成婚詩云。棠棣開雙萼。天桃照兩花。分庭合珮響。隔扇偶粧華。迎風俱似雪。映綺共如霞。今霄二神女。併在一仙家。

王勣

詠妓詩云。妖姬飾淨粧。窈窕出蘭房。日照當軒影。風吹滿路香。早時歌扇薄。今日舞衫長。不應令曲誤。持此試周郎。

勣武德正觀間人。有集五卷。

竇威

出塞曲云。匈奴屢不平。漢將欲縱橫。看雲方結陣。却月始連營。潛軍渡馬邑。楊旆掩龍城。

會勒燕然石。方傳車騎名。威字文蔚。沈邃有器局。貫覽羣言。諸兄詆爲書癡。武德初爲內史令。



唐詩紀事卷第六

上官儀

郭正一

喬知之

喬侃

員半千

任希古

蘇味道

杜審言

郭利正

吳少微

富嘉謨

李福業

王適

李崇嗣

上官儀

字游韶。陝州人。工詩。其詞綺錯婉媚。及貴人効之。曰上官體。

詠雪詩云。禁園凝朔氣。瑞雪掩晨曦。花明棗鳳閣。珠散影娥池。飄素迎歌上。翻花向舞移。幸因千里映。還繞萬年枝。

又奉和山夜臨秋詩云。殿帳清炎氣。輦道合秋陰。淒風移漢筑。流水入虞琴。雲飛送斷鴈。日上淨疎秋。滴瀝露枝響。空濛烟壑深。

又和穎川公秋夜詩云。沉寥空色遠。葉黃淒序變。洞浦落遵鴻。長飈送巢燕。千秋流夕景。萬籟含霄轉。峻雉聆金祇。曾臺切銀箭。(金祇未詳)

王昭君云。玉關春色晚。金河路幾千。琴悲桂條上。笛怨柳花前。霧掩臨牀月。風驚入鬢蟬。裁書待迴使。淚盡白日天。（日字未詳）

高宗承貞觀之後。天下無事。儀獨持國政。嘗凌晨入朝。巡洛水堤。步月徐轡。詠詩曰。脈脈廣川流。驅馬入長洲。鵲飛山月曙。蟬噪野風秋。音韻清亮。羣公望之。猶神仙焉。（右古今詩話）高宗卽位。儀爲相。麟德元年。坐梁王忠事。下獄死。武后惡之也。儀應詔詩中用影娥池。學士時無解其事。祭酒令狐德棻。召張柬之等十餘人。示此詩。柬之對云。洞冥記。漢武帝於望鶴臺西。起俯月臺。臺下穿影娥池。每登臺眺月影入池中。使宮人乘舟笑弄月影。因名影娥池。亦曰眺蟾臺。令狐德棻嘆其博識。

郭正一

定州人。永隆中平章事。武后專國。出刺陝州。與張楚金元萬頃。皆爲周興誣殺之。

和太子納妃公主。出降詩云。桂宮初服冕。蘭掖早升筭。禮盛親迎晉。聲芳出降齊。金龜開瑞鈕。寶翟上仙鞋。轉扇承霄月。揚旌照夕蜺。

喬知之

知之馮翊人。武后時爲補闕。

有綠珠篇云。石家金谷重新聲。明珠十斛買娉娉。昔日可憐君自許。此時歌舞得人情。君家閨閣不曾關。好將歌舞借人看。富貴英雄非分理。驕奢勢力橫相干。別君此去終不忍。徒勞掩淚傷紅粉。百年離別在高樓。一旦紅顏爲君盡。蓋知之有寵婢曰碧玉。知之爲之不婚。爲武承嗣所奪。知之以此歌寄之。而未句云。百年離別在高樓。一旦紅顏爲君盡。寵者結於衣帶投井而死。承嗣見詩大恨。知之坐此陷亡。

沈佺期贈知之古意云。盧家小婦鬱金堂。海燕雙栖玳瑁梁。九月寒砧催下蔡。十年征戍憶遼陽。白狼河北音書斷。丹鳳城南秋夜長。誰知含愁獨不見。使妾明月照流黃。

通鑑考異云。唐曆及本紀。殺知之在天授元年。據陳子昂別傳云。武攸宜討契丹。子昂知之爲參謀。尙在萬歲通天元年。子昂有西還至散關。答知之詩云。昔君事胡馬。余得奉戎旃。携手同沙塞。關河緬幽燕。歎此南歸日。猶聞北戍邊。是時未罷也。疑知之死在神功年後。或天授初。承嗣銜之。至是乃殺之耳。

### 喬侃

人日登高云。僕本多悲者。年來不悟春。登高一遊目。始覺柳條新。杜陵猶識漢。桃源不辨秦。整若昇雲霧。還似出囂塵。賴得烟霞氣。淹留攀桂人。

沈佺期送喬隨州侃云。結交三十載。同遊一萬里。情爲契闊生。心由離別死。拜恩前後人。從官差池起。今爾歸漢東。明珠報知己。

侃。武后時學士。預脩三教珠英知之之弟也。開元初。爲兗州都督。長安中。卒於襄陽。以文詞知名。

員半千

隴右途中遭非語云。趙有兩毛遂。魯聞二曾參。慈母猶且惑。况在行路心。冠冕無醜士。賄賂成知己。名利我所無。清濁誰見理。弊服空廷春。緩帶不着身。出遊非懷璧。何憂乎忘人。正須自保愛。振衣出世塵。

半千。字榮期。齊州人。嘗事王義方。義方曰。五百歲一賢者生。子宜當之。因改今名。始名餘慶。舉八科皆中。累爲洪文館學士。睿宗立。召爲太子右諭。德表丐骸骨事。五君有清白節。與王劇路敬淳石抱中武后時同爲洪文館學士。

任希古

字敬臣。棗州人。五歲喪母。七歲問父何以報母。父曰。揚名顯親可也。乃刻志從學。年十六。刺史崔樞欲舉秀才。自以學未廣。遞去。後舉孝廉。虞世南器其人。爲洪文學士。終太子舍人。



奉和太子納妃公主出降詩云。帝子陞青陛。王姬降紫宸。星光移雜珮。月彩薦重輪。龍旌翻地杪。鳳管颺天濱。槐陰浮淺瀨。葆吹翼輕塵。

和長孫祕監伏日苦熱云。玉署三時曉。金羈五日歸。北林開晚徑。東閣敞閑扉。池鏡分天色。雲峯減日輝。游鱗映荷聚。驚翰遶林飛。披襟楊子宅。舒嘯仰重闈。

和東觀羣賢七夕臨泛昆明云。秋風始搖落。秋水正澄鮮。飛眺牽牛渚。激賞鏤鯨川。岸珠淪曉魄。池灰斂曙煙。泛查分寫漢。儀星別架天。雲光波處動。月影浪中懸。驚鴻絳蒲弋。游鯉入莊筭。萍葉凝江上。菱花似鏡前。長林代輕幌。細草卽芳筵。文華開翠激。筆海控清漣。不挹蘭樽聖。空仰桂舟仙。

薛元超永徽初爲中書舍人薦希古郭正一王義方孟和貞崔融十餘人時論美之。

蘇味道

趙州人與里人李嶠號蘇李武后時爲相世號模稜手。

上元云。火樹銀花合。星橋鐵鎖開。暗塵隨馬去。明月逐人來。遊妓皆濃李。行歌盡落梅。金吾不惜夜。玉漏莫相催。

詠霧詩曰。氤氳超洞壑。遙裔匝平疇。乍似含龍劍。還疑映蜃樓。拂林隨雨密。度逕帶煙浮。

方謝公超步終從彥輔遊。

又詠虹詩曰。紆餘帶星渚。窈窕架天濤。空因壯士見。還共美人沉。逸照舍良玉。神光藻瑞金。獨留長劍彩。終負昔賢心。

贈封御史入臺詩云。故事惟三獨。茲辰對兩關。夕林鳴舞屈。春草接芳菲。盛府題清藁。殊章動繡衣。風連臺閣起。霜就簡書飛。凜凜當朝色。行行滿路威。唯當擊隼去。復覩落鵝歸。(舞屈字未詳)

又始背洛城秋郊。矚目奉懷臺中諸侍御詩云。薄遊忝霜署。直指戒冰心。荔浦方南紀。蘄皋暫北臨。山晴關塞斷。川暮廣城陰。場圃通圭甸。溝塍礙石林。野童求掘拾。田叟去謳吟。蟋蟀秋風起。蒹葭晚露深。帝城猶鬱鬱。征傳幾駸駸。迴憶披書地。勞歌謝所欽。

杜審言

和李大夫嗣真奉使存撫河東云。六位乾坤動。三微歷數遷。謳歌移火德。圖讖在金天。子月開階統。房星受命年。禎符龍馬出。寶籙鳳凰傳。地即交風雨。都仍卜澗瀨。明堂惟御極。清廟乃尊先。不宰神功運。無私大象懸。八荒平物土。四海接人煙。已屬羣生泰。猶言至道偏。璽書傍問俗。旌節近推賢。秩比司空位。官臨御史員。推詞執刀筆。直諫下樓船。國有大臣器。朝加小會

筵將行備禮樂。送別仰神仙。城闕周京轉。關河陝服連。稍觀汾水曲。俄指絳臺前。姑射聊長望。平陽遂宛然。舜耕餘草木。禹鑿舊山川。昔出諸侯爭。無何霸業全。中軍掃戰敵。外府絕兵權。隱隱帝鄉遠。瞻瞻肅命虔。西河偃風俗。東壁挂星躔。井邑枌榆社。陵園松柏田。榮光朝掩代。佳氣曉侵燕。雨霈鴻私滌。風行睿旨宣。悻悻訪疾苦。屠釣探貞堅。人樂逢刑措。時康洽賞延。賜踰秦氏給。恩倍漢家錢。擁傳咸翹首。稱觴競比肩。拜迎彌道路。舞詠溢郊鄘。殺氣西衡白。窮陰北土玄。飛霜遙度海。殘月迴臨邊。緬邈朝廷問。周流朔塞旋。興來探鳥策。俊發抱龍泉。學惣三千卷。文傾三百篇。澄清得使者。作頌有人焉。未以崇班闕。而云勝託捐。偉材何磊落。陋質幾翩翾。江海常爲讓。巴渝輒自牽。一聞歌聖道。助曲荷陶甄。(諸侯爭勝。托捐未詳。)

和韋承慶過義陽公山莊池五首

野興城中發。朝英物外求。情懸朱紱望。契動赤城遊。海燕巢書閣。山鷄舞畫樓。雨餘清晚夏。共坐北巖幽。巡轉危峯逼。橋斜缺岸妨。玉泉移酒味。石髓換花香。綰霧青條弱。牽風紫蔓長。猶言行樂少。別向後池塘。携琴遶碧沙。搖筆弄青霞。杜若幽庭草。芙蓉曲沼花。宴遊成點客。形勝得仙家。往往留仙步。登攀日易斜。攢石當軒倚。懸泉度牖飛。鹿麕衝妓席。鶴子曳童衣。園菓嘗難遍。池蓮摘未稀。卷簾先待月。應在醉中歸。賞翫奇他日。高深愛此時。池爲入水背。峯作九

山疑池靜魚偏逸。人閑鳥欲欺。青溪留別興。別與白雲期。

贈崔融詩云。十年俱薄宦。萬里各他方。雲天斷書札。風土異炎涼。太息幽蘭紫。勞歌奇樹黃。日疑懷叔度。夜似憶眞長。北使從江表。東歸在洛陽。相逢慰疇昔。相對叙存亡。草深窮巷毀。竹盡故園荒。雅節君彌固。衰顏余自傷。人事盈虛故。交游寵辱妨。雀羅爭去翟。鶴幣更尋王。思極歡娛至。明情詎可忘。速騎追佳賞。城中及路傍。琴樽橫宴席。巖冶臥詞場。三川宿雨霽。四月晚花芳。復此開懸榻。甯唯入後堂。興酣鷓鴣舞。言念鳳凰翔。高選俄遷職。嚴程已飭裝。撫躬銜道義。携手戀輝光。玉振先推美。金銘舊所防。勿嗟離別易。行役共時康。

贈蘇味道詩云。北地寒應苦。南庭戍不歸。邊聲亂羌笛。朔氣卷戎衣。雨雪關山暗。風霜草木稀。胡兵戰欲盡。漢卒尙重圍。雪淨妖星落。秋深塞馬肥。據鞍雄劍動。擗筆羽書飛。輿駕還京邑。朋遊滿帝畿。方期來獻凱。歌舞共春輝。

蓬萊三殿侍宴。奉勅詠終南山應制詩云。北斗掛城邊。南山倚殿前。雲標金闕迴。樹杪玉堂懸。半嶺通佳氣。中峯繞瑞煙。小臣持獻壽。長此戴高天。

子美贈閻丘師詩云。吾祖詩冠古。同年蒙主恩。謂審言以詩。閻丘均以字。同侍武后也。審言字必簡。襄州人。初貶吉州司戶。與同僚不叶。司馬周季重。司戶郭若訥。誣以罪繫獄。

審言子并。年十三。因季重醉讎。懷刃刺之。季重臨死曰。吾不如審言有孝子。若訥誤我。亦焉避害。審言因此免官還東郭。則天召將用之。問曰。卿喜否。審言舞蹈謝恩。因作懽喜笑。授著作郎。神龍初。坐交通張易之流峯州。入爲修文館學士。卒。將死。謂宋之問武平一曰。吾在。久壓公等。今日死。固大慰。但恨不見替人云。與李喬。崔融。蘇味道。爲文章四友。審言卒。李嶠已下。請加命。時武平一爲表云。審言舉鬱中朝。文高前列。是以升榮粉署。擢秀蘭臺。往以微瑕。久從遠謫。陛下膺圖玉屐。下制金門。收賈誼於長沙。返蔡邕於左校。審言獲登文館。預奉屬車。未獻長卿之辭。遽啓元瑜之悼。臣等積薪增愧。焚芝盈感。伏乞恩加朱紱。寵及幽泉。假飾終之儀。舉哀榮之典。庶弊帷莫棄。墜履無遺。乃贈著作郎。制曰。漢覃恩祐。方慶於同時。漳浦疴痾。忽歸於厚夜。蒿里修文之地。永闕音徽。蓬山著作之曹。宜加寵數。（開階統漢單字。俱未詳。）

郭利正

上元云。九陌連燈影。千門慶月華。傾城出寶騎。匝路轉香車。爛熳唯愁曉。周遊不問家。更逢清管發。處處落梅花。

吳少微

少微和崔日用游開元寺詩云。左憲多材雄。故人尤鷲鷯。護贈單于使。休軺太原郭。館次

厭煩歎。清懷尋寂寞。西緣十里餘。北上開花閣。初入雲樹間。冥蒙未昭廓。漸出欄檻外。萬里秋景焯。歲晏風落山。天寒水歸壑。覽物頌幽景。三乘動玄鑰。但敷利解言。永用忘昏著。

少微新安人。與富嘉謨齊名。友善。進士擢第。累授晉陽尉。與富嘉謨並拜監察御史。時臥疾。聞嘉謨亡。號哭賦詩曰。維三月癸丑。河南富嘉謨卒。予時寢疾於洛陽北里。聞之投枕而起。淚霑乎衽席。匍匐於寢門之外。病不能哭。仰天而呼曰。天乎。天乎。俾予曷所朋。曷可得而見乎。賦詩曰。吾友適不死。於戲社稷臣。直祿非造利。長懷大庇人。乃通承明籍。遇比敦牂春。藥厲其可畏。皇穹故匪仁。疇昔與夫子。孰云異天倫。同病一相失。茫茫不重陳。子之文章在其殆。尼父新鼓興。幹河岳。貞詞毒鬼神。可悲不可朽。車轆沒荒榛。聖主賢爲寶。吁茲大國貧。詞人莫不歎。美。旣而病亟。歎曰。生死人之大分。何恨焉。然官職十分。未作其一。乃至是耶。慷慨而終。

少微爲并州長史。張仁寶進九鼎銘。表其略曰。鼎者夏后氏作。羣牧貢金。遠方圖物。備諸山澤。以禦魍魎。厥後嗣德昏亂。鼎遷於商。夏之寶也。杞不足徵。殷既有之。又患失之。周德休明。神寶不墜。百代可繼。伏惟陛下。光大而當之。若乃崇貴之器。金玉之鼎。銘首山。發睢上。列太廟。序明堂。克明靈命。以奉上帝。非愚臣所敢議也。

明冰篇云。北陸蒼茫河海凝。南山闌干晝夜冰。素彩峨峨明月升。深山窮谷不自見。安知探斲備嘉薦。陰房固泫掩寒扇。陽春二月朝始噉。春光潭沲度千門。明冰時出御至尊。彤庭赫赫九儀備。腰玉煌煌千官事。明冰畢歲周在位。憶昔沙朔寒風漲。崑崙長河冰始壯。漫汗峻嶒積亭障。嚶嚶鳴鴈江上來。禁苑池臺冰復開。搖青涵綠映樓臺。豳歌七月王風始。鑿冰藏用昭物軌。四時不忒千萬祀。

嘉謨武功人。長安中爲晉陽尉。吳少微者亦尉晉陽。有魏倚谷者。爲太原主簿。時稱北京三傑。時天下文章尙徐庾。浮俚不競。嘉謨少微本經術。雅厚雄邁。人爭慕之。號吳富體。嘉謨終於右臺監察御史。張說論其文曰。如孤峯絕岸。壁立萬仞。濃雲鬱興。震雷俱發。誠可畏也。若施於廊廟。駭矣。

### 李福業

嶺外守歲詩云。冬去更籌盡。春隨斗柄迴。寒暄一夜隔。客鬢兩年催。  
福業調露二年登第。後爲御史。五王誅二張。亦與謀及誅。

### 王適

幽州人。終雍州司功參軍。

詠江濱梅云。忽見寒梅樹。開花漢水濱。不知春色早。疑是弄珠人。

陳子昂別傳云。幽人王適。見感遇詩曰。是必爲海內文宗矣。

蜀中言懷云。獨坐年將暮。常懷志不通。有時須問影。無事則書空。棄置如天外。平生似夢中。蓬心猶是客。華髮欲成翁。跡滯魂逾窘。情乖路轉窮。別離同夜月。愁畏隔秋風。老少悲顏叟。盈虛悟翟公。時來不可問。何用求童蒙。

李崇嗣

寒食絕句云。普天皆滅焰。匝地盡藏煙。不知何處火。來向客心燃。

覽鏡云。歲去紅顏盡。愁來白髮新。今朝開鏡匣。疑是逢故人。

獨愁云。聞道成都酒。無錢亦可求。不知將幾許。銷得北來愁。

陳子昂題李三書齋云。灼灼青春仲。悠悠白日昇。聲容何足恃。榮吝坐相矜。願與金庭會。將待玉書徵。還丹應有術。煙駕共君乘。

又別李參軍詩云。弦望如朝夕。甯嗟蜀道行。

又酬李參軍旅館見贈云。昨夜銀河半。星文犯遙漢。今朝紫氣新。物色果逢眞。君從天上落。乃是地僊人。白璧疑冤楚。烏裘似入秦。摧藏多古意。歷覽備艱辛。樂廣雲雖覩。夷吾風未春。



鳳歌空有問。龍性詎能馴。寶劍終應出。驪珠會見珍。未及馮公老。何驚孺子貧。青雲儻可致。北海憶孫賓。皆與福業酬唱也。

沈佺期黃口讚序云。聖曆中有勅東觀修書。黃口飛落鉛槧間。奉宸主簿李宗嗣。命采花哺之。河東薛曜。邀余爲讚。



唐詩紀事卷第七

高正臣

崔知賢

韓仲宣

周彥昭

高球

弓嗣初

高瑾

王茂時

徐皓

長孫正隱

高紹

郎餘令

陳嘉言

周彥輝

高嶠

周思鈞

劉友賢

王季子

東方虬

駱賓王

盧照隣

王勃勳  
勳

楊炯

田遊巖

高正臣

晦日置酒林亭詩云正月符嘉節三春翫物華忘懷寄罇酒陶性狎山家柳翠含煙葉梅芳帶雪花光陰不相借遲遲落景斜

晦日重宴云芳辰重遊衍乘景共追隨班荆陪舊識傾蓋得新知水葉分蓮沼風花落柳枝自符河朔趣甯羨山陽池

正臣廣平人官至衛尉卿習右軍書法睿宗最愛其筆晦日宴高氏林亭凡二十一人皆

以華字爲韻。子昂爲之序曰。有渤海之宗英。是平陽之貴戚。發揮鳳臺而嘯侶。幽贊鷄川而留宴。又曰。冠纓濟濟。多延戚里之賓。鸞鳳鏘鏘。自有文雅之客。

晦日重宴。八人皆以池字爲韻。周彥暉爲之序。上元夜効小庾體詩。六人以春字爲韻。長孫正隱爲之序。

崔知賢

晦日林亭云。上月河陽地。芳辰景望華。綿蠻變時鳥。昭曜起春霞。柳搖風處色。梅散日前花。淹留洛城晚。歌吹石崇家。

上元夜効小庾詩云。今夜啓城闌。結伴戲芳春。鼓聲撩亂動。風光觸處新。月下多遊騎。燈前饒看人。歡樂無窮已。歌舞達明晨。

韓仲宣

晦日林亭云。欲知行有樂。芳嶼對物華。地接安仁縣。園是季倫家。柳處雪疑葉。梅間雪似花。日落歸途遠。留與伴烟霞。

晦日重宴詩云。鳳苑先吹晚。龍樓夕照披。陳遵已投轄。山公正坐池。落日催金奏。飛霞送玉卮。此時陪綺席。不醉欲何爲。

上元夜効小庾體云。他鄉月夜人。相伴看燈輪。光隨九華出。影共百枝新。歌鍾盛北里。車馬沸南隣。今宵何處好。惟有洛城春。

周彥昭

晦日林亭云。勝地臨鷄浦。高會偶龍沙。御柳驚春色。仙筇掩月華。門邀千里馭。杯泛九光霞。日落山亭晚。雷送七香車。

高球

晦日林亭云。溫洛年光早。皇州景望華。連鑣尋上路。乘輿入山家。輕苔網危石。春水架平沙。賞極林塘暮。處處起烟霞。

弓嗣初

晦日林亭云。上序春輝麗。中國物候華。高才盛文雅。逸興滿煙霞。參差金谷榭。皎鏡碧塘沙。蕭散林亭晚。倒戴欲還家。

晦日重宴云。年華藹芳隰。春溜滿新池。促賞依三友。延歡寄一卮。鳥聲隨管變。花影逐風移。行樂方無極。淹留惜晚曦。

嗣初咸亨二年第一人登第。

高瑾

晦日林亭云。試入山亭望。言是石崇家。二月風光起。三春桃李華。鶯吟上喬木。鴈往息平沙。相看會取醉。甯知還路賒。

晦日重宴云。忽聞鶯響谷。於此命相知。正開彭澤酒。來向高陽池。柳葉風前弱。梅花影處危。賞洽林亭晚。落照下參差。

上元夜效小庾體云。初年三五夜。相知一兩人。連鑣出巷口。飛轂下池濬。燈下恰似月。人面併如春。遨遊終未已。相歡待日輪。

瑾士廉之孫。登咸亨元年進士第。

王茂時

晦日林亭云。勝踐尋良會。乘春翫物華。還隨張放友。來向石崇家。止水分巖鏡。開庭枕浦沙。未極清泉賞。參差落照斜。

徐皓

晦日林亭云。綺筵乘暇景。瓊醕對年華。門多金埒騎。路引璧人車。蘋早猶藏葉。梅殘正落花。藹藹林亭晚。餘興促流霞。

長孫正隱

晦日林亭云。梅晚屬煙霞。遨遊重歲華。歌鍾雖戚里。林藪是山家。細雨猶開日。深池不漲沙。淹留迷處所。巖岫幾重花。

上元夜效小庾體詩云。薄晚嘯遊人。車馬亂驅塵。月光三五夜。燈焰一重春。烟雲迷北闕。簫管識南隣。洛城終不閉。更出小平津。

正隱序上元之遊云。九谷帝畿。三川奧域。交風均露。上分朱鳥之躔。沂洛背河。下鎮蒼龍之闕。多近臣之第宅。卽躡銅街。有貴戚之樓臺。自連金穴。美人競出。錦幃如霞。公子交馳。雕鞍似月。同遊洛浦。疑尋稅馬之津。爭渡河橋。似向牽牛之渚。實昌年之樂事。令節之佳遊者焉。

高紹

晦日林亭云。嘯侶入山家。臨春翫物華。葛絲調綵水。桂醕酌丹霞。岸柳開新葉。庭梅落早花。興洽林亭晚。方還倒戴車。

紹爲考功郎中。

郎餘令

晦日林亭云。三春休晦節。九谷泛年華。半晴餘細雨。全晚澹殘霞。樽開疎竹葉。管應落梅

花興闌相顧起。流水送香車。

餘令定州人博學擢第。授霍王元軌府參軍事。從父知年亦爲王友。元軌每日。郎家二賢皆入府。不意培塿而松柏爲林也。改著作郎。卒。

餘令善畫。唐祕書省內落星石。薛稷畫鶴。賀知章草書。餘令鳳相傳爲四絕。元和中。韓公武爲校書郎。挾彈中鵠一眼。乃謂之五絕。

陳嘉言

晦日林亭云。公子申敬愛。携朋翫物華。人是平陽客。地卽石崇家。水文生舊圃。風色滿新花。日暮連歸騎。長川照晚霞。

晦日重宴云。高門引冠蓋。下客抱支離。綺席珍羞滿。文場藻翰攜。囊華彫上月。柳色藹春池。日斜歸戚里。連騎勒金羈。

上元夜效小庾體云。今夜可憐春。河橋多麗人。寶馬金爲絡。香車玉作輪。連手窺潘掾。分頭看洛神。重城自不掩。出向小平津。

武后時。酷吏也。中宗神龍中。詔酷吏陳嘉言等。其身已死。自垂拱已來。枉濫殺人。有官者。並令削奪。開元中。御史程行誼奏。酷吏來子珣等。二十三人。情狀尤重。子孫不許與官。陳嘉言。



魚承暉。皇甫文備。傳遊藝。四人情狀稍輕。子孫不許近任。

周彥輝

晦日林亭云。砌裏收晦魄。津柳競年華。旣狎忘筌友。方淹投轄車。綺筵迴舞雪。瓊醕泛流霞。雲低上天晚。絲竹帶風斜。

晦日重宴云。春華歸柳岸。晦景落棠枝。置驛銅街石。開筵玉浦陲。林煙含障密。竹雨帶珠危。興闌巾倒戴。山公下習池。

彥輝登咸亨五年進士。

高嶠

晦日林亭云。飛歡寫春望。開宴坐汀沙。積溜含苔色。晴空蕩日華。歌人平陽第。舞對石崇家。莫慮能騎馬。投轄自停車。

晦日重宴云。駕言尋鳳侶。乘歡俯鴈池。班荆逢舊識。樹桂喜深知。紫蘭方出巡。黃鶯未嚙枝。別有陶春日。青天雪霧披。

嶠爲司門郎中。

周思鈞

北門學士思茂之弟也。武后時爲太子文學。劉祿之賜死。在獄上疏自陳。臨誅洗沐。神色自若。自捉筆爲表。詞懇哀到。思鈞帳嘆其文。后惡之。貶楊州司倉參軍。和高氏林亭晦日文宴云。早春驚柳毳。初晦掩萸華。騎出平陽里。筵開衛尉家。竹影含雲密。池紋帶雨斜。重惜林亭晚。上路滿煙霞。

重宴又云。綺筵乘晦景。高宴下陽池。溜雨梅香散。含風柳色移。輕塵依扇落。流水入絃危。勿顧林亭晚。方歡雲霜披。

思鈞以中書舍人卒。子瑛爲單父令。瑛以女適武。就生靖。安丞相元衡。

劉友賢

晦日林亭云。春來日漸賒。琴酒逐年華。欲向文通徑。先游武子家。池碧新流滿。巖紅落照斜。興闌情未旣。步步惜風花。

已上並高氏林亭之客。外陳子昂。張錫。王勔。解琬。各載其門。

于季子

漢高祖云。百戰方夷項。三章且代秦。功歸蕭相國。氣盡戚夫人。

詠雲詩云。瑞雲千里映。祥輝四望新。隨風亂鳥足。汎水結魚鱗。布葉疑臨夏。開花詎待春。

願得承嘉景。無令掩桂輪。

季子登咸亨進士第。

南方虬

詠春雪云。春雪滿空來。觸處似花開。不知園裏樹。若箇是真梅。

陳子昂寄東方左史修竹篇序云。文章道弊。五百年矣。漢魏風骨。晉宋莫傳。然而文獻有可證者。常觀齊梁詩。彩麗競繁。而興寄都絕。每以永嘆。昨見明公孤桐篇。骨氣端翔。音韻頓挫。光英明韶。有金石聲。遂用洗心收視。發揮幽鬱。不圖正治之音。復覩於茲。

虬。武后時爲左史。嘗曰。百年後可與西門豹作對。

盛賓王

帝京篇云。山河千里國。城闕九重門。不覩皇居壯。安知天子尊。皇居地里嶠。兩谷鶉野龍。山侯甸服。五緯連影。集星躔。八水分流。橫地軸。秦塞重關。一百二。漢家離宮。三十六。桂殿陰岑。對玉樓。椒房窈窕。連金屋。三條九陌。麗城隈。萬戶千門。旦開。複道斜通。鳩鵲觀。交衢直指。鳳凰臺。劍履南宮入。舞纓北闕來。聲明冠寰宇。文物象昭回。鈞陳肅蘭祀。璧沼浮槐市。銅羽應風迴。金莖承露起。校文天祿閣。習戰昆明水。朱邸枕平臺。黃扉通戚里。平臺戚里帶崇墉。灼金饌。

玉待鳴鍾。小堂綺帳。三千萬。大道青樓。十二重。寶蓋彫鞍。金絡馬。蘭窓繡桂。玉盤龍。綺柱璇題。粉壁映。鏘金鳴玉。王侯盛。王侯貴人多近臣。朝遊北里暮南鄰。陸賈分金將讌喜。陳遵投轄尙留賓。趙李經過密。蕭朱交結親。丹鳳朱城白日暮。青巾繡幃紅塵度。俠客珠彈垂楊道。倡婦銀鈎采薪路。倡家桃李自芳菲。京華遊俠盛輕肥。延年女弟雙飛入。羅敷使君千騎歸。同心結縷帶。連理織羅衣。春朝桂樽樽百味。秋夜蘭燈燈九微。翠幌珠簾不獨映。清歌寶瑟自相依。且論二八千金是。寧知四十九年非。古來榮利若浮雲。人生倚伏信難分。始見田竇相移奪。俄聞衛需有功勳。未厭金陵氣。先開石櫛文。朱門無復張公子。霸亭誰畏李將軍。相顧百齡皆有待。居然萬化成應改。桂枝芳氣已銷亡。柏梁高宴今何在。莫矜一旦擅豪華。自言千載長驕奢。倏忽搏風生羽翼。須臾失浪委泥沙。黃雀徒巢桂。青門遂種瓜。黃金銷鑠素絲變。一貴一賤交情見。紅顏宿昔白頭新。脫粟布衣輕故人。故人有湮淪。新知無意氣。灰死韓安國。羅傷翟庭尉。已矣哉。歸去來。馬卿辭蜀多文藻。楊雄仕漢乏良媒。三冬自矜成足用。十年不調幾遭迴。汲黯薪逾積。孫弘閣未開。誰惜長沙傅。獨負洛陽才。

世稱王楊盧駱。楊盈川之爲文。好以古人姓名連用。如張平子之略談。陸士衡之所記。潘安仁宜其陋矣。仲長統何足知之。號爲點鬼簿。竇王文好以數對。如秦地重關一百二。漢家雖宮三

十六人號爲算博士。帝京篇曰：倏忽搏風生羽翼，須臾失浪委泥沙。賓王後與徐敬業興兵揚州，大敗逃死，此其讖也。

宋之問貶黜放還，至江南遊靈隱寺。夜月極明，長廓行吟曰：鷲嶺鬱岧峣，龍宮鏤寂寥。句未屬，有老僧點長明燈，問曰：少年夜久不寐，何耶？之問曰：適偶欲題此寺，而興思不屬，僧請吟上聯，卽曰：何不云：樓觀滄海日，門對浙江潮。之問愕然，訝其逾麗，又續終篇曰：桂子月中落，天香雲外飄。捫羅登塔遠，剝木取泉遙。霜薄花更發，冰輕葉互凋。待入天台路，看余渡石橋。遲明更訪之，則不復見矣。寺僧有知者曰：此賓王也。詠月云：忌滿光先缺，乘昏影暫流。旣能明似鏡，何用曲如鉤。

賓王，義烏人，七歲能賦詩。武后時，數上疏言事，除臨海丞，鞅鞅不得志，棄官去。徐敬業亂，以爲府屬，敬業爲檄武后罪，后讀但嘻笑。至一杯之土未乾，六尺之孤安在，矍然曰：誰爲之。或以賓王對，后曰：宰相安得失此人。敬業敗，亡命不知所之。中宗時，詔求其文，得數百篇。

賓王七歲詠鵝云：鵝鵝曲頂向天歌，白毛浮綠水，紅掌撥清波。

### 盧照隣

結交少年場云：長安重遊俠，洛陽富才雄。玉劍浮雲騎，金鞭明月弓。鬪鷄通渭北，走馬向

關東孫賓遙見待。郭解暗相通。不受千金爵。誰論萬里功。將軍下天上。虜騎入雲中。烽火夜似月。兵氣曉成虹。橫行徇知己。負羽遠征戎。龍旌昏朔霧。鳥陣卷寒風。追奔瀚海咽。戰罷陰山空。歸來謝天子。何如馬上翁。

詠史云。昔有平陵男。姓朱名阿游。直髮上衝冠。壯氣橫三秋。願請斬馬劍。先斷佞臣頭。天子玉檻折。將軍丹血流。捐生不肯拜。視死其若休。歸來教鄉里。童蒙遠相求。弟子數百人。散在十二州。三公不敢吏。五鹿何能誦。名與日月懸。義與天壤儔。何必疲執戟。區區在封侯。偉哉曠達士。知命固不憂。

季生昔未達。身辱功不成。髡鉗爲臺隸。灌園變姓名。幸逢滕將軍。兼遇曹丘生。漢祖廣招納。一朝拜公卿。百金孰爲重。一諾良匪輕。廷議斬樊噲。羣公寂無聲。處身孤且直。遭時坦而平。丈夫當如此。唯唯何足榮。大漢昔云季。小人道遂振。玉帛委關尹。斧鑕嬰摺紳。邈哉郭先生。卷舒得其真。雍容謝朝廷。譚笑獎人倫。在晦不絕俗。處亂不爲親。諸侯不得友。天子不得臣。冲情甄負甑。重價折角巾。悠悠天下士。相送洛橋津。誰知仙舟上。寂寂無四隣。

公業負奇志。交結盡才雄。良田四百頃。所食常不充。一爲侍御史。慷慨說何公。何公何爲敗。吾謀適不同。仲穎恣殘忍。廢誠良在躬。死人如亂麻。天子如轉蓬。干戈及黃屋。荆棘生紫宮。

鄭生運其謀。將以清國戎。時來命不遂。脫身歸山東。凜凜千載下。穆如懷清風。

元日述懷云。策仕無中秩。歸耕有外臣。人歌小歲酒。花舞大唐春。草色薰三徑。風光動四隣。願得長如此。年年物候新。

七夕泛舟云。汀葭肅徂暑。江樹起初涼。水疑通織室。舟似泛仙潢。連棹渡急響。鳴棹下浮光。日晚菱歌唱。風煙滿夕陽。

鳳杼秋期至。鳧舟野望開。微吟翠塘側。延想白雲隈。石似支機罷。杳疑犯宿來。天潢殊漫漫。日暮獨悠哉。

照隣字昇之。范陽人。調新都尉。病去官。足孱。一手又廢。乃居具茨山下。自以爲高宗尙吏。已獨儒。武后尙法。已獨黃老。后封嵩山。屢聘賢士。已獨廢。著五悲文。以自明。病旣久。與親屬訣。自沈穎水。

王勃 勸 勵

裴行儉在吏部。見蘇味道。王勳曰。二君後皆掌銓衡。李敬玄盛稱王勃。楊炯。盧照隣。駱賓王。行儉曰。勃等雖有才。然浮躁銜露。豈享爵祿者。炯頗沉默。可至今長。餘皆不得其死。

勸晦日宴高氏林亭詩云。上序披林館。中京視物華。竹窻低露葉。梅逕起風花。景落春臺

霧池侵舊渚。沙綺筵歌吹。晚暮雨泛香車。

勃爲文。先磨墨數升。引被覆面而臥。忽起書之。初不加點。時謂腹囊。滕王閣記。落霞孤鶩之語。至今稱之。其詩甚多。如畫棟朝飛。南浦雲珠簾暮捲。西山雨上已云。綠齊山葉滿。紅曳片芝銷。九日云。蘭氣添新酌。花香染別衣。又詠風云。肅肅涼景生。加我林壑情。驅烟入洞戶。卷霧出山楹。去來固無跡。動息如有情。日落山水靜。爲君起松聲。最有餘味。真天才也。

勳。開元中任中書舍人。先是五王出閣。同日受冊。有司忘載冊文。百官在列。方知闕禮。勳召五吏執管授。一時俱畢。

勃爲沛王府修撰。時諸王鬪鷄。勃戲爲文檄英王鷄。高宗曰。是且交觀。斥出府。勃既廢官。劍南嘗登葛嶺山。曠望慨然。思諸葛之功。賦詩見情。爲魏州參軍。坐罪除名。父福時以左遷交附。令勃往省。度海溺水。瘞而卒。年二十九。勳勳以事坐誅。

楊炯

夜送趙縱云。趙氏連城壁。由來天下傳。送君還舊府。明月滿秦川。

張燕公贈別盈川箴云。杳杳深谷。森森喬木。天與之才。或解其祿。君服六藝。道德爲尊。君居百里。風化之源。才勿驕恣。政勿苛煩。明神是福。而小人不寃。畏其不畏。存其不存。作誥茲酒。



成敗之根。勒銘其口。禍福之門。雖有韶夏。勿棄擊轅。豈無車馬。敢贈一言。

炯。華陰人。永隆二年。皇太子已釋奠。求豪俊。充崇文館學士。後爲盈川令。說以箴贈行。戒其苛。至官。果以嚴酷稱。不爲人所多。卒官。中宗時。贈著作郎。

田遊巖

遊巖云。洪農清巖曲。有磐石可坐。宋十一每拂拭待余。寄詩贈之云。信彼稱靈石。居然狎遁棲。徘徊承翠巘。斌駁帶深溪。夕陰起層岫。清景半虹蜺。風來應嘯阮。波渡可琴嵇。僕也穎陽客。望彼空思齊。儻見山人至。簪蒿且杖藜。

宋之問答云。家臨清溪水。溪水繞磐石。綠羅四面垂。纓裳百餘尺。風泉度絲管。苔蘚鋪茵席。傳聞穎陽人。霞外漱靈液。忽枉巖中翰。吟臥復朝夕。何當遂遠遊。物外候逋客。

遊巖。京兆人。隱箕山。高宗幸嵩山。遣薛元超就問其母。帝親至其門。帝曰。先生比佳否。答曰。臣所謂泉石膏肓。烟霞痼疾者。敢赴都拜崇文館學士。進太子洗馬。裴炎死。坐素厚善。放還山。



唐詩紀事卷第八

陳子昂

邵大震

李日知

李景百

劉棹子

王無競

袁恕已

郭元震

崔融

張昌齡

陳子昂

字伯玉梓州人資褊躁然好施子篤朋友與陸餘慶王無競房融崔泰之盧藏用趙元最厚唐興文章承徐庾餘風子昂始變雅正爲感遇詩三十八篇王適曰是必爲海內文宗

子昂趙貞固盧藏用杜審言宋之問畢隆澤郭襲微司馬承禎釋懷一陸餘慶號方外十友

盧黃門藏用曰道喪五百歲而得陳君（顏真卿曰若激昂頽俗雖無害於過正權其中論不亦傷於厚誣與沈隱侯論謝康樂靈均以來此秘未覩同也）開寶中梓州刺史郭廷謂以詩哭之略曰魄逐東流水墳依獨坐山

退之薦士詩曰國朝盛文章子昂始高蹈黃門侍郎盧藏用祭文曰天之生也珠圓流兮

玉方潔。子之歿也。太山頽兮良玉折。士林閔寂兮人物疎。門館蕭條兮賓侶絕。嘆佳城之不返。辭玉階而長別。嗚呼。置酒祭子子不顧。亢聲哭子子不迴。唯天道而無託。但無心而已摧。

獨異記載。子昂初入京。不爲人知。有賣胡琴者。價百萬。豪貴傳視無辯者。子昂突出。謂左右曰。箏千緡市之。衆驚問。答曰。余善此樂。皆曰。可得聞乎。曰。明日可集宣揚里。如期偕往。則酒肴畢具。置胡琴於前。食畢。捧琴語曰。蜀人陳子昂。有文百軸。馳走京穀。碌碌塵土。不爲人知。此樂賤工之役。豈宜留心舉而碎之。以其文軸。遍贈會者。一日之內。聲華溢郡。時武攸宜爲建安王。辟爲書記。

咸遇詩云。微月生西海。幽陽始代昇。圓光正東滿。陰魄已朝凝。太極生天地。三元更廢興。至精諒斯在。三五誰能徵。(其一)

蘭若生春夏。芊蔚何青青。幽獨空林色。朱蕤冒紫莖。遲遲白日晚。嫋嫋秋風生。歲華盡搖落。芳意竟何成。(其二)

蒼蒼丁零塞。今古緬荒途。亭候何摧兀。暴骨無全軀。黃沙暮南起。白日隱西隅。漢甲三十萬。曾以事匈奴。但見沙場死。誰憐塞上孤。(其三)

樂羊爲魏將。食子殉軍功。骨肉且相薄。他人安得忠。吾聞山中相。乃屬放麇翁。孤獸猶不

忍况以奉君終（其四）

市人矜巧智。於道若童蒙。傾奪相夸侈。不知身所終。曷見玄真子。觀世玉壺中。杳然遺天地。乘化入無窮（其五）

吾觀龍變化。乃知至陽精。石林何冥密。幽洞無留行。古之得仙道。信與元化并。玄感非象識。誰能測淪冥。世人拘目見。酣酒笑丹經。崑崙有瑤樹。安得采其英（其六）

白日每不歸。青陽時暮矣。茫茫吾何思。林臥觀無始。衆芳委時晦。鷓鴣悲鳴耳。鴻荒古已頽。誰識巢居子（其七）

吾觀崑崙化。日月淪洞冥。精魄相交會。天壤以羅生。仲尼推太極。老聃貴窈冥。西方金仙子。崇議乃無明。空色皆寂滅。業緣定何成。名教信紛糶。死生俱未停（其八）

聖人祕元命。懼世亂其真。如何嵩公輩。談譎誤時人。先天誠爲美。階亂禍誰因。長城備胡寇。羸禍發其親。赤精旣迷漢。子年何救秦。去年桃李花。多言死如麻（其九）

深居觀羣動。怫然爭朵頤。羣動相啖食。利害紛疑疑。便便夸毗子。榮耀更相持。務光讓天下。商賈競刀錐。已矣行采芝。萬世同一時（其十）

吾愛鬼谷子。青谿無垢氛。囊刮經世道。遺身在白雲。七雄方龍鬪。天下亂無君。浮榮不足

貴導養晦時文。舒可彌宇宙。卷之不盈分。豈徒山木壽。空與麋鹿羣。（其十一）

呦呦南山鹿。離罟以媿和。招搖青桂樹。幽蠹亦成科。世情甘近習。榮耀紛如何。怨憎未相復。親愛生禍羅。瑤臺傾巧笑。玉杯殞雙娥。誰見枯城蘖。青青成斧柯。（其十二）

林居病時久。水木澹孤清。閑臥觀物化。悠悠念無生。青春始萌達。朱玉已滿盈。殞落方自此。感歎何時平。（其十三）

臨歧泣世道。天命良悠悠。昔日殷王子。玉馬遂朝周。寶鼎淪伊穀。瑤臺成古丘。西山傷遺老。東陵有故侯。（其十四）

貴人難得意。賞愛在須臾。莫以心如玉。探他明月珠。昔稱天桃子。今爲舂市徒。鷓鴣悲東國。麋鹿泣沾蘇。誰見鷓鴣子。扁舟去五湖。（其十五）

聖人去已久。公道緬良難。蚩蚩夸毗子。堯禹以爲謾。驕榮貴工巧。勢利迭相干。燕玉尊樂毅。分國願同歡。魯連讓齊爵。遺組去邯鄲。伊人信往矣。感激爲誰歎。（其十六）

幽居觀大運。悠悠念羣生。終古代興沒。豪聖莫能爭。三季淪周赧。七雄滅秦嬴。復聞赤精子。提劍入咸京。炎光旣無象。晉虜紛縱橫。堯禹道已昧。昏虐勢方行。豈無當世雄。天道與胡兵。咄咄安可言。時醉而未醒。仲尼溺東夏。伯陽遁西溟。大運自古來。旅人胡歎哉。（其十七）

透迤世已久。骨鯁道斯窮。豈無感激者。時俗頽此風。灌園何其鄙。皎皎於陵子。世道不相容。嗟嗟張長公。（其十八）

聖人不利己。憂濟在元元。黃屋非堯意。瑤臺安可論。吾聞西方化。清淨道彌敦。奈何窮金玉。彫刻以爲尊。雲架山林盡。瑤圖珠翠煩。鬼功尙未可。人力安能存。夸愚適增累。矜智道逾昏。（其十九）

玄天幽且默。羣議曷嗤嗤。聖人教猶在。世運久陵遲。一繩將何繫。憂醉不能持。去去行采芝。勿爲塵所欺。（其二十）

蜻蛉遊天下。與世本無患。飛飛未能止。黃雀來相干。穰侯富秦寵。金石比交歡。出入咸陽裏。諸侯莫敢言。甯知山東客。激怒秦王肝。布衣取丞相。千載爲辛酸。（其二十一）

微霜知歲宴。斧柯始青青。況乃金天久。浩露齒羣英。登山望宇宙。白日已西溟。雲海方蕩漭。孤鱗安得甯。（其二十二）

翡翠巢南海。雌雄珠樹林。何知美人意。驕愛比黃金。殺身炎洲裏。委羽玉堂陰。旖旎光首飾。葳蕤爛錦衾。豈不在遐遠。虞羅忽見尋。多材信爲累。歎息比珍禽。（其二十三）

挈餅者誰子。姣服當青春。三五明月滿。盈華不自珍。高坐委金玉。微縷懸千鈞。如何負公

鼎被微笑時人（其二四）

寒蟬號白露。茲歲已蹉跎。羣物從大化。孤英將奈何。瑤臺有青鳥。遠食玉山禾。崑崙見玄

鳳。豈復羅雲龍（其二五）

荒哉穆天子。始與白雲期。宮女多怨曠。層城閉峨眉。日晚瑤臺樂。豈傷桃李時。青苔空萎

絕。白髮生羅帷（其二六）

朝發宜都渚。浩然思故鄉。故鄉不可見。但見巫山陽。巫山彩雲沒。高丘正微茫。佇立望已

久。涕淚霑衣裳。豈慈越鄉感。憶昔楚襄王。朝雲無處所。荆國亦淪亡（其二七）

昔日章華宴。荆生樂荒淫。霓旌翠羽蓋。射咒雲夢林。竭來高堂觀。悵望陽雲岑。雄圖今何

在。黃雀空哀吟（其二八）

丁亥歲云暮。西山事甲兵。嬴糧市邛道。荷戟爭羌城。嚴冬陰風勁。窮岫油雲生。昏黯無晝

夜。羽檄復相驚。

拳跼兢萬仞。崩危走九冥。籍籍峯壑裏。哀哀冰雪行。聖人御宇宙。聞道太階平。肉食謀何

朱。藜藿緬縱橫（其二九）

可惜瑤臺樹。灼灼佳人姿。碧華映朱實。攀折青春時。豈不盛光寵。榮君白玉墀。但恨紅芳



敬。凋傷感所思。（其三十）

劫來豪遊子。勢利禍之門。如何蘭膏歎。感激自生怨。衆趨明所避。時棄道猶存。雲泉旣已失。羅網與誰論。箕山有高節。湘水有清源。唯應白鷗鳥。可爲洗心言。（其三一）

索居猶幾日。炎夏忽然衰。陽彩皆陰翳。親友盡睽違。登山望不見。涕泣久漣瀉。宿昔感顏色。若與白雲期。世中驕豪子。驅逐正嗷嗷。蜀山與楚水。携手在何時。（其三二）

金鼎合神丹。世人將見欺。飛飛騎羊了。胡乃在峨眉。變化固幽類。芳菲能幾時。疲疴苦淪世。憂悔日侵淄。眷然顧幽褐。白雪空涕洟。（其三三）

朔風吹海樹。蕭條邊已秋。亭上誰家子。哀哀明月樓。自言陰燕客。結髮事遠遊。赤丸殺公吏。白刃報私讎。避仇至海上。被役此邊州。故鄉三千里。遼水復悠悠。每憤胡兵入。常爲漢國羞。何知七十載。白首未封侯。（其三四）

本爲貴公子。平生實憂才。感時思報國。拔劍起蒿萊。西馳丁令塞。北上單于臺。登山見千里。懷古心悠哉。誰言未忘禍。磨沒成塵埃。（其三五）

浩然坐何慕。吾蜀有峨眉。念與楚狂子。悠悠白雲期。時哉悲不會。涕泣久漣瀉。夢登西山穴。南采巫江芝。探元觀造化。遺出從雲螭。婉戀將永矣。感悟不見之。（其三六）

朝入雲中郡。北望單于臺。胡秦何密邇。沙朔氣雄哉。藉藉天驕子。猖狂已復來。塞垣無名將。亭堠空崔嵬。咄嗟吾何歎。邊人塗草萊。（其三七）

仲尼探元化。幽鴻順陽和。大運自盈縮。春秋遞來過。首颺忽號怒。萬物相紛劇。溟海皆震蕩。孤鳳其如何。（其三八）

邵大震

菊花叢  
九日登玄武山旅眺云。九月九日望遙空。秋水秋天生夕風。寒鴈一向南飛遠。遊人幾度

盧照隣和云。九月九日眺山川。歸心歸望積風烟。他鄉共酌金花酒。萬里同悲鴻鴈天。  
玄武山在今東蜀。高宗時王勃以檄鷄文斥出沛王府。既廢。客劍南。有遊玄武山賦詩。照隣爲新都尉。大震其同時人也。

勃詩云。九月九日望鄉臺。他席他鄉送客杯。人今已厭南中苦。鴻鴈却從北地來。

李日知

鄭州人。景龍初爲相。初安樂公主館第成。中宗臨幸。燕從官賦詩。日知卒。章曰。所願但知居者樂。無使時稱作者勞。獨以規誡。睿宗他日謂曰。嚮時雖朕亦不敢諫。非卿亮直。何能爾。卽

拜侍郎（亮直唐書本傳作挺直）

李景伯

中宗宰相懷遠之子。景龍初爲諫議大夫。中宗宴侍臣。酒酣各命爲迴波辭。景伯獨爲箴規語。帝不悅。肅至忠曰。眞諫官也。

迴波辭曰。迴波爾持酒卮。微臣職在箴規。侍宴旣過三爵。喧譁切恐非宜。

劉璋之

字希夷。常州人。與孟利貞、高智周、郭正一俱有名。號劉孟高郭。上元中與元萬頃等偕召入禁中。論次新書。高宗又密與參決時政。以分宰相權。時謂北門學士。武后時以罪賜死。

九成宮秋初應制詩云。玄圃疏金闕。仙臺駐玉鑾。野分仙鷲岫。路接寶鷄壇。林樹千霜積。山宮四序寒。蟬急知秋早。鶯疎覺夏闌。怡神紫氣外。凝涕白雲端。舜海詞波發。空驚游聖難。

和太子納妃公主出降詩曰。夢梓青光陞。穠桃藹紫宮。德優宸念遠。禮備國姻崇。萬戶聲明發。三條騎吹通。香輪送重景。綵旆引仙虹。

奉和別越王詩云。周屏辭金殿。梁驂整玉珂。管聲依折柳。琴韻動流波。鶴蓋分陰促。龍軒別念多。延襟小山路。還起大風歌。

王無競

字仲列。宋太尉弘之裔。豪氣縱。下筆成章。爲殿中侍御史。張易之等誅。坐嘗交貶廣州。仇家矯制榜殺之。巫山詩云。神女向高唐。巫山下夕陽。徘徊作行雨。婉孌逐荆王。電影江前落。雷聲峽外長。霧雲無處所。臺館曉蒼蒼。

宋之問下山歌云。懷嵩丘兮所思。携佳人兮步遲。松間明月長如此。君再遊兮復何時。無競和云。日云暮兮嵩山路。連綿兮樹石間。谷口兮見明月。心徘徊兮不能還。

袁恕已

詠屏風云。綺閣雲霞滿。芳林草樹新。鳥驚疑欲曙。花笑不關春。山對彈琴客。溪流垂釣人。請看車馬客。行處有風塵。

恕已。滄州人。與誅二張。相中宗及貶。周利正逼殺之。

郭元震

古劍歌云。君不見。昆吾鐵冶飛炎煙。紅光紫氣俱赫然。良工鍛鍊凡幾年。鑄得寶劍名龍泉。龍泉顏色如霜雪。良工嗟咨歎奇絕。琉璃玉匣吐蓮花。錯鏤金環生明月。正逢天下無風塵。幸得用防君子身。精光黯黯青蛇色。文章片片綠龜鱗。非直結交遊俠子。亦曾親近英雄人。何

言中路遭棄捐。零落飄淪古獄邊。雖復沉埋無所用。猶能夜夜氣衝天。（子美過代公故宅詩云。壯公臨事斷。顧步涕橫落。高詠寶劍篇。神交付溟漠。）

元振尉通泉。任挾使氣。撥去小節。武后知所爲。召欲詰。既與語。奇之。索所爲文章。上寶劍篇。后覽嘉嘆。詔示學士李嶠等。

久戍人偏老。長征馬少肥。元振警句也。元振嘗山居。夜有人面如盤出燈下。元振以此詩題其頰。遂滅。明日出行。巨木上有白耳。此句在焉。

元振。魏州人。年十六。與薛稷。趙彥昭。同爲大學生。資雄邁。景雲中位宰相。

### 崔融

融。字成安。齊州人。擢八科高第。與李嶠。蘇味道。王紹宗。附易之兄弟。杜審言爲融所獎引。爲服總麻。子禹錫。翹知名。孫巨。曾孫從。

和宋之問寒食題黃梅臨江驛云。春分自淮北。寒食渡江南。忽見溱陽水。疑自宋家潭。明主閣難叫。孤臣逐未堪。遙思故園陌。桃李正酣酣。

宋之問詩云。馬上逢寒食。愁中屬暮春。可憐江浦望。不見洛橋人。北極懷明主。南溟作逐臣。故園腸斷處。日夜柳條新。

戶部尙書崔公挽歌云。八座圖書委。三臺章奏盈。舉杯常有勸。曳履忽無聲。市若荊州罷。池如薛縣平。空餘濟南劍。天子署高名。

詠劍詩云。寶劍出昆吾。龜龍夾采珠。五精初獻術。千戶競論都。匣氣衝牛斗。山形轉鹿盧。欲知天下貴。持此問風湖。（風湖字未詳）

則天皇后挽歌云。前殿臨朝罷。長陵合葬歸。山川不可望。文物盡成非。陰月霜中道。軒星落太微。空餘天子孝。松上景雲飛。

韋長史挽詞云。日落桑榆下。寒生松柏中。冥冥多若霧。切切有悲風。京兆新阡闕。扶陽甲第空。郭門從此送。荆棘漸蒙籠。

崔融瓦松賦序曰。崇文館瓦松者。產于屋霑之下。謂之木也。訪山客而未詳。謂之草也。驗神農而罕記。賦云。煌煌特秀。狀金芝之產霑。歷歷虛懸。若星榆之種天。葩條郁毓。根抵連卷。間紫苔而裊露。凌碧瓦而含煙。又曰。慚魏宮之烏悲。惡漢殿之紅蓮。崔公博學。莫不該悉。豈不知瓦松已有舊說乎。博雅云。在屋曰昔邪。在牆曰垣衣。廣志謂之香生於久屋之瓦。魏明帝好之。命長安西載其瓦於洛陽。以覆屋。前代詞人詩中多用昔邪。梁簡文詠薔薇曰。綠塔覆碧倚。依簷映昔邪。或言屋上木多松。栽土木氣洩。則瓦松生出西陽雜俎。（烏悲字未詳）

久視元年。改控鶴府爲奉宸府。張易之爲奉宸令。引詞人爲供奉。佞者奏云。昌宗王子晉後身。令被羽衣。吹簫。乘木鶴。奏樂於庭。融賦詩爲絕唱。有昔遇浮丘伯。令同丁令威。中郎才貌是藏史。姓名非之句。後與宰相蘇味道相諍云。某詩所以不及相公。無銀花合也。蘇有詩云。火樹銀花合。味道云。子詩雖無銀花合。還有金銅了。取令威之句也。

融爲文華婉。當時未有輩者。朝廷大筆。多手敕委之。讓武后哀冊。最高麗。絕筆而死。時謂思苦神竭云。

### 張昌齡

冀州人。與兄昌宗。皆能文。昌齡舉進士。與王公治齊名。皆爲考功王師。且所絀。太宗問之。答曰。昌齡等華而少實。其文浮靡。非令器也。取之則後生勸慕。亂陛下風雅。帝然之。後獻翠微宮頌。敕於通事舍人裏洪奉賀蘭敏之奏。豫北門修撰。卒。南部新書云。昌齡與文皇作息兵詔。嘆曰。禰衡潘岳之儔也。





唐詩紀事卷第九

李適 張錫 徐彥伯 宗楚客

韋承慶 蕭至忠 李迥秀 劉憲

崔湜 岑羲

李適

適字子至京兆人武后修三教珠英以李嶠張昌宗爲使取文學士綴集適與王無兢尹元凱等在選睿宗時以工部侍郎卒

九日登慈恩應制云鳳簾乘朝霧鸚林對晚秋天文具葉寫聖澤菊花浮塔似神功造龜疑佛影留幸陪清漢蹕欣奉淨居遊

答宋十一崖口五渡見贈云聞君訪遠山躋險造幽絕眇然青雲境觀奇彌年月登嶺亦沂溪孤舟事淞越寫嶂傳彩翠崖磴互欹缺石林上攢叢金澗下明滅捫壁窺丹井梯苔瞰乳穴忽枉巖中贈對翫未嘗輟殷勤獨往事委曲鍊藥說邀余名山期從爾泛海滢歲晏秉宿心斯言匪徒說

初中宗景龍二年始於修文館置大學士四員。學士八員。直學士十二員。象四時八節十二月。於是李嶠。宗楚客。趙彥昭。韋嗣立。爲大學士。適劉憲。崔湜。鄭愔。盧藏用。李又。岑義。劉子玄。爲學士。薛稷。馬懷素。宋之問。武平一。杜審言。沈佺期。閻朝隱。爲直學士。又召徐堅。韋元且。徐彥伯。劉允濟等。滿員。其後被選者不一。凡天子饗會游豫。唯宰相直學士得從。春幸黎園。並渭水。被除。則賜柳圈。辟羈。夏宴蒲萄園。賜朱櫻。秋登慈恩浮圖。獻菊花酒稱壽。冬幸新豐。歷白鹿觀。上驪山。賜浴湯池。給香粉蘭澤。從行給翔麟馬。品官黃衣各一。帝有所感。卽賦詩。學士皆屬和。當時人所欽慕。然皆狎猥佻佻。忘君臣禮法。惟以文華取幸。若韋元且。劉允濟。沈佺期。宋之問。閻朝隱等。無它稱。景龍二年七夕。御兩儀殿賦詩。李嶠獻詩云。唯言七襄詠。流入五絃歌。是日李行言唱步虛歌。九月幸慈寺塔。上官氏獻詩。羣臣並賦。閏九月幸總持。登浮圖。李嶠等獻詩。十月三日幸三會寺。十一月十五日中宗誕辰。內殿連句爲柏梁體。二十一日安樂公主出降。武延秀是月以姪妤上官爲昭容。十二月六日。上幸薦福寺。鄭愔詩先成。舊邸三乘闢是也。宋之問後進。駕象法王歸是也。立春侍宴賦詩。二十一日。幸臨渭亭。李嶠等應制。三十日。幸長安故城。十二月晦。諸學士入闔守歲。以皇后乳母戲適御史大夫。資從一。往來其家。遂有國爹之號。三年七日。清暉閣登高。遇雪。宗楚客詩云。蓬萊雪作山。是也。因賜金綵。

人勝。李嶠等七言詩。（千鍾聖酒御筵披。是也。）是日甚懼。上令學士遞起屢舞。至沈佺期賦迴波。有齒綠牙緋之語。晦日。幸昆明池。宋之問詩。自有夜珠來之句。至今傳之。二月八日。送沙門元奘等歸荊州。李嶠等賦詩。十一日。幸太平公主南莊。七月。幸望春宮。送朔方節度使張寶赴軍。八月三日。幸安樂公主西莊。九月九日。幸臨渭亭。分韻賦詩。（韋安石先成。）十一月一日。安樂公主入新宅賦詩。十五日。中宗誕辰。長甯公主滿月。李嶠詩。龍神見像日。仙鳳養雛年。是也。二十三日。南郊。徐彥伯上南郊賦。十二月十二日。幸溫泉宮。勅蒲州刺史徐彥伯入伏同學士例。因與武平等五人獻詩。上官昭容獻七言絕句三首。十四日。幸韋嗣立莊。拜嗣立遺遙公。名其居曰清虛原。幽栖谷。十五日。幸白鹿觀。十八日。幸秦始皇陵。四年正月朔。賜羣臣柏樹。五日。蓬萊宮宴。吐蕃使因爲柏梁體。（吐蕃舍人亦賦。）七日。重宴大明殿。賜綵鏤人勝。又觀打毬。八日。立春。賜綵花。二十九日。晦。幸滌水。二月一日。送金城公主。三日。幸司農少卿王光輔莊。是夕。岑羲設茗飲。討論經史。武平一論春秋。崔日用請北面。日用贈平一歌曰。彼名流兮左氏癖。意玄遠兮冠今昔。二十一日。張寶至白湖方。宴于桃花園。賦七言詩。明日。宴承慶殿。李嶠桃花園詞。因號桃花行。三月一日。清明。幸黎園。命侍臣爲拔河之戲。三日上巳。祓禊於渭濱。賦七言詩。賜細柳圈。八日。令學士尋勝。同宴於禮部尙書竇希琳亭。賦詩。張說爲之序。十一日。

宴於昭容之別院。二十七日，李嶠入都耐廟。徐彥伯等餞之。賦詩。四月一日，幸長甯公主莊。六日，幸興慶池，觀競渡之戲。其日，過希玠宅。學士賦詩。二十九日，御宴祝欽明，爲八風舞。諸學士曰：祝公斯舉，五經掃地盡矣。容宗時，道士司馬承禎還天台，適贈詩詞甚美。朝士屬和，三百餘人。徐彥伯編爲白雲記。

中宗幸興慶，戲競渡。應制云：拂霧金輿丹旆轉，凌晨黼帳碧池開。南山倒影從雲落，北澗搖光寫浪迴。急舸爭標排荇度，輕帆截浦觸荷來。橫汾宴鎬歡無極，歌舞年年聖壽盃。

陪幸臨渭亭詩云：長樂喜春歸，披香愛雪霏。花從銀閣度，絮繞玉窗飛。寫曜銜天藻，呈祥拂御衣。上林紛可望，無處不光輝。

安樂公主山莊云：平陽金勝鳳凰樓，沁水銀河鸚鵡洲。綵仗遙尋丹壑裏，仙輿暫幸綠亭幽。前池錦萬蓮花豔，後嶺香爐桂藥秋。貴主稱觴萬年壽，還輕漢武濟汾遊。

人日大明宮應制云：朱城待鳳韶華至，碧殿乘龍淑氣來。寶帳金屏人已帖，圖花學鳥勝初裁。林香近接宜春苑，山翠遙添獻壽杯。向夕憑高風日麗，天文垂曜象昭回。

望春宮迎春應制云：玉輦金輿天上來，花園四望錦屏開。輕絲半拂朱城柳，細纈全披畫閣梅。舞蝶分行飄御席，歌鸞度曲繞仙盃。聖詞春日光輝滿，漢主秋風莫道才。

送金城公主云。降河從遠娉。青海赴和親。月作臨邊曉。花爲度隴春。主歌悲願鶴。帝策重安人。獨有瓊簫去。悠悠思錦輪。

宴安樂公主新宅云。銀河半倚鳳凰臺。玉酒相傳鸚鵡杯。若見君平須借問。仙槎一去幾時來。

餞唐永昌赴任東都云。聞道飛鳧向洛陽。翩翩矯翮度文昌。自尙書郎爲令。因聲寄意三花樹。少室崑前幾過香。適云有田在少室。不見十年矣。

徐元伯題適碑陰序曰。謔謔李公。生自號東山子。死葬東山。豈其識哉。神交者歌薤露以送子。歸東山焉。歌曰。隴障縈紫氣。金光赫氛氳。美人含遙謫。桃李方自薰。圖高黃鶴羽。寶奪驪龍羣。忽驚薤上曲。掩啼東山雲。回也實天枉。賈生亦晚促。今復哀若人。危迅風前燭。夜臺淪清鏡。窮塵埤結綠。何以贈下泉。生芻唯一束。

張錫

慈恩寺九月九日登浮圖應制云。九州霜景淨。千門曉望通。仙遊光御路。瑞塔迴凌空。菊彩揚堯日。萸香遶舜風。天文麗辰象。竊抃仰層穹。

晦日宴高文學林亭云。雪盡銅駝路。花照石崇家。年光開柳色。池影汎雲華。賞洽情方遠。

春歸景未賒。欲知多暇日。罇酒漬澄霞。

錫文琮之子也。久視初代其甥李嶠爲宰相。請還廬陵王。不爲張易之所右。俄知選坐賊論流循州。韋后臨朝。爲相旬日。出刺絳州。卒。

徐彥伯

兖州人。爲蒲州司軍兵參時。司戶韋岳善判。司士李万工書。彥伯屬辭。號河東三絕。武后撰三教珠英。取文辭士。皆天下選。彥伯嶠居首。

和宋之問崖口五渡云。聞有獨往客。拂衣捐世心。結忻薄枉渚。撰念榮舊林。經万去崖合。冥綿歸壑深。琪樹環碧彩。金潭生翠陰。洞汭弄沙傍。危口眺明岑。夕聞桂裏猿。曉翫松上禽。雜珮蘊孤袖。瓊敷綴雙矜。我懷滄洲想。懿爾白雪吟。秉願理方叶。存期跡易尋。茲言庶不負。爲報巖中琴。

贈劉舍人古意云。深林闕靈鳥。文章世所希。巢居碧梧樹。舞君青瑣闈。或言鳳池樂。撫翼更西飛。鳳池環禁林。仙閣霧沉沉。璇題激流日。珠綴綿清陰。郁穆絲言重。熒煌台座深。風張丹旆翻。月弄紫庭音。還彩結不散。孤英跂莫尋。浩歌向蘭渚。婉戀故儔心。

和韋元旦早朝云。夕轉清壺漏。晨驚長樂鐘。逶迤綸禁客。假寐守銅龍。子亦趁三殿。肩隨

謁九重。繁珂接曙響。華劍比春容。相間苔光歇。彌憐芳意濃。願言乘日盱。攜手卽雲峯。

被袂涓濱侍宴應制云。晴風麗日滿芳洲。御幕春筵祓錦流。皆言曲侍璜溪宴。整似輕飛天漢遊。

侍宴韋嗣立莊云。鼎臣休澣隙。方外結遙心。別業青霞境。孤潭碧樹林。每馳東野策。遙弄北溪琴。帝眷紆時豫。台園賞歲陰。移鑾明月沼。張緝白雲岑。御酒瑤觴落。仙壇竹徑深。三光懸聖藻。五等冠朝簪。自昔皇恩感。咸言獨自今。

送金城公主云。鳳展憐簫曲。鸞闈念掌珍。羞庭遙築館。廟策重和親。星轉銀河夕。花移玉樹春。聖心悽遠送。留蹕望征塵。

駕幸溫泉云。姬典歌時邁。虞編記省方。何如黑帝月。玄口白雲鄉。翠仗縈船岸。明旂應寶蓋。(音負王草也)陽風搖花艇。彩雲豔寶戈。芒御陌開油。次離宮夾樹行。桂枝籠驪裊。松葉蔭堂皇。仙女含珠液。溫池孕璧房。湧疑神澆溢。泛若帝臺漿。獨沸流常熱。潛蒸氛轉香。青瑛環玉甃。紅淀鑠金光。藻曜凝芳潔。葳蕤獻淑祥。五龍歸寶算。九雁叶時康。同預華封老。中衢祝聖皇。安樂公主新宅云。鳳樓開闔引明光。花酌連添醉益香。欲知帝女薰天貴。金歌玉柱夜成行。(或云金珂玉柱。或云金歌玉柱。)

餽唐永昌云。金谿碧水玉潭砂。鳧鳥翩翩弄日華。鬪鷄香陌行春倦。爲摘東園桃李花。  
餽唐州高使君云。香萼媚紅滋。垂條縈綠絲。情人拂瑤袂。共惜此芳時。繡轅已躑躅。烏隼  
方葦蕞。跂聞望太守。流潤及京師。

中宗幸輿慶池。戲競渡。獻詩曰。夾道傳呼翊翠虬。天迴日轉御芳洲。青潭曉靄籠仙蹕。紅  
嶼晴花隔綵旒。香溢金環盈廣坐。聲搖妓舸匝中流。羣臣相慶嘉魚樂。共晒橫汾歌吹秋。

中宗與修文館學士宴樂賦詩。每命彥伯爲之序。文彩華縟。夜宴安樂公主新第序云。言  
容有典。緝似幄之柔規。湯沐增榮。結風庭之藻渙。又曰。鳴璫節珮。登繡軸之瑠軒。花綬香纓。帶  
澤壺之青鑱。此言駙馬。送鄭惟忠序云。卷蘆葉而橫吹。聲愁隴月。撫劍鐔而直視。目斷口洲。  
彥伯爲文。多變易求新。以鳳閣爲鸚閣。龍門爲虬戶。金谷爲銑溪。玉山爲瓊岳。竹馬爲篠  
驂。月兔爲魄兔。進士効之。謂之徐滌體。

宗楚客

正月晦。中宗幸滄水。詩云。御輦出明光。乘流泛羽觴。珠胎隨月滅。玉漏與年長。寒盡梅猶  
白。風遲柳未黃。日斜旌騎轉。休氣滿林塘。

人日清暉閣應制云。窈窕神仙閣。參差雲漢間。九重中禁啓。七夕早春還。太液天爲水。蓬



萊雪作山。今朝上林樹。無處不堪攀。

幸安樂公主西園應制詩。玉樓銀榜枕嚴城。翠蓋虹旗列禁庭。日映層巖圖畫色。風搖雜樹管絃聲。水邊重閣含飛動。雲裏孤峯似削成。幸陪七聖遊崑閬。無勞萬里訪蓬瀛。

又安樂公主入新宅詩云。星橋他日創。仙榜此時開。馬向鋪錢埽。簫聞弄玉臺。人疑衛叔美。客似長卿才。借問遊天漢。誰能取石迴。

楚客字叔敖。河東人。節愍太子之敗也。楚客請殊其首。祭三思。俄爲相。與紀處納締交。世號宗紀。御史崔琬劾之。帝詔琬與宗紀兄弟兩解之。世謂帝爲和事天子。韋氏敗。被誅。

### 韋承慶

字延休。性謹畏。長安中爲相。附張易之。時與異母弟嗣立並爲宰相。韋氏孝友。詞學則承慶。嗣立。邃音樂。有萬石。達禮儀。則叔夏。史才博識。有述。時趙冬曦兄弟亦各有名。張說曰。韋趙兄弟。人之杞梓。

寒食應制詩云。鳳條春色晚。龍禁早輝通。舊火收槐燧。餘寒入桂宮。鶯啼正隱葉。鷄樹始開籠。藹藹瑤山滿。仙歌始樂風。

直中書省詩。清切鳳凰池。扶疎鷄樹枝。惟應集鸞鷲。何爲宿羆雌。大造乾坤闢。深恩雨露

垂。昆蛟既含養。驚駘亦驅馳。木偶翻爲用。芝泥忽濫窺。九思空自勉。五字本無施。徒喜逢千載。何階答二儀。螢光向日盡。蚊力負山疲。禁宇庭除闕。閑宵鐘箭移。暗花臨戶發。殘月下簾欹。白髮隨身改。丹心爲主披。命將時並泰。言與行俱危。寄謝巢山客。堯年正在斯。

南中詠雁云。萬里人南去。三秋雁北飛。不知何歲月。得與爾同歸。

凌朝浮江旅思云。天晴上初日。春水送孤舟。山遠疑無樹。潮平似不流。岸花榮且落。江鳥沒還浮。羈望傷千里。長歌遣客愁。

蕭至忠

安樂公主山莊云。西郊窈窕鳳凰臺。北渚平明法駕來。匣地金聲初度曲。周堂玉溜始傾杯。澗路分遊畫舟轉。巖門相向碧亭開。微臣此時承宴樂。髣髴疑從星漢迴。

九日侍宴應制云。望幸三秋暮。登高九日初。朱旗巡漢苑。翠帶俯秦墟。寵極萸香遍。恩深菊耐餘。承權何以答。萬籟俯宸居。(得餘字)

慈恩寺九日登塔應制云。天蹕三乘啓。星輿六轡行。登高臨寶塔。極目遍王城。神衛虛中遶。仙歌雲外清。重陽千萬壽。率舞頌昇平。

至忠。德音孫。相中宗。後從太平公主逆謀。誅明皇曰。至忠誠國器。但晚謬耳。

李迥秀

慈恩寺九日應制云。沙界人王塔。金繩梵帝遊。言從祇樹賞。行翫菊叢秋。御酒調甘露。天花亂綵旒。堯年持佛日。同此慶時休。

和主弟錫宴云。金勝峇嶢雲裏開。玉簫參差天際迴。莫驚側弁還歸路。祇爲平陽歌舞催。安樂公主山莊云。詰旦重門開警蹕。傳言太主奏山林。是日迴輿羅萬綺。此時歡甚賜千金。鸞羽鳳簫參樂曲。荻蕩竹徑接帷陰。手舞足蹈方無已。萬年千歲奏薰琴。

迥秀崔湜鄭愔。在武后中宗時。以姦淫汙名位。然皆有文。迥秀嘗以鴛鴦口一雙。與張易之共飲。取其常相逐也。

迥秀爲兵部尙書。有疾。謂問者曰。僕自知當作侍中。有命固不變也。問者出門而終。詔贈侍中。

劉憲

送張賣赴朔方應制云。命將擇耆年。圖功勝必全。光輝萬乘餞。威武二庭宣。中衢橫鼓角。曠野蔽旌旃。推食天廚至。投醪御酒傳。涼風過雁苑。殺氣下鷄田。分闈恩何極。臨歧動容篇。陪幸長寧公主林亭莊云。公主林亭地。清晨降玉輿。畫橋飛渡水。仙閣涌臨虛。晴新看峽

蝶。夏早摘芙蓉。文酒娛遊盛。忻叨侍從餘。

陪幸五王宅云。北斗樞機任。西京肺腑親。麟昔王門下。今茲制幸晨。恩光山水被。聖作管絃新。遶座薰紅藥。當軒暗綠筠。摘荷纔早夏。聽鳥尙餘春。行漏金徒晚。風煙起觀津。

三會寺應制云。崑嶠蒼史臺。敞朗紺園開。戒旦壺人警。纓霜羽騎來。下輦登三襲。褰旒望九垓。林披館陶勝。水浸昆易灰。網戶飛花綴。幡竿度鳥迴。豫遊仙唱動。蕭洒出塵埃。

薦福寺應制云。地靈傳景福。天駕儼鈎陳。佳哉藩邸舊。赫矣梵宮新。香塔魚山下。禪堂雁水濱。珠幡映白日。鏡殿寫青春。甚懼延故吏。大覺拯生人。幸承歌頌末。長奉屬車塵。

陪遊上苑遇雪云。龍驂曉日望春宮。正逢春雪舞春風。花光併在天文上。寒氣行銷御酒中。

賜剪綵花應制云。上林宮館妓。春心獨早知。剪花疑始發。刻燕似新窺。色澹輕雪點。香淺嫩風吹。此日叨陪待。恩榮槩數枝。

人日清暉閣應制云。輿輦乘人日。登臨上鳳京。風尋歌曲颺。雪向舞行縈。千官隨輿合。百福與時并。承恩長若此。微賤幸昇平。

安樂公主山莊云。主家別墅帝城隈。無勞海上覓蓬萊。杳嶂懸流平地起。危樓曲閣半天

開庭莎作薦舞行出。浦樹相將歌棹迴。此日風光與形勝。祇言併伴聖詞來。

侍宴韋嗣立莊云。東山有謝安。枉道鳴和鑿。緹騎紛初日。霓旌度曉寒。雲蹕巖間下。虹橋澗底盤。幽棲俄似屆。聖囑宛餘觀。崖懸飛溜直。岸轉綠潭寬。桂華堯酒冷。松響舜絃彈。明主恩斯極。賢臣節更殫。不才叨侍從。詠聽以濡翰。

白鹿觀應制云。玄遊乘落暉。仙宇曖霏微。石梁縈澗轉。珠旆掃壇飛。芝童薦膏液。松鶴舞驂駢。還似瑤池上。歌成周馭歸。

衣。人日翫雪應制云。勝日登臨雲葉起。芳風搖蕩雪花飛。星暉幸得承金鏡。颺影還將奉玉

送金城公主云。外館踰河右。行營指路岐。和親悲遠嫁。忍愛泣將離。旌旆羌風引。軒車漢水隨。那堪馬上曲。時向管中吹。

輿慶池應制云。蒼龍闈下天泉池。軒駕來遊簫管吹。綠堤夏篠繁不散。冒水新荷卷復披。帳殿疑從畫裏出。樓船直在鏡中移。自然東海神仙處。何用西崑轍迹疲。

宴安樂公主新宅云。層軒洞戶且新披。度曲飛觴夜不疲。綺綴玲瓏河色曉。珠簾隱映月華窺。

錢唐永昌云。始見郎官拜洛陽。旋聞近侍發雕章。緒言已最期年政。綺字當生滿路光。  
七夕應制云。秋吹過雙闌。星仙動二靈。更深移月鏡。河淺度雲駟。殿上呼方朔。人間失武  
丁。天文茲夜裏。光映紫微庭。

慈恩寺九日應制云。香塔曾霄半。仙鑪淨鏡遊。登臨憑季月。寥廓見中州。御酒新寒退。天  
文寶氣浮。却邪將獻壽。茲日奉千秋。

人日侍宴大明宮應制云。禁苑韶華此日歸。東郊道上轉青旂。柳色梅芳何處所。風前雪  
裏覓芳菲。開冰池內魚新躍。剪綵花間燕始飛。欲識王游達陽氣。爲觀天藻競春輝。

奉和三日祓禊渭濱云。桃花欲落柳條長。沙頭水上足風光。此時御蹕來遊處。願奉年年  
祓禊觴。

奉和春幸望春宮應制云。暮春春色最便妍。苑裏花開列御筵。商山積翠臨城起。滌水浮  
光共幕連。鶯藏嫩葉歌相喚。蝶礙芳叢舞不前。歡娛節物今如此。願奉宸遊億萬年。

憲字元度。宋州人。爲中書舍人。坐善張易之。出刺渝州。召爲太僕少卿。兼修文館學士。卒。  
天授中。治來俊臣獄。疾其酷。欲痛繩之。反爲所陷。明皇在東宮。憲啓曰。褚無量經明行脩。耆年  
宿望。宜數召問。以察其言。太子頓納。

白鹿觀應制云。御旗探紫籙。仙伏闢丹丘。捧藥芝童下。焚香桂女留。鸞歌無歲月。鶴語記春秋。臣朔其何幸。常陪漢武遊。

送金城公主云。懷戎前冊備。降女舊姻脩。簫鼓辭家怨。旌旃出塞愁。尙孩中念切。方遠御慈留。顧乏謀臣用。仍勞聖主憂。

餞唐州高使君云。芳春桃李時。京都物華好。爲岳豈不貴。所悲陟遠道。遠道不可思。宿昔夢見之。贈君雙佩刀。日夕視來期。

慈恩寺九日應制云。帝里重陽節。香園萬乘來。却邪莢結珮。獻壽菊傳杯。塔類承天湧。門疑待佛開。睿詞懸日月。長得仰昭回。

立春內出綵花應制云。澹蕩春光滿曉空。逍遙御辇入離宮。山河降望雲天外。臺榭參差煙霧中。庭際花飛錦繡合。枝間鳥囀管絃同。卽此歡娛齊鎬宴。唯應率舞樂薰風。

婕妤怨云。不分君恩斷。新粧視鏡中。容華向春日。嬌愛似秋風。枕席臨燈曉。屏幃向月空。年年後庭樹。榮落在深宮。

秦州薛都督挽詞云。十里絳山幽。千年汾水流。碑傳門客建。劍是故人留。壠樹煙含夕。山

門月照秋。古來鐘鼎盛。共盡一蒿丘。

湜。仁師之子。弟澄。液。從兄洧。並有文翰。列居清要。每私宴。自比王謝之家。謂人曰。吾門戶及出身。歷官未嘗不爲第一。丈夫當先據要路。以制人。豈能默默受制於人。故進取不已。而不以令終。湜執政時。年三十六。嘗暮出端門。下天津馬上賦詩曰。春還上林苑。花滿洛陽城。張說見之。嘆曰。文與位固可致。其年不可及也。

湜字澄瀾。以文詞稱。附韋后作相。又附太平公主。門下客獻海鷗賦。以諷。湜稱善。而不自悛。帝誅蕭至忠。湜流嶺外。後知湜本謀。賜死荊州。

岑羲

安樂公主山莊云。銀榜重樓出霧開。金輿步輦向天來。泉聲迴入吹簫曲。山勢遙臨獻壽杯。帝女含笑流飛電。乾文動色象昭回。誠願北極拱堯日。微臣抃舞詠康哉。

宴安樂全主新宅云。金榜重樓開夜扉。瓊筵愛客未言歸。御歡不覺銀河曙。盡醉那知玉露晞。

餞唐州高使君云。蒼茫南塞地。明媚上春時。目極傷千里。懷居不自持。征車別岐路。斜日下嶮巖。一歎輶軒阻。悠悠卽所思。



慈恩寺九日應制云。寶臺聳天外。玉輦步雲端。日麗重陽景。風搖季月寒。梵堂遙集雁。帝樂近翔鸞。願獻延齡酒。長承湛露歡。

立春內出綵花應制云。和風助律應韶年。清蹕乘高入望先。花笑鶯歌迎帝輦。雲披日霽俯皇川。南山近獻仙杯上。北斗平臨御座前。一奉恩榮歡在鎬。空知率舞聽薰絃。

義字伯華。初爲金壇令。弟仲翔。長洲令。仲休。漂水令。宗楚客語本道巡察御史曰。母遺江東三岑。後相中宗。睿宗。坐預太平公主謀。誅。始岑氏在清要者數十人。義曰。物極則反。一可以懼矣。然不能抑退。以及禍。



唐詩紀事卷第十

趙彥昭

崔日用

李又

盧藏用

馬懷素

薛稷

劉允濟

李元紘

李嶠

蘇瓌

蘇頲

趙彥昭

上幸薦福寺令賦詩云。初地龍飛後。金身佛現時。千花開國界。萬善累重基。北闕承行幸。西園屬住持。天衣拂舊石。王舍起前祠。刹鳳迎瑠箆。幡虹駐綵旗。同霑小雨潤。仰詠大風詩。

九日臨渭亭云。秋豫凝仙覽。宸遊轉翠華。呼鷹下鳥路。戲馬出龍沙。紫菊宜新壽。丹萸辟舊邪。須陪長久宴。歲歲奉吹花。

安樂公主入新宅詩云。雲物中京曉。天人外館開。飛橋像河漢。懸榜學蓬萊。北闕臨仙檻。南山送壽杯。一窺輪奐畢。慙慙棟梁材。

人日清暉閣應制云。出震乘東陸。憑高御北辰。祥雲應早歲。瑞雪候初旬。庭樹千花發。堦蓂七葉新。幸承今日宴。長奉萬年春。

侍宴韋嗣立莊云。賢族唯題里。儒門但署鄉。何如表嚴洞。宸翰發輝光。地在茲山曲。家憐邵水陽。六龍駐旌罕。四壯耀旂常。北斗臨台坐。東山入廟堂。天高羽翼近。主聖股肱良。野竹池亭氣。村花澗谷香。縱然懷豹隱。空愧躡鷓行。

白鹿觀應制云。雲驂驅半景。星蹕坐中天。國誕玄宗聖。家尋碧落仙。玉杯鸞薦壽。寶算鶴知年。一覩光華日。忻承道德篇。

登驪山寓目應制云。皇情遍九垓。御輦駐昭回。路若隨天轉。人疑近日來。河看大禹鑿。山見巨靈開。願扈封鸞駕。常持薦壽杯。

人日翫雪應制云。始見青雲干律呂。俄逢瑞雪應陽春。今日迴看上林樹。梅花柳絮一時新。

七夕應制云。青女三秋節。黃姑七日期。星橋度玉珮。雲閣掩羅帷。河氣通仙掖。天文下睿詞。今宵望雲漢。應得見娥眉。

慈恩寺九日應制云。口口乘秋節。登高出梵宮。皇心滿塵界。佛跡現虛空。日月宜長壽。人天得大通。喜聞題寶唱。受記莫由同。

立春日侍宴別殿內出綵花應制云。剪綵迎初候。攀條寫故真。花隨紅意發。葉就綠情新。

嫩色驚啣燕。輕香誤採人。應爲薰風拂。能令芳樹春。

人日侍宴大明宮。應制云。寶契無爲屬聖人。珣輿出幸翫芳辰。平樓半入南山霧。飛閣旁臨東野春。路夾穠花千樹發。垂軒弱柳萬條新。處處風光今日好。年年願奉屬車塵。

悼右僕射楊再思詩云。兩揆光天秩。三朝奉帝熙。何言集大鳥。忽此喪元龜。坐歎公槐落。行聞宰樹悲。壑舟今已去。甯有濟川期。

彥昭字奐然。甘州人。少豪邁。風骨秀爽。景龍中爲相。以權幸進。後御史郭震（非元震也）劾暴舊惡。姚崇惡之。貶江州別駕。卒。

崔日用

正月七日宴大明殿詩云。新年宴樂坐東朝。鐘鼓鏗鏘大樂調。金屋瑤筐開寶勝。花牋彩筆頌春椒。曲江苔色冰前液。上苑梅香雪裏嬌。宸極此時飛聖藻。微臣竊抃預聞韶。

望春宮迎春應制云。東郊草物正薰聲。素澹冕鷖戲綠汀。鳳闕斜通長樂觀。龍旂直逼望春亭。光風遙艷蘭英紫。淑景依遲柳色青。渭浦明晨脩禋事。羣公傾賀水心銘。

送金城公主云。聖后經綸遠。謀臣計畫多。受降追漢策。築館許戎和。俗化烏孫壘。春生積石河。六龍今出餞。雙鶴願爲歌。

宴長樂公主新宅云。銀燭金屏坐碧堂。只言河漢動神光。主家盛明歡不極。才子能歌夜未央。

饑唐永昌云。洛陽桴鼓今不鳴。朝野咸推重太平。冬至冰霜俱怨別。春來花鳥若爲情。

慈恩寺九日應制云。紫宸歡每洽。紺殿法初隆。菊泛延齡酒。蘭吹解愠風。咸英調正樂。香梵遍秋空。臨幸符天瑞。重陽日再中。

日用爲御史中丞。賜紫。是時佩魚。須有時恩。亦因宴命羣臣撰詞。日用曰。臺中鼠子直須諳。信足跳梁上壁龕。倚巖燈脂污張五。還來嚙帶報韓三。莫浪語。直王相。大家必若賜金龜。賣卻苗兒相報賞。中宗亦以金魚賜之。

立春遊苑應制云。乘時迎氣正。瑤衡滿滄煙。氛向曉清。剪綺裁紅妙。春色宮梅殿。柳識天情。瑤篔綵燕先呈瑞。金縷長鷄未學鳴。聖澤陽和宜宴樂。年年捧日向東城。

上宴日。日用起舞。自歌云。東館揔是鸞鸞。南臺自多杞梓。日用讀書萬卷。何忍不蒙學士。墨制簾下出來。微臣眼看喜死。其日。日用兼修文館學士。制曰。日用書窮萬卷。學富三冬。日用舞蹈拜謝。日用滑州人。中宗時。武三思宗楚客權寵交煽。日用多所結納。才辯絕人。能乘機反禍。取富貴。韋氏平。遂爲相。嘗謂人曰。吾平生所事。皆適時制變。不專始謀。然每一反思。若芒

刺在背云。明皇時。日用猶被寵眷。帝賦詩宴遊。多預酬唱。送張說巡邊應制云。吉日四黃馬。宣王六月兵。擬清鷄鹿寒。先指朔方城。日用有才辯。惟是姦佞耳。中宗時。七日應制云。曲江苔色冰前液。上苑梅香雪裏嬌。亦佳語也。

李义

陪幸臨渭亭詩云。青陽御紫微。白雪下彤闈。浹壤流天沛。綿區灑帝輝。水如銀度燭。雲似玉披衣。爲得因風起。還來就日飛。

送沙門元奘等還荊州云。初日承歸旨。秋風起贈言。漢珠留道味。江壁返眞源。地出南關遠。天迴北斗尊。甯知一柱觀。却啓四禪門。

芙蓉園應制云。水殿臨丹籞。山樓遶翠微。昔遊人託乘。今幸帝垂衣。澗篠緣峯合。巖花逗浦飛。朝迴曲池地。無處不光輝。

陪幸韋嗣立莊云。樞掖調梅暇。林園種槿初。入朝榮劔履。退食偶琴書。地隱東巖室。天迴北斗車。旌門臨窈窕。箠道屬扶疏。雲罕明丹谷。霜笳徹紫虛。水疑投石處。溪似釣璜餘。帝澤頒卮酒。人歡頌里闕。一承黃竹咏。長奉白茆居。

景龍四年正月。賦栢樹詩云。勁節凌冬勁。芳心待歲芳。能令人益壽。非止麝含香。

陪幸長甯公主莊云。紫禁乘宵動。青門訪水嬉。貴遊鱣序集。仙女鳳樓期。合宴簪紳滿。承恩雨露滋。比辰還捧日。東館幸逢時。

陪奉五王宅云。家住千門側。亭臨二水傍。貴遊開北第。宸睇幸西鄉。曳履迎中谷。鳴絲出後堂。浦疑觀萬象。峯似駐三光。草向瓊筵樂。花承繡屐香。聖情思舊重。留飲賦雕章。

三會寺應制云。睿德愔無邊。神臯擇勝緣。二儀齊法駕。三會禮香筵。漢闕中黃近。秦山太白連。臺疑憲鳥日。池似刻鯨年。滿月臨真鏡。秋風入御絃。小臣叨下列。持管謬窺天。

薦福寺應制云。象設隆新宇。龍潛想舊居。碧樓披玉額。丹枕導金輿。代日興光近。周星掩曜初。空歌清浦筑。梵樂美何書。帝造環三界。天文賚六虛。康哉孝理日。崇德在真如。

人日清暉閣應制云。上日登臺賞。中天御筮飛。後庭聯舞唱。前席仰恩輝。睿作風雲起。農祥雨雪霏。幸陪人勝節。長願奉垂衣。

安樂公主山莊云。金輿玉輦背三條。水閣山樓望九霄。野外初迷七聖道。河邊忽覩二靈橋。懸泉滴滴依虹箭。清吹泠泠雜鳳簫。向晚平陽歌舞合。前溪更轉木蘭橈。

白鹿觀應制云。制蹕乘驪阜。迴輿指鳳京。南山四皓謁。西岳兩重迎。雲幄臨玄圃。霞杯薦赤城。神明近福地。何必往蓬瀛。



登驪山寓目應制云。崖巘萬尋懸。居高敞御筵。行戈疑駐日。步輦若昇天。城闕霧中近。闕河雲外連。謬陪登岱駕。忻奉濟汾篇。

望春宮迎春應制云。東城結宇敞千尋。北闕迴輿且四臨。麗日祥煙承翠畢。輕萸弱草藉衣簪。春商重沓雲巖近。河渭縈紆霧壑深。謬接鸞鴻陪賞樂。還欣魚鳥遂飛沉。春商恐是春字誤。

春日遊苑喜雨云。仙蹕九成臺。香筵萬壽杯。一句初降雨。二月早聞雷。葉向朝躋密。花含宿潤開。幸天承澤遍。無使日光催。

興慶池應制云。神池汎濫水盈科。仙蹕紆餘步。輦過縱棹洄。淞萍溜合。門軒眺賞麥風和。潭魚在藻供遊詠。谷鳥含櫻入賦歌。寄語乘查溟海客。匪頭來此問天河。

宴安樂公主新宅云。牽牛南度象昭回。學鳳樓成帝女來。平旦鸞鸞歌席上。方霄鸚鵡獻酬杯。

餞唐永昌云。田郎才貌出咸京。潘子文華向洛城。願以深心留善政。當令強項謝高名。

餞唐州高使君云。淮源之水清。可以濯君纓。彼美稱才傑。親人佇政聲。歲寒疇曩意。春晚別離情。終歎臨歧遠。行看擁傳榮。

餞許州宋司馬云。展驥旌時傑。談鷄美代賢。暫離仙掖務。追送近郊筵。地慘金商節。人康璧假田。從來昆友事。咸以佩刀傳。

慈恩寺九日應制云。涌塔臨玄地。高層瞰紫微。鳴鑾陪帝出。攀掠翊天飛。慶洽重陽壽。文含列象輝。小臣叨載筆。欣此頌巍巍。

和晦日駕幸昆明池云。玉輅尋春賞。金堤重晦遊。川通黑水沒。地派紫泉流。晃朗扶桑出。綿聯樹杞周。烏疑埋海處。人似隔河秋。劫盡灰猶識。年移石故留。汀洲歸棹晚。簫鼓雜汾謳。

人日侍宴大明宮應制云。詰旦行春上苑中。憑高御下大明宮。千年執象寰瀛泰。七日爲人慶賞隆。鐵鳳曾鶩搖瑞雪。銅烏細轉入祥風。此時朝野歡無算。此歲雲天樂未窮。

奉和三日祓禊渭濱云。上林花鳥暮春時。上巳陪遊樂在茲。此日欣逢臨渭賞。昔年空道濟汾詞。

又爲紫微侍郎與蘇頲對掌綸誥。明皇曰。前有味道。嶠。朕今有頲。又皆號蘇李。時宰相輔子將授太廟。頲草詞。久不就。曰。以遵仲尼之問。而未能續。又曰。何不云。宜採方山之能。猶伏其敏。

又字尙真。趙州人。年十二。工屬文。薛元超曰。是子且有海內名。沈正方雅識治體。時稱有宰相器。初爲黃門侍郎。開元初。姚崇爲紫微令。乃薦爲侍郎。外託引重。實去其糾駁權。畏又明。

切也。未幾卒於刑部尙書。兄尙一、尙正俱有名，同爲一集，號李氏花萼集。（尙一終清源尉，尙正博州刺史。）

盧藏用

幸安樂公主西莊應制云：皇女瓊臺天漢潯，星橋月宇劄山林。飛蘿半拂銀題影，瀑布環流玉砌陰。菊酒香隨鸚鵡泛，簫樓韻逐鳳凰吟。瑤池蹕駐思方久，璧月無文輿轉深。

餞唐州高使君云：餞酒臨豐樹，褰帷出魯陽。蕙蘭春已曉，桐柏路猶長。祖逖方城鎮，安期外氏鄉。從來二千石，天子命惟良。

餞許州宋司馬云：國爲休徵選，輿因仲舉題。山川襄野隔，朋酒瀟亭睽。零雨征軒鶩，秋風別驥嘶。驪歌一曲罷，愁望正淒淒。

慈恩寺九日應制云：化塔龍山起，中天鳳輦迂。綵梳牽畫刹，雜珮冒香莢。寶葉擎千座，金英漬百盃。秋雲飄聖藻，霄極捧連珠。

主弟夜宴云：侯家主第一時新，上席花年不惜春。珠缸綴月那知夜，玉墀流霞畏底晨。

宋主簿鳴泉夢趙六未及報而陳子云亡追爲此詩答宋兼貽平昔遊舊云：暮川罕停波，朝雲無留色。故人琴與詩，可存不可識。識心尙可親，琴詩非故人。鳴臯初夢趙，蜀國已悲陳。感

化傷淪滅。魂交昔未申。冥期失幽報。茲理復今晨。前嗟成後泣。已矣將何及。舊感與新悲。虛懷疇昔時。趙侯鴻寶氣。獨負青雲姿。羣有含妙識。衆象懸清機。雄談盡物變。精義解人頤。在陰既獨善。幽躍自爲疑。跪彼千里足。傷哉一尉欺。陳生富清理。卓犖兼文史。思縟巫山雲。調逸岷江水。鏗鏘哀忠義。感激懷知己。負劔登薊門。孤遊入燕市。浩歌去京國。歸守西山趾。幽居探元化。立言見千祀。埋沒經濟情。良圖竟云已。坐憶平生遊。十載懷嵩丘。題書滿古壁。採藥遍巖幽。子微化金鼎。僊筆不可求。榮哉宋與陸。名官美中州。在亡一睽阻。岐路方悠悠。自余事山海。及茲人世改。傳聞當世榮。皆入古人名。無復平原賦。空餘隣笛聲。泣對西州使。悲訪北邙塋。新墳蔓宿草。舊園毀殘銘。爲君成此曲。因言寄友生。默語無窮事。凋傷共此情。

藏用字子潛。幽州人。初隱終南少室二山中。時有意當世。人目爲隨駕隱士。晚乃徇權利。司馬承禎將還山。藏用指終南曰。此中大有佳處。承禎徐曰。以僕視之。仕宦之捷徑耳。藏用終黃門侍郎。

馬懷素

慈恩寺九日應制云。季月啓重陽。金輿陟寶坊。御旗橫日道。仙塔儼雲莊。帝蹕千官從。乾詞七耀光。顧慚文墨職。無以頌時康。

中宗立春游苑應制云。玄籥飛灰出洞房。青郊迎氣肇初陽。仙輿暫下宜春苑。御體行開薦壽觴。映水輕苔猶隱綠。緣堤弱柳未舒黃。唯有裁花飾簪鬢。相隨聖藻狎年光。

興慶池侍宴應制云。積水逶迤繞直城。含虛皎鏡有餘清。圖雲曲樹連緹幕。映日中塘間綵旌。賞洽猶聞簾管沸。歡留更睹木蘭輕。無勞海上尋仙客。卽此蓬萊在帝京。

正月七日宴大明殿云。日宇千門平旦開。天容萬象列昭回。三陽候節金爲勝。百福延祥玉作盃。就暖風光偏着柳。辭寒雪影半藏梅。何幸得參詞賦職。自憐終乏馬卿才。

安樂公主山莊云。主家臺沼勝平陽。帝幸歡娛樂未央。掩映瑠窗交極浦。參差繡戶透迴塘。泉聲百處歌傳曲。樹影千重舞對行。聖酒一霑何以報。唯忻頌德奉時康。

望春宮迎春應制云。綵旆瑤輿俯碧潯。行春御氣發皇心。搖風細柳縈馳道。映日輕花出禁林。遍野園亭開帟幕。連堤草樹狎衣簪。謬參西掖霑堯酒。願沐南薰解舜琴。

送金城公主云。帝子今何在。重姻適異方。離情愴宸掖。引路遶關梁。望絕園中柳。悲纏陌上桑。空余願黃鶴。東顧憶迴翔。

宴安樂公主新宅云。鳳樓窈窕凌三襲。翠幌玲瓏瞰九衢。複道中宵留宴衍。彌令上客想  
脚爾。

饒唐永昌云。聞君出宰洛陽隅。賓友稱觴饒路衢。別後相思在何處。祇應闌下望仙鳧。  
饒唐州高使君云。外牧資賢守。斯人奉帝俞。淮南膺建隼。渭北斬分符。坐歎烟波隔。行嗟  
物候殊。何年昇美口。迴看北城隅。

饒許州宋司馬云。穎川開郡邑。角宿分躔野。君非仲舉才。誰應題輿者。憫憫琴上鶴。蕭蕭  
路傍馬。嚴程若可留。別袂希再把。

懷素字惟白。潤州人。師李善。武后時。爲監察御史。李迥秀斂脉諉法。懷素劾罷之。轉禮部  
外郎。開元初。爲昭文館學士。

薛稷

送金城公主云。天道甯殊俗。慈仁乃戢兵。懷荒寄赤子。忍愛鞠蒼生。月下瓊娥去。星分寶  
婺行。關山馬上曲。相送不勝情。

安樂公主山莊云。主家園囿極新規。帝郊遊豫奉天儀。歡宴瑤臺鎬京集。賞賜銅山蜀道  
移。曲閣交映金精板。飛花亂下珊瑚枝。借問今朝八龍駕。何如昔日指仙池。

望春宮迎春應制云。九春風景足林泉。四野雲霞敞御筵。花鏤黃山繡作苑。草圖玄灞錦  
爲川。飛觴趁醉心迴日。走馬爭先服着鞭。喜奉仙遊歸路遠。直言行樂不言旋。

宴安樂公主新宅云。秦樓宴喜月徘徊。妓筵銀燭滿庭開。坐中香氣排花出。扇後歌聲逐酒來。

饒唐永昌云。河洛風煙壯市朝。送君飛颺去漸遙。更思明年桃李月。花紅柳綠宴浮橋。  
饒許州宋司馬云。令弟與名兄。高才振兩京。別序聞鴻鴈。離章動鶴鶩。遠鵬追翰墨。勝地寫丹青。風月相思夜。勞望穎川星。

慈恩寺九日應制云。寶宮星宿劫。香塔鬼神功。王遊盛塵外。眷覽出區中。日宇開初景。天詞掩大風。微臣謝時菊。薄綵入芳叢。

秋日還京。陝西十里作云。驅車越陝郊。北顧臨大河。隔河見鄉邑。秋風水增波。西城咸陽途。日暮憂思多。傳巖旣紆鬱。首山亦嵯峨。操築無昔老。採薇有遺歌。客遊旣回換。人生能幾何。  
(杜子美云。少保有古風。得之陝郊篇。謂此作也。)

稷善書畫。畫蹤閎立本。書師褚河南。時稱買褚得薛不落節。

稷字嗣通。母魏鄭公女也。爲中書舍人。與從祖兄曜。更踐兩省。俱以辭章自名。睿宗立。自少常數日。拜中書侍郎。參知機務。歷太子少保。以翊贊功。恩絕羣臣。資懷正誅。稷以知本謀。賜死萬年獄。

劉允濟

詠琴詩云。昔在龍門側。誰想鳴鳳時。雕琢今爲器。宮商不自持。巴人緩疎節。楚客弄繁絲。欲作高張引。醜成下調悲。

允濟字允濟。河南人。少與王勃齊名。垂拱四年。明堂成。奏賦述功德。除著作郎。遷鳳閣舍人。坐二張昵狎。除青州長史。以內憂去官。服除。召爲修文館學士。旣久。斥。喜甚。與家人樂飲數日卒。

經廬岳。迴望江山想洛川。有作云。龜山帝始營。龍門禹初鑿。出入經變化。俯仰憑寥廓。未若茲山功。連延並巫霍。東北疏艮象。西南距坤絡。宏阜自鬱盤。高標復迴薄。勢入柴桑渚。陰開彭蠡壑。九江杳無際。七澤紛相錯。雲雨散吳會。風波騰鄢鄂。跡隨造化久。利與乾坤博。盼蟹精氣通。紛綸潛怪錯。石渠忽見踐。金房安可託。地入天子都。巖有仙人藥。二門幾迢遞。三宮何儼爚。咫尺窮杳冥。跬步皆恬漠。才驚羽翰幽。居靜龍蛇蠖。明牧振雄詞。地華殊灼灼。盛業匡西夏。深謀贊禹亳。黃雲覆鼎飛。絳氣橫川躍。佐曆符賢運。人其茂天爵。禮樂富垂髻。詩書成舞勺。清輝靖崑電。利器騰霜鏑。遊聖挹衢樽。隣幾恭木鐸。牆仞包武侯。波瀾控文若。旋開刈薪楚。遽都升葵蕘。稷高郭口圖。良平公輔略。重臣資出守。英藩諒求瘼。豫章觀偉材。江州訪靈嶧。陽岫曉



氛氳陰崖暮蕭索。潛伏屢鯨奔。雄飛更鷲搏。驚瀾透煙霞。騰猿亂枝格。故園有歸夢。他山飛賞樂。帝鄉徒可遊。皇溪終族泊。景物觀淮海。雲霄望河洛。城闕紫微星。圖書玄扈閣。神功多粉績。元氣猶斟酌。丞相下南宮。將軍趨北落。橫簪並輝蟬。烈鼎俱調鶴。四郊時迷路。五月先投命。池榭喧瓊管。風花亂珠箔。舊遊勞夢寐。新知無悅樂。天寒欲贈言。歲暮期交約。夜琴清玉柱。秋灰變緹幕。風雲動翰林。宮徵調文籥。言泉激爲浪。思緒飛成織。千里輝珠璣。五采含丹臆。鐘鼓旋驚鷄。瑾瑜俄抵鵲。竊價慚庸怠。叨聲逾寂寞。長望限南溟。居然翳東郭。（此詩爲當時推最。）

李元紘

綠暉怨云。征馬噪金珂。嫋姚向北河。綠苔行跡少。紅粉淚痕多。寶屋粘花絮。銀箆覆網羅。別君如昨日。青海雁頻過。

相思怨云。望月思氛氳。朱衾懶更薰。春生翡翠帳。花點石榴裙。燕語時驚妾。鶯啼轉憶君。交河一萬里。仍隔數重雲。

元紘字大綱。京兆人。開元中爲相。務峻岸檢抑。奔競奪進者憚之。宋璟曰。李公引宋遙之美。黜劉冕之貪。爲國相家無留儲。雖季文之德。何以加之。

送張說上集賢學士元紘應制得私字云。碩儒延鳳詔。金馬被鴻私。饌玉還丹禁。牋花降

紫墀御恩傾旨酒。鼓舞詠康時。暫纂羣書緝。逾昭盛業丕。接筵欣有命。搦管愧無詞。自驚一何幸。太陽還及葵。

李嶠

三會寺應制云。故臺蒼頡里。新邑紫泉居。歲在開金寺。時來降玉輿。龍形雖起剎。鳥跡尙留書。竹是蒸青外。地仍點墨餘。天文光聖草。寶思合真如。謬奉千齡日。忻陪十地初。

又陪幸臨渭亭詩曰。同雲接野煙。飛雪暗長天。拂樹添梅色。過樓助粉妍。光含班女扇。韻入楚王絃。六出迎仙藻。千箱答瑞年。

送沙門元奘等還荊州詩云。三乘歸淨域。萬騎饒通莊。就日離亭近。彌天別路長。荆南旋杖鉢。渭北限津梁。何日紆真乘。還來入帝鄉。

幸太平公主南莊詩云。主家山第接雲開。天子春遊動地來。羽騎參差花外轉。霓旌遙颺日邊迴。還將石溜調琴曲。更取峯霞入酒杯。鸞輅已辭烏鵲渚。簫聲猶繞鳳凰臺。

送張奩赴朔方應制云。玉塞徵驕子。金符命老臣。三軍張戍旆。萬乘飾行輪。猛氣凌玄朔。崇恩降紫宸。投醪還得士。辭第本忘身。露下鷹初擊。風高雁欲賓。方銷塞北祲。遂靜漠南塵。

薦福寺應制云。應詔開香域。嬰林降綵旃。還窺圖鳳宇。更坐躍龍川。桂壘朝羣辟。蘭宮列

四禰半空銀閣斷。分砌寶繩連。甘雨蘇煇澤。慈雲動沛篇。獨慚賢作礪。空喜福成田。

陪遊苑遇雪云。散漫祥雲逐聖迴。飄飄瑞雪透天來。不能落後爭飛絮。故故迎前定早梅。  
剪綵花應制云。幸聞年欲至。剪綵學芳辰。綴綠奇能似。裁紅巧逼真。花從篋裏發。葉向中  
手春。不與時光競。何名天上人。

人日清暉閣應制云。三陽偏勝節。七日最靈辰。行變傳芳蟻。升高綴綵人。階前冀候月。樓  
上雪驚春。今日御天造。還疑上漢津。

安樂公主山莊云。黃金瑞榜絳河隈。白玉仙輿紫禁來。碧樹青岑雲外聳。朱樓畫閣水前  
開。龍舟下瞰蛟人室。羽節高臨鳳女臺。邊惜歡娛歌吹晚。揮戈却使耀靈迴。

人日大明宮應制云。鳳城景色已含韶。人日風光陪覺饒。桂吐半輪迎此夜。莫開七葉應  
今朝。魚猜冰凍行猶澁。鸞喜春驚弄欲嬌。愧奉登高搖采翰。欣逢御氣上丹霄。

春日遊苑喜雨詩。園林春正歸。入苑弄芳菲。密雨迎仙步。低雲拂御衣。危花濔易落。度鳥  
濕難飛。膏澤登千庾。歡情遍九圍。

送金城公主云。漢帝撫戎臣。絲言命錦輪。還將弄機女。遠嫁織皮人。曲怨江山月。粧消道  
路塵。所嗟穠李樹。空對小榆春。

九日應制云。令節三秋晚。重陽九日歡。仙杯還泛菊。寶饌且調蘭。御氣雲霄近。乘高宇宙寬。今朝萬壽引。宜向曲中彈。（得歡字）

正月中宗上清暉閣遇雪。嶠賦詩云。千鍾聖酒御筵披。六出祥英亂繞枝。卽此神仙對瓊圃。何須轍跡向瑤池。

七夕應制云。靈匹三秋會。仙期七夕過。查來人泛海。橋渡鵲填河。帝縷昇銀闕。天機罷玉梭。誰言七襄詠。重入五絃歌。

嶠字巨山。爲兒時。夢人遺雙筆。自是有文詞。十五通五經。二十擢進士第。與駱賓王。劉光業。齊名。和中宗。其仕也。初與王勃。楊盈川。接。中與崔融。蘇味道。齊名。晚諸人沒。獨爲文章宿老。一時學者取法焉。

嶠汾陰行云。君不見昔日西京全盛時。汾陰后土帝親祠。齊宮宿寢設廚供。撞鐘鳴鼓樹羽旗。漢家四葉才且雄。賓延萬靈朝九戎。柏梁賦詩高宴罷。詔書法駕幸河東。河東太守親掃除。奉迎至尊導鑾輿。五營將校列容衛。三河縱觀空里閭。回旌駐蹕降靈場。焚香奠醑邀百祥。金鼎發食正焜煌。靈祇煒燁攄景光。埋玉陳牲禮神畢。舉麾上馬乘輿出。彼汾之曲嘉可游。木蘭爲檝桂爲舟。權歌微吟綵鷁浮。簫鼓哀鳴白雲秋。歡娛宴洽賜羣后。家家復除戶牛酒。聲明

動天樂無有。千秋萬歲南山壽。自從天子向秦關。玉輦金車不復還。珠簾羽蓋長寂寞。鼎湖龍髯安可攀。千齡人事一朝空。四海爲家此路窮。雄豪意氣今何在。壇場宮館盡蒿蓬。路逢古老長歎息。世事回環不可測。昔時青樓對歌舞。今日黃埃聚荆棘。山川滿目淚沾衣。富貴榮華能幾時。不見只今汾水上。惟有年年秋雁飛。天寶末。明皇乘春登勤政樓。命梨園弟子歌數闋。有唱歌至富貴榮華能幾時以下四句。帝春秋衰邁。問誰詩。或附李嶠。因淒然涕下。遽起曰。嶠。真才子也。及其年。幸蜀。登白衛嶺。覽眺良久。又歌是詞。復曰。嶠。誠才子也。高力士以下揮涕久之。嶠有三戾性。好榮遷。憎人陞進。性好文章。憎人才華。性貪濁。憎人受賂。利州昭化縣之南境。與劍門相接。有鋪曰白衛鋪。今其名見於此。

張竇自朔方入朝。中宗於西苑迎之。從臣宴于桃花園。嶠歌曰。歲去無言忽顛顛。時來含笑吐氛氳。不能擁路迷仙客。故欲開蹊侍聖君。趙彥伯曰。紅萼競然春苑曉。芋萸新吐御筵開。長年願奉西王讖。近侍慙無東朔才。又一從臣歌曰。源水叢花無數開。丹跗紅萼間青梅。從今結子三千歲。預喜仙遊復摘來。明日宴承慶殿上。令宮女善謳者唱之。詞旣婉。歌仍妙絕。樂府號桃花行。

皮日休松臆錄云。中宗常召宰相蘇瓌。李嶠之子進見。時皆童年。帝謂曰。汝等各以所通

書取宜奏吾者。言之。頌應曰。木從繩則正。后從諫則聖。嶠二子亡其名。亦奏曰。斬朝涉之脛。剖賢人之心。帝曰。蘇瓌有子。李嶠無兒。

蘇瓌

九日應制云。重陽早露晞。睿賞瞰秋磯。菊氣先薰酒。萸香更襲衣。清切絲桐會。縱橫文雅飛。恩深答効淺。留醉未宸暉。

興慶池侍宴應制云。金闕平明宿霧收。瑤池式宴俯清流。瑞鳳飛來隨帝輦。祥魚出戲躍王舟。帷齊綠樹當筵密。蓋轉細河接岸浮。如臨竊比微臣懼。若濟叨陪聖主遊。

瓌字昌容。武功人。以正立朝。相中宗。睿宗。陳當世利病甚多。

蘇頌

送金城公主云。帝女出天津。和戎轉蜀輪。川經斷腸望。地與析支隣。奏曲風嘶馬。啣悲月伴人。旋知偃兵革。長是漢家親。

興慶池應制云。降鶴池前迴步輦。棲鸞樹杪出行宮。山光積翠遙相逼。水態含青近若空。直視天河垂象外。俯窺京室畫圖中。皇歡未使恩波極。日暮樓舡更起風。

宴安樂公主新宅云。車如流水馬如風。仙史高樓十二重。天上初移衡漢匹。中憐歌舞夜

相逢。

餞唐州高使君云。春日奏對時。東風搖蕩夕。浩然思樂事。飜復餞征客。淮水春流清。楚山暮雲白。勿言行路遠。所貴專城伯。

九日應制云。并數登高日。延齡命賞時。宸游天上轉。秋物雨來滋。降鶴承仙取。吹花入睿詞。微臣復何幸。長得奉饒私。（得時字）

顛字廷石。幼敏悟。一覽至千言。初除左司禦率府曹參軍吏侍。馬載曰。古稱一日千里。蘇生是矣。長安中爲中書舍人。時瓌同三品。父子同在禁筦。榮之。開元中爲相。（綽威瓌。顛。四世爲名宰相。）

寒食。宴于中舍兄弟宅云。子推山上歌龍罷。定國門前細駟來。始覩元昆鏘玉至。旋聞季子佩刀迴。晴花處處因風起。御柳條條向日開。自有長筵歡不極。還持綵勝詠南陔。

和晦日駕幸昆明池云。炎曆事邊陲。昆明如鑿池。豫遊光後聖。征戰罷前規。霽色清彌宇。年芳入錦披。御杯薦葉。仙仗柳交枝。二石分河寫。雙珠代月移。微臣此翔詠。恩廣自無涯。

瓌初未知顛。一日有客詣瓌。候於客次。顛擁篲庭廡間。遺落一文字。客取視之。乃詠崑崙奴詩云。指如十挺墨。耳似兩張匙。異之。良久。瓌出。與客淹留言詠。以其詩問瓌何人。豈非足下

宗庶之孽也。瓌備言其事，客驚訝之，請瓌加禮收舉，必蘇氏之令子也。瓌稍稍親之，有人獻兔，懸於廊廡，瓌召令詠之，曰：「兔子死，蘭彈將來掛竹竿，試將明鏡照，無異月中看。」瓌覽詩，異之，由是學問日新，文章蓋代。及帝平內難，日夕制詔駱驛，無非瓌之所作，時稱小許公。

人日侍宴大明宮，應制云：「疏龍磴，道切昭回，建鳳旗，開繞帝臺。七葉仙，莫承月吐，千株御柳拂煙開。初年競帖宜春勝，長命先浮獻壽杯。是日最靈知竊幸，羣心就捧大明來。」  
瓌幼年有京兆尹過瓌，命詠尹字，曰：「君雖有足，甲不全身。見君無口，知伊少人。」

韋嗣立拜中書令，瓌署官告，瓌爲之詞，薛稷書，時謂三絕。

東明觀道士周彥雲，欲爲其師立碑，謂瓌曰：「成某志，不過煩相君諸子。」五郎文（頰也）六郎書（說善八分）七郎致石，口瓌大笑，口不言而心服其公。

長安盛春遊，頰製詩云：「飛埃結紅霧，遊蓋飄青雲。明皇嘉賞，以御花親插其巾上，時榮之。」  
望春宮應制云：「東望春光正可憐，更逢晴日柳含煙。宮中不見南山盡，城上平臨北斗懸。」  
細草偏承新輦處，輕花微落奉觴前。宸遊對此歡無極，鳥哢聲聲入管絃。

扈從明皇出雀鼠谷，應制云：「雨施巡方罷，雲從訓谷迴。密途汾水衛，清蹕晉郊陪。寒着山邊靜，春當日下來。御祠元鳥應，仙仗綠楊開。作頌音傳雅，觀文色動台。更知西向樂，宸藻協鹽。」



梅。(類詩。盡是中宗時作。惟此一篇。明皇時作。)



唐詩紀事卷第十一

韋嗣立

趙彥伯

閻朝隱

鄭愷

沈佺期

宋之問

徐堅

盧懷慎

武平一

李行言

韋元旦

韋嗣立

九日應制云。層觀遠沉沉。變旗九日臨。帷宮壓水岸。步輦入煙岑。枝上萸新採。樽中菊始  
掛。願陪歡樂事。長與歲時深。（得深字）

嗣立。在省閣與岳州張使君說潭州王都督熊聯事。後承朝譴。各東西相別。詩云。茂先王  
佐才。作牧楚江隈。登樓正欲賦。復遇仲宣來。黃鶴飛將遠。雕龍文爲開。甯知昔聯事。聽曲有餘  
哀。

昔時陪二賢。纓冕會神仙。一去馳江海。相逢共播遷。無因千里覩。忽覩四愁篇。覽諷歡何  
已。歡終徒愴然。

嗣立。中宗時爲大學士。制云。詞林佇秀。學海資英。苟非鴻儒。孰副推擇。守大府卿。韋嗣立。

金罍襲慶。玉鼎生才。浴德澡身。居中履孝。保淳懿之道。綜虛明之識。前言往行。獨運襟靈。健筆通文。孤標望實。果升臺閣。常典樞機。誠亮險夷。政敷匡益。自出入中外。周旋宦遊。夕郎歸其峻。寵冬卿美其成務。官曹內殿。朝野旁求。宜參右署之榮。俾接金閨之彥。可修文館大學士。兄承慶。長壽中。與嗣立相代爲鳳閣舍人。長安三年。承慶代嗣立爲鳳閣侍郎。頃之。又代爲黃門侍郎。四職相代。時謂大郎罷相。二郎拜相。中宗授嗣立黃門侍郎。制曰。芝蘭並秀。見謝石之階庭。騏驎並驅。有劉山之昆季。又曰。近者命於鸞渚。已擢鴈行。纔出芝局。奄歸蒿里。永言荆樹。坐折連枝。眷彼常山。空餘一鳥。俾遷榮於皂蓋。宜襲寵於黃樞。

嗣立庄在驪山鸚鵡谷。中宗幸之。嗣立獻食百罌。及木器藤盤等物。上封爲逍遙公。谷爲逍遙谷。原爲逍遙原。中宗留詩。從臣屬和。嗣立並鐫于石。請張說爲之序。薛稷書之。李乂詩略云。樞掖調梅暇。林園種樅初。入朝榮劍履。退食樂琴書。地隱東巖石。天迴北斗車。旌門臨舜祿。輦路屬扶疏。沈佺期詩略云。水堂開禹膳。山閣獻堯鐘。皇鑒清居遠。天文容獎濃。武平一云。三光迴斗極。萬騎肅鈞陳。地若遊汾水。畋疑獵渭濱。趙彥昭云。廊廟心存巖壑中。鑾輿颺在瀟城東。逍遙自有蒙莊子。漢主徒言河上公。張說序亦云。嵐氣入野。榛煙出谷。魚潭竹岸。松齋藥畹。虹泉電射。雲木虛吟。恍惚疑夢。問關忘術。茲所謂立擊道政。龍衣冠巢許也。

開元中。嗣立自湯井還都。經其龍門北溪別業。忽懷驪山之勝。嘗有詩云。幽谷杜陵邊。風  
燼別幾年。偶來伊水曲。溪嶂覺依然。傍浦憐芳木。尋崖愛淥泉。嶺雲隨馬足。山鳥向人前。地合  
心俱靜。言因理自玄。短才叨重寄。戶祿媿妨賢。每拊掛冠侶。思從初服旋。稻梁仍欲報。歲月坐  
空捐。助岳無纖芥。輸溟謝末涓。還晤北轅失。方茲南澗田。時張說。崔泰之。崔日知。在東都。皆和  
焉。先一日。太平公主。上官昭容。題詩數篇。故張說詩云。舞鳳迎公主。雕龍賦婕妤。

趙彥伯

九日應制云。九日報仙家。三秋轉翠華。呼鷹下鳥路。戲馬出龍沙。簪挂丹萸藥。杯涵紫菊  
花。所願同微物。年年共辟邪。（得花字）

張賣來自朔方軍。中宗迓之。宴于桃花園。應制曰。紅萼競燃春苑曙。芊葢新色御筵開。長  
年願奉西王讌。近侍慚無東朔才。

彥伯爲洪文館學士。

閻朝隱

送金城公主。生舅重親地。君臣厚義鄉。還將貴公主。嫁與梅檀王。鹵簿山川闊。胡琴道路  
長。迴瞻父母國。日出在東方。

人日大明宮應制云。句芒人面乘兩龍。道是春神衛九重。綵勝年年逢七日。醑釀歲歲滿千鍾。宮梅間雪祥光徧。城柳含煙瑞氣濃。醉倒君前情未盡。願因歌舞自爲容。

宴安樂公主新宅云。鳳凰鳴舞樂昌年。蠟燭開花夜管絃。半醉徐擊珊瑚樹。已聞鐘漏曉聲傳。

鸚鵡貓兒云。鸚鵡惠鳥也。貓不仁獸也。飛翔其背焉。嚙啄其願焉。攀之緣之。蹈之履之。弄之藉之。踰踏然。此爲自得。彼亦以爲自得。畏者無所起其畏。忍者無所行其忍。抑血屬舊故之不若。臣叨踐太子舍人。朝暮侍從。預見其事。聖上方以禮樂文章爲功業。朝野歡娛。強梁充斥之輩。願爲臣妾。稽顙闕下者。日萬計。尋而天下一統。實以爲惠。可以伏不惠。仁可以伏不仁。亦太平非常之明證。事恐久遠。風雅所缺。再拜稽首。爲之篇。

霹靂引。豐隆鳴。猛獸噫。氣蛇吼。聲。鸚鵡鳥。同資造化。兮。殊粹精。鷓鴣毛。翡翠翼。鸕雛延頸。鸚鵡弄色。鸚鵡鳥。同稟陰陽。兮。異埏埴。彼何爲兮。隱隱振振。此何爲兮。綠衣翠襟。彼何爲兮。窳窳蠢蠢。此何爲兮。好口好音。彷彿兮。佯佯似妖姬。躡步兮。動羅裳。趁趁兮。踰踰若處子。迴眸兮。登玉堂。爰有獸也。安其獸也。其忍。若其脅。距其胸。與之放曠。浪浪兮。從從容容。鈎爪。踞牙也。霄行晝伏。無以當遇之兮。忘味搏擊。騰擲也。朝飛暮噪。無所拒逢之兮。屏氣由是言之。貪殘薄則。

智惠作貪殘臨之兮不復躍。由是言之。智惠周則貪殘囚。智惠犯之兮不復憂。菲形陋質雖賤。微皇王顧遇長光輝。離宮別館臨朝市。妙舞繁絃雜宮徵。嘉喜堂前景福內。和歡殿上明光裏。雲母屏風文彩合。流蘇斗帳香煙起。承恩宴盼接宴喜。高視七頭金駱駝。平懷五尺銅師子。國有君兮國有臣。君爲主兮臣爲賓。朝有賢兮朝有德。賢爲君兮德爲飾。千年萬歲兮心轉憶。筵願因吹菊酒。相守百千年。（得筵字）

中宗立春遊苑應制云。管籥周移寰極裏。乘輿望幸斗城闌。草根未結青絲纒。蘿蔦猶垂綠帔巾。鵲入巢中言改歲。燕銜書上道宜新。願得長繩繫取日。光臨天子萬年春。

送唐永昌赴東都詩曰。洛陽難理若焚絲。推破連環定不疑。鸚鵡鳥道長安樂。回首一顧一相思。

授著作郎直學士制云。朝隱夜光成寶。朝陽擢秀。文高一變。藝摠三端。承顧問於鸞掖。賞圖書於麟府。頃屬播遷。獲返班序。方來石室分曹。已參於著述。金門直事。俾崇於伸獎。可修文館直學士。

朝隱字友倩。趙州饒城人。性滑稽。屬辭奇詭。爲武后所賞。景龍時。爲著作郎。先天中。爲秘

書少監。坐事貶通州別駕卒。

鄭愔

上幸薦福寺令賦詩云。舊邸三乘闕。佳辰萬騎留。欄闔奉葉飴。芝蓋拂花樓。國會人王法。宮還天帝遊。紫雲成寶界。白水作禪流。鴈塔呂基遠。鸚杯容藻抽。忻承大風曲。竊預小童謳。

三會寺應制詩云。鳥籟遺新閣。龍旗訪古臺。造書臣頡往。觀跡帝羲來。睿覽山川匠。宸心宇宙該。梵音隨駐輦。天步接乘杯。舊苑經寒露。殘池問劫灰。散花將捧日。俱喜聖詞開。

陪幸昭容院獻詩四首。

地軸樓居遠。天台闕路賒。何如遊帝宅。卽此對僊家。拂座金壺電。池搖玉酒霞。無云秦漢隔。別訪武陵花。堯詞姑射近。漢苑建章連。十五莫知月。三千桃幾年。鶯歌隨鳳吹。鶴舞向鸚絃。更覓瓊妃伴。來過玉女泉。宮掖賢才重。山林高士難。不言辭輦地。更有結廬歡。池棟清溫燠。巖窓起泫寒。幽亭有山桂。聖主萬春看。槎流天上轉。茅宇禁中開。河鵠填橋至。山熊避檻來。庭花採藁葬。巖石步莓苔。願奉蘿圖泰。長聞錦翰裁。

陪幸長甯公主莊云。公門襲漢壇。主第稱秦玉。池架祥鱸宇。山吹鳴鳳曲。拂席薜蘿垂。迴舟芰荷觸。平陽妙舞處。日暮清歌續。



望春宮迎春應制云。晨蹕凌高轉翠旌。春樓望遠背朱城。忽排花上遊天苑。却坐雲邊看帝京。百草香心初冒蝶。千林嫩葉始藏鶯。幸同微蕞傾誠早。願比盤相應候榮。

送金城公主云。下嫁戎庭遠。和親漢禮優。笳聲出虜塞。簫曲比秦樓。貴主悲黃鶴。征人怨紫騮。皇情眷億兆。割念俯懷柔。

早朝云。瑞闕龍居峻。宸庭鳳掖深。才良寄天綽。趁拜侶朝簪。飛鳥看來影。喧車識駐音。重軒輕霧入。洞戶落花侵。聞有題新翰。依然想舊林。同聲慚卞王。謬比託韋金。

### 塞外三篇

塞外蕭條望。征人北路賒。邊聲亂朔馬。秋色引胡笳。遙郡侵歸日。長城帶晚霞。斷蓬飛古戍。連雁聚寒沙。海暗雲無葉。山春雪作花。丈夫期報主。萬里獨辭家。荒嶼三秋夕。窮郊萬里平。海陰凝獨樹。日氣下連營。戎旆霜疑重。邊裘夜更輕。將軍猶轉戰。都尉不成名。析柳悲春曲。吹笳斷夜聲。明年漢使返。須築受降城。陽鳥南飛夜。陰山北地寒。漢家征戍客。年歲在樓蘭。玉關朔風起。金河秋月團。邊聲入鼓吹。霜氣下旌干。海外歸書斷。天涯旅鬢殘。子卿猶奉使。常向節旌看。

惜字文靖。年十七。進士擢第。神龍中。爲中書舍人。與崔日用。趙履溫。李愷等。託武三思權。

熏炙中外。天下語曰：崔冉鄭亂時政。（冉祖雍也）或曰：初附來俊臣，俊臣誅，附易之，易之誅，託韋庶人，後附譙王，卒被戮。

人日侍宴大明宮云：瓊殿含光映早輪，玉鑾初蹕望初晨。池開凍水仙宮麗，樹發寒花禁苑新。佳氣徘徊籠細網，殘英淅瀝染輕塵。良時荷澤皆迎勝，窮谷嵇陽猶未春。

哭郎著作云：詩禮康成學，文章賈誼才。已年人得夢，庚日鳥爲災。書草藏天閣，琴聲入夜臺。荒階羅駁蘚，雲座滿塵埃。白馬賓從散，青鳥隴隧開。悲涼門館下，懷舊幾遲迴。

秋閨詩云：征客向輪臺，幽閨寂不開。音書秋雁斷，機杼夜蛩催。虛幌吹風葉，閑堦露染苔。自憐愁思影，常共月徘徊。

唐永徽以來，唱桑條歌云：桑條韋也女，韋也神龍時。逆韋應之，惜作乘條樂詞十首，以進擢吏侍。

愔樂府採蓮曲云：錦櫂沙棠艦，羅帶石榴裙。綠潭採荷芰，清香日稍曛。魚鳥爭唼喋，花葉相芬氤。不覺湘州暮，菱歌處處聞。

胡笳曲云：漢將留邊朔，遙遙歲序深。誰堪牧馬思，正是胡笳吟。曲斷江山月，聲悲雨雪陰。傳書向蘇武，陵也獨何心。

折楊柳云。青柳映紅顏。黃雲蔽紫關。忽聞邊使出。枝葉爲君攀。舞腰愁欲斷。春心望不還。  
風花袞成雪。羅綺亂班班。

夜遊曲云。漢室歡娛盛。魏國文雅適。許史多暮宿。應陳從夜遊。西園燕公子。北里召王侯。  
詎以將軍獵。空嗟亭尉留。

年少行云。穎川豪橫客。咸陽輕薄兒。田寶方貴幸。趙李新相知。軒蓋終朝集。笙竽此夜吹。  
黃金盈篋筒。白日忽西馳。

沈佺期

幸太平公主南庄詩云。主第山門起灞川。宸遊風景入初年。鳳凰樓下交天仗。烏鵲橋頭  
敞御筵。往往花間逢綵石。時時竹裏見虹泉。今朝扈蹕平陽館。不羨乘槎雲漢邊。

九日臨渭亭云。御氣幸金方。憑高薦羽觴。魏文菊藥。漢武賜萸房。秋美銅池色。晴添銀  
樹光。年年重九慶。日月奉天長。

陪幸韋嗣立庄云。台階好赤松。別業對青峯。茆室承三顧。花廳接九重。虹旗縈秀木。鳳輦  
拂疎筇。逕直千官擁。溪長萬騎容。水堂開禹膳。山閣獻堯鐘。皇鑑清居遠。天文睿獎濃。巖泉他  
夕夢。漁釣往年逢。共榮丞相府。偏降逸人封。

白鹿觀應制云。紫鳳真人府。班龍太上家。天流芝蓋下。山轉桂旌斜。聖藻垂寒露。仙杯落晚霞。唯應問王母。桃作幾時花。

上巳陪駕渭濱云。寶馬香車清渭濱。紅桃碧柳楔堂春。皇情尙隱垂竿佐。天瑞先呈捧劍人。

陪幸五王宅云。北闕垂旒暇。南宮聽履迴。天臨翔鳳轉。恩向濯龍開。蘭氣承僊帳。榴花引御盃。日從金穴吐。雲是玉衣來。池影搖歌席。林香散舞臺。不知行漏晚。清蹕尙徘徊。

安樂公主莊云。皇家貴主學神仙。別業初開雲漢邊。山出盡如鳴鳳嶺。池成不讓飲龍川。粧樓翠幌教春住。舞閣金鋪借日懸。景從乘輿來此地。稱觴獻壽樂鈞天。

人日大明宮應制云。拂旦鷄鳴仙衛陳。憑高龍首帝庭春。千宮黼帳杯前壽。百福香奩勝裏人。山鳥初來猶怯囀。林花未發已偷新。天文正應韶光轉。設報懸知用此辰。

望春宮迎春應制云。芳郊綠野散春晴。複道離宮煙霧生。楊柳千條花欲綻。蒲桃百丈蔓初縈。林香酒氣元相入。鳥囀歌聲各自成。定是風光牽宿醉。來晨復得幸昆明。

晦日滌水應制云。素滌接宸居。青門盛袂除。摘蘭誼風野。浮棗溢龍渠。苑蝶飛殊嬾。宮鶯囀不疎。景移天上入。歌舞向儲胥。

送金城公主云。金勝扶丹掖。銀河屬紫闈。那堪將鳳女。還似嫁烏孫。玉就歌中怨。珠辭掌上恩。西戎非我匹。明主爲公存。

饒唐永昌云。洛陽舊有神明宰。輦轂由來天地中。餘邑政成何足貴。因君取則四方同。早朝云。闔闔連雲起。巖廊拂霧開。玉珂龍影度。珠履雁行來。長樂霄鐘盡。明光曉奏催。一經推舊德。五字擢英才。儼若神仙去。紛從霄漢迴。千春奉休歷。分禁喜趨陪。

曝衣篇云。君不見昔日宜春太液邊。披香畫閣與天連。登華灼燦九微映。香氣氤氳百和燃。此夜星繁河正白。人傳織女牽牛客。宮中擾擾曝衣樓。天上娥娥紅粉席。曝衣何許曠半黃。宮中梁絳河裏。碧煙上。雙花伏兔畫屏風。四子盤龍擎斗帳。舒羅散縠雲霧開。綴玉垂珠星漢迴。朝霞散綵羞衣架。曉月分光劣鏡臺。上有仙人長命錦。中有玉女迎歡繡。玳瑁筵中別作春。珊瑚窗裏釀成畫。椒房金屋寵新流。意氣嬌奢不自由。漢文宜惜露臺產。晉武須燒前殿裘。  
(中間疑有脫字)

九日應制云。御氣幸金方。憑高薦羽觴。魏文頒菊蕊。漢武賜萸房。去鶴留歌吹。歸鴻識舞行。臣歡重九慶。日月奉天長。(得長字)

和晦日駕幸昆明池云。法駕乘春轉。神池象漢迴。雙星移舊石。孤月隱殘灰。戰鷁逢時去。

恩魚望幸來。岸花緹騎遠。堤柳幔城開。思逸橫汾唱。歡流宴鎬杯。微臣凋朽質。羞覩豫章材。

白鹿觀應制云。四郊秦漢國。八水帝王都。閎閣雄理閭。宮闕壯規模。貫渭稱天邑。含歧實奧區。金門披玉館。因此識皇圖。

主第夜宴云。濯龍門外主家親。鳳鳴樓中天上人。自有金杯迎甲夜。還將綺席發陽春。

張燕公說嘗謂佺期曰。沈三兄詩。須還他第一。佺期字雲卿。相州人。除給事中。考功郎。受賊劾未究。會張易之敗。遂長流驩州。稍遷台州錄事參軍。入計召見。拜起居郎。兼修文直學士。侍宴爲弄辭悅帝。賜牙緋。尋爲太子詹事。開元初卒。佺期迴波樂詞云。迴波爾時佺期。流向嶺外生歸。身名已蒙齒錄。袍笏未復牙緋。

魏建安後。訖江左。詩律屢變。至沈約。庾信。以音韻相婉附。屬對精密。及之間。沈佺期。又加靡麗。回忌聲病。約句準備。如錦綉成文。學者宗之。號爲沈宋。語曰。蘇李居前。沈宋比肩。謂蘇武李陵也。

酬蘇味道夏晚省中云。並命登仙閣。分霄直禮闈。大官供宿膳。侍史護朝衣。卷幔天河入。開牕月露微。小池殘暑退。高樹早涼歸。冠劍無時釋。軒車待漏飛。明朝題漢柱。三署有光輝。

和楊再思春夜宿直云。西禁青春滿。南端皓月微。千廬霄駕合。五夜曉鐘晞。星斗橫綸閣。

天河渡瑣闥。煙花奏裏紛。向夕郎飛。

和崔正諫登秋日早朝云。雞鳴朝謁滿。露白禁門秋。爽氣臨旌戟。朝光映冕旒。河宗來獻寶。天子命焚裘。獨負津陽議。言從逮禮遊。

巫山高云。巫山高不極。合沓奇狀新。暗谷疑風雨。陰崖若鬼神。月明三峽曙。潮滿九江春。爲問陽臺客。應知入夢人。此詩范攄以爲佞期之作。而顧陶以爲張循。今記於此。

宋之問

芙蓉園應制云。芙蓉秦地沼。盧橘漢家園。谷轉斜盤徑。江迴曲抱源。風來花自舞。春入鳥能言。侍宴瑤池夕。歸途笳吹繁。

三會寺應制云。六飛迴玉輦。雙樹謁金仙。瑞鳥呈眞宇。神龍吐浴泉。淨心遙證果。睿想獨超禪。塔踴香花地。山圍日月天。梵音迎雨徹。空樂倚雲懸。今日登仁壽。長看法鏡圓。

薦福寺應制云。梵筵光聖邸。遊豫覽宏規。不改靈光殿。因開功德池。蓮生新步葉。桂長昔攀枝。踴塔夜中見。飛樓海上移。聞韶三月幸。觀象七星危。欲識龍歸處。朝來雲氣隨。

陪遊苑遇雪云。紫禁仙輿詰旦來。青旗遙倚望春臺。不知庭蔽今朝落。疑是林花昨夜開。錢許州宋司馬云。穎郡水東流。荀陳兄弟遊。偏傷茲日遠。獨向聚星州。河潤在明德。人康

非外求。當聞力爲政。遙慰我心愁。

謁禹廟云。夏王乘四載。茲地發金符。駿命終不易。報功疇敢渝。先驅惣昌會。後至伏靈誅。玉帛空天下。衣冠照海隅。旋開厭黃屋。更道出蒼梧。林表詞轉茂。山阿井詎枯。舟遷龍負壑。田變鳥芸蕪。舊物森如在。天威肅未殊。玄夷屆瑤席。玉女侍青都。弈弈肩闈邃。軒軒文衛趨。氣青都曙海。雲白洗春湖。猿嘯有時合。禽言長自呼。靈歆異蒸糈。至樂匪笙竿。茅殿今文襲。梅梁古製無。運遙日崇麗。業盛答昭蘇。伊昔力云盡。而今功尙敷。揆才非美箭。精享愧生芻。郡職味爲美。邦空甯自誣。下車轍已積。攝事露行濡。人隱冀多祐。曷惟密薄馿。

詠海云。肅事祠春溟。宵齋洗蒙慮。鷄鳴見日出。鷺下觀濤驚。地闊八荒近。天迴百川澍。筵端濟空曲。目外唯霧霧。暖氣物象來。周遊晦明互。致腥匪玄享。裊滌期靈煦。的的波際禽。泫泫鳥問樹。安期今何在。方丈蔑尋路。仙事與世隔。冥搜徒已屢。四明背羣山。遺老莫辨處。內撫良自慨。弱齡忝恩遇。三入文史林。兩拜神仙署。雖歎出關遠。始知臨海趣。賞來空自多。理勝孰能喻。留楫竟何時。待徙倚歲云暮。

浣沙篇贈陸上人云。越女顏如花。越王聞浣沙。國徽不自寵。獻作吳宮娃。山藪半潛匿。芋糶更蒙遮。一行霸勾踐。再笑傾夫差。艷色奪人目。効嘯亦相誇。一朝還舊都。覩粧尋若耶。林鳥



驚入松。網魚畏沈花。始覺治容安。方悟君心邪。欽子秉幽意。世人共稱嗟。願言託君懷。儻類蓬  
生麻。家住雷門曲。閣高陵飛霞。淋漓翠羽帳。旖旎綠雲車。春風颯楚舞。秋月綿胡笳。自昔專嬌  
愛。翫襲惟矜奢。達本知空寂。棄彼猶泥沙。永割偏執性。自長薰修牙。携妾不障道。願止妾西家。  
中宗幸薦福寺獻詩云。香刹中天起。宸遊滿路輝。乘龍太子去。駕象法王歸。殿飾金人影。  
牕搖玉女扉。稍迷新草木。遍識舊庭闈。水入禪心定。雲從寶思飛。欲知星劫遠。初拂六銖衣。  
立春日侍宴內殿出剪綵花詩云。金閣裝新店。瓊筵弄綺梅。人間都未識。天上忽先開。蝶  
繞香絲住。蜂憐艷粉回。今年春色早。應爲剪刀催。

陪幸公主南莊詩云。青門路接鳳凰臺。素澹宸遊龍騎來。澗草自迎香釐合。巖花應對御  
筵開。文移北斗成天象。酒近南山作壽盃。此日侍臣將石去。共歡明主錫金迴。（之間薦福寺  
昆明池及此作。都爲冠首。）

明河篇云。八月涼風天氣品。萬里無雲河漢明。昏見南樓清且淺。曉落西山縱復橫。洛陽  
城闕天中起。長河夜夜千門裏。複道連薨共蔽虧。盡堂瓊戶特相宜。雲母帳前初汛濫。水精簾  
外轉逶迤。倬彼昭回如練白。復出東城接南陌。南陌征人去不歸。誰家今夜擣寒衣。鴛鴦機上  
疎螢度。烏鵲橋邊一鴈飛。鴈飛螢度愁難歇。坐見明河漸微沒。已能舒卷任浮雲。不惜光輝讓

流月。明河可望不可親。願得乘槎一問津。更將織女支機石。還訪成都賣卜人。蓋之問求爲北門學士。天后不許。故此篇有乘槎訪卜之語。后見其詩。謂崔融曰。吾非不知其才。但以其有口過爾。之問終身恥之。（口過齒疾。）

武后遊龍門。命羣官賦詩。先成者賜以錦袍。左史東方虬詩成。拜賜坐未安。之問詩後成。文理兼美。左右莫不稱善。乃就奪錦袍衣之。其詞曰。宿雨霽氛埃。流雲度城闕。河湓柳新翠。苑樹花初發。洛陽花柳此時濃。山水樓臺映幾重。羣公拂霧朝翔鳳。天子乘春幸鑿龍。龍門近出王城外。羽從淋漓擁軒蓋。雲蹕纔臨御水橋。天衣已入香山會。山壁巔巖斷復連。清流澄澈俯伊川。塔影遙遙綠波上。皇龍弈弈翠微邊。層巒舊長千尋木。春壑初飛百丈泉。綵仗旄旌遠香閣。下輦登高望河洛。東城宮闕擬昭回。南陌溝塍殊綺錯。林下天香七寶臺。山中春酒萬年盃。微風一起祥花落。仙樂初鳴瑞鳥來。鳥來花落紛無已。稱觴獻壽煙霞裏。歌舞淹留景欲斜。石間猶駐五雲車。烏旗翼翼留芳草。龍騎駸駸映晚花。千乘萬騎鑾輿出。水靜山空巖壑蹕。郊外喧喧引看人。傾城南望屬車塵。囂聲引颺聞黃道。王氣周迴入紫宸。先王定鼎三河固。寶命乘周萬物新。吾皇不事瑤池樂。時雨來觀農扈春。

詠省壁畫鶴詩云。粉壁圖仙鶴。昂藏真氣多。鴛飛竟不去。當是戀恩波。

韋善心爲郎中善剖決之問善詩時謂戶部二妙之間字延清汾州人與佺期允濟媚附  
易之及敗貶瀧州參軍事逃歸復附三思景龍中諂事太平公主安樂公主權盛復往諸結太  
平深嫉之中宗將用爲中書舍人太平發其賊下遷越州長史賦詩流傳京師睿宗立以兇險  
盈惡詔流欽州賜死

徐堅

送金城公主云星漢下天孫車服降殊藩匣中詞易切馬上曲虛繁關寒移朱帳風塵照  
錦軒簫聲去日遠萬里望河源

餞許州宋司馬云舊許星車轉神京祖帳開斷煙傷別望零雨送離盃辭燕依空遠賀鴻  
入聽哀分携與秋氣日夕共徘徊

餞唐永昌赴任東都云郎官出宰赴伊瀟征轉駸駸灞水前此時長望新豐道携手相看  
共黯然

餞考功武員外學士使嵩山置舍利塔歌云伊川別騎灞岸分筵對三春之花月覽千里  
之風煙望青山兮分地見白雲兮在天寄愁心於樽酒愴離緒於清絃共握手而相顧各啣悽  
而黯然（已上中宗時作）

堅字元固。西臺舍人齊暉之子。屬文典厚。楊再思每日爲鳳閣舍人樣。中宗時爲給事中。明皇改麗正書院爲集賢院。以堅充學士。不爲章句之學。而窮覽治聞。綿歷四朝。以謹厚稱。

送張說巡邊應制云。至德撫遐荒。神兵赴朔方。帝思元帥重。爰釋股肱良。累相承開池。深籌協子房。寄崇專斧鉞。禮備設壇場。鼙鼓喧雷電。戈劍凜風霜。四驂將戒道。十乘啓先行。聖錫加常錫。天光曜寵光。出郊開帳飲。寅饒盛離章。雨濯梅林潤。風秋麥野涼。燕山應勒頌。麟閣佇名楊。（開池字疑）

堅卒。張說挽歌云。才美臨淄北。名高淮海東。羽儀三省遍。漁獵五車通。玉殿孤新榜。珠英落舊叢。徒存一寶劍。何處訪徐公。

盧懷慎

九日應制云。時和素秋節。宸豫紫機閑。鶴似聞琴至。人疑宴鑄還。曠望對平野。潺湲俯暎灣。無因酬大德。空此媿崇班。（得還字）

懷慎靈昌人。開元初與姚崇同相。時譏爲伴食。然能清儉。以直道始終。

武平一

駕幸溫泉詩云。秦王登謁石。周后襲峴崙。何必在遐遠。方稱萬寓尊。我皇順時豫。星駕動

軒轅。維騎交馳道。清笳度國門。迴輿長樂觀。校獵上林園。行漏移三象。連營惣八屯。旌搖鸚鵡谷。騎轉鳳凰原。絕壁蒼苔古。靈泉碧溜溫。參差開水殿。奇籟敞巖垣。豐邑蹤猶在。驪宮跡尙存。煙松御翠幄。雪逕遶花源。侍從推玄草。文章召武賁。深仁浹夷夏。洪造溢乾坤。謬忝王枚列。多慚雨露恩。

景龍四年正旦賦柏樹詩云。綠葉迎春綠。寒枝歷歲寒。願將百葉壽。長奉萬年歡。

興慶池云。鑿輿羽駕直城隈。帳殿旌門此地開。皎潔靈潭岡日月。參差畫舸結樓臺。波搖岸影隨橈轉。風送荷香逐酒來。願奉皇權常不極。長遊雲漢幾昭回。

白鹿觀應制云。玉府凌二曜。金壇駐六龍。綠旒懸倒景。羽蓋偃喬松。玄圃靈芝秀。華池瑞掖濃。謬因霑舜渥。長願奉堯封。

送金城公主云。廣化三邊靜。通姻四海安。還將膝下愛。特副域中歡。聖念飛玄藻。仙儀下白蘭。日斜征蓋沒。歸騎動鳴鸞。

宴安樂公主新宅云。王孫帝女下仙臺。金榜珠簾日夜開。邊惜瓊筵權正洽。雄愁銀箭曉相催。

餞唐永昌云。聞君墨綬出丹墀。靈鳥飛來佇有期。寄謝銅街攀柳日。無忘粉署握蘭時。

正月八日立春。內出綵花賜近臣。應制云。變轂青旂下帝臺。東郊上苑望春來。黃鸞未解林間囀。紅藥先從殿裏開。書閣條風初變柳。銀塘曲水半含苔。欣逢睿藻元韶律。更促霞觴畏景催。是日中宗手勅批云。平一年雖最少。文甚警新。悅紅藥之先開。訝黃鸞之未囀。循環吟咀。賞歎兼懷。今更賜花一枝。以彰其美。所賜學士花。並令插在頭上。後所賜者。平一左右交插。因舞蹈拜謝。時崔日用乘酣飲。欲奪平一所賜花。上於簾下見之。謂平曰。日用何爲奪卿花。平一跪奏曰。讀書萬卷。從日用滿口虛張。賜花一枝。學平一終身不獲。上及侍臣大笑。因更賜酒一盃。當時嘆美。

中宗宴安樂公主新宅。應制云。紫漢秦樓敞。黃山魯館開。簪裙分上席。歌舞列平臺。馬既如龍至。人疑學鳳來。幸忻聯棣萼。何以接鄒枚。

人日西臺觀打毬。應制云。令節重遨遊。分塵戲綵毬。騶隨迴上苑。蹀躞繞通溝。影就紅塵沒。光隨赭汗流。賞闌清景暮。歌舞樂時休。

平一名甄。以字行。武后時。畏禍隱嵩山。中宗雖宴豫。嘗因詩規誠。然不能卓然自引去。明皇時。終亦彼謫。雖謫而名不衰。

秋晚度廢關云。秦郊平舊險。周德眷遺黎。始聞清夜柳。俄見落風泥。物色來無限。津途去不迷。空亭誰問馬。閑戍但鳴鷄。山月寒彌淨。河風曉更淒。贈言楊伯起。非復是關西。

景龍中。中宗引近臣宴集。令各獻伎爲樂。張錫爲談客娘舞。宗晉卿舞渾脫。張洽舞黃鸞。杜元琰誦婆羅門呪。行言唱駕車西河。盧藏用効道士上章。國子司業郭山輝。請誦古詩兩篇。誦鹿鳴蟋蟀未畢。李嶠以詩有好樂無荒之語。止之。行言隴西人。兼文學幹事。函谷關詩。爲時所許。中宗時。爲給事中。能唱步虛歌。帝七月七日御兩儀殿會宴。帝命爲之。行言於御前長跪。作三洞道士音。詞歌數曲。貌偉聲暢。上頻嘆美。

### 韋元旦

正月七日。宴大明殿詩云。鸞風旌旆拂曉陳。魚龍角觶大明辰。青韶旣肇人爲日。綺勝初成日作人。聖藻凌雲裁柏賦。仙歌從宴摘梅春。垂旒一慶宜年酒。朝野俱歡薦壽新。

安樂公主山莊云。銀河南洛帝城隅。帝輦平明出九衢。刻鳳蟠螭陵桂邸。穿池疊石寫蓬壺。瓊簫暫下鈞天樂。綺綴長懸明月珠。仙榜承恩爭旣醉。方知朝野更歡娛。

望春宮迎春應制云。九重樓閣半山霞。四望韶陽春未賒。侍蹕妍歌游灞浹。留觴罷舞出京華。危萍競捧中街日。戲馬爭銜上苑花。景色歡娛長若此。承恩不醉不還家。

送金城公主云。柔遠安夷俗。和親重漢年。軍容旌節送。國命錦車傳。琴曲悲千里。簫聲戀九天。唯應西漢月。來就掌珠圓。

餞唐州高使君云。桐柏膺新命。芝蘭惜舊遊。鳴皋夜鶴在。遷木早鴛求。傳擁淮源路。鱗空灞水流。落花分送遠。春色別離憂。

早朝云。霞維芳月季。宸極衆星尊。佩玉朝三陛。鳴珂過九門。挈壺分早漏。伏檻耀初暉。北倚蒼龍闕。西臨紫鳳垣。詞庭草雖視。溫室樹無言。鱗翰空爲忝。長懷聖主恩。

中宗立春遊苑應制云。滿涘長安常近日。殷正臘月早迎新。池魚戲葉仍含凍。宮女裁花已作春。向苑雲疑承翠帷。入林風若起青蘋。年年斗柄東無限。願把瓊觴壽北辰。

中宗時輿慶池侍宴應制云。滄池漭沆帝城邊。殊勝昆明鑿漢年。夾岸旌旗疏遠道。中塘簫鼓振樓船。雲峯四起迎宸帳。寶樹千重入御筵。宴樂已深魚鳥詠。承恩更欲奏甘泉。

主第夜宴云。主第新成銀作榜。賓筵廣宴玉爲樓。壺觴既下仙人夜。歌舞疑停織女秋。元旦京兆萬年人。與張易之姻屬。易之罷。貶感義尉。舅陸頌妻。章后弟也。元旦憑以復進。

終中書舍人。

唐詩紀事卷第十一終



唐詩紀事卷第十二

畢乾泰

辛替否

王景

卓安石

竇希玠

李成

陸景初

鄭南金

于經野

解琬

麴瞻

樊忱

孫佺

李從遠

周利用

楊廉

張景源

李恒（已上景龍應制羣臣）

畢乾泰

慈恩寺九日應制云。鸚鵡林化塔啓。鳳輦順時遊。重九昭皇慶。大千揚帝休。耆闍妙法闡。王舍睿文流。至德覃無極。小臣歌詎訃。

辛替否

慈恩寺九日應制云。洪慈均動植。至德俯深玄。出豫從初地。登高適梵天。白雲飛御藻。慧日暖皇編。別有秋原葢。長傾雨露緣。

替否字協時。京兆人。景龍中爲左拾遺。以直諫遷右臺殿中侍御史。爲憲司。彈擊不避強。

禦累遷穎王府長史卒。

王景

慈恩寺九日應制云。玉輦移中禁。珠梯覽四禪。重階清漢接。飛竇紫霄懸。綴葉披天藻。吹花飲御筵。無因鑾蹕暇。俱舞鶴林前。

景。太原人。爲司門員外郎。萊州刺史。子之咸。爲長安尉。昆弟之賁。之渙。皆善屬文。之咸之子緯。有傳。

韋安石

九日侍宴應制云。重九開秋節。得一動宸儀。金風飄菊蕊。玉露滋萸枝。睿覽八絃外。天文七曜披。臨深應在卽。居高豈慮危。（得枝字）

安石。京兆人。久視中爲相。二張三思橫寵。安石數析辱之。復相中宗。不附太平公主。睿宗時。爲姜晦所劾。貶黜。發憤卒。

竇希玠

九日應制云。鑿輿巡上苑。鳳駕瞰層城。御座丹烏麗。宸居白鶴驚。玉旗縈桂葉。金杯汎菊英。九晨陪聖膳。萬歲奉承明。（得明字）

八月中宗令學士尋勝同宴於禮部尙書竇希玠林亭。張說製序云：召絲竹於伶官，借池亭於貴族。雕俎在席，金羈駐門。遠山片雲，隔層城而卽興；繁鴛芳樹，遶高臺而共樂。

夏日帝幸五王第，乃過希玠宅。劉憲詩云：北斗樞機任，西京肺腑親。李又詩云：貴遊開北第，宸眷幸西鄉。按希玠武德時內史，令威之後。中宗時爲禮書，以恩澤賜實封。開元爲太子少傅，世爲外戚。唐世貴盛，莫與爲此。

李威

九日應制云：重陽乘令序，四野開晴色。日月數初并，乾坤聖登極。菊黃迎酒泛，松翠凌霜直。遊海難爲深，負山徒倦力。（得直字）

陸初景

九日應制云：九秋光順豫，重節霽良辰。登高識漢苑，問道侍軒臣。菊花浮秬鬯，萸房插繒紳。聖化謐邊垂，長洲鴻雁濱。（得臣字）

景初，元初之子。恬靜寡欲，議論高簡。景雲中，與崔湜同知政事。睿宗曰：子能召先業，是謂象賢，乃賜名象先。

鄭南金

九日應制云。重陽玉律應。萬乘金輿出。風起韻虞絃。雲開吐堯日。菊花浮聖酒。茱萸香挂囊。賈欲知恩煦多。順動觀秋實。（得日字）

于經野

九日應制云。御氣三秋節。登高九曲門。桂筵羅玉俎。菊體溢芳樽。遵洛歸鴻度。承雲舞鶴。窳。微臣濫陪賞。空荷聖明恩。（得樽字）

經野。中宗時爲戶部尙書。

中宗九日登高應制。二十四人。韋安石。蘇頌。詩先成。于經野及盧懷慎詩後成。時景龍三年也。

解琬

慈恩寺九日登塔應制云。瑞塔臨初地。金輿幸上坊。空邊有清淨。覺處無聲香。雨霽微塵歛。風秋定水涼。茲辰採仙菊。薦壽慶重陽。

晦日宴高氏林亭云。主第簪裾出。王畿春照華。山亭一已眺。城闕帶煙霞。橫堤列錦帳。傍浦駐香車。歡娛屬晦節。酩酊未還家。

琬。魏州元城人。與郭元振善。習邊事。守邊積二十年。開元中終同州刺史。

魏瞻

慈恩寺九日應制云。扈蹕遊玄地。陪仙瞰紫微。似邁銖衣劫。將同羽化飛。雕戈秋日麗。寶劍曉霜霏。馭觴乘菊序。長願奉天暉。

樊忱

慈恩寺九日應制云。淨境重陽節。仙遊萬乘來。插萸登鷺嶺。把菊坐蜂臺。十地祥煙合。三天瑞景開。秋風詞更遠。竊抃樂康哉。

孫佺

慈恩寺九日應制云。應節萸香滿。初寒菊浦新。龍旗煥辰極。鳳駕儼香闌。蓮井偏疑夏。梅梁更若春。一忻陪應塔。還似得天身。

佺麟德。宰相處約之子。延和初。爲幽州都督。爲奚所敗。同周以弟見獲。送默啜所殺之。佺不知兵。始表懷古爲都督。馭士有方。朝廷以佺代之。遂及敗。

李從壇

慈恩寺九日應制云。九月從時豫。三乘爲法開。中霄日天子。半座寶如來。摘果珠盤獻。攀黃玉輦迴。願將塵露點。遙奉光明臺。

周利用

慈恩寺九日應制云。出輿乘金節。飛文煥日官。英房開聖酒。杏苑被玄功。塔向三天迥。禪  
收八解空。叨恩奉蘭籍。終愧洽薰風。

金城公主和蕃。中宗送至馬嵬。羣臣賦詩。帝令御史大夫鄭惟忠。及利用護送。入蕃。學士  
賦詩以餞。徐彥伯爲之序云。

楊廉

九日侍宴應制云。遠目瞰秦垌。重陽坐灞亭。旣開黃菊酒。還降紫微星。蕭鼓諳仙曲。山河  
入畫屏。幸茲陪宴喜。無以效丹青。（得亭字）

慈恩寺九日應制云。萬乘臨眞境。重陽眺遠空。慈雲浮雁塔。定水映龍宮。寶鐸含鸞響。仙  
輪帶日紅。天文將瑞色。輝煥滿寰中。

沈佺期酬楊給事中廉見贈臺中詩云。子雲惟辯博。公理擅詞雄。始自尙書省。旋開給事  
中。言從溫室祕。籍向鎖闈通。

張景源

慈恩寺九日應制云。飛塔凌霄起。宸遊一屆焉。金壺新泛菊。寶座卽披蓮。就日搖香輦。憑

雲出梵天。祥氛與佳色。相伴雜鑪煙。

李恒

慈恩寺九日應制云。寶地隣丹掖。香臺瞰碧雲。關山江水出。城闕樹中分。容藻蘭英秀。仙杯菊蕊薰。願將今日樂。長奉聖明君。





唐詩紀事卷第十三

崔液

張元一

劉希夷

鄭遂初

王熊

房融

張敬忠

崔珪

沈祖仙

盧崇道

徐安期

張紘

薛曜

袁暉

李休烈

邵士彥

吳大江

劉幽求

賈曾

楊齊哲

魏元忠

李夔

司馬承禎

崔液

上元詩六首云。玉漏銅壺且莫催。鐵關金鎖徹明開。誰家見月能閑坐。何處聞燈不看來。  
今年春色勝常年。此夜風光最可憐。鵝鵲樓前新月滿。鳳凰臺上寶燈燃。  
神燈佛火百輪張。刻象圖容七寶裝。影裏如聞金口說。空中似放玉豪光。  
金勒銀鞍控紫騮。玉輪珠璣駕青牛。驂驪始散東城曲。倏忽還來南陌頭。  
公子王孫意氣驕。不論相識也相邀。最憐長袖風前弱。更覺新絃暗裏調。

星移漢轉月將微。露灑煙飄燈漸稀。猶惜道傍歌舞處。踟躕相顧不能歸。

液。字潤甫。仁師之子。湜之弟也。工五言。舉進士第一人。湜嘗曰。液子。我家龜龍也。官至殿中侍御史。坐湜故。亡命郢州。作幽征賦以見意。遇赦還。卒。

張元一

武后朝。左司郎中張元一。善滑稽。時西戎犯邊。武懿宗統兵禦之。至邠。畏懦而遯。懿宗知陋。元一嘲曰。長弓短度箭。蜀馬臨高蹠。去賊七百里。隈墻獨自戰。忽然逢着賊。騎猪向南越。則天未曉曰。懿宗無馬耶。元一曰。騎猪夾豕也。則天大笑。后嘗問元一。外有何事。曰。有三慶。旱而雨。洛橋成。郭洪霸死。〔洪霸。酷吏也。〕

劉希夷

將軍行云。將軍關轅門。耿介當風立。諸將欲言事。逡巡不敢入。劍氣射雲天。鼓聲破原隰。黃塵塞路起。走馬追兵急。彎弓從此去。飛箭如雨集。截圍一百里。斬首五千級。代馬流血死。胡人抱鞍泣。古來養甲兵。有事常討襲。乘我廟堂運。坐使干戈戢。獻凱歸帝京。軍容何翕習。

悲代白頭翁云。洛陽城東桃李花。飛來飛去落誰家。洛陽兒女惜顏色。行逢落花長歎息。今年花落顏色改。明年花開誰復在。已見松柏摧爲薪。更聞桑田變爲海。古人無復洛城東。今

人還對落花風。年年歲歲花相似。歲歲年年人不同。寄言全盛紅顏子。須憐半謝白頭翁。此翁白頭真可憐。伊昔紅顏美少年。公子王孫芳樹下。清歌妙舞落花前。光祿臺前錦綉。將軍樓閣盡神仙。一朝臥病無人識。三春行樂在誰邊。宛轉娥眉能幾時。須臾鶴髮亂如絲。但看舊來歌舞地。唯有黃昏鳥雀悲。

唐新語云。希夷一名庭芝。汝州人。少有文華。好爲宮體詩。詞旨悲苦。不爲時人所重。善彈琵琶。嘗爲白頭翁詠云。今年花落顏色改。明年花開復誰在。旣而自悔曰。我此詩識與石崇白首同所歸何異。乃更作一聯云。年年歲歲花相似。歲歲年年人不同。旣而歎曰。此句復似向識矣。然死生有命。豈復由此。乃兩存之。詩成。未周歲。爲奸人所殺。或云。宋之問害之。後孫翌撰正聲集。以希夷詩爲集中之最。由是大爲人所稱。或云。之問害希夷。而以洛陽之篇爲已作。至今載此篇在之問集中。

晚憩南陽旅館云。旅館何年廢。征夫此日過。途窮人自哭。春至鳥還歌。行路新知少。荒田古路多。池篔覆丹谷。墳樹遶清波。日照蓬陰轉。風微野氣和。傷心不可去。回首怨如何。

秋日題汝陽潭壁云。獨坐秋陰至。悲來從所適。行見汝陽潭。飛蘿蒙水石。懸瓢木葉上。風吹何歷歷。幽人不耐煩。振衣步閑寂。回流清見底。金沙覆銀礫。洛水非一丈。空隴幾千尺。魚鱗

可憐紫鴨毛自然碧。秋水弄清光。渺焉忘損益。遊山隨形影。清濁混心迹。歲暮歸去來。東山餘宿昔。

故園置酒云。酒熟人須飲。春還髮已秋。願逢千日醉。得緩百年憂。舊里多青草。新知盡白頭。風前燈易滅。川上月難留。卒卒周姬旦。棲棲魯孔丘。平生能幾日。不及且遨遊。

夜集張謹所居云。江南成久客。門館日蕭條。唯有圖書在。多傷鬢髮凋。諸生陪講誦。稚子給漁樵。隱室寒燈淨。空階落葉飄。滄洲自有趣。誰道隱須招。

巫山懷古云。巫山幽陰地。神女艷陽年。襄王伺容色。落日望悠然。歸來高堂夜。金缸焰青煙。頽想臥瑤席。夢魂何翩翩。搖落殊未已。榮華倏徂遷。愁思滿湘浦。悲涼雲夢田。猿啼秋風夜。雁飛明月天。巴歌不可聽。聽此益潺湲。

孤松篇云。蠶月桑葉青。鸞時柳花白。澹艷煙雨滋。敷芬陽春陌。如何秋風起。零落從此始。獨有南澗松。不歎東流水。玄陰天地冥。皓雪朝夜零。豈不罹寒暑。爲君留青青。青青好顏色。落在孤直羣。樹遙相望。衆草不敢逼。靈龜卜真隱。仙鳥宜棲息。恥受秦帝封。願言唐侯食。寒山夜月明。山冷氣清清。淒兮歸風集。吹之作琴聲。松子臥仙岑。寂聽凝野心。清冷有真曲。樵採無知音。美人何時來。幽逕委綠苔。吁嗟深澗底。棄捐廣廈材。

鄭遂初

別離怨云。蕩子戍遼東。連年信不通。塵生錦步障。花送玉屏風。只怨紅顏改。寧辭玉簫空。  
繫書春鴈足。早晚到雲中。

萬歲通天年。李迥秀下登第。

王熊

熊。自潭州至岳陽。張燕公宴別贈詩二章云。絲管清且哀。一曲傾一盃。氣將然諾重。心向  
友朋開。古木無生意。寒雲若死灰。贈君芳杜草。爲植建章臺。

縉紳連省閣。溝水邊西東。然諾心猶在。容華歲不同。孤城臨楚塞。遠樹入秦宮。誰念三千  
里。江潭一老翁。

熊答云。長沙辭舊國。洞庭逢故人。薰蘭敦久要。披霧轉相親。歲月方嗟老。江山不惜春。忽  
聞黃鶴曲。更作白頭新。

平生共風月。倏忽間山川。不期交淡水。暫得款忘年。興逸方罷釣。帆開欲解船。離心若危  
旆。朝夕爲君懸。

韋嗣立嘗和前作。并序云。余昔忝省闕。與岳州張使君。潭州王都督。同官聯事。後承朝譴。

各自東西。張公與王都督別詩二首。情頗感切。余覽以耿耿。因追和焉。（詩見嗣立門。）

房融

遊始興廣果寺山房云。零落嗟殘命。蕭條託勝因。方燒三界火。遽洗六情塵。隔嶺天花發。凌空月殿新。誰令鄉國思。從此學分身。

融。河南人。武后時爲宰相。神龍元年。貶死高州。

張敬忠

先天中。王上客爲侍御史。自以才望華妙。當入省望。前行。忽除膳部員外。微有悵惋。吏部郎中張敬忠戲詠曰。有意嫌兵部。專心望考功。誰知腳踏躑。幾落省牆東。蓋膳部在省最東北隅也。

張仁愿。在朔方。奏用御史張敬忠。何長鸞等。分摠軍事。太子文學柳彥昭爲管記。義烏尉昆良正爲隨機。皆著稱。敬忠自監察御史。累遷吏部郎中。開元七年。拜平盧節度使。（上客字未詳。）

崔珪

孤寢怨云。征戍動經年。含情拂玳筵。花飛織錦處。月落擣衣邊。燈暗愁孤坐。牀空怨獨眠。

自君遼海去。玉匣閑春絃。

珪開元中爲太子詹事。與兄中書舍人琳。弟光祿卿瑤。俱列棨戟。世號三戟崔家。

沈祖仙

秋閨詩云。白馬三軍客。青娥十載思。王庭霜落夜。羅幌月明時。爐冷蜘蛛喜。燈寒熠耀期。愁多不可曙。流涕坐空幃。

廬崇道

新都南亭別郭大元振詩云。竹徑女蘿蹊。蓮洲文石隄。靈深人俗斷。尋玩往還迷。碧潭秀初月。素林驚夕棲。囊幌納鳥侶。罷琴聽猿啼。佳辰改宿昔。勝寄坐睽攜。長懷賞心愛。如玉復如珪。

崇道爲太常卿。坐其黨崔湜反。俱流嶺南。還歸至都。爲其子娶崔氏女。有內給使取充貴人。崇道賂之。令別娶一崔氏女。入內事。敗。并男三人。皆勅杖至殞。蓋睿宗時也。

徐安期

催粧云。傳聞燈下調紅粉。明鏡臺前作好春。不須面上渾粧却。留着雙眉待畫人。

張紘

閨怨詩云。去年離別鴈初歸。今夜裁縫螢已飛。征客近來音信斷。不知何處寄寒衣。  
紘登久視六年進士第。

薛曜

正夜侍宴應制云。重關鐘漏通。夕敞鳳凰宮。雙日祥煙裏。千門明月中。酒盃浮湛露。歌曲唱流風。侍臣咸醉止。常慚恩遇崇。

曜尙城陽公主。子紹尙太平公主。紹兄顛懼太盛。以問從兄克。克曰。帝甥尙主。由來故事。但以恭慎行之。何懼也。曜堂姪倣。子鏞。自曜至鏞。一門四公主。

曜。元起之子也。聖曆中。附張易之。官正諫大夫。

袁暉

正月閨情云。正月金閨裏。微風繡戶聞。曉魂憐別夢。春思逼啼顏。透砌梅堪折。當軒樹未攀。歲華庭北上。何日度陽關。

七月閨情云。七月坐涼霄。金波滿麗譙。容華芳意改。枕席怨情饒。錦字沾愁淚。羅裙綆細腰。不如銀漢女。感感鵲成橋。

二月閨怨云。二月韶光好。春風香氣多。園中花巧笑。林裏鳥能歌。有恨離琴瑟。無情着綺



羅更聽春燕語。妾亦不如他。

三月閨怨云。三春時將盡。空房獨妾居。蛾眉愁自結。鬢髮沒情梳。

魏知古薦爲左補闕。開元中。馬懷素欲校正羣籍。暉自邢州司戶參軍預焉。

明皇東巡。回出雀鼠谷。暉應制云。魏國山河險。周王警蹕迴。九旗雲際出。萬騎谷中來。石岸行將盡。煙郊望忽開。賞矜垂柳拂。春畏落花催。興逸橫汾體。恩褒作頌才。小臣瞻日月。延首詠康哉。

### 李林烈

長壽三年。則天徵天下銅五十餘萬斤。鐵一百三十餘萬斤。於定鼎門內。鑄八稜銅柱。高九十尺。徑一丈二尺。題曰。大周萬國。述德天樞。紀革命之功。貶唐家之德。天樞下。置鉄山銅龍。負載獅子。麒麟圍遶。上有雲蓋。上施盤龍。以托珠。高一丈。圍三丈。金彩熒煌。光侔日月。武三思爲其文。朝士獻詩者。不可紀。惟李嶠詩冠絕當時。曰。轍跡光西嶠。勳庸紀北燕。何如萬國會。諷德九門前。灼灼臨黃道。迢迢入紫烟。仙盤正下露。高柱欲承天。山類叢雲起。珠疑大火懸。聲流塵作劫。業固海成田。聖澤傾堯酒。薰風入舜絃。忻逢下生日。還遇上皇年。後憲司發嶠。附會韋庶人。左授滁州別駕而終。

開元中，詔毀天樞，發卒鎔鑠，彌月不盡。洛陽尉李休烈賦詩以詠之，曰：天門街裏倒天樞，火急先須卸火珠。計合一條絲線挽，何勞兩縣索人夫。先有訛言云：一條線挽天樞，言其不經久也。故休烈詩及之。士庶莫不諷詠。天樞之北，韋庶人織造一臺，先此毀拆。（出大唐新語）

邵士彥

秋閨詩云：斜日空庭暮，幽閨積恨盈。細風吹帳冷，微月度窗明。怨坐啼相續，愁眠夢不成。調琴欲有弄，畏作斷腸聲。

吳大江

擣衣詩云：沙寒秋應晚，金閨恨已空。那堪裂紈素，時許出房櫳。杵影弄寒月，砧聲調夜風。裁縫雙淚盡，萬里寄雲中。

劉幽求

幽求書懷云：心爲明時盡，君門尙不容。田園迷徑路，歸去欲何從。

幽求，冀州人。臨淄王入誅韋庶人，預參大策。先天中爲相，在同列下，意望未滿，已而竇懷正、崔湜附太平公主，有逆謀。幽求說明皇圖之謀，洩睿宗流之於封州。明年，公主誅，召復舊官。開元初，進左丞相，以太子少保罷。姚崇忌之，奏幽求鬱鬱散職，有怨言。詔有司鞠治。盧懷慎等

奏幽求輕肆不恭。失大臣體。貶睦州刺史。遷杭柅二州。悲憤卒于道。

賈曾

洛陽人。以孝聞。開元初。爲中書舍人。與蘇晉同掌制誥。時號蘇賈。

曾孝和皇帝挽詞云。新命千齡啓。鴻圖累聖餘。天行應潛躍。帝出受圖書。禮若傳堯舊。功疑復夏初。夢遊長不返。何國是華胥。

曾和宋之問下山歌云。良遊晼晚兮月成紅。錦路逶迤兮山路長。王孫不留兮歲將宴。嵩富仙草兮爲誰芳。（之問詩。見王无競門紅字未詳。）

奉和春日出苑遊囑云。彤闈晚闕問安迴。金輅遊春博望開。渭北晴光搖草樹。終南佳氣入樓臺。招賢已得商山客。託乘還招鄴下才。臣在東周獨留滯。欣承容藻日邊來。（時爲太子舍人使在東都。）

楊齊哲

過函谷關云。地險崑函北。途經分陝東。逶迤衆山盡。荒涼古塞空。河光流曉日。樹影散朝風。聖德今無外。何處是關中。

魏元忠

侍宴銀潢宮應制云。別殿秋雲上。離宮夏景移。寒風生玉樹。涼氣下瑤池。顰花仍吐葉。富  
菌尙抽枝。願奉南山壽。千秋長若斯。（元忠唐史有傳。）

李夔

夔爲汴州司戶。使至汴州。喜逢宋之問詩云。阮籍蓬池上。孤韻竹林才。巨源從吏道。正擁  
使車來。相逢且交臂。相命且銜盃。醉後長歌畢。餘聲繞吹臺。

之問答曰。遠方來下客。輜軒揖使臣。弄琴宜在夜。傾酒貴逢春。駟馬留孤館。雙魚贈故人。  
明朝雲雨散。遙仰德爲鄰。

司馬承禎

宋之問吟冬霄引贈承禎云。河有冰兮山有雪。北戶墜兮行人絕。獨山中兮對明月。懷美  
人兮屢盈缺。明月的的寒潭中。青松幽幽吟勁風。此情不向俗人說。愛而不見恨無窮。

承禎答云。時旣暮兮節欲春。山林寂兮懷幽人。登奇峯兮望白雲。帳灑邈兮象郁紛。白雲  
悠悠去不返。寒風颼颼吹日晚。不見其人誰與言。歸坐彈瑟思逾遠。

承禎字子微。事潘師正。傳辟穀導引術。無不通。睿宗明皇累召至京師。問其術。卒贈正一  
先生。沈佺期贈詩云。紫微降天仙。丹地授雲藻。上言華頂事。中問長生道。華頂居最高。大壑朝

陽早。長生術何妙。童顏後天老。清晨朝鳳京。靜夜思鴻寶。絃其被召之事也。李白云。余昔於金陵。見司馬子微。謂余有仙風道骨。可以神遊八極之表。因著大鵬賦以見志焉。



唐詩紀事卷第十四

張說

宋璟

王丘

崔翹

王光庭

席豫

梁昇卿

源乾曜

張嘉正

盧從愿

韓休

徐知仁

崔禹錫

裴灌

韋杭

程行誡

李嵩

蕭嵩

劉昇

裴光庭

宇文融

崔沔

崔尙

陸堅

崔泰之

崔日知

魏奉古

張說

八日迎春賜綵花詩云。別館芳菲上苑東。飛花澹沲御筵紅。城臨渭水天河近。聞對南山雲霧通。繞殿流鶯凡幾樹。當蹊亂蝶許多叢。春園既醉心和樂。共識皇恩造化同。

送金城公主云。青海和親日。星潢出降時。戎王子晉寵。漢國舊家慈。春野開離宴。雲天起別詞。空彈馬上曲。詎減鳳樓悲。

晦日滙水應制云。千行發御柳。一葉下仙筇。青浦宸遊至。朱城佳氣濃。雲霞交暮色。草樹喜春容。藹藹天旂轉。清笳入九重。

餞唐州管使君云。常時好閑燕。朋舊好相過。及爾宣風去。方嗟離別多。淮流春晚晚。江海路蹉跎。百年屢分散。言歡復幾何。（已上四首。中宗時作。）

說字道濟。洛陽人。相明皇。爲文屬思精壯。長於碑誌。謫岳州後。詩益悽婉。人謂得江山助云。

夜坐詩云。懷哉四壁時。未有五都價。百金誰見許。斗酒難爲貴。落花生芳春。孤月皎清夜。復逢利交客。題戶遙相謝。

岳陽早霽南樓云。山水佳新霽。南樓翫初旭。夜來枝半紅。雨後洲全綠。四運相終始。萬形紛代續。適臨青草湖。再變黃鸝曲。地穴穿山武。江流下西蜀。歌聞枉渚邇。舞見長沙促。心遠居無漏。神和生自足。白髮悲上春。知常謝無欲。

岳陽石門墨山。二山相連。有禪道觀。天下絕境。詩云。困輪江上山。近在華容縣。常陟巴丘首。天晴遙可見。佳遊屢前諾。芳月愆幽眷。及此符守移。歡言臨道便。旣攜賞心客。復見送行掾。竹徑入陰窅。松崖上空禱。草共林一色。雲與峯萬變。探窺石門斷。緣越沙澗轉。兩山勢爭雄。峯



巖相顧盼。藥妙靈仙寶。境華巖壑選。清都西淵絕。金地東敞宴。池果接園畦。風煙邇臺殿。高尋去石頂。曠覽天宇徧。千山紛滿目。百川豁對面。騎來雲氣迎。人去鳥聲戀。長揖桃源士。舉世同企羨。

岳州山城云。岳城豐日暇。閉戶見天心。東曠迎朝色。西樓引夕陰。觀書千載近。學靜二毛深。忽有南風至。吹君堂上琴。

岳州行郡竹籬云。山郡不溝郭。荒城無翳壅。愛人忠主利。義守閉爲勇。苟非小勤瘁。安得期逸寵。板築恐土疏。襄城嫌役重。藩柵聊可固。筠篁近易奉。差池截浦沙。繚繞緣隈隴。蟲似長雲亘。森如高戟聳。預絕材狼憂。知免牛羊恐。閭里寬矯步。榛叢恣踏踵。始果游處心。終日成閑拱。

出湖寄趙冬曦云。西泛平湖盡。參差入亂山。東瞻岳陽郡。汗漫太虛間。窘步同行樂。適文亦屢看。山戍上雲桂。江亭臨水關。川途倏忽間。風景依如昨。湘浦未賜環。荆門猶主諾。何時得余美。載酒游宛洛。

說謔岳州常鬱鬱不樂。時宰以說機辨才略。牙相排擯。蘇頲方大用。說與瓌善。說因爲五君詠。致書封其詩以貽頲。誠其使曰。當候忌日。近暮送之。使者近暮。弔客至。多說先公僚舊。頲

覽詩鳴咽流涕。翌日上對大陳說忠正。謬人望所屬。不宜淪滯遐方。上因降璽書勞問。俄遷荊州長史。由是陸象先、韋嗣立、張庭珪、賈曾皆以譴逐歲久。因加甄敘。頰以父之執友。事之甚謹。

王洽然上燕公書云。詩曰。投我以木瓜。報之以瓊琚。此言雖小。可以喻大。相公五君詠曰。淒涼丞相府。餘慶在元成。蘇公一聞此詩。移公於荆府。積漸至相。由蘇得也。今蘇屈居益部。公坐廟堂。投木報瓊。義將安在。亦可舉蘇以自代。然後爲方朔之行。洽然書又曰。相公岳陽送別詩云。誰念三千里。江潭一老翁。今日忘往日之棲遲。貪暮年之富貴乎。

明皇封太山迴。過金橋。御路縈轉。一望旌纛。綿數十里。上曰。張說言我勒兵三十萬。旌旗徑五百里。陝右上黨。至于太原。見后上碑。真才子也。召吳道子。韋無忝。陳闍。同製金橋圖。扈從南山雀鼠谷云。豫動三靈贊。時巡四海威。硤關凌曙出。平路半春歸。雀鎮迎雲罕。汾河送羽旂。山南柳半密。北谷草全稀。遲日宜華蓋。和風入夾衣。上林千里近。應見百花飛。

將赴朔方軍。應制云。禮樂逢明主。韜鈴用老臣。恭憑神武策。遠御鬼方人。供帳榮恩餞。山川喜詔巡。天文日月送。朝賦管弦新。幼志傳三略。衰材謝六鈞。膽猶忠作伴。心故道爲鄰。漢保河南地。胡清塞北塵。連年大軍後。不日小康辰。劍舞輕離別。歌酣忘苦辛。從來思博望。許國不

謀身。

說赴集賢院學士上賜讌。應制得輝字韻云。侍帝金華講。千齡道固稀。任將賢士設。書共學徒歸。首命深燕隗。通經淺漢章。列筵榮賜食。送客愧儒衣。賀燕窺簷下。遷鶯入殿飛。欲知朝野處。文教日光輝。

三相同日拜官奉和御制云。大塊鎔羣品。輕生偶聖時。猥承三仕命。虛恭百僚師。右揆謀華實。前星傳重資。達驚求舊禮。濫點樂賢詩。賜釜同榮拜。樅金宴宰司。菊花吹御酒。蘭葉捧天詞。寶曆休明盛。頽年曷漏衰。少留青史筆。未敢赤松期。

恩賜宴樂遊園云。漢苑佳遊地。軒庭近侍臣。共持榮幸日。來賞豔陽春。饌玉頒王籩。樅金下帝鈞。池臺草色徧。宮觀柳條新。花綬光連榻。朱顏暢飲醇。聖朝多樂事。天意每隨人。

醉中作云。醉後方知樂。彌勝未醉時。動容皆是舞。出語摠成詩。

雜詩云。抱薰心常焦。舉旆心常搖。天長地自久。歡樂能幾朝。君看西陵樹。歌舞爲誰嬌。

五君詠（達志美類。刺異感義。哀事顏氏之心也。擬焉。）

齊公生人表。向天聞鶴唳。清論早揣摩。玄心晚超詣。入相廊廟靜。出軍沙漠霽。見深呂祿憂。舉後陳平計。甘心除君惡。足以報先帝。

許公信國禎。堯美且瞻情。百事資朝問。三章廣世程。處高心不有。臨節自爲名。朱戶傳新戟。青松拱舊營。淒涼丞相府。餘慶在玄成。

李公實神敏。才華乃天授。陸親何用心。處貴不忘舊。故事尊臺閣。新詩冠宇宙。在人忠所奉。惡我誠將宥。南浦去莫歸。嗟嗟茂孫秀。

代公舉鵬翼。翻飛磨海霧。志康天地屯。適與雲雷遇。興喪一言決。安危萬心注。大勳書王府。奪命淪江路。勢傾北夏門。哀靡東平樹。

耿公山岳靈。才傑心亦妙。鷲鳥峻標立。辰玉扣清調。協贊休明啓。思華日月照。何意瑤臺雲。風吹落江徼。湘流下潯陽。洒淚一投弔。

宋璟

奉和明皇答張說南出雀鼠谷詩云。秦地雄西夏。并州近北胡。禹行山啓路。王在邑爲都。忽視寒暄隔。深思險易殊。四時宗伯敍。六義宰臣鋪。微作宮常應。星環日每紆。盛哉逢合道。良以致亨衢。

奉和聖製送張尚書巡邊云。帝道薄存兵。王師尙有征。是聞司馬法。爰命摠戎行。畫闔崇威信。分麾盛寵榮。聚觀方結轍。出祖遂傾城。聖洒山河潤。天詞象緯明。德風邊地假。勝氣朔雲

平宰國推良器。爲軍挹壯聲。至和常得體。不戰卽雲精。以智泉寧竭。其徐海自清。遲遲廟堂坐。贈別故人情。

奉和御製三相同日上官詩云。丞相邦之重。非賢諒不居。老臣庸且憊。何德以當諸。厚秩先爲忝。崇班復此除。太常陳禮樂。中掖降彝摬。聖洒山河潤。仙文象緯舒。冒恩懷寵祿。陳力省空虛。郭隗慚無駿。馮諼媿有魚。不知周勃者。榮幸定何如。

恩賜樂遊園宴詩云。侍飲終酺會。承恩續勝遊。戴天惟慶幸。選地卽殊尤。北向祇雙闕。南臨賞一丘。曲江新溜暖。上苑雜花稠。嚶嚶韶絃屢。戔戔賁帛周。醉歸填畛陌。榮耀接軒裘。

右開元天子登封泰山。南出雀鼠谷。張說獻詩。明皇御答。羣臣應制。故明皇詩。有川途猶在。晉車馬漸歸。秦之句。餞張尙書朔方者。燕公說也。明皇詩有三台入武帳。八座起文昌之句。左丞相張說。右丞相宋璟。太子少傅源乾曜。同日上官錫宴東堂。明皇賜詩。有赤帝收三傑之句。故蘇晉序云。天子作三傑之詩。以命宴樂。蓋爲此也。

劉禹錫獻權舍人書。日昔宋廣平之沉下僚也。蘇公味道。時爲繡衣直指使者。廣平投以梅花賦。蘇盛稱之。自是方列于聞人之目。名遂振。嗚呼。以廣平之才。未爲是賦。則蘇公果暇知其人耶。將廣平困於窮。阨於躓。然後爲是文耶。是知英賢卓犖。可外文字。然猶用片言借說於

先達之口。席其勢而後驤。首當時矧碌碌者。疇能自異。

皮日休桃花賦序曰。餘常慕宋廣平之爲相。正姿勁質。剛態毅狀。疑其鐵腸石心。不能吐  
婉媚辭。然觀其文。而有梅花賦。清便富豔。得南朝徐庾之體。

王丘

奉和明皇答張說南出雀鼠谷詩云。襟帶三秦接。旂裳萬乘過。陽源淑氣早。陰谷沍寒多。  
花梅前茆伏。霜巖後乘戈。戍雲開晉嶺。江鴈入汾河。北土分堯俗。南風動舜歌。一聞天樂唱。恭  
逐萬人和。

丘字仲山。擢童子科。能屬文。爲吏部侍郎典選。其獎用如孫逖。張晉明。王洽然。皆一時茂  
秀。蕭嵩引與當國。丘盛推韓休。休秉政。薦爲御史大夫。

撫言蕭穎士恃才傲物。嘗攜壺逐勝。憩於逆旅。風雨暴至。有紫衣翁領二僮。避雨於此。穎  
士頗侮之。雨止。老人上馬呵殿而去。穎士始知爲丘也。明日造門謝罪。丘引至廡下。坐而責之。  
復曰。子負名傲忽。其止於一第乎。果終于楊州工曹。

崔翹

奉和明皇答張說南出雀鼠谷詩云。碛路繞河汾。晴光掃曙氛。笳吟中嶺樹。戍入半峯雲。

頓覺山原盡。平看邑里分。早行芳草末。晚想好風薰。嘉頌推英宰。春遊扈聖君。共欣承睿渥。日月照天文。

翹官至禮部尙書清河公。

王光庭。

奉和明皇答張說南出雀鼠谷詩云。省俗恩時遍。巡方路稍迴。寒隨汾谷盡。春逐晉郊來。雲騎傳行漏。烟旄引從臺。惠風初應律。和氣正調梅。雅頌通晨禁。天文接曙台。新城桃李色。應待日華開。

奉和御製送張尙書巡邊詩云。賢相德符充。朝推文武維。海波先若鏡。關草預從風。鉞助將軍勇。威成天子功。瓊章九霄發。錫宴五衢通。玉帳龍盤帶。金裝鳳頸總。虎貔分儼儼。河洛震熊熊。戈刃千霜白。旌旗萬火紅。示荆夷夏變。流惠鬼神同。

張說送光庭詩云。同居洛陽陌。輕日嬾相求。及爾江湖去。言別悵悠悠。楚雲眇霸翼。海月倦行舟。愛而不可見。徒嗟芳歲流。光庭與燕公最善。故云。

席豫

奉和明皇答張說南出雀鼠谷詩云。鳴鑾初幸代。旋蓋欲橫汾。山盡千旗直。郊平五校分。

前林已暝景。後壑尙寒氛。風送簫韶曲。花鋪黼黻文。鹽梅推上宰。禮樂統中軍。獻賦紆天札。飄飛白雲。

奉和聖製送張尙書巡邊詩云。聖帝重兵權。分飛屬大賢。中軍人執政。丞相復巡邊。翁習戎裝動。張皇廟略宣。朝榮承容札。野餞轉行旃。亭障東緣海。沙場北際天。春冬見嚴雪。朝夕候烽烟。已勒燕山頌。猶聞遣戍篇。五營將月合。八陣與雲連。經略圖方遠。懷柔道更全。歸來畫麟閣。藹藹武功傳。

豫字建侯。年十六。舉手筆。俊拔科。中之後。爲中書舍人。與韓休。許景先。徐安正。孫狄。名相甲乙。當時號爲席公。帝嘗登朝元閣賦詩。羣臣屬和。帝以豫詩最工。詔曰。詩人之冠冕也。

梁昇卿

奉和明皇答張說南出雀鼠谷詩云。何忽重關道。千年遇聖皇。幽林承惠澤。閑客見清光。日御仙途遠。山靈壽域長。寒雲入晉薄。春樹隔汾香。國佐同時雨。天文屬歲陽。從來漢家盛。未若此巡方。

昇卿與張九齡善。涉學工書。於八分尤工。歷廣州都督。書東封朝覲碑。爲時絕筆。

源乾曜



奉和御製送張尙書巡邊云。匈奴邇河朔。漢地復戎旅。天子擇英才。朝端出盤撫。流星下闔闔。寶鉞專公輔。禮物生光輝。宸意備思詡。有征示矛戟。制勝惟罽俎。彼美何壯哉。桓桓擅斯舉。聲華振臺閣。功德標文武。奉國知命輕。忘家以身許。安人在勤恤。保大殫襟腑。此外無異言。同情報明主。

送張說上集賢學士賜讌賦詩得迎字云。盛業光書府。微人盡國英。絲綸賢相稱。羣俊學爲名。寵名垂天賜。崇恩發睿情。薰風清禁籞。文殿述皇明。日霽庭陰出。池新水氣生。歡娛此無限。詩酒自相迎。

奉和御製賜三相同日上宮云。睿作超千古。湛思育萬人。遞遷俱荷澤。同拜忽爲隣。道合音徽暢。芳馳景命新。鼓鐘崇享禮。鷄鶩集朝倫。竊位思官謗。彫容謝木春。慚多無以敘。拙備實難陳。進級懷三少。承光盡百身。自當歸第日。何幸列官臣。

乾曜開元初。姜皎薦於帝。召見神氣爽。澈古對有序。帝悅之。性謹重。與張嘉正。張說。李元紘。同秉政。居中書。未常廷議。可否。皎爲嘉正所排。得罪。訖不申救。君子譏焉。

張嘉正

奉和御製送張尙書巡邊云。天錫我宗盟。元戎付夏卿。多才思命將。必勇獨橫行。經緯稱

人傑。文章作代英。山川看是陣。草木想爲兵。不待河水合。猶防漢月明。有謀當繫魄。無戰是綏氓。關外專三略。雲中冀一平。感恩其心盡。悵別屢魂驚。直視前旌掣。遙聞後騎鳴。還期方定日。復此出郊迎。

嘉正性簡疏。與人不疑。所薦中書舍人苗延嗣。呂太一。考功員嘉靖。侍御史崔訓。時語曰。令君四俊。苗呂崔員。始爲中書舍人。崔湜輕之。後與議事。正出其上。湜驚曰。此終其坐。後十年而爲中書令。

盧從愿

奉和御製送張說巡邊云。上將發文昌。中將靖朔方。占星引旌節。擇日拜壇場。禮樂臨軒送。威聲出塞揚。安邊俟帷幄。制勝在巖廊。作鼓將軍氣。投醪將士觴。戒途遵六月。離贈動三光。槐路清梅暑。蘅皋赴麥涼。時文仰雄伯。耀武震遐荒。衽席知無戰。兵戈示不忘。佇聞歌杖杜。凱入繫名王。

從愿字子襲。舉制科高第。爲兵部尙書。數充校考使。御史中丞宇文融將以括田戶功爲上下考。從愿不許。乃密白。從愿盛植產。占良田數百頃。帝自此薄之。目爲多田翁。後欲用爲相。屢矣。卒以是止。

韓休

奉和御製送張尙書巡邊云。一德光台象。三軍掌夏卿。來威申廟略。出摠協師貞。受鉞辭金殿。凭軒去鼎城。曉光搖組甲。疎吹繞雲旌。左律方先凱。中韓卽訓兵。定功彰武事。陳頌紀天聲。祖宴初留賞。宸章更寵行。車徒零雨送。林野夕陰生。路極河流遠。川長朔氣平。南轅遲反旆。歸奏謁承明。

徐知仁

奉和御製送張尙書巡邊云。聖德膺三統。皇威被八埏。大明均照物。小醜未寧邊。國相台衡重。元戎廟略宣。紫泥方受命。黃石乃推賢。問罪陰山下。安人屬國前。度關行照月。乘障坐銷烟。北闕紆宸藻。南橋列祖筵。耀威當夏日。殺氣指秋天。鼓鼓盈溫振。旌旗烏獸懸。由來詞翰首。今見勒燕然。

崔禹錫

奉和御製送張尙書巡邊云。供帳何煌煌。公其撫朔方。羣寮咸餞酌。明主降離章。關塞重門下。郊歧禁苑傍。練兵宜雨洗。臥鼓候風涼。炎景甯云憚。神謀肅所將。旌搖天月迴。騎入塞雲

長赫赫皇威振。油油聖澤滂。非惟按車甲。兼以正封疆。叱叱陰山道。澄清潮海陽。虜垣行決勝。台座佇爲光。

禹錫字洪範。登顯慶三年進士第。爲中書舍人。

裴灌

送張說上集賢學士賜讌賦得昇字云。問道圖書盛。尊儒禮教興。石渠因學廣。金殿爲賢昇。日月恩光照。風雲寵命膺。謀謨言可範。舟楫事斯憑。宴喜明時洽。光輝湛露凝。大哉堯作主。天下頌歌稱。

灌與張說善。說爲相。數薦之。灌長於敷奏。天子亦自重焉。

韋杭

送集賢學士張說上官賦讌。賜得西字云。廣庭臨壁沼。多士侍金闈。英宰文儒協。明君日月齊。集賢光首拜。改殿發新題。早夏初移律。餘花尙拂溪。帝觴接雲上。經術引關西。聖德鴻名遠。將陪玉檢泥。

杭終於刑部尙書。所薦如梁昇卿。王倕。王壽。後皆爲顯人。唐史稱之。

程行誼

送張說上集賢學士賜讌賦得迴字。聖主崇文化，鏘鏘得盛才。相因歸夢立，殿以集賢開。象繁微言闡，詩書至道該。堯舜承帝澤，禹膳自天來。禮洽歡逾長，風怡異更迴。國朝將舜頌，同是一康哉。

裴子餘補鄆尉，行謚與之同舍。行謚以文法稱，而子餘以儒顯。長史陳崇業曰：蘭菊異芬，無可廢者。二子卒，子餘諡孝，行謚諡正。張說嘆曰：二諡可無愧矣。

李嵩

送張說上集賢學士賜讌得催字。假武堯風接，崇文漢道恢。集賢更內殿，清選自中台。佐命留侯業，詞華博物才。天廚千品降，夏旨百壺催。鸚鵡方成列，神仙喜暫陪。復欣同拜首，叨此頌良哉。

蕭嵩

送張說上集賢學士賜讌得登字。帝日簡才能，旌賢在股肱。文章體一變，禮樂道逾引。芸閣英華入，賓門鸚鵡登。恩延過所望，聖澤實超恆。夏葉開紅藥，餘花發紫藤。微臣亦何幸，叨此預文明。

奉和御製三相同日上官詩云：審官思其理，多士屬惟唐。歷選台庭舊，來熙帝業昌。入朝

師百辟。論道協三光。垂拱資元老。親賢輔少陽。登榮崇禮送。寵德耀宸章。卿酒飛觴洽。仙闈雅樂張。荷恩思有報。陳力愧無良。願罄公忠節。同心奉我皇。

嵩元開初。權中書舍人。崔琳。王丘。齊澣。以嵩少學術。不以輩行許也。獨姚崇稱其遠到。帝欲相。蘇頲嘗夜密召嵩草詔。其詞曰。國之環寶。帝曰。朕不斥其父名。卿當爲刊削。沉思久之。乃曰。國之珍寶。嵩出。帝曰。虛有其表。嵩頤大多髭。故帝有是言。

劉昇

送張說上集賢學士。賜講得賓字云。圖書應明主。策府宴嘉賓。台耀臨東壁。乾光自北辰。網羅窮象繫。述作究天人。聖洒千鍾洽。仙廚百味陳。成山徒可仰。涉海詎知津。幸逢文教盛。還視頤聲新。

昇能文善草隸。德威之後也。開元中。累遷中書舍人。

裴光庭

奉和御製三相同日上官詩云。樂賢聞往誥。褒德偶茲辰。端揆升元老。師謀擇累仁。紫庭崇讓畢。粉署禮容陳。旣荷恩榮舊。俱承寵命新。天文懸瑞色。聖洒汎華茵。雜選陳蕭鼓。歡娛洽縉紳。掖垣招近侍。虛薄廁清塵。共保堅身節。當期雨露均。

光庭字連城。時爲兵部侍郎。後爲相。譔瑤山往則維城前軌二篇。獻之手制褒美。詔皇太子諸王於光順門見光庭。謝所以規諷意。

宇文融

奉和御製三相同日上官詩云。申甫生周日。宣慈舉舜年。何如偶昌運。比德邁前賢。寵獲元良密。榮瞻端揆遷。職優三仕老。位極百僚先。北極迴宸渥。南宮飾宴筵。飛文瑤札降。賜酒玉杯傳。謬列台衡重。俱承雨露偏。誓將同竭力。相與効塵涓。

融爲張說所惡。欲先事中傷說。張九齡謂說曰。融辯洽多詐。公不可忽。說曰。狗鼠何能。其後乃與崔隱甫廷劾說受昧事。帝詔說致仕。而出融詩。有誓將同竭力。相與効塵涓之語。欣附說之辭也。

融安輯戶口。明皇賜詩。張說奉和云。聖德臨天下。勞情遍九圍。念茲人去本。蓬轉將何依。外避征戍數。內傷親黨稀。嗟不逢明盛。胡能照隱微。柏臺簡行李。蘭殿錫朝衣。別曲動秋風。恩令生春輝。使出四海安。詔下萬心歸。忤無夔龍佐。徒歌鴻鴈飛。

崔沔

恩賜樂遊園宴云。五日酺初畢。千年樂未央。復承天所賜。終宴園之陽。地勝春逾好。恩深

樂更張。落花飛廣座。垂柳拂行觴。庶尹陪三吏。諸侯具萬方。酒酣同拊躍。歌舞詠時康。

沔字善冲。有才章。舉賢良方正第一。最受知於張說。儉約自持。嘗作陋室銘以見志云。

崔尙

恩賜樂遊園宴云。春日照長安。皇恩寵庶官。合簪承罷飲。宴帛賜追歡。供帳馮高列。城池入迥寬。花催相國飲。鳥和樂人彈。北闕雲中見。南山樹杪看。樂遊宜締賞。舞詠惜將闌。

尙登久視六年進士第。官至祠部郎中。

陸堅

送張說上集賢學士應制得令字云。聖主崇文教。層霄降德音。尊賢澤既厚。式宴寵逾深。復有夔龍相。良哉簡帝心。得人惟邁昔。多士諒惟今。書殿榮光滿。儒門喜氣臨。願惟成濫吹。徒此接衣簪。

堅爲中書舍人。以集賢學士。或其非人。而供擬太厚。議白罷之。張說曰。麗正乃天子禮樂之司。所費細而所益者大。陸生之言。蓋未達耶。帝知。遂薄堅。

崔泰之

酬韋嗣立龍門北溪作云。闕塞臨伊水。驪山枕灊川。俱臨隱路側。同在帝城邊。謝公兼出



處。搆妓玩林泉。鳴騶噴梅雪。飛蓋曳松烟。聞琴幽谷裏。看弈古巖前。落月低幃帳。歸雲繞管絃。  
叨榮慚北闕。微尚愛東田。寂寞灰心盡。蕭條麈事捐。朝思登絕嶠。夜夢弄潺湲。宿懷南澗意。况  
視北宮邊。

同光祿弟冬日述懷序云。韋祭酒。張左丞。二公。並廊廟偉才。朝廷舊相。咸光首和。殊爲佳  
作。輒繼陽春。深增媿悚。詩云。吾族白眉良。才華動洛陽。觀光初人仕。應宿始爲郎。飛螢翫書籍。  
白鳳吐文章。海卿逾往雅。河尹冠前張。擇才綏隲。殊化被江湘。高樓臨廣陌。甲第敞通莊。別  
館邛山下。疏亭洛水傍。昌年賞豐陌。暇日悅林塘。衣冠皆秀茂。羅綺盡名倡。隔岸聞歌度。臨池  
見舞行。門庭寒變色。檠戟日生光。窮陰方變隼。殺氣正蒼茫。咸時興盛作。晚歲其多傷。積德韋  
丞相。通神張子房。吟草編簪紱。逸韻合宮商。功名守留省。濫跡在文昌。家園遙可見。臺寺近相  
望。無庸乘侍謁。有暇共翱翔。棣華依鴈序。竹葉拂鸞觴。水坐憐秋月。山行弄晚芳。恩榮慚服冕。  
友愛篤垂堂。無由報大德。相顧詠時康。韋祭酒。嗣立。張左丞。說。光祿。日知也。

泰之時以禮部居洛。故與嗣立說日知。數有酬唱。泰之知溫之子。初以職方郎中。預平二  
張。終於工部尚書。

崔日知

和韋嗣立龍門北溪作云。夙齡秉微尚。中年忽有隣。以慈山水僻。遂得學道人。迨我南京道。聞君北業新。嵩前窺石鏡。河畔踏芳茵。既憐伊浦綠。復憶瀨池春。連詞謝家子。同歡寄野賓。趣閑魚共樂。情洽鳥來馴。誰念昔遊者。祇命獨留秦。蕭條潁陽戀。冲漠漢陰真。無由陪勝躅。空此飯書筠。

冬日述懷奉呈韋祭酒張左丞蘭臺名賢云。弱齡好經籍。披泰卽怡然。覃精四十載。馳騁數千言。孔壁探遺篆。周韋考絕編。袁公論劍術。孫子敍兵篇。魯史君臣道。姬書日月懸。從師改炎煥。負笈遍山川。上異西河道。中非北海玄。光榮拾青紫。名價接通賢。既重萬鍾樂。甯思二頃田。長戟同分虎。高冠亞附蟬。晚懷重虛曠。養志息雕鑄。登高慚思拙。匠物謝情妍。不慕張平子。寧希王仲宣。誰爲登龍日。醜成刻鶴年。循循勞善誘。軋軋思微牽。琢磨才既竭。鑽仰德彌堅。朽木誠爲諭。捫心徒自憐。終期吞鳥夢。振翼上雲煙。賦成先擲地。詞高直揆天。吏執樞衣禮。仍聞函丈筵。露披槐市藹。水靜璧池圓。願逐從風葉。飛舞翰林前。

日知字子駿。日用從父兄。與張說同爲魏元忠朔方判官。再遷洛州司馬。譙王重福之變。以功加銀青光祿大夫。遷殿中少監。日知在洛日。與韋嗣立張說酬唱。故說和冬日述懷詩序云。太極殿衆君子。分司洛城。自春涉秋。日有遊訪。崔光祿述志論文。首貽雅唱。諸公嘉德序事。

咸有報章。若夫盛時榮位。華景勝會。此四者古難一遇。而我輩實兼之。嗣立亦序云。僕忝臺閣。早經聯事。崔公以雅道自居。未嘗至假之室。僕羸疾收退。門堪羅雀。公存訪不避風雨。方知向時跡也。今晨情也。蘭菊春秋自芳。竹柏歲寒無變。故嗣立詩有昌年雖共偶。歡會此難并。爲憐漳浦山。沉痾有劉禎之句。說詩云。夫君邁前侶。觀國騁奇姿。山似鳴威鳳。泉如出寶龜。又曰。紫綬拂三寺。朱門臨九逵。其貴盛如此。後爲太常卿。自以處朝廷久。每入謁。必與尙書齒。時謂尙書裏行。後爲潞州長史。卒。初赴潞州。明皇賜詩云。潞國開新府。壺關寵舊臨。妙旌循吏德。持悅庶民心。蓋潞爲明皇舊鎮。故也。張說和云。聖情垂曩鎮。佳氣翊興王。增戟雄都府。高車轉太常。川橫八澗闊。山帶五龍長。連帥初恩命。天人舊紀綱。餞塗飛御藻。闔境自輝光。明主招循吏。何年下鳳凰。

魏奉古

和韋嗣立龍門北溪作云。有美朝爲貴。幽尋地自偏。踐臨伊水泆。想望瀟池邊。是遇哲新賞。茲遊若舊年。藤蘿隱路接。楊柳御溝聯。道愜神情王。機忘俗理捐。遂初誠已重。兼濟實爲賢。跡是山東戀。心唯北闕前。顧慚經拾紫。多謝賦思玄。未躍中林步。空乘麗藻傳。陽春和已寡。扣寂竟徒然。

龍門北溪韋嗣立山居在焉。諸公賦詩奉古詩預酬唱之末。張說序崔韋贈答詩云。二公述志論文。首貽雅唱。其餘尋聲響答。望形影赴。故亦峻碧池之連漪。增瑤林之沃若。蓋奉古之徒是也。

唐詩紀事卷第十五

王灣

魏知古

許景先

姚崇

姜皎

姜晞

王岳靈

楊顏

鄭繇

張諤

趙仁漿

張暉

金昌緒

蘇晉

張九齡

崔國輔

王灣

奉使登終南山詩云。常愛南山遊。因而盡原隰。數朝至林嶺。百仞登崑崙。石壯馬徑窮。苔色步緣入。物奇春狀改。氣遠天香集。虛洞策杖鳴。低雲拂衣濕。倚巖見廬舍。人戶欣拜揖。問性矜勤勞。示心教澄習。玉英時共飲。芝草爲餘拾。境絕人不行。潭深鳥空立。一乘從此受。九轉兼是給。辭處若輕飛。憩來唯吐吸。閑襟超已勝。迴路倏而及。煙色松上深。水流山下急。漸平逢車騎。向晚睨城邑。峯在野趣繁。塵飄宦情緝。辛苦久爲吏。勞生何妄執。日暮懷此山。悠然賦斯什。

閏月七日織女云。耿耿曙河微。神仙此會稀。今年七月間。應得兩迴歸。

灣登仙天進士第。開元初。爲滎陽主簿。馬懷素欲校正羣籍。灣在選中。各部撰次。後爲洛

陽尉商瑤云。灣詞翰早著。爲天下所稱。寂者不過一二。遊吳中。江南意云。海月生殘夜。江春入舊年。詩人以來無聞此句。張公居相府。手題於政事堂。每示能文。令爲措式。又擣衣篇云。月華照杵空悲妾。風響傳砧不見君。所有衆制。類咸若斯。非張蔡之輩。未見覺顏謝之彌遠乎。江南意云。南國多新意。東行伺早天。潮平兩岸失。風正數帆懸。海日生殘夜。江春入舊年。從來觀氣象。雍向之中偏。

麗正殿賜同宴。用天前煙年四韻。應制云。金殿忝陪賢。瓊羞忽降天。鼎羅仙掖裏。觴拜鎖闈前。院逼青霄路。廚知紫禁舞。酒酣空抃舞。何以答昌年。

秋夜寓直卽事懷贈蕭令公裴侍郎兼通簡南省諸友人云。聖主萬年興。賢臣數載升。古靈傳岳秀。宏量稟川澄。畿甸舉長策。風霜乘直繩。出車遙俗震。登閣滿朝稱。賦簡流亡輯。農安政理憑。還家新長幼。巡隴舊溝塍。忠梗大勳立。寰瀛墮業懲。焚香兼御史。懸鏡委中丞。旃傘當朝立。臺聽發郡乘。司徒漢家重。國典潁川徵。雲路俄平入。台階忽上陵。秉鈞調造化。宣綍慰黎蒸。金省方秋作。瑤軒直夜凭。中書贈陳準。右相簡王陵。三傑賢更穆。百僚歡且兢。搖懷及賓友。計曲辦淄灑。閭闔暝陰散。鈎陳爽氣凝。月深宮樹轉。河近禁樓水。卑吏夙斷策。微涓効斗升。望塵霄繼火。書板曙懷蒸。彼此雖流眄。規模轉伏膺。惠將霄漢隔。勞或歲時矜。位重恩寧濫。才輕

攝不勝。林巒甘獨往。疵賤苦相仍。敢忘御花雀。思同附驥蠅。平生逐鳥雀。何日似蒼膺。

晚春詣蘇州贈武員外云。蘇臺憶季常。飛掉歷江鄉。恃功曹椽。初離華省郎。貴門生禮樂。明代秉文章。嘉璧位先進。洪儒名重揚。援從姻戚貶。豈失忠信妨。萬里行驥足。十年睽鳳翔。迴遷翊元聖。入拜佇爲良。別業對南浦。羣書滿北堂。意深投轄盛。才重接筵光。陋學叨鈞簡。弱齡許翰場。神馳勞舊國。顏展別殊方。際晚雜紛散。殘春衆物芳。煙和疎樹滿。雨續小溪長。旅拙感成慰。通賢顧不忘。從來琴曲罷。開匣爲君王。

晚夏馬升卿池亭卽事寄京中二三知己云。忝職畿甸淹。濫陪時英後。才輕策疲劣。勢薄常駢走。牽役勞風塵。秉心在巖藪。宗賢開別業。形勝代稀偶。竹澆清渭湄。泉流白渠口。遂巡期賞會。揮忽變星斗。逮此乘務餘。因而訪幽叟。入來殊景物。行復洗紛垢。林淨秋色多。潭深月光厚。盛香蓮近折。新味瓜初剖。滯拙懷隱淪。書之寄良友。

奉同賀監林月清酌云。華月當秋滿。朝英假興同。淨林新霽入。窺院早涼通。碎影行筵裏。搖花落酒中。清霄凝爽意。併此助文雄。

觀插箏云。虛室有秦箏。箏新月復清。絃多弄委曲。柱促語分明。曉怨凝繁手。春嬌入慢聲。近來唯此樂。傳得美人情。

魏知古

知古，深州人。相宗薦，洹水令。呂太一，蒲州司功參軍。齊澣，內率騎曹參軍。柳澤，密尉。宋遙，左補闕。袁暉，右補闕。封希顏，伊闕尉。陳希烈，後皆爲聞人。

玄元觀尋李先生不遇詩云：羽客今何在，空尋伊洛間。忽聞歸苦縣，應想入函關。未作十年別，猶應七日還。神仙不可見，寂寞返蓬山。

奉和春日途中喜雨應詔詩曰：豫遊欣勝地，皇澤乃先天。油雲陰御道，膏雨潤公田。隴麥霑逾翠，山花濕更燃。稼穡良所重，方復悅豐年。

春夜寓直鳳閣懷羣公詩云：拜門傳漏晚，寓省案居時。昔重安仁賦，今稱伯玉詩。鴛池滿不溢，鷄樹久逾滋。夙夜懷山甫，清風詠所思。

先天初，爲侍中，從獵渭川。獻詩曰：嘗聞夏太康，五弟訓禽荒。我后來冬狩，三驅盛禮張。順時鷹隼擊，講事武功揚。奔走未來云，翻飛豈暇翔。非熊從渭水，瑞翟想陳倉。此欲誠難縱，茲遊不可常。子雲陳羽獵，僖伯諫漁棠。得失鑒齊楚，仁恩念禹湯。豈熙諒在宥，亭毒匪多傷。辛甲今爲史，虞箴遂孔彰。手詔褒之。

知古卒，宋璟歎曰：叔向古遺直，子產古遺愛，兼之者，其魏公乎。



許景先

常州人先獻賦。李迥秀見之。歎曰。是宜付太史。後與齊澣。王丘。韓休。更知制誥。張說曰。許舍人之文。雖乏峻峯激流。然詞旨豐美。得中和之氣。天寶間。以吏侍卒。

陽春怨云。紅樹曉鶯啼。春風暖翠閨。雕籠薰繡被。珠履踏金堤。芍藥花如吐。菖蒲葉正齊。葉砧當此日。行役向遼西。

送張說巡朔方應制云。文武承邦式。風雲感國禎。王師親賦政。廟略久論兵。漢主知三傑。周官統六卿。四方分闡受。千里坐謀成。介冑辭前殿。壺觴宿左營。賞延頒賜重。宸賜出車榮。龍武三軍氣。魚鈴五校名。郊雲駐旌羽。邊吹引金鉦。振旅方稱德。安仁更克身。佇觀銘石罷。同聽凱歌聲。

姚崇

享龍池樂章云。恭聞帝里生靈祉。應報明君鼎業新。既叶翠泉光寶命。還符白水出真人。當時舜海潛龍躍。此日堯河帶馬巡。獨有前池一小鴈。叨承舊惠入天津。

又云。帝宅王家大道邊。神馬潛龍涌聖泉。昔日昔時經此地。看來看去漸成川。歌臺舞榭宜正月。柳岸梅洲勝往年。莫疑沙上春雲少。祇爲龍飛直上天。

龍池。興慶宮池也。明皇潛龍之地。張九齡撰龍池頌。刊石興慶宮。玄宗以爲不稱。更命副澤王。璆爲頌。建花萼樓。北初睿宗五子。賜弟隆慶坊。號五王宅。明皇爲太子。製大衾長枕。將與諸王共之。睿宗喜甚。明皇先天後。盡以降慶舊邸爲興慶宮。而賜憲薛第於勝業。中岐嶺於安興。環列宮側。天子於宮西南置樓。西曰花萼相輝。南曰勤政務本。

張曲江有和姚令公哭李尙書詩。姚亦時有述作。然少見於世。

口箴云。君子欲訥。吉人寡辭。利口作戒。長舌爲詩。斯言不善。千里違之。勿謂可復。駟馬難追。惟靜惟默。澄神之極。去甚去泰。居物之外。多言多失。多事多害。聲繁則淫。音希則大。室本無暗。垣亦有耳。何言者天。成蹊者李。似不能言。爲世所尊。言不出口。冠時之首。無掉爾舌。以速爾咎。無易爾言。亦孔之醜。欽之慎之。可大可久。欽之伊何。三命而走。慎之伊何。三緘其口。勉哉夫子。行矣勉旃。書之屋壁。以代章紘。

李德裕舌箴序云。余宿於洞庭西。夢與中書令姚公偶坐。如舊相識。問余曰。君見僕所作口箴乎。余對曰。去歲居守東周。於公曾孫諫議郤處。御金石之刻。遂莞爾而笑曰。孫子猶能藏之。又曰。余感姚公之夢。乃爲舌箴云。

享龍池樂章云。龍池初此出龍山。常經此地謁龍顏。日日芙蓉生夏水。年年楊柳變春灣。堯壇寶匣餘煙霧。舜海魚舟尙往還。願以飄飄五色影。從來從去九天間。

又云。龍興白水漢興符。聖主時乘運斗樞。岸上芊葺五花樹。波中的礫千金珠。慘環昔聞迎夏啓。匣先來瑞有虞。風色雲光隨隱見。赤雲神化象江湖。

皎。長安中爲尙衣奉御。明皇在藩邸。識其有非常度。委心焉。及卽位。授殿中少監。出入臥內。開元十年。爲祕書監。坐洩禁中語。流欽州。道死。

姜晞

龍池樂章云。靈池縈迴邸第前。浴日極春寫曙天。始見龍臺昇鳳闕。應如霄漢起神泉。石匱渚傍還啓聖。桃李初生更有仙。欲化帝圖從此受。正同河變一千年。

又云。乾坤啓聖吐龍泉。泉水年年勝一年。始看魚躍方成海。卽觀龍飛利在天。洲渚遙將銀漢接。樓臺直與紫微連。休氣榮光常不散。懸知此地是神仙。

晞登永隆二年進士第。

王岳靈

聞漏詩云。建禮含香處。重城待漏臣。余聞傳鳳詔。曉唱辨鷄人。銀箭殘將盡。銅壺漏更新。

催簫當午夜。移刻及三辰。杳杳從天遠。泠泠出禁頻。直宜殘漏曙。肅肅對鈞陳。

岳靈登開元進士第。天寶十年爲監察御史。撰張惡子廟碑。

楊顏

田家云。小園足生事。尋勝日傾帝。蒔蔬利於鶻。纔青圓已無。四隣因野竹。日夕採其枯。田家心適時。春色遍桑榆。

顏登開元進士第。

鄭繇

失白鷹詩云。白錦文章亂。丹霄羽翮齊。雲中呼暫下。雪裏放還迷。梁苑驚池鵞。陳倉拂野鷄。不知寥廓外。何處獨飛棲。

開元初經慈澗題詩云。岸與恩同廣。波將慈共深。涓涓勞日夜。長似下流心。

繇鄭州人。登嗣聖元年進士第。開元時。岐王範愛儒士。繇與劉廷琦。閻朝隱。張諤。皆遊其門。飲酒賦詩。相娛樂。子審有詩名。終於袁州刺史。與杜子美善。

張諤

九日詩云。秋天林下不知春。一種佳遊事也均。絳草從朝飛着夜。黃花開日未成句。將衡

柏樹頻驚馬。半醉歸途數問人。城遠登萬仞九日。茱萸凡作幾年新。

諤登景龍進士第。歧王範好儒士。與閣朝隱劉廷琦鄭絳等飲酒詩賦。駙馬都尉裴虛已善讖緯。坐私與範游。徙嶺南。廷琦貶雅州司戶。諤山莊承。然明皇於範無間也。

### 趙仁獎

合乘驄馬去。承脫繡衣來。仁獎送上蔡。合潘好禮拜御史詩也。或訝其假手。蓋仁獎住王戎墓側。善歌黃鸝。景龍中負薪詣闕云。助國調鼎。卽除臺官中書令。

姚崇曰。此是黃鸝耶。授以當州一尉。惟以黃鸝自銜。宋務光嘲之曰。趙仁獎出王戎墓下。入朱博臺中。捨彼負薪。登茲列柏。行人不避驄馬。坐客惟聽黃鸝。忽一夫負兩束薪曰。此合拜殿中人。問其由。曰。趙以一束拜監察。此兩束合授殿中。

### 張軍

遊棲霞寺云。躋險入幽深。翠微含竹殿。泉聲無休歇。山色時隱見。潮來雜風雨。梅落成霜霰。一從方外遊。頓覺塵心變。

潤州延陵有包融。儲光羲。曲阿有丁仙芝。緱氏主簿蔡隱丘。監察御史蔡希周。渭南尉蔡希寂。處士張彥雄。張朝。校書郎張暈。吏部常選周瑀。長洲尉談馘。句容有殷遙。硤石主簿樊光。

橫陽主簿沈如筠。江甯有右拾遺孫處士。徐延壽。丹徒有江都主簿馬挺武。進尉申堂溝。十八人。皆有詩名。殷璠次爲丹陽集。暈開元進士。蕭穎士同年生也。

蕭穎士有張暈下第歸江東詩云。俱飛仍失路。綵服邇清波。地積東南美。朝遣甲乙科。客愁千里別。春色五湖多。明日舊山去。其如相望何。

金昌緒

春怨詩云。打却黃鸞兒。莫教枝上啼。幾迴驚妾夢。不得到遼西。(顧陶取此詩爲唐類詩) 昌緒。餘杭人。

蘇晉

晉。中宗戶部尙書珣之子。數歲知爲文。吏侍房穎叔。祕書少監。王紹宗曰。後來之王粲也。先天中。爲中書舍人。杜暹當國。表宋璟爲吏書。晉齊澣爲侍郎。世謂臺選。

過賈六詩云。主人病且閑。客來情彌適。一酌復一笑。不知日將夕。昨來屬歡遊。於今盡成昔。努力持所趣。空名定何益。

丞相少傅拜職。天子作三傑之詩以宴。命晉序云。惟聖寶賢。以齊皇極。有若左丞相燕國公。右丞相廣平公。太子少傅安陽侯。皆生人碩德。皇國元老。道著廊廟。績宣華戎。由是懋其成。

功錫以元圭。咨日於朔。擇時千秋。俾對命王庭。受職公府。見羣屬。楫庶寮。禮官辨章。掌舍陳次。警工備樂。佑饗獻蒸。六卿拜下。以成儀。三事自天而來。賀秩秩賓序。暉暉旅醴。玉緯垂文。南風和雅。頌之變。金漿降醞。雲天光飮。酌之宜。宰德貴和。盡莊敬具瞻之範。羣情尙洽。預周旋宴語之歡。方將一心天工。戮力帝載。寢黑山之柝。包青海之戈。雲雨賢才。水火菽粟。日詠魚藻。歲陳由庾。頤殷趙之年。留魯陽之景。爰命在宴。乃府載歌。時左相張說。右相宋璟。太子少傅源乾曜。同日上官。命宴於東堂。明皇賜詩曰。亦帝收三傑。黃軒舉二臣。故序及之。

送張說巡邊應制云。方漢北周年。興王合在宣。亟聞降虜拜。復覩出師篇。圻父萬邦武。英猷三略傳。筭車申夏政。芟舍啓戎田。嚴問盟胡苑。軍容濟洛川。皇情悵關旆。詔餞列郊筵。路接禁園草。池分御井蓮。離聲軫去角。居念斷歸蟬。三捷豈云永。七擒良信然。具寮誠寄望。奏凱秋風前。

張九齡

在郡秋懷二首。秋風入前林。蕭瑟鳴寒枝。寂寞遊子思。寤歎何人知。官成名不立。志在歲已馳。五十而無聞。古人深所疵。平生去外飾。直道如不羈。未得操割效。忽復寒暑移。物情有固然。身退毀亦隨。悠悠滄海渚。望望白雪涯。露下霜且降。澤中草披離。蘭艾若不分。安用馨香爲。

庭蕪生白露。歲候感遐心。策蹇慚遠塗。巢枝思故林。小人恐致寇。終日如臨深。魚鳥好自逸。池龍安所欽。掛冠東都門。探蕨南山岑。議道誠愧昔。覽分還愜今。憮然憂成老。空爲白頭吟。感寓云。蘭葉春葳蕤。桂華秋皎潔。欣欣此生意。自爾爲佳節。誰知林棲者。聞風坐相悅。草木有本心。何求美人折。（段成式云。桂花三月生。黃而不白。曲江云。桂華秋皎潔。妄矣。）

幽林歸獨臥。滯慮洗孤清。持此謝高鳴。因之傳遠情。日夕懷空意。人誰感至精。飛沉理自隔。何所慰吾誠。魚遊樂深池。鳥棲欲高枝。嗟爾蜉蝣羽。薨薨亦何爲。有生豈不化。所感奚若斯。神理日微滅。吾心安得知。浩歎楊朱子。徒然泣路岐。

孤鴻海上來。池潢不敢顧。側見雙飛鳥。巢在三珠樹。矯矯玲木巔。得無金丸懼。美服患人指。高明逼神惡。今我遊冥冥。弋者何所慕。

吳越數千里。夢寢今夕見。形骸非我親。衾枕卽鄉縣。比蝶猶不識。川魚安可羨。海上有仙山。歸期覽神變。抱影吟中夜。誰聞此歎息。美人適異方。庭樹銜幽色。白雲愁不見。滄海飛無翼。鳳凰一朝來。竹花此可食。漢上有遊女。求思安可得。袖中一書札。欲寄雙飛翼。冥冥獨不見。耿耿徒緘憶。紫蘭秀空蹊。皓霧奪幽色。馨香歲欲晚。感歎情何極。白雲在南山。日暮長太息。

九齡在相位。有謬匪躬之誠。明皇旣在位久。稍怠庶政。每見帝。極言得失。林甫時方同。



列陰欲中之。將加朔方節度使牛仙客實封。九齡稱其不可。甚不叶帝旨。他日林甫請見。屢陳九齡頗懷誹謗。于時方秋。帝命高力士持白羽扇以賜。將寄意焉。九齡惶恐。因作賦以獻。又爲燕詩以貽林甫。曰：海燕何微渺。乘春亦慳來。豈知泥濘賤。只見玉堂開。繡戶時雙入。華軒日幾迴。無心與物競。鷹隼莫相猜。林甫覽之。知其必退。恚怒稍解。

九齡泊裴耀卿罷免之日。自中書至月華門。將就班列。二人鞠躬卑遜。林甫處其中。揚揚自得。觀者竊謂一鵬挾兩兔。俄而詔張裴爲左右僕射。罷知政事。林甫視其詔。大怒曰：猶爲左右丞耶。二人趁就本班。林甫目送之。公卿不覺股慄。子美八哀詩曰：相國生南紀。金璞無留礦。仙鶴下人間。獨立霜毛整。矯然江海思。復與雲露永。寂寞想土階。未遑等箕穎。上君白玉堂。倚君金華省。九齡登進士第。應拔萃。登乙科。拜校書郎。玄宗在東宮。舉天下文章之士。親加策問。九齡對策高第。礪石歲嶮嶮。天地日蛙黽。退食吟大庭。何心託榛梗。骨驚畏曩哲。鬣變負人境。雖蒙換蟬冠。右地惡多幸。侍中冠加貂蟬。九齡爲相。以文雅爲上知。右相李林甫惡之。引牛仙客以傾之。遂罷。敢忘一疏歸。痛迫蘇耽井。紫綬映暮年。荊州謝所領。初九齡爲相。薦長安尉周安。周子諒爲監察御史。至是。子諒以妄陳休咎。上親加詰問。令於朝堂決殺之。九齡坐引非其人。左選荊州大都督府長史者。久之。庾公興不淺。黃霸鎮每靜。賓官引諷同。諷詠

在務屏詩罷地有餘。篇終語清省。一陽發陰管。淑氣含公鼎。乃知君子心。用才文章境。(九齡善屬文。有集二十卷。)散帙起翠螭。倚薄巫廬並。綺麗玄暉擁。賤誅任昉聘。自我一家則。未缺隻字警。千秋滄海南。名繫朱鳥影。歸老守故林。戀闕情延頸。波濤良史筆。蕪絕大庾嶺。向時禮數隔。制作難上請。再讀徐孺碑。猶思理煙艇。

九齡字子壽。曲江人。輔明皇爲賢宰相。既卒。明皇每用人。必曰。風度能若九齡乎。張說論其文曰。如輕縑素練。實濟時用。而窘邊幅。

柳子厚敍楊評事文集云。文有二道。辭令褒貶。本乎著作者流。蓋述於書之謨訓。春秋之筆削。其要在於高壯廣厚。詞正而理備。謂宜藏於簡冊也。比興者流。蓋出乎虞夏之詠歌。周之雅頌。其要在乎麗則清越。言暢意美。謂宜流於謠誦也。唐興以來。稱是選而不作者。梓潼陳拾遺。其後燕公文。以著述之餘。攻比興。而莫能極。張曲江以比興之隙。窮著作而不克備。其餘各探一偶。相與皆馳於道者。其去彌遠。文之難兼。斯甚矣。

中書舍人姚子顏狀其行曰。公所得俸祿。悉歸鄉園。先得賜物。上表進納。其清約如此。常賦詩曰。清節往來苦。壯容離別裏。有以見公之情也。公以風雅之道。興寄爲主。一句一詠。莫非興寄。時皆諷誦焉。

明皇送張說巡朔方賜詩云。命將綏邊服。雄圖出廟堂。說應制詩。有從來思博望。許國不謀身之句。張嘉正云。山川看是陣。草木想爲兵。盧從愿云。佇聞歌林杜。凱入繫名王。徐知仁云。由來詞翰首。今見勤燕然。皆取制勝之義。獨九齡詩云。宗臣事有征。廟筭在休兵。天與三台座。人當萬里城。朔南方偃革。河右誓楊旌。又曰。威風六郡勇。計日五戎平。山甫歸應疾。留侯功復成。大抵取旋師偃武之義。宋璟詩云。以智泉寧竭。其餘海自清。亦有深意也。

釋皎然讀曲江集詩云。相公乃天啓。人文佐生成。立程正頽靡。釋思何縱橫。春杼弄綉綺。陽林敷玉英。飄然飛動姿。邈矣高簡情。後輩驚失步。前脩敢爭衡。始欣耳目遠。再使幾慮清。體正力已全。理精識何妙。昔年歌陽春。徒推郢中調。今朝聽鸞鳳。豈獨蘇門嘯。帝命鎮雄州。詩流據上游。才兼荆衡秀。氣助瀟湘秋。逸蕩子山匹。怪奇文暢儔。沈吟未終卷。變態紛難數。耀耳代明璫。襲衣比芳杜。愔愔聞玉聲。寤寐在靈府。

### 崔國輔

少年行云。遺却珊瑚鞭。白馬驕不行。章臺折楊柳。春草路傍情。  
魏宮詞云。朝日點紅粧。擬上銅雀臺。畫眉猶未竟。魏帝使人催。  
長信宮云。長信宮中草。年年愁處生。時侵珠履迹。不使玉階行。

怨詞云。妾有羅衣裳。秦王在時作。爲舞春風多。秋來不堪着。

古意云。歸來日尙早。却欲向芳洲。渡口水流急。回舟不自由。

子美獻三賦。國輔于休烈。每稱述焉。子美有留贈集賢院崔于二學士詩云。欲整還鄉旆。長懷禁掖垣。謬稱三賦在。難述二公恩。太白有送崔度自幽燕還吳詩云。故人禮部員外國輔之子也。國輔明皇時。應縣令。舉授許昌令。集賢直學士。禮部（員外）郎。坐王鉷近親。貶晉陵郡司馬。

商璠云。國輔詩。婉變清楚。深宜諷味。樂府數章。雖絕句。然古人不能過也。

雜詩云。逢着平樂兒。論交鞍馬前。與酤一斗酒。恰用十千錢。後余在關內。作事多迍邅。何處肯相救。徒聞寶劍篇。

古意云。淨掃黃金階。飛霜厚如雪。下簾彈箜篌。不忍見秋月。

湖南云。湖南送君去。湖北送君歸。湖裏鴛鴦鳥。雙雙他自飛。

香風詞云。洛陽梨花白如霰。河陽桃葉生復齊。坐惜玉樓春欲盡。紅綿粉絮裏。粧啼。

對酒吟云。行行日將夕。荒村古塚無人迹。蒙籠荆棘一鳥吟。屢唱提壺沾酒聲。古人不達酒不足。遺恨精靈傳此曲。寄言世上諸少年。平生且盡杯中綠。

唐詩紀事卷第十六

王維

王綰

裴迪

崔興宗

王維

集異記載維未冠。文章得名。妙能琵琶。春之一日。岐王引至公主第。使爲伶人。進主前。一進新曲。號鬱輪袍。并出所爲文。主大奇之。令宮婢傳教。遂召試官至第。諭之作解頭登第。

祿山之亂。李龜年奔於江潭。曾於湘中探訪使筵上唱云。紅豆生南國。秋來發幾枝。贈君多採擷。此物最相思。又清風明月苦相思。蕩子從戎十載餘。征人去日慙慙囑。歸雁來時數附書。此皆維所製。而梨園唱焉。

維年十七時。九日憶山東弟兄云。獨在異鄉爲異客。每逢佳節倍思親。遙知兄弟登高處。遍插茱萸少一人。

祿山大會凝碧池。梨園弟子歛歐泣。下樂工雷海清。擲樂器。西向大慟。賊支解於試馬殿。維時拘於菩提寺。有詩曰。萬戶傷心生野煙。百僚何日更朝天。秋槐落葉深宮裏。凝碧池頭奏管絃。後有罪。以此詩獲免。寧王憲貴盛。寵妓數十人。有賣餅之妻。纖曰。明媚王。一見屬意。因厚

遺其夫。求之寵愛逾等。歲餘。因問曰。汝復憶餅師否。使見之。其妻注視。雙淚垂頰。若不勝情。時王座客十餘人。皆當時文士。無不憐異。王命賦詩。維先成云。莫以今時寵。難忘異日恩。看花滿眼淚。不共楚王言。座客無敢繼者。王乃歸餅師。以終其志。出本事詩。

或說維詠終南山詩。譏時也。詩曰。太一近天都。連山接海隅。言勢焰盤據朝野也。白雲回望合。青竄入看無。言徒有其表也。分野中峯變。晴陰衆壑殊。言恩澤偏也。故人投處宿。隔水問樵夫。畏禍深也。

維善畫。破墨山水。嘗自制曰。當代謬詞客。前身應畫師。不能捨餘習。偶被時人知。

維字摩詰。爲給事中。遇祿山反。賊平。下遷太子中允。三遷尚書右丞。喪妻。不娶。孤居三十年。母亡。表輞川第爲寺。終葬其西。寶應中。代宗語王縉曰。朕嘗於諸王座。聞維樂章。今傳幾何。遣中人往取。縉哀集數百篇上之。表曰。臣兄文辭立身。行之餘力。當官堅正。秉操孤直。縱居要劇。不忘清淨。實見時輩。許以高流。至於晚年。彌加進道。端坐虛室。念茲無生。乘興爲文。未嘗廢業。詔答云。卿之伯氏。天下文宗。位歷先朝。名高希代。抗行周雅。長揖楚詞。調六氣於終篇。正五音於逸韻。泉飛藻思。雲散襟情。詩家者流。時論歸美。誦於人口。久鬱文房。歌以國風。宜登樂府。眎朝之後。一夜將觀。石室所藏。歿而不朽。柏樑之會。今也則亡。乃春棣華。克成編錄。聲猷益茂。

歎息良深。

商璠云。維詩辭秀調雅。意新理愜。在泉爲珠。看壁成繪。一字一句。皆出帝境。至如落日山水好。漾舟信歸風。又澗芳襲人衣。山月映石壁。又天寒遠山靜。日暮長河急。又賤日豈殊衆。貴來方悟稀。又日暮沙漠陲。戰聲煙塵裏。詎肯慚於古人也。

送晁監歸日本國云。積水不可極。安知滄海東。九州何重去。萬里若乘空。向國唯看日。歸帆但信風。鼉身映天黑。魚眼射波紅。鄉樹扶桑外。主人孤島中。別離方異域。音信若爲通。

送丘爲云。憐君不得意。况復柳條春。爲客黃金盡。還家白髮新。五湖三畝宅。萬里一歸人。知禰不能薦。羞稱獻納臣。

獵騎云。風勁角弓鳴。將軍獵渭城。草枯鷹眼疾。雪盡馬蹄輕。忽過新豐市。還歸細柳營。回看射雕處。千里暮雲平。（自送晁監以後三詩。姚合極元集云。此詩家射鵰之手也。更擇其極玄者。）

藍田精舍云。落日山水好。漾舟信歸風。玩奇不覺遠。因以尋源窮。遙愛雲木翠。初疑路不同。安知清流轉。偶與前山通。捨舟理輕策。果然愜所適。老僧四五人。逍遙蔭松柏。朝梵林方曙。夜禪山更寂。道心友牧童。世事問樵客。暝宿長林下。焚香臥瑤席。澗芳襲人衣。山月映石壁。再

尋長迷誤。明發更登歷。笑謝桃源人。花紅復來覲。

西施篇云。豔色天下重。西施寧又微。朝仍越溪女。莫作吳宮妃。賤日豈殊衆。貴來方悟稀。要人傅脂粉。不自着羅衣。君寵益嬌態。君憐無是非。常時浣沙伴。莫得同車歸。寄言鄰家子。効顰安可希。（又字未詳）

淇上別趙仙舟云。相逢方一笑。相送還成泣。祖席忽傷離。荒城復愁入。天寒遠山靜。日暮長河急。解纜君已遙。望君猶佇立。

李陵詠（時年十九）云。漢家李將軍。三代將門子。結髮有奇策。少年成壯士。長驅塞上兒。深入單于壘。旌旗列相向。簫鼓悲何已。日暮沙漠陲。戰聲煙塵裏。將令驕虜滅。豈獨名王侍。既失大軍援。遂嬰穹廬恥。少小蒙漢恩。何堪坐思此。深哀欲有報。投軀未能死。引領望子卿。非君誰相理。

渭城朝雨裊輕塵。客舍青青柳色新。勸君更盡一杯酒。西出陽關無故人。維送客詩也。

王縉

縉字夏卿。河中人。與兄維俱以名聞。舉草澤文辭清麗科上第。相肅宗。

縉九月九日作云。莫將邊地比京都。八月嚴霜草已枯。今日登高樽酒裏。不知能有菊花



無。

別輞川云。山月曉仍在。林風涼不絕。殷懃如有情。惆悵令人別。

贈曇壁上人云。林中空寂舍。階下終南山。高臥一床地。回看六合間。浮雲幾處滅。飛鳥何時還。問義天人接。無心世界閑。誰知大隱客。兄弟自追攀。

遊悟真寺云。開道黃金地。仍成白玉田。擲山移巨石。呪嶺出飛泉。猛虎同三逕。愁猿學四禪。買香燃綠桂。乞火踏青蓮。草色搖霞上。松聲泛月邊。山河窮百二。世界滿三千。梵宇聊憑覽。王城遂眇然。灞陵纔出樹。渭水欲連天。遠縣分朱郭。孤村起白煙。望雲思聖主。披霧憶羣賢。薄宦慚尸祿。終身擬尙玄。誰言草庵客。曾和柏梁篇。

送孫秀才云。帝城風日好。况復建平家。玉枕雙紋篋。金盤五色瓜。山中無魯酒。松下飲胡麻。莫厭田家苦。歸期遠復賒。

裴迪

過曇興上人山院云。不遠灞陵邊。安居向十年。入門穿竹徑。留客聽山泉。鳥嘯深林裏。心閑落照前。浮名意何憶。從此願棲禪。

迪初與王維興宗俱居終南。天寶後爲蜀州刺史。與杜甫友善。（興宗姓崔。）

迪與王維訪逸人不遇。賦詩云：恨不逢君出荷囊，青松白屋更無他。陶令五男曾不有，蔣生三逕任相過。芙蓉曲沼春流滿，薜荔成帷晚籟多。聞說桃源好迷客，不如高臥盼庭柯。

維詩云：桃源一向絕風塵，柳市南頭訪隱淪。到門不敢題凡鳥，看竹何須問主人。城外青山如屋裏，東家流水入西鄰。閉戶著書多歲月，種松皆作老龍鱗。

王維輞川集云：餘別業在輞川山谷，其遊止有孟城坳、華子岡、文杏館、斤竹嶺、鹿柴、（去聲）木蘭柴、茱萸泚、（潘上去音匹半切水流也）宮槐陌、臨湖亭、南坨、（音茶）欽湖、柳浪、欒家瀨、金屑泉、白石灘、北坨、竹里館、辛夷塢、漆園等，與裴迪閑暇各賦絕句云：

維孟城坳云：新家孟城口，古木餘衰柳。來者復爲誰，空悲昔人有。

迪和云：結廬古城下，時登古城上。古城非疇昔，今人自來往。

維華子岡云：飛鳥去不窮，連山復秋色。上下華子岡，惆悵情何極。

迪和云：落日松風起，還家草露晞。雲光侵履跡，山翠拂人衣。

維文杏館云：文杏裁爲梁，香茅結爲宇。不知棟裏雲，去作人間雨。

迪和云：迢迢文杏館，躋攀日已屢。南嶺與北湖，前看復迴顧。

維斤竹嶺云：擅欒映空曲，青翠漾漣漪。暗入商山路，樵人不可知。

明流紆且直。綠篠密復深。一逕通山路。行歌望舊岑。(迪)

鹿柴云。空山不見人。但聞人語響。返景入深林。復照青苔上。(維)

日夕見寒山。便爲獨往客。不知深林事。但有鬪麕迹。(迪)

木蘭柴云。秋山斂餘照。飛鳥逐前侶。彩峯時分明。夕嵐無處所。(維)

蒼蒼落日時。鳥聲亂溪水。綠溪路轉深。幽興何時已。(迪)

茱萸泝云。結實紅且綠。復如花更開。山中儻留客。置此芙蓉盃。(維)

飄香亂椒桂。布葉間檀欒。雲日雖迴照。森沉猶自寒。(迪)

宮槐陌云。返逕蔭宮槐。幽陰多綠苔。應門但迎掃。畏有山僧來。(維)

門前宮槐陌。是向欽湖道。秋來山雨多。落葉無人掃。(迪)

臨湖亭云。輕舸迎上客。悠悠湖上來。當軒對樽酒。四面芙蓉開。(維)

當軒彌澗漾。孤月正徘徊。谷口猿聲發。風傳入戶來。(迪)

南垞云。輕舟南垞去。北垞祿難卽。融浦望人家。遙遙不相識。(維)

孤舟信一泊。南沱湖水岸。落日下崦嵫。清波殊淼漫。(迪)

欽湖云。吹簫凌極浦。日暮送夫君。湖上一迴首。青山卷白雲。(維)

空闊湖水廣。青熒天色同。艤舟一長嘯。四面來清風。(迪)

柳浪云。分行接綺樹。倒影入清漪。不覺御溝上。春風傷別離。(維)

映池同一色。逐吹散如絲。結陰旣得地。何謝陶家詩。(迪)

欒家瀨云。颯颯秋雨中。淺淺石榴瀉。跳波自相濺。白鷺驚復下。(維)

瀨聲噴極哺。汎汎向南津。汎汎鷗鳧渡。時時欲近人。(迪)

金屑泉云。日飲金屑泉。少當千餘歲。翠鳳翊文螭。羽節朝玉帝。(維)

縈渚澹不流。金碧如可拾。迎晨含素華。獨往事朝汲。(迪)

白石灘云。清淺白石灘。綠蒲尙堪把。家住水東西。浣沙明月下。(維)

跋石復臨水。弄波情未極。日下川上寒。浮雲澹無色。(迪)

北垞云。北垞湖水北。雜樹映朱欄。透迓南川水。明滅青林端。(維)

南山北垞下。結宇臨欹湖。每欲採樵去。扁舟出菰蒲。(迪)

竹里館云。獨坐幽篁裏。彈琴復長嘯。深林人不知。明月來相照。(維)

來過竹里館。日與道相親。出入唯山鳥。幽深然世人。(迪)

辛夷塢云。木末芙蓉花。山中發紅萼。澗戶寂無人。紛紛開且落。(維)

綠堤春草合。王孫自留翫。况有辛夷花。色與芙蓉亂。（迪）

漆園云。古人非傲吏。自闕淫世務。偶寄一微官。婆婆數株樹。（維）

好閑早成性。果此諧宿諾。今日漆園遊。還同莊叟樂。（迪）

椒園云。桂樽迎帝子。杜若贈佳人。椒漿奠瑤席。欲下雲中君。（維）

丹刺刺人衣。芳香留過客。幸填調鼎用。願君垂採摘。（迪）

李頎聖善閣送迪入京云。雪華歛高閣。苔色上鈎欄。藥草空階靜。梧桐返照寒。清吟可愈疾。攜手暫同歡。墜葉和金聲。飢鳥鳴露盤。伊川惜東別。灞水向西看。舊託含香署。雲霄何足難。

### 崔興宗

興宗爲右補闕。時和王譙勅賜櫻桃詩云。未央朝謁正逶迤。天上櫻桃錫此時。朱實初傳九華殿。繁花舊雜萬年枝。全勝晏子江南橘。莫比潘家大谷梨。聞道令人顏色好。神農本草自應知。

喜羣公訪林亭去。窮巷深林常閉關。悠然獨臥對前山。今朝忽枉嵇生駕。倒屣開門遙解顏。

王維詩云。綠樹重陰蓋四鄰。青苔日厚自無塵。科頭箕踞長松下。白眼看君是甚人。

盧象云。映竹時聞轉轆轤。當窗只見網蜘蛛。主人非病常高臥。環堵蒙籠一老儒。  
王縉云。聲名不問十年餘。老大誰能更讀書。林中獨酌鄰家酒。門外時聞長者車。

裴迪云。喬柯門裏自成陰。散髮窗中曾不簪。逍遙且喜從吾事。榮寵從來非我心。（時號興宗爲處士）

如叡。又王維有崔九往南山馬上口號與別云。城隅一分首。幾日還相見。山中有桂花。莫待花

裴迪云。歸山深淺去。須盡丘壑美。莫學武陵人。暫遊桃源裏。

興宗留別云。駐馬欲分襟。清寒御溝上。前山氣景佳。獨往還惆悵。

王維與興宗寫真詠云。畫君年少時。如今君已老。今時新識人。知君舊時好。

王維送興宗遊蜀云。送君從此去。轉覺古人稀。徒御猶回首。田園方掩扉。出門當旅食。中路授寒衣。江漢風流地。遊人何歲歸。

唐詩紀事卷第十七

賀知章

賀蘭進明

李邕

陰行先

李伯魚

趙冬曦

尹恣

崔成甫

李昂

殷遙

徐延壽

范咸

丘爲

賀知章

詠柳云。碧玉粧成一樹高。萬條垂下綠絲條。不知細葉誰裁出。二月春風似剪刀。

曉發詩云。故鄉杳無際。江皋聞曙鐘。始見沙上鳥。猶埋雲外峯。

知章年八十六。臥病。冥然無知。疾損上表。乞爲道士還鄉。明皇許之。捨宅爲觀。賜名千秋。

命其男曾子會稽郡司馬。賜鑑湖剡川一曲。（元乞官湖數頃爲放生池。因賜剡川一曲）詔

令供帳東門。百寮祖餞。御製送詩。并序云。天寶三年。太子賓客賀知章。鑒止足之分。抗歸老之

疏。解組辭榮。志期入道。朕以其年在遲暮。用循挂冠之事。俾遂赤松之遊。正月五日。將歸會稽。

遂餞東路。乃命六卿庶尹大夫供帳青門。寵行邁也。豈惟崇德尙齒。抑亦勵俗勸人。無令二疎。

獨光漢册。乃賦詩贈行。詩云。遺榮期入道。辭老競抽簪。豈不惜賢達。其如高尚心。寰中得祕要。方外散幽襟。獨有青門餞。羣英悵別深。又云。筵開百壺餞。詔許二疎歸。仙記題金籙。朝章拔羽衣。悄然承容漢。行路滿光輝。

李林甫詩云。挂冠知止足。豈獨漢疎賢。入道求真侶。辭勞訪列仙。容文含日月。宸翰動雲煙。鶴駕吳鄉遠。遙遙南斗邊。

知章採蓮詩云。稽山雲霧鬱嵯峨。鏡水無風也自波。莫言春度芳菲盡。別有中流採芰荷。朝士以知章吳越人。戲云。南金復生中土。知章賦詩云。鍛鏤銀盤盛蛤蜊。鏡湖蕝菜亂如絲。鄉曲近來佳此味。遮渠不道是吳兒。

神龍中。知章與越州賀朝。方齊融。揚州張若虛。邢巨。湖州包融。俱以吳越文詞俊秀。名聞上京。朝止山陰尉齊融。崑山令若虛。兖州兵曹巨。監察御史融。遇張九齡。引爲懷州司戶集賢直學士。知章最貴。神龍中。又有尉氏李澄之。善五言詩。終宋州參軍。

知章送張說巡朔方應制云。荒境盡懷忠。梯航已自通。九攻雖不戰。五月尙持戎。遣戍徵周牒。臨邊重漢攻。選軍命元宰。授律取文雄。胄出天弧上。謀成帝幄中。詔旂分夏物。專射錫唐弓。帳宿伊生石。鉞吹晉苑東。饜人藉蕡實。樂正理絲桐。岐陌涵餘雨。離川照曉虹。恭聞詠方叔。



千載舞皇風。

又送張說集賢上學士應制云。西學垂玄覽。東堂發聖謨。天光燭武殿。時宰集鴻都。枯朽霑皇澤。鸞飛舞帝梧。跡同遊汗漫。榮是拔泥塗。三歎承湯鼎。千歡接舜壺。微軀可不答。空欲詠依蒲。

賀蘭雉明

古意云。秦庭初指鹿。羣盜滿山東。忤意皆誅死。所言誰肯忠。武關猶未啓。兵入望夷宮。爲崇非涇水。人君道自窮。

又云。崇蘭生澗底。香氣滿幽林。采采欲爲贈。何人是同心。日暮徒盈把。徘徊憂思深。慨然紉雜佩。重奏丘中琴。

祿山亂。進明守臨淮。以御史大夫爲節度使。張巡睢陽之圍。遣南霽雲乞師不應。霽雲去。抽矢回射佛寺浮圖。曰。吾破賊必滅賀蘭。此矢所以志也。

行路難云。君不見富下井。百尺不及泉。君不見山上苗。數寸臨雲煙。人生相命亦如此。何苦太息自憂煎。但願親友長含笑。相逢莫乏杖頭錢。寒夜邀歡須秉燭。豈得容思花柳年。

君不見門前柳。榮耀暫時蕭條久。君不見陌上花。狂風吹去落誰家。誰家思婦見之歡。蓬

首不梳心歷亂。盛年夫豈長離別。歲暮見之色凋換。

君不見芳樹枝。春花落盡蜂不窺。君不見梁上泥。秋風始高燕不栖。蕩子從軍事征戰。蛾眉嬋娟守空閨。獨宿自然堪下泪。况復更聞烏夜啼。

君不見雲間月。慳盈還復缺。君不見林下風。聲遠意難窮。親故平生或聚散。懽娛未盡嶸中空。歎息青青陵上陌。歲寒能與幾人同。

君不見東流水。水去無窮已。君不見西郊雲。日夕空氣氳。羣鴈徘徊不能去。一鴈驚鳴復失羣。人生結交在終始。莫以深沉中路分。（右行路難。商璠取於河岳英靈。）

進明登開元十六年進士第。肅宗時。進明爲北海太守。詣行在上。命房琯以進明爲南海太守。兼御史大夫。嶺南節度使。琯以爲攝御史大夫。進明入謝。遂譖之。上由是疎琯。

李邕

李之芳自尙書郎出爲齊州司馬。製新亭。邕有登歷下古城員外孫新亭詩云。吾宗固神秀。體物寫謀長。形制開古跡。曾水延樂方。太山雄地里。巨壑眇雲莊。高興泊煩促。永懷清典常。含引知四大。出入見三光。負郭喜粳稻。安時歌吉祥。（之芳。大宗子。蔣王揮之後。善五言詩。初爲祿山范陽司馬。祿山叛。自拔歸。）

子美八哀詩。有祕書監江夏李邕詩云。長嘯宇宙間。高才日陵替。古人不可見。前輩復誰繼。憶昔李公存。詞林有根抵。唐文苑傳。李邕。廣陵江都人。父善。嘗注文選六十卷。行於時。邕少知名。長安初。李矯張廷珪並薦邕。詞高行直。堪爲諫諍。聲華當健筆。灑落富清製。風流散金石。追琢山岳銳。邕早擅才名。尤長碑頌。中朝衣冠。天下寺觀。多出其手。情窮造化理。學貫天人際。干謁走其門。碑板照四裔。各滿深望還。森然起凡例。蕭蕭白楊路。洞徹寶珠惠。龍宮塔廟湧。浩劫浮雲衛。宗儒俎豆事。故吏去思計。胠膝已皆虛。跋涉曾不泥。向來映當時。豈獨勤後世。豐屋珊瑚鈎。騏驎織成罽。紫駟隨劍几。義取無虛歲。分宅脫驂間。感激懷未濟。衆歸賙給美。擺落多藏穢。邕素負美名。頻被貶斥。皆以邕能文養士。而賈生信陵之流。執事忌勝。剝落在外。獨步四十年。風聽九皋唳。邕知名長安中。死天寶初。十四年間。可謂獨步矣。累獻詞賦。甚稱玄宗旨。後因上計中使。臨索其新文。以文章徹天聽。故有九皋唳之句。嗚呼江夏姿。竟掩宣尼袂。往者武后朝。引用多寵嬖。否臧太常議。邕有戒韋巨源益議。文士推重之。面折二張勢。邕爲左拾遺。俄而御史中丞宋璟奏侍臣張昌宗兄事。有不順之言。請付法斷。則天初不應。邕在陛下進曰。環言事關社稷。望陛下可其奏。則天色解。始允。宋璟旣出。或謂邕曰。子名位尙卑。若不稱旨。禍福將不測。何爲造次如是。邕曰。不顛不狂。其名不章。襄俗凜生風。

排蕩秋旻。忠正負冤恨。宮闕深旒綴。放逐早聯翩。低垂困炎厲。邕始以與張東之善。貶雷州。玄宗初。又貶口後召還。爲姚宗所嫉。貶口州。徵爲陳州。玄宗東封回。邕謁見於抹。獻詞慰稱旨。頗自矜銜。爲張說所惡。發陳州貯事。抵死。許州人孔璋上疎救之。會口免。貶欽州。後於嶺南從中官楊思勗討賊有功。轉括溜滑三州刺史。上計京師。邕少有名。累被貶逐。後進不識。京洛阡陌。聚觀以爲古人。或傳眉目有異。衣冠望風。尋訪門巷。又中使臨問。索其新文。復爲人陰中。竟不得進用也。日斜鵬鳥入。魂斷倉梧帝。榮枯走不暇。星駕無安稅。幾分漢庭竹。漢制以竹使符分給郡守。邕累爲刺史。故曰幾分。夙擁文侯箠。終悲洛陽獄。事近小臣敵。禍階初負謗。易力何深囓。邕與柳勣馬一疋。及勣下獄。吉溫令勣引邕議及休咎事。遂誅。伊昔臨淄亭。酒酣託末契。甫有陪李北海宴。歷下亭詩是也。重敍東都別。朝陰改軒砌。論文到崔蘇。崔信明。蘇源明二人。以文章擅也。指盡流水逝。近伏盈川雄。唐文苑傳。陽炯爲盈川。今卒。張沈曰。楊盈川文思如懸河注。酌之不竭。旣優於盧照隣。亦不減王勃也。末廿特進麗。張說曰。李嶠之文。如良金美玉。無疵不可特進。李嶠爲特進。故也。是非張相國相扼一危脆。玄宗東封回。邕於汴州謁見。累獻詞賦。甚種上旨。由是頗自矜銜。自云當居相位。又素輕張說。與相惡。說爲中書令。甚惡之。爭名豈古然。鍵捷歛不閉。例及吾家詩。曠懷掃氛翳。慷慨嗣眞作。

咨嗟玉山桂。鍾律儼高懸。鯤鯨噴迢遼。坡陁青州血。蕪沒汝陽瘞。邕葬所也。哀贈竟蕭條。恩波延揚厲。伐宗時國恩。例贈祕書監。子孫如在綫。舊客再疑滯。君臣尙論兵。將帥接燕薊。朗詠六公篇。邕有張桓等五公。泊伏相六公詩。髮來豁蒙蔽。虛藏用。嘗謂邕如干將莫邪。難與爭鋒。但虞傷缺耳。後卒如其言。

邕字太和揚州人。既冠。見李嶠。願一見祕書。乃假直祕閣。累以罪譴。開元末。歷淄滑二州刺史。上計京師。阡陌聚觀。出爲北郡太守。李林甫忌之。天寶末。以柳勣事。遣御史就郡杖殺之。先是邕王琚王琬皆耆艾補外久。書疏尺題有譴謫落留之句。林甫故陰議除之。

### 陰行先

張燕公說至湘。有九日登高詩云。西楚茱萸節。南淮戲馬臺。甯知沅水上。復有菊花盃。亭帳憑高出。親遊自遠來。短歌將急景。同使與情催。

行先和云。重陽初啓節。無射正飛灰。寂寞風蟬至。連翩雙雁來。山棠紅葉下。岸菊紫花開。今日桓公坐。多愧孟嘉才。

行先開元爲湘州從事。

### 李伯魚

伯魚桐竹詩云。北竹青桐北。南家綠竹南。竹林君早愛。桐樹我初貪。鳳栖桐不媿。鳳食竹何慚。棲食更如此。餘非鳳所堪。

張燕公說和云。結廬桐竹下。室邇人相深。接垣分竹逕。隔戶共桐陰。落花朝滿岸。明月夜披林。竹有龍鳴管。桐留鳳舞陰。

伯魚臨淄人。登開元六年進士第。善爲文。擢校書郎。出爲青州司功。而卒。其妻范陽張氏女。燕公之妹也。燕公銘張氏墓云。送我伯妹。萬安之墳。精靈何處。爲雨爲雲。彼臨淄兮千里。望倏忽兮夫君。

趙冬曦

和張燕公說。早霽南樓詩云。方曙躋南樓。凭軒四遐矚。物華喧淑氣。春景媚晴旭。川霽湘山孤。林芳楚郊縟。列巖重壘翠。遠岸透迤綠。風帆摩天垠。漁艇散灣曲。鴻歸鶴舞遠。猿叫鶯斷續。羣動皆熙熙。噫予獨羈束。常欽才子義。忌鵬傷蹀躞。雅尙騷人文。懷沙河迫促。未知二賢意。去矣從所欲。

和張說耗磨日飲云。春來半月度。俗忌一朝閑。不酌他鄉酒。無堪對楚山。  
久曠定州人。開元初爲監察御史。坐事流岳州。召還復官。

酬燕公歸田賦之作云。窮鳥嬰籠。綴孤飛。任播遷。鶴鶴王佐。用復此。挫冲天。楚雲何掩鬱。湘水亦迴遒。懷哉愧木雁。忽爾枉蘭荃。愈疾同枚叔。銷髮比仲宣。歸途書可畏。弱藻石猶堅。覆載雖云廣。潑陽直塊然。(枚叔未詳)

滄湖作云。三湖返入兩山間。畜作滄湖。變復變。暑雨奔流。湘正滿。微霜及潦。水初還。水還波卷。溪潭澗。綠草芊芊。岸嶄崖。適方飛棹。共回旋。已復揚鞭。恣行樂。道傍耆老。步蹢躅。楚言茲事不知年。試就湖邊披草徑。莫疑東海變桑田。君訝今時盡陵陸。我看明歲更淪漣。來今自昔無終始。人事迴環常若是。應思闕下聲華日。誰謂江潭旅遊子。初貞正喜固當然。往蹇來譽宜可俟。盈虛用捨輪輿旋。勿學靈均遠問天。(序云。巴江南滄湖者。蓋沅湘汨之際。波淪匯洞庭。澹澹千里。夏潦成湖。冬澗爲野。爾雅云。水返入爲滄。斯名之作。有由焉爾。)

和燕公岳州山城云。爲吏恩猶舊。投沙惠此蒙。江邊攸爾處。泗上宛然同。訪道精言合。論經大義通。鳴琴有真氣。泥已沫清風。

陪燕公行郡竹籬云。良臣乃國寶。麾守去承明。外戶人無閉。浮江獸已行。隨來晉盜逸。民化蜀風清。鄂郭從彝典。州閭荷德聲。小人被天涯。流落巴丘城。所賴中和作。優游鑿與耕。

酬燕公出湖見寄云。綸紱有成命。旌麾不可攀。湘川朝自斷。剌闕夕波還。果枉東瞻唱。興

言夕放閑。攜琴仙洞中。置酒瀼湖上。芳景恣行樂。謫居忽如忘。聚散本相因。離情自悲悵。鸞翻非常戩。鵬天會昭曠。永懷宛洛游。曾是彈冠望。（剡闕字未詳）

和燕公遊瀼湖上寺云。江外多山水。招要步馬來。琴將天籟合。酒共鳥聲催。巖坐攀紅藥。溪行愛綠苔。所懷非此地。游望亦徘徊。

和燕公別瀼湖云。南湖美泉石。君子翫幽奇。灣澳陪臨泛。巖崕共踐窺。秋風頰桂竦。春景綠楊垂。郢路委分竹。湘濱擁去麾。枉帆懷勝賞。留景惜羌池。水木且不棄。情遊良可知。

尹恁

陪燕公登南樓詩云。君子每垂眷。江山共流盼。水遠林外明。窟近霧中見。終日西北望。何處是京縣。屢登高春臺。徒使淚如霰。

燕公和云。危樓瀉洞湖。積水照城隅。命駕邀漁父。通家引鳳鷄。山晴紅藥匝。洲曉綠苗鋪。舉目思鄉縣。春光定不殊。

趙冬曦云。寬慰何以歡。陰氣亦登望。孤鳥輕霧裏。行舟白波上。日熒西北雲。心醉東南障。昔日青溪子。胡然此無狀。

秋夜遊瀼湖詩云。熊軾巴陵地。鷁舟湘水潯。江山與勢遠。泉石自幽深。杳靄入天壑。冥茫



見道心。超然無俗事。清宴有深林。

又云。江上饒奇山。巒羅雲水間。風秋樹色雜。苔古色文斑。巴浴將千澁。澆湖凡幾灣。嬉遊竟不盡。乘月汎舟還。○悉序云。燕公以董司馬初到。趙侍御客焉。聿理方舟。嬉遊澗壑。覽山川之異。探泉石之奇。盼望崇朝。留樽待月。一時之樂。豈不盛歟。

燕公和云。澗湖佳可遊。旣近復能幽。林裏棲精舍。山間轉去舟。鴈飛江月冷。猿嘯野風秋。不是迷鄉路。尋奇處處留。

又云。坐嘯人事閑。佳遊野情發。山門送落照。湖口望昇月。林尋猿狖居。水戲龜鼉穴。朔風吹飛鴈。芳草亦云歇。

趙冬曦云。政理常多暇。方舟此沂洄。吹笙虛洞答。舉揖使風催。山暗雲猶辯。潭幽月稍來。清溪無數曲。未盡莫先回。

又云。煙靄夕微蒙。幽灣賞未窮。艤舟待初月。寒幌招遠風。鶴聲聒前浦。人火明暗叢。東山雲壑意。不謂爾來同。

張均云。遠水沉西日。寒沙聚夜鷗。平湖乘月滿。飛棹接星流。黃葉鳴淒吹。蒼葭掃暗洲。願移滄浦賞。歸侍穎川遊。

又云。灣潭幽意深。查澗涌寒岑。石痕秋水落。嵐聚夕陽沉。澄澈天爲底。淵玄月作心。青溪非大隱。歸乘白雲海。

汎洞庭云。風光浙浙草中飄。日采熒熒水上搖。幸奉瀟湘雲壑意。山傍欲與動仙槎。  
燕公和云。平湖一望水連天。秋景千潭下洞泉。忽驚水上光華滿。疑是乘舟到日邊。  
悉開元時張燕公岳州從事也。官補闕。

崔成甫（李白詩。崔侍御是也。）

贈李白云。我是瀟湘放逐臣。君辭明主漢江濱。天外常求李白老。金陵捉得酒仙人。  
白和云。嚴陵不從萬乘遊。歸臥空山釣北流。自是客星辭帝座。元非太白醉揚州。

李白澤畔吟序云。澤畔吟者。逐臣崔公所作云。代業文宗早茂。才秀起家。校書蓬山。再尉關輔。中佐于憲車。因貶湘陰。流離沅湘。摧頓草莽。忠憤義烈。形于清辭。其怨者之流乎。

開元末。長安令韋堅。兼水陸轉運使。鑿潭望春樓下。先時。民間唱俚歌曰。得本紇那邪。其後得寶符於桃林。時成甫爲陝縣尉。更得體歌。爲得寶洪農野。堅命舟人歌之。成甫又廣爲之歌辭十闕。白衣缺後綠衣錦。半臂紅抹額。立第一船。爲號頭以唱。集兩縣婦女百人。鮮服亂粧。鳴鼓吹笛以和之。

先是人間獻唱歌詞云得（丁紇反）體（都董反）紇那耶。紇囊得體耶。潭裏船車鬧。楊州銅器多。三郎當殿坐。看唱得體歌。至開元二十九年。田同秀上言。見玄元皇帝云。有寶符在陝州桃林縣。古關令尹喜宅。發中使求而得之。以爲殊祥。改桃林爲靈寶縣。以韋堅爲陝郡太守。鑿新潭。潭成。又致楊林銅器。翻出此詞。廣集兩縣官使婦人唱之。言得寶弘農野。弘農得寶耶。潭裏船車鬧。楊州銅器多。三郎當殿坐。看唱得寶歌。成甫又作歌詞十首。

李昂

雋秀等科。初嘗考功主之。開元二十四年。李昂員外。性剛急。不容物。以舉人皆飭名求稱。搖蕩主司。談毀失實。竊病之。而將革焉。集貢士與之約曰。文之美惡。悉知之矣。考校取捨。在乎至公。如有請託於時。求聲於人者。當首落之。旣而昂外舅常與進士李權鄰居相善。乃舉權於昂。昂怒。集貢人召權庭數之。權謝曰。人或相知。竊聞於左右。非敢求也。昂因曰。觀衆君子之文。信美矣。然古人云。瑜不掩瑕。忠也。其有詞或不典。將與衆評之。若何。皆曰。唯公之命。旣出。權謂衆曰。向之言。其意屬吾也。吾誠不第。決矣。又何藉焉。乃陰求昂瑕。以待之。異日。會論果斥權章句之疵。以辱之。權拱而前曰。夫禮尚往來。來而不往。非禮也。鄙文不臧。旣得而聞矣。而執事昔有雅什。嘗聞於道路。愚將切磋可乎。昂怒而嬉笑曰。有何不可。權曰。耳臨清渭洗。心向白雲閑。

豈執事之詞乎。昂曰：然。權曰：昔唐堯衰老，厭倦天下，將禪於許由，由惡聞，故洗耳。今於天子春秋鼎盛，不揖讓於足下，而洗耳何哉？是時國家甯謐，百寮畏法，令兢然莫敢跌。昂聞惶駭，蹶起，不知所酬，乃訴於執政，謂權風狂不遜，遂下權吏。初，昂強復不受囑請，及有吏議求者，莫不允從。由是庭議以省郎位輕，不足以臨多士，乃以禮部侍郎專之。

昂賦戚夫人楚舞歌云：定陶城中是妾家，妾年二八顏如花。閨中歌舞未終曲，天下死人如亂麻。漢王此地因征戰，未出簾櫳人已薦。風花菡萏落轅門，雲雨徘徊入行殿。日夕悠悠非舊鄉，飄飄處處逐君王。閨門向裏通歸夢，銀燭迎來在戰場。相從顧恩不顧己，何異薄萍寄深水。逐戰曾迷隻輪下，隨君幾陷重圍裏。此時平楚復平齊，咸陽宮闕到關西。珠簾夕殿聞鍾鼓，白日秋天憶鼓鼙。君王縱恣翻成誤，呂后山來有深妬。不奈君王容鬢衰，相存相顧能幾時。黃泉白骨不可報，雀釵翠羽從此辭。君楚歌兮妾楚舞，脈脈相看兩心苦。曲未終兮袂更揚，君流涕兮妾斷腸。已見儲君歸惠帝，徒留愛子付周昌。

殷遙

題友人亭云：故人雖薄宦，往往涉清溪。鑿牖對山月，褰裳拂澗霓。遊魚逆水上，宿鳥向風棲。一見桃花發，能令秦漢迷。

山行云。寂歷青山曉。山行趣不稀。野花成子落。江燕引雛飛。暗草薰苔徑。晴楊掃石磯。俗人猶語比。餘立轉忘歸。

王維哭之云。人生能幾何。畢竟歸無形。念君等爲死。萬事傷人情。慈母未及葬。一女纔十齡。潸潸寒郊外。蕭條聞哭聲。浮雲爲蒼忙。飛鳥不能鳴。行人同寂寞。白日自悽清。憶昔君在時。問我學無生。勸君苦不早。令君無所成。故人各有贈。又不及半生。負爾非一涂。慟哭返柴荆。又曰。送君反葬石樓山。松柏蒼蒼賓馭還。埋骨白雲長已矣。空餘流水向人間。遙丹陽人天寶間。終於忠王府曹參軍。

徐延壽

人日剪綵詩云。閨婦持刀坐。自憐裁剪新。葉催情綴色。花寄手成春。帖燕留粧戶。黏鷄欲向人。驚來問夫婿。何處不如真。

延壽開元間江寧人。處士也。

苑咸

王維贈咸詩序曰。苑舍人。能書梵字。兼達梵音。曲盡其妙。戲爲之贈詩曰。名儒待制滿公車。才子爲郎典石渠。蓮花法藏心懸悟。貝葉經文手自書。楚詞共許勝揚馬。梵字何人辯魯魚。

故舊相望在三事。願君莫厭承明廬。

咸答詩曰：蓮花梵字本從天，華省仙郎早悟禪。三點成伊猶有想，一觀如幻自忘筌。爲文已變當時體，入用還推問氣賢。應同羅漢無名欲，故作馮唐老歲年。（王爲庫部員外郎，久不遷，故咸末句及之。王答云：仙郎真意憐同舍，丞相無私斷掃門。）

咸，成都人。開元末，上書拜司經校書中書舍人，顏真卿序遜逸文集曰：公之除庶子也，苑咸草詔曰：西掖掌綸，朝推無對，議者以爲知言。唐人推咸爲文誥之最。後貶漢東郡司戶參軍，復起爲舍人。終永陽太守。始咸舉進士，在京，仲夏忽染疾而卒。三日復蘇，云：見人追至陰司，見劉敬則爲冥官，乃同舉進士也。問其故，乃曰：追賊乃誤召公，速遣押還。咸曰：數上京不捷，家遠且貧，試闈籍，若有科第官職，卽願生還。劉謂曰：君來春登第，歷臺省，至中書舍人。

丘爲

爲，蘇州嘉興人，事繼母孝，常有靈芝生堂下。累官太子右庶子，時年八十餘，而母無恙，給俸祿之半。及居憂，觀察使韓滉以致仕官給祿，所以惠養老臣，不可在喪爲異。唯罷春秋羊酒，初還鄉，縣令謁之，爲候門磬折，令坐，乃拜里胥，立庭下。旣出，乃敢坐。經縣宇，降馬而趨。卒年九十六，與劉長卿善，長卿送爲赴上都詩云：帝鄉何處是，岐路空垂泣。楚思愁暮多，川程帶潮急。

潮歸人不歸。獨向回塘立。王摩詰送爲往唐州詩云。四愁連漢水。百口寄隨人。

爲尋西山隱者不遇詩云。絕頂一茅茨。直上三十里。扣關無僮僕。窺室唯案几。若非巾柴車。應是釣秋水。差池不相見。黽俛空仰止。草色新雨中。松聲晚秋裏。及茲繼幽絕。自足盪心耳。雖無賓主意。頗得清淨理。興盡方下山。何必待之子。

王維送爲落第東歸詩云。憐君不得意。况覓柳條春。爲客黃金盡。還家白髮新。五湖三畝宅。萬里一歸人。知禰不能薦。羞爲獻納臣。（重出）

摩詰賦左掖梨花詩云。閑灑階邊草。輕隨箔外風。黃鸝弄不足。銜入未央宮。爲和云。冷艷全欺雪。餘香乍入衣。春風且莫定。吹向玉階飛。

皇甫冉詩云。巧解迎人笑。偏能亂蝶飛。春風時入戶。幾片落朝衣。





# 唐詩紀事卷第十八

杜甫 李白

杜甫

元稹作子美墓銘。敍曰。余讀詩至杜子美。而知古人之才。有所摠萃焉。始堯舜之君臣。以廣歌相和。是後詩人繼作。歷夏殷周千餘年。仲尼緝拾選練。取其干預教化之尤者。三百篇。其後無聞焉。騷人作而怨憤之態繁。然猶去風雅日近。尙相比擬。秦漢已還。采詩之官既廢。天下俗謠民謳。歌頌諷賦。曲度嬉戲之詞。亦隨時間作。至武帝賦柏梁詩。而七言之體具。蘇子卿李少卿之徒。尤工爲五言。雖句讀文律。各異雅鄭之音。而詞意闊遠。指事言情。自非有爲而爲。則文不妄作。建安之後。天下之士。遭罹兵戰。曹氏父子。鞍馬間爲文。往往橫槊賦詩。故其適文壯節。抑揚怨哀。悲離之作。尤極於古。晉世風概稍存。宋齊之間。教失根本。士以簡慢矯飾。尙文章。以風容色。澤放曠。精清爲高。蓋吟寫性靈。流連光景之文也。意義格力無取焉。陵遲至梁陳。淫艷刻飾。佻巧小碎之詞。又宋齊之所不取。唐興。學官大振。歷世之文。能者互書。而又沈宋之流。研練精切。穩順聲勢。謂之爲律。詩由是而後。文變之體極焉。而又好古者遺近。務華者去實。

效齊梁則不逮於晉魏。工樂府則力屈於五言。律切則骨格不存。閑暇則纖穠莫備。至於子美。所謂上籀風雅。下該沈宋。言奪蘇李。氣吞曹劉。掩顏謝之孤高。雜徐庾之流麗。盡得古今之體勢。而兼昔人之所獨專矣。如使仲尼考覈其旨要。尙不知貴其多乎哉。苟以爲能所不能。無可無不可。則詩人以來。未有如子美者。是時山東人李白。亦以奇文取稱。時人謂之李杜。余觀其壯浪縱恣。擺去拘束。摸寫物象。及樂府歌詩。誠亦差肩於子美。至若鋪陳終始。排比聲韻。大或千言。次猶數百。詞氣豪邁。而風調清深。屬對律切。而脫棄凡近。則李尙不能歷其藩翰。况堂奧乎。余嘗欲條析其文體別相附與來者爲之準。病懶未就爾。適子美之孫嗣業。啓子美之柩。襄耐事於假師。途次于荆楚。雅知余愛言其大父之爲文。祈余爲誌。辭不可絕。余因系其官閥而銘其卒葬云。系曰。晉當陽侯杜氏。下十世而生依藝。生審言。善詩。官至膳部員外郎。審言生閑。閑生甫。爲奉天令。甫字子美。天寶中。獻三大禮賦。明皇奇之。命宰相試文。文善。授率州曹。屬京師亂。步謁行在。授左拾遺。以直言失官。出爲華州司功。尋遷京兆功曹。劍南節度使嚴武拔爲工部員外參謀。軍事。旋又棄其官。扁舟下荆楚間。竟以寓卒。旅殯嶽陽。享年五十九。夫人弘農楊氏女。父曰司農少卿怡。四十九年終。嗣子曰宗武。病不克葬。沒命其子嗣業。以家貧無以給喪。收拾乞丐。燹勞晝夜。去子美沒後四十年。然後卒先人之志。亦足爲難矣。銘曰。惟元和之癸

己粵某月某日之佳辰。合窆我杜子美於首陽之山前。嗚呼千歲而下。曰此文先生之古墳。  
樂天曰。杜詩最多。至於貫穿今古。覲縷格律。盡工盡善。又過於李。然撮其新安。石壕。潼關。吏。蘆子關。花門之章。朱門洒肉臭。路有凍死骨之句。亦不過三四十。杜尙如此。況不逮者乎。

容宗先天元年癸丑是歲。甫生。明皇開元三年丙辰。於郾城觀公孫大娘舞劍器。是年才四歲。必有誤。天寶元年癸未。有南曹小司寇爲山之作。時年三十一。天寶十一年癸巳。上韋相詩。有龍飛四十春。帝卽位四十年。時有兵車行。麗人行。十三年乙未。上三大禮賦。甫年四十三。召試文章。授河西尉。不行。改右衛率府胄曹。十四年丙申。是年十一月初。自京赴奉先。有懷詠詩。是月。祿山亂。以家避亂。鄜州獨陷賊中。天寶十五載丁酉六月。帝西狩。有哀王孫詩。七月。肅宗卽位。改元至德。是年避寇馮翊。有白水高齋三川觀漲詩。至德二年。自賊中竄歸鳳翔。拜左拾遺。八月。墨制。放往鄆州。迎家。有北征詩。明年乾元元年。收京。扈從還長安。上疏論救房瑄。帝怒。黜甫華州司功。有新安吏。石壕吏。新婚別。垂老別。留花門。洗兵馬詩。明年。關輔飢亂。棄官之秦州。乃適同谷。乃入蜀。有遣興三百首。上元元年辛丑。在蜀二年。嚴武鎮蜀。甫自閬往依焉。明年寶應元年癸巳。有元年建巳月詩。代宗廣德元年甲辰。有祭房相國文。武再鎮蜀。表甫參謀檢校。工部員外。作傷春五首。永泰元年丙午。武卒。崔旰殺郭英。又楊子琳。栢正節舉兵攻。

盱蜀亂甫遊東川除京兆功曹不赴大歷元年丁未移居夔州三年出峽之荆渚至湘潭寓居未陽五年辛亥有追高適人日作夏甫還襄漢卒於岳陽

段成式西陽雜俎云李白集有堯祠贈杜補闕者老杜也詩曰我覺秋興逸誰言秋興悲山將落日去水與晴相宜煙歸北海少雁度青天遲相失各萬里茫然空爾思不獨飯顆山頭之句也

國朝盛文肅嘗夢朝上帝見殿上題扇云夜闌更秉燭相對如夢寐初謂天下之作已而知子美詩也

禰衡過漁陽摻其聲悲壯漢武時星辰影動搖東方朔謂民勞之應子美詩云五更鼓角聲悲壯三峽星河影動搖乃用故事也先儒云不行一萬里不讀萬卷書不知老杜詩信然詩話云有病瘡者子美曰吾詩可以療之病者曰云何曰夜闌更秉燭相對如夢寐其人誦之瘡猶是也杜曰更誦吾詩云子章憫饑血糝糊手提榔還崔大夫其人誦之果愈子美傲誕不冠見嚴武故詩云莫倚善題鸞鵲賦何須不着鵲儀冠子美奉酬云謝安不倦登臨費阮籍焉知禮法疎傳敍子美傲放武積不平欲殺之冠鈞於簾者三遂止

寄章有夏都中詩云省郎憂病士書信有柴胡飲子頻通汗懷君想報珠飲子對懷君或

云。沈佺期齒錄對牙緋。孟浩然鷄黍對楊梅之類也。

子美題李尊師松障詩云。已知仙客意相親。更覺良工心獨苦。用意之妙。有舉世莫知者。此唐人所以名家也。

### 李白

烏棲曲云。姑蘇臺上烏棲時。吳王宮裏醉西施。吳歌楚舞歡未畢。青山猶銜半邊月。銀箭金壺（一作金丁）漏水多。起看秋月墜江波。東方漸高奈樂何。（一作爾何）天寶初。賀知章見之曰。此詩可以泣鬼神矣。

蜀道難云。噫噫吁。危乎高哉。蜀道之難。難於上青天。蠶叢見魚鳧。開國何茫然。爾來肆萬捌千歲。乃與秦塞通人煙。西當太白有鳥道。可以橫絕峨眉巔。地崩山摧壯士死。然後天梯石棧方（一作和）鈎。漣上有六龍迴日之高標。（一作橫河斷海之浮雲）下有衝波逆折之回川。黃鶴之飛尚不得。（一作過）猿狖欲度愁攀緣。（一作牽）青泥何盤盤。百步九折縈崑巒。捫參歷井仰脅息。以手撫膺坐長嘆。問君西遊何時還。畏途巖崑不可攀。但見悲鳥號古木。雄飛雌從遶林間。又聞子規啼夜月。愁空山。蜀道之難。難於上青天。使人聽此凋朱顏。連峯去天不盈尺。（一作入煙幾千尺）枯松倒挂倚絕壁。飛湍瀑流爭喧廝。水崖轉石方壑雷。其

嶮也若此。嗟爾遠道之人，胡爲乎來哉！劍閣崢嶸而崔嵬，一夫當關，萬人（一作夫）莫開。所守或匪親（一作人），化爲狼與豺。朝避猛虎，夕避長蛇。磨牙吮血，殺人如麻。錦城雖云樂，不如早還家。蜀道之難，難於上青天。側身西望長咨嗟（一作令人嗟）。

蜀道難，或曰譏章仇兼瓊，或曰譏嚴武之暴，爲房相杜甫危之也。

宮中行樂詞云：小小生金屋，盈盈在紫微。山花插寶髻，石竹繡羅衣。每出深宮裏，常隨步輦歸。只愁歌舞散，化作綵雲飛。

柳色黃金嫩，梨花白雪香。玉樓巢（一作開）翡翠，珠（一作金）殿鎖鴛鴦。選妓隨雕（一作朝）輦，徵歌出洞房。宮中誰第一，飛燕在昭陽。

盧橘爲榛樹，蒲桃出（一作是）漢宮。煙花宜落日，絲管醉春風。笛奏龍鳴（一作吟），水簫吟（一作鳴）。鳳下空，君王多樂事，何必向（一作在）回中（一作選與萬方同）。

玉樹（一作殿）春歸日（一作好），金宮樂事多。後庭朝未入，輕輦夜相過。笑步花間語，嬌來燭下歌。莫教明月去，留著醉姮娥。

繡戶香風暖，紗窗曙色新。宮花爭笑日，池草暗生春。綠樹聞歌鳥，青樓見舞人。昭陽桃李月，羅綺自（一作坐）相親。

今日明光裏。還須結伴遊。春風開紫殿。天樂下珠樓。豔舞全知巧。嬌歌半欲羞。更憐花月夜。宮女笑藏鉤。寒雪梅中盡。春風柳上歸。宮鶯嬌欲醉。簷燕語還飛。遲日明歌席。新花豔舞衣。晚來移綵仗。行樂好光輝。水滌南薰殿。花紅北闕樓。鶯歌聞太液。鳳吹遶瀛州。素女鳴珠佩。天人弄綵毬。今朝風日好。宜入未央遊。

明皇坐沉香亭。意有所感。欲得白爲樂章。召入。而白已醉。左右以水頰面。稍解。授筆成文。婉轉精切。無留思。

清平調詞云。雲想衣裳花想容。春風拂檻露華濃。若非羣玉山頭見。會向瑤臺月下逢。  
一枝紅豔露凝香。雲雨巫山枉斷腸。借問漢宮誰得似。可憐飛燕倚新粧。  
名花傾國兩相歡。長得君王帶笑看。解釋春風無限恨。沉香亭北倚欄干。

禁中木芍藥開。上賞之。妃子從。帝曰。賞名花。對妃子。焉用舊樂詞爲。命李龜年持金花牋。賜白爲清平樂詞三章。梨園弟子。撫絲竹。李龜年歌之。上親調玉笛以倚曲。每曲遍。將換。則遲其聲以媚之。太真以頗梨七寶盃。酌西涼蒲萄酒。笑飲。

翰林讀書言懷。呈集賢院內諸學士云。晨趨紫禁中。夕待金門詔。觀書散遺秩。探古窮至妙。片日苟會心。掩卷忽而笑。青蠅易相點。白雪難同調。本是散疏人。屢貽褊促誚。雲天屬清朝。

林壑憶遊眺。或時清風來。閑倚欄（一作簷）下嘯。嚴光桐廬溪。謝客臨海嶠。功成謝人君。（一作間）從比一投釣。

高力士以脫靴之恥。譖白於貴妃曰。以飛燕指妃子。是賤之甚也。不爲親近所容。乃益放鷲爲酒。八仙人懇求還山。

潯陽紫極宮感秋作云。何處聞秋聲。脩脩北牕竹。迴薄萬古心。攬之不盈掬。靜坐觀衆妙。浩然媚幽獨。白雲南山來。就我簷下宿。嬾從唐生決。羞訪季主卜。四十九年非。一往不可復。野情轉蕭散。世道有翻復。陶令歸去來。田家酒應熟。

是時自有歸山之意矣。

胡無人云。嚴風吹霜海草凋。筋箝精堅胡馬驕。漢家戰士三十萬。將軍兼領（一作誰者）霍嫖姚。流星白羽腰間插。劍花秋蓮光出匣。天兵照雪下玉關。虜箭如沙射金甲。雲龍飛虎盡（一作畫）交回。太白入月敵可摧。旄頭滅。覆胡之腸。涉胡血。懸胡青天上。埋胡紫塞旁。胡無人。漢道昌。陛下之壽三千霜。但歌大風雲飛揚。安用猛士兮守四方。

此詩祿山反時作。祿山死。太白食月云。

東武吟云。好古笑流俗。素聞賢達風。方希佐明主。長揖辭成功。白日在高天。回光燭微躬。



恭承鳳凰詔。欵起雲蘿中。清切紫霄迴。優遊丹禁通。君王賜顏色。聲價凌煙虹。乘輿擁翠蓋。扈從金城東。寶馬麗絕景。錦衣入新豐。倚巖望松雪。對酒鳴絲桐。因學楊子雲。獻賦甘泉宮。天書美片善。清芬播無窮。歸來入咸陽。談笑皆王公。一朝去金馬。飄落成飛蓬。賓友日疏散。玉樽日成空。才力猶可倚。（一作恃）不慙世上雄。閑作東武吟。曲盡情未終。書此謝知己。吾尋黃綺翁。（一作扁舟尋釣翁）

或曰。白以是詩留別翰苑。遂放遊江湖矣。

對酒憶賀監序云。太子賓客賀公。於長安紫極宮一見余。呼余爲謫仙人。因解金龜換酒爲樂。沒後對酒。悵然有懷。而作是詩。曰。四明有狂客。風流（一作霞杯）賀季真。長安一相見。呼我謫仙人。昔好盃中物。翻（一作今）爲松下塵。金龜換酒處。却憶淚沾巾。

又狂客歸四明。山陰道士迎。勅賜鏡湖水。爲君臺沼榮。人亡余湖宅。空有荷花生。念此杳如夢。淒然傷我情。又曰。欲向江東去。定將誰舉盃。稽山無賀老。却棹酒船迴。

飯顆山頭逢杜甫。頂戴笠子日草屣。借問因何太瘦生。摠爲從前作詩苦。此詩載於唐舊史。

近世傳白詩云。斷崖如削瓜。嵐光破崖綠。天河從中來。白雲漲川谷。玉案勅文字。世眼不

可讀。攝身凌清霄。松風拂我足。又云。舉袖露條脫。招我飯胡麻。

白本末傳記所載不同。唐史稱白與聖皇帝九世孫。隋末以罪徙西域。神龍初遁還。客巴西。既長。隱岷山。蘇頌爲益州長史。見白異之。更客任城。與孔巢父。韓準。裴政。張叔明。陶沔。居徂徠山。日沉飲。號竹溪六逸。天寶初。南入會稽。與吳筠善。筠被召。故白亦至長安。往見賀知章。賀知章見其文。歎曰。子謫仙人也。

嚴武傳。武爲劍南節度使。房瑄以故相爲部內刺史。武慢据不爲禮。最厚杜甫。然欲殺甫數矣。李白爲蜀道難者。乃爲房杜危之也。

韋臯傳。天寶時。李白爲蜀道難。斥嚴武。陸暢更爲蜀道易。以美韋臯。撫言云。太白自蜀至京。以新業贊謁賀知章。知章覽蜀道難一篇。楊眉謂之曰。公非人世。豈非太白星精邪。然則蜀道難之作久矣。非爲房杜也。又南部新書云。李白。山東人。父爲任城尉。因家焉。少與魯人隱徂徠山。號竹溪陸逸。天寶初。遊會稽。吳筠隱剡中谷。稱蜀人。非也。今任城令廳有白之詞尙存。唐范傳正誌其墓曰。白涼武昭王九世孫。昭王隴西人。隋末子孫以罪徙碎葉。神龍時。白父客自西域逃居綿之巴西。而白生焉。唐魏顥。李陽冰序其文。劉全白撰其墓碣。皆曰。廣漢人。故論白者。或曰隴西。或曰山東。或曰蜀。陽冰云。出翰林。浪跡冰酒。以自昏穢。詠歌之際。屢稱東山林。

白亦云。以張口讒逐。遊海岱間。子美所謂。汝與山東李白好。蓋白自號也。蜀道難。或曰作於天寶初。或曰作於天寶末。二說皆出於後世。以意逆之。曰此爲房杜危之也。陸暢去白未遠。作蜀道易。以美韋臯。傳之當時。而蜀道難之詞。曰錦城雖云樂。不如早還家。其意必有所屬。房杜之說。蓋近之矣。（白之父客於巴西。故以客呼之。）東蜀楊天惠彰明逸事云。元符二年春正月。天惠補令於此。竊從學士大夫求問逸事。聞唐李太白。本邑人。微時。募縣小吏入令臥內。嘗驅牛徑堂下。令妻怒。將加詰責。太白亟以詩謝云。素面倚欄鉤。嬌聲出外頭。若非是織女。何得問牽牛。令驚異不問。稍親。招引侍研席。令一日賦山火詩。思札不屬。太白從傍綴其下句。令詩云。野火燒山去。人歸火不歸。太白繼云。燄隨紅日去。煙逐暮雲飛。令慙止。頃之。從令觀漲。有女子溺死江上。令復苦吟。太白輒應聲繼之。令詩云。二八誰家女。漂來倚岸蘆。鳥窺眉上翠。魚弄口珠傍。太白繼云。綠鬢隨波散。紅顏逐浪無。因何逢五伯。應是想秋胡。令不悅。太白恐棄去。隱居戴天大匡山。往來旁郡。依潼江趙徵君狴。

亦節士。任俠有氣。善爲縱橫學。著書號長短。經太白從學歲餘。去遊成都。賦春感詩云。茫茫南與北。道直事難諧。榆莢錢生樹。楊花玉慘街。塵縈遊子面。蝶弄美人釵。却憶青山上。雲門掩竹齋。益州刺史蘇頲見而奇之。時太白齒方少。英氣溢發。諸爲詩文甚多。微類宮中行樂詞。

體。今邑人所藏百篇。大抵皆格律也。雖頗體弱。然短羽禱縱。已有雛鳳態。淳化中。縣令楊遂爲之引。謂爲少作是也。遂。江南人。自名能詩。累謫爲令。云始太白與杜甫相遇。梁宋間。結交歡甚。久乃去。客居魯徂徠山。甫從嚴武成。都太白益流落不能歸。故甫詩又云。匡山讀書處。頭白好歸來。然學者多疑太白爲山東人。又以匡山爲匡廬。皆非也。今大匡山猶有讀書臺。而清廉鄉故居遺地尙在。廢爲寺。名隴西院。有唐梓州刺史碑。失其名。及綿州刺史高祝記。太白有子曰伯禽。女平陽。皆生太白去蜀後。有妹月圓。前嫁邑子。留不去。以故葬邑下。墓今在隴西院旁百步外。或傳院乃其所捨。云白詩云。昔作芙蓉花。今爲斷腸草。以色事他人。能得幾時好。陶洪景仙方云。斷腸草不可食。其名美好。名芙蓉。乃知詩人無一字閑語。

# 唐詩紀事卷第十九

崔宗之

敬括

房琯

蘇淵明

崔宗之

宗之。襲父日用齊家之封。好學寬博。有風舉。與李杜以文相知。贈李白云。涼秋八九月。白露空園庭。耿耿意不暢。悄悄（一作悄悄）風葉聲。思見雄俊士。共話今古情。李侯忽來儀。把袂苦不早。清論既抵掌。玄談多絕倒。分明楚漢事。歷歷王霸道。擔囊無俗物。訪古千里余。袖有七首劍。懷中茂陵書。雙眸光照人。詞賦凌子虛。酌酒並素琴。霜風氣凝潔。平生心事中。今日爲君說。我家有別業。寄在嵩之陽。明月出高岑。清溪澄素光。雲散牕戶靜。風吹松桂香。子若同斯遊。千載不相忘。白和云。朔風橫高天。萬里起秋色。壯士心飛揚。落日空嘆息。長嘯出原野。凜然寒風生。幸遭聖明時。功業猶未成。奈何懷良圖。鬱悒獨愁坐。（一作空獨坐）杖策尋英豪。立談乃知我。崔公生人秀。緬邈青雲姿。制作參造化。託諷含神祇。海岳尙可傾。吐諾終不移。是時霜颯寒。逸興臨華池。起舞拂長劍。四座皆揚眉。因得窮歡情。贈我以新詩。又結汗漫期。九垓遠相待。身舉憩蓬壺。濯足弄滄海。從此凌倒景。一去無時還。朝遊明光宮。暮日闔闔關。但得長把

袂何必嵩丘山。

宗之爲侍御史。謫官金陵。與白詩酒唱和。月夜乘舟。自採石達金陵。

敬括（孫晦駢）

括字叔弓。河中人。爲殿中侍御史。不諧。附揚國忠。出知果州。入爲兵侍。志簡淡。不求名。後刺同州。隱然持重。大曆中卒。

括試七月流火云。前逢一葉下。言念忽悲秋。變節金初至。分寒火正流。氣含良夜早。光拂夏雲收。助月微明散。泓河麗景浮。秋標時令美。詩興國風幽。白此觀邪正。深知玉葉休。

房瑄

瑄宰盧氏。王維贈詩云。達人無不可。忘己愛蒼生。不復小千室。絃歌在兩楹。又云。視事兼偃臥。對書不辨纓。蕭條人吏疎。鳥雀下空庭。是時瑄之清名已重於縉紳矣。

瑄題漢州西湖云。高流纏峻隅。城下緬丘墟。決渠信浩蕩。潭島成江湖。結宇依回渚。水中信可居。三伏氣不蒸。四達暑自徂。同人千里駕。鄰國五馬車。月出共登舟。風生隨所如。舉麾指極浦。欲極更盤紆。繚繞各殊致。夜盡情有餘。遭亂意不開。卽理還暫祛。安得長晤語。使我憂更除。瑄之次律融之子也。相肅宗。有遠器。好談老子浮屠法。高談有餘。而不切事。

蘇源明

天寶十二載源明守東平。宴濮陽守崔季重。魯郡李蘭。濟南田琦。濟陽李陵于回源亭。爲小洞庭。五太守讌集。載其歌曰。小洞庭兮寓方舟。風嫋嫋兮離平流。寓方舟兮小洞庭。雲微微兮連絕擘。仍瀾壯兮緬以沒。重富轉兮超以忽。馮夷妻兮護輕撓。蛟龍仔兮落增湖。泊中湖兮澹而閑。並曲渝兮悵而還。適子手兮非於期。將解袂兮葉子曲。尙君子兮壽厥身。承明主兮憂斯人。

其後以國子司業召須尉袁廣。餞於小洞庭。復歌曰。浮漲湖兮莽條遙。川后禮兮扈予橈。橫增沃兮蓬僊延。川后福兮易予船。月澄疑兮明空波。星磊落兮耿秋河。夜旣良兮酒且多。樂方作兮奈別何。

子美八哀詩曰。武功少也孤。徒步客徐兗。讀書東嶽中。十載考墳典。時下萊蕪郭。忍飢浮雲巖。負采晚爲身。每食臉必泫。夜字照葵薪。垢衣生碧蘚。庶以勤苦志。報茲劬勞願。學蔚醇儒姿。文包舊史善。灑落辭幽人。歸來潛京輦。射策君東堂。宗匠集精選。制可題未乾。乙科已大闡。文章日自負。吏祿亦累踐。晨趨闔闔內。足踏宿昔研。一麾出守還。源明累遷太子論德。爲東平太守。故召爲國子司業也。黃屋朔風卷。不暇陪八駿。虜庭悲所遣。平生滿樽酒。斷此朋知。

展憂憤病二秋。有恨石可轉。〔安祿山陷京師。源明以病不受僞官黃屋車蓋也。〕肅宗復社稷。得無逆順辨。〔肅宗復兩京。權考功郎中知制誥。〕范曄顧其兒。李斯憶黃犬。祕書茂松意。再扈祠壇墀。前後百卷文。枕籍皆禁樹。篆刻楊雄流。溟漲本末淺。青焚芙蓉劍。犀兕豈獨刺。反爲後輩襲。予實苦懷緬。煌煌齋房芝。事絕萬手攀。垂之俟來者。正始眞勸勉。不要懸黃金。胡爲投亂口。結交三十載。吾與誰遊衍。滎陽復冥莫。罪罟已橫罨。嗚呼子逝日。始泰則終蹇。長安米萬錢。凋喪盡餘喘。戰伐何當解。歸帆阻清沔。尙纏漳水疾。求負蒿黑餞。〔詩中滎陽謂鄭虔也。〕



唐詩紀事卷第二十

鄭虔

嚴武

史俊

李適之

祖詠

李順

綦母潛

趙謙光

李元操

薛令之

張譔

陶翰

顏舒

王珣

王熊

薛維翰

崔巨

朱琳

王冷然

萬楚

胡皓

袁瓘

柳識

高力士

高霽

息夫牧

崔曙

鄭虔

虔閨情云。銀鑰開香閣。金臺點夜燈。長征君自慣。獨臥妾何曾。

子美詩云。鸚鵡至魯門。不識鍾鼓饗。孔翠望青霄。愁思彫籠養。滎陽冠衆儒。早聞名公賞。地崇士大夫。况乃清氣爽。天然生知姿。學立游夏上。神農或閨漏。黃石愧師長。藥纂西極名。兵流指諸掌。貫穿無遺恨。蒼葭何技癢。圭臬星經奧。蟲篆丹青廣。按新史。虔集撰當世著書八

十余篇。有窺其藁者。上書告虔。私撰國史。虔蒼黃焚之。坐謫十年。命其書爲會粹。孔子作春秋。游夏不能贊。皇猷。虔私撰國史。出其上也。神農黃石藥。纂兵流者。古書也。言虔無不貫穿。復通游藝。星經丹青之類。子雲窺未遍。方朔諧太枉。神翰顧不一。體變鍾兼兩。虔好書及畫。恨無紙。慈恩寺貯蒲葉數屋。虔取筆書。歲久皆遍矣。文傳天下口。大字猶在榜。昔獻書畫圖。新詩亦俱往。滄洲同玉陛。宣鶴誤一響。三絕自御題。四方尤所仰。虔自寫其詩。并畫以獻帝。大署其尾。曰鄭虔三絕。宣一作寡。嗜酒益疎放。故杜甫贈詩云。賴得蘇司業。時時與酒錢。蘇司業。源明也。彈琴視天壤。形骸實土木。親近唯几杖。未曾寄官曹。突兀倚書幌。虔初坐謫。還京師。上愛其材。欲置左右。以不事事。更爲置廣文館。以虔爲博士。虔聞命。不知廣文曹司何在。訴宰相曰。上增國學。置廣文館。以居賢者。令後世言廣文博士。自君始。不亦美乎。晚就芸香閣。胡塵昏坎葬。反覆歸聖朝。點染無滌蕩。老蒙台州椽。泛泛浙江漿。安祿山反。遣張通儒劫百官。置東都。僞受水部郎中。因稱風緩求攝市令。潛以密草達靈武。賊平免死。貶台州司戶參軍。履穿四明雪。飢拾檣溪橡。空聞紫芝歌。不見杏壇丈。天長眺東南。秋色餘。鱸。別離慘至今。班白徒懷曩。春深秦山秀。葉墜清謂朗。劇談王侯門。野稅林下鞅。操紙終夕。酣。時物集遐想。詞場竟疎闊。平昔濫吹獎。百年見存沒。牢落吾安放。蕭條阮咸在。出處同世網。

他日傍江樓。含棲述飄蕩。（宣鶴一作寡鶴。）

虔滎陽人。天寶初爲協律郎。或告其私撰國史。坐謫。十年還京。爲廣文博士。自寫其詩畫以獻。帝書曰。鄭虔三絕。祿山反。劫爲攝部郎中。乃託風綏求水市令。而以密草達靈武。賊平坐王維下遷。而虔貶台州司戶參軍。後數年卒。

虔著蒼叢等諸書之外。又撰胡本草七卷。詩中及之。子美云。虔與今祕書監鄭審編翰齊價。謫江陵。故有阮咸江樓之句。

### 嚴武

臥向巴山落月時。兩鄉千里夢相思。可但步兵偏愛酒。也知光祿最能詩。（阮籍謝莊）  
江頭赤葉楓愁客。籬外黃花口對誰。跋馬望君非一度。冷鴉秋雁不勝悲。（巴嶺答子美見憶子美詩云。遙知簇鞍馬。回首白雲間。）

漫向江頭把釣竿。懶眠沙草愛風湍。莫倚善題鸚鵡賦。何須不着鷓鴣冠。（侍中）腹中書籍幽時曬。肘後醫方靜處看。興發會能馳駿馬。終須重到使君灘。（寄題杜二錦江野亭）

子美八哀詩云。鄭公瑚璉器。華岳金天晶。昔在童子日。已聞老成名。崑然大賢後。復見秀骨清。（嚴武傳。武中書侍郎挺之子。神氣雋爽。敏於聞見。幼有成人風。讀書不究精義。涉獵而

已。大賢謂嚴子陵歟。開口取將相。小心事友生。甫與武世契也。嘗醉登武牀。呼斥其父名。而武不忤。閱書百紙盡。落筆四座驚。歷職匪父任。嫉邪常力爭。武弱冠。以門蔭策名。哥舒翰奏克判官。至德初。肅宗初。靖難大收才傑。武挺節赴行在。宰相房琯。素重之。及是。首薦才略。可稱。累遷給事中。漢儀尙整肅。時武爲侍御史。胡騎忽縱橫。祿山之亂也。飛傳目河壘。逢人問公卿。不知萬乘出。雪涕風悲武。受詞劍閣道。謁帝蕭關城。河壘劍閣蕭關城事。新舊二史皆不載。寂寞雲臺仗。飄飄沙塞旌。江山少使者。笳鼓凝皇情。壯士血相視。忠臣氣不平。密論正觀體。揮發岐陽征。時肅宗兵鳳翔。感激動四極。聯翩收二京。二京。長安東都也。二史皆不載。武收復功。西郊牛酒再。原廟丹青明。匡汲俄寵辱。衛霍竟衰榮。四登會府地。既收長安。以武爲京兆少尹兼御史中丞。時年二十三。後又還京兆尹兼御史大夫。三掌華陽兵。華陽成都也。武以史思明阻兵。不之官。游優京師。頗自矜大。出爲綿州刺史。遷劍南東川節度使。登發上皇詔。以劍南兩川合爲一道。拜武成都尹。充劍南節度使。入復求爲方面。拜成都尹。在蜀累年。肆志逞恣。行猛政。威震一方。京兆空柳色。尙書無履聲。羣鳥日朝夕。白馬休橫行。諸葛蜀人愛。文翁儒化成。公來雪山重。公去雪山輕。記室得何遜。韜鈴延子荆。四郊失壁壘。失壁壘。言無出戍也。此美武能鎮靜也。虛館開逢迎。堂上指畫圖。軍中吹玉笙。

豈無成都酒。憂國只細傾。時觀錦水釣。問俗終相并。意待犬戎滅。人藏紅粟盈。以茲報主願。庶或裨世程。炯炯一心在。沉沉二豎嬰。顏回竟短折。賈誼徒忠貞。飛旆出江漢。孤舟轉荆衡。虛無馬融笛。悵望龍驤整。空餘老賓客。身上媿絳纓。

武年二十二。爲給事黃門郎。明年擁旄西蜀。杜甫乘醉言。不謂嚴挺之。乃有此子也。武志目久之曰。杜審言孫子。擬捋虎鬚。合坐皆笑。以彌縫之。房太尉瑄徵有所誤。憂怖成疾。李太白作蜀道難。爲房杜危之也。武字季鷹。永泰初卒。母哭且曰。而今而後。吾知免爲官婢矣。

子美送武入朝。有鼎湖瞻望遠。象闥憲章新之作。武酬別云。獨逢堯典日。再視漢宮時。未効風霜勁。空慚雨露私。夜鍾清萬戶。曉漏拂千旂。並向斜亭謁。俱承別館追。斗城憐舊路。澗水惜歸期。峯樹還相伴。江雲更對誰。試迴滄海棹。更和敬亭詩。祇是書應寄。無忘酒共持。但令心事在。未肯鬢毛衰。最悵巴山裏。清猿惱夢思。

武題巴州光福寺楠木云。楚江長。楚寺對。楠木幽生赤崖背。臨溪插石盤老根。苔色青蒼。山雨痕。高枝闊葉鳥不度。半掩白雲朝與暮。香殿蕭條轉密陰。花龕滴瀝垂清露。聞道偏多越水頭。煙生霧斂使人愁。月明忽憶湘川夜。猿叫還思鄂渚秋。看君幽竊幾千丈。寂寞窮山今遇賞。亦知鍾梵報黃昏。猶臥禪床戀奇響。

史俊

題巴州光福寺楠木云。近郭城南山寺深。亭亭奇樹出禪林。結根幽壑不知歲。聳幹摩天凡幾尋。翠色晚將嵐氣合。月光時有夜猿吟。經行綠葉望成蓋。宴坐黃花長滿襟。此木嘗聞生豫章。今朝獨秀在巴鄉。凌霜不肯讓松柏。作字猶來稱棟樑。會待良工時一盼。應歸法水作慈航。嚴武作巴山賦楠木歌。俊後以監察御史來臨是邦。亦賦焉。

李適之

常山愍王孫。天寶初代牛仙客爲左相。適之未能相也。朝退每邀賓戚談諧賦詩。曾賦云。朱門長不閉。親友恣相過。年今將半百。不樂復如何。後爲林甫所譖罷。乃爲詩曰。避賢初罷相。樂聖且嘯盃。爲問門前客。今朝幾箇來。

適之入仕。不歷丞簿。便爲別駕。不瀝兩畿官。便爲京兆尹。不歷御史及中丞。便爲大夫。不歷兩省給舍。便爲宰相。不歷刺史。便爲節度使。然不得其死。

祖詠

古意二首。楚王意何去。獨自留巫山。偏使世人見。迢遙江水間。駐舟春潭裏。誓願拜靈顏。夢寐覩神女。金沙鳴珮環。閑艷絕世姿。令人氣力微。含笑默不語。化作雲朝飛。

夫差日淫放。舉國求妃嬪。自謂得王寵。代間無美人。碧羅蒙天閣。坐輦乘芳春。宮女數千騎。常遊江水濱。年深玉顏老。時薄花粧新。拭淚下金殿。嬌多不顧身。生前妬歌舞。死後同灰塵。塚墓令人哀。哀於銅雀臺。

有司試終南山望餘雪詩詠賦云。終南陰嶺秀。積雪浮雲端。林表明霽色。城中增暮寒。四句。卽納于有司。或誥之。詠曰意盡。

陸渾水亭云。晝眺伊川水。巖間霽色明。淺沙平有路。流水漫無聲。浴鳥泐波聚。潛鱗觸釣驚。更尋春岸上。幽意滿山楹。

王維有喜祖三至留宿詩詠云。四年不相見。相見復何爲。握手言未畢。却令傷別離。升堂還駐馬。酌醴便呼兒。語默自相對。安用旁人知。(詠與維最善。)

### 詠登開元進士第

商璠云。詠詩剪刻省淨。用思尤苦。氣雖不高。調頗浚俗。至如霽日園林好。清明煙火新。亦可稱爲才子也。張說在并州。厚遇王翰。旣相引爲駕部員外郎。說罷相。出翰仙州別駕。至郡日。聚英豪。從禽擊鼓。恣爲歡賞。詠與杜華嘗在座。翰坐是。貶道州司馬。

開元中。進士唱第尙書省。落第者。至省門散去。詠吟曰。落去他兩兩。三三戴帽子。日暮祖

候吟一聲。長安竹栢皆枯死。

留別盧象云。朝來已握手。宿別更傷心。灞水行人渡。商山驛路深。故情君且足。謫宦我難任。直道皆如此。誰能淚滿襟。

蘭峯贈張九臯云。君王既巡狩。輦路入秦京。遠樹低蒼壘。孤山出草城。寒疏清禁漏。夜警羽林兵。誰念迷方客。長懷魏國情。

蘇氏別業云。別業居幽處。到來生隱心。南山當戶牖。豐水在園林。屋覆經冬雪。庭昏未夕陰。寥寥人境外。閑坐聽春禽。

夕次圃田店云。前路入鄴郊。向經百餘里。馬煩時欲歇。客歸程未已。落日桑栢陰。遙村烟火起。西還不皇宿。中夜渡涇水。

題韓少府山亭云。梅福幽棲處。佳期不忘還。鳥啼當戶竹。花遶傍池山。水氣侵塔冷。藤陰覆坐閑。常知武陵趣。宛在市朝間。（自留別盧象以下五篇。姚合以爲極元集。）

清明宴劉司勳別業云。田家復近臣。行樂不遺親。霽日園林好。清明煙火新。以文常會友。唯德自成隣。池照窗陰晚。杯看藥味春。簷前花覆地。竹外鳥窺人。何似桃源裏。深居作隱淪。

李頎



緩歌行云。小來託身攀貴遊。傾財破產無所憂。暮夜經過石渠署。朝將出入銅龍樓。結交杜陵輕薄子。誰言可生復可死。一沉一浮會有時。棄我翻然如脫屣。男兒立身須自強。十年閉戶頽水陽。業就功成見明主。擊鍾鼎食坐華堂。二八娥眉梳墮馬。美酒清歌曲房下。文昌宮中賜錦衣。長安陌上退朝歸。五陵賓從莫相視。三省官寮揖者稀。早知今日讀書是。悔作從來狂俠兒。

聽董大彈胡笳聲。兼語弄寄序給事云。蔡女昔造胡笳聲。一彈一十有八拍。胡人落淚向邊草。漢使斷腸對歸客。古戍蒼蒼烽火寒。大荒陰沉飛雪白。先拂商弦後角羽。四郊秋葉驚撼撼。董夫子。通神明。深山竊聽來妖精。言遲更速皆應手。將往復旋如有情。空山百鳥散還合。萬里浮雲陰且明。斯酸雖鳳失羣夜。斷絕胡兒戀母聲。川爲靜其波。鳥亦罷其鳴。烏珠部落家鄉遠。羅紗沙塵哀怨生。出音變調忽飄灑。長風吹林雨墮瓦。迸泉颯颯飛木末。野鹿呦呦走堂下。長安城連東掖垣。鳳凰池對青瑣門。高才脫略名與利。日夕望君抱琴至。

漁父歌云。白頭何老人。篔簹蔽其身。避世常不任。釣魚清江濱。浦沙明濯足。山月靜垂綸。寓宿湍與瀨。行歌秋復春。持竿湘岸竹。煮火蘆州薪。綠水飯香稻。青荷包紫鱗。於中還自樂。所欲全吾真。而笑獨醒者。臨流多苦辛。

送暨道士還玉清詩云。仙官有名籍。度世吳江濱。大道本無我。青春長與君。中州俄已到。至理得而聞。明主降黃屋。時人看白雲。空山何窈窕。三秀日氛氳。遂此留書客。超遙煙駕分。樂天放言詩序云。元九在江陵有放言長句詩五韻。韻高而體律。意古而詞新。雖前輩深於詩者。未有此作。唯李頎有云。濟水至清河自濁。周公大聖接輿狂。斯句近之矣。

聖善閣送裴迪入京云。雪華斂高閣。苔色上鈎欄。藥草空階靜。梧桐返照寒。清吟可愈疾。攜手暫同歡。墮葉如金磬。飢鳥鳴露盤。伊川惜東別。瀟水向西看。舊託含香署。雲霄可足難。

題瀋公山池云。遠公遁跡廬山岑。開山出居祇樹林。片石孤峯窺色相。清池白月點禪心。指揮如意天花落。坐臥閑房春草深。此外俗塵都不染。唯餘玄度得相尋。

王摩詰贈頎詩云。聞君餌丹砂。甚有好顏色。不知從今去。幾時生羽翼。王母鬢華芝。望爾崑崙側。文螭從赤豹。萬里方走息。悲哉世上人。甘此羶腥食。

頎開元進士也。

商璠云。頎詩發調既清。修詞亦麗。漁父歌咸善。玄理寔長。故其論道家。往往高於衆作。頎東郊寄萬楚云。澹落久無用。隱身甘采薇。仍聞薄宦者。還事田家衣。頎水日夜流。故人相見稀。春山不可望。黃鳥東南飛。濯足豈長往。一鱗聊可依。了然潭上月。適我胸中機。在昔同

門友。如今出處非。優游白虎殿。出入青瑣闈。且有薦君表。當看攜手歸。寄書不代面。蘭首空芳菲。（此詩取於河岳英靈）

王母歌云。武皇齋戒承華殿。蟠拱須臾王母見。霓旌照耀麒麟車。羽蓋淋漓孔雀扇。手指交梨遣帝食。可以長生臨寓縣。頭上復帶九星冠。揔領玉皇坐南面。歌聞要言今告汝。帝乃焚香請此語。若能鍊魂去三尸。後當見我天皇所。顧謂侍女董雙成。酒闌可奏雲和笙。紅霞白日儼不動。七龍五鳳紛相迎。惜哉志驕神不悅。歎息馬蹄與車轍。復道歌鍾查將暮。深官桃李花成雪。爲看青玉五枝燈。蟠螭吐火光已絕。

綦母潛

字孝通。開元中。繇宜壽尉入集賢院待制。遷右拾遺。終著作郎。

早發上東門云。十五能行西入秦。三十無家作路人。時命不將明主合。紫衣空染洛陽塵。（顧陶取爲唐類詩）

春泛若耶詩云。幽意無斷絕。此去隨所偶。晚風吹行舟。花路入溪口。際夜轉西壑。隔山望南斗。潭煙飛溶溶。林月低向後。生事且彌漫。願爲持竿叟。

王摩詰別潛詩云。端笏明光宮。歷稔朝雲陛。詔刊延閣書。高義平津邸。適意輕偶人。虛心

削繁禮。盛得江左風。彌工建安體。高張多絕絃。截河有清濟。嚴冬爽羣木。伊洛方清泚。渭水冰下流。潼關雪中啓。符條幾時還。塵纓待君洗。

韋蘇州寄淮上綦毋三詩云。滿城憐傲吏。終日賦新詩。請報淮陰客。春帆浪作期。

商璠云。拾遺詩。舉體清秀。蕭蕭跨俗。桑門之說。於已獨能。至如松覆山殿冷。不可多得。又鍾聲和白雲。歷代少有。借使若人。加氣質。減彫飾。則高視三百年以外也。

題靈隱寺山頂禪院云。招提此山頂。下界不相聞。塔影挂清漢。鍾聲和白雲。觀空淨室掩。行道衆香焚。且駐西來駕。人天日未曛。

若耶溪逢孔九云。相逢此溪曲。勝託在烟霞。潭裏竹影動。崑陰簷竹斜。人生上皇代。大吠武陵家。借問淹留日。春深歸若耶。

冬夜寓居贈儲太祝云。自爲洛陽客。夫子吾知音。盡義能下士。時人無此心。奈何離居夜。巢鳥空悲林。愁坐至月上。復聞南隣砧。

過禪居云。山頭禪室挂僧衣。牕外無人溪鳥啼。黃昏半在下山路。却聽松聲連翠微。

題鶴林寺云。道門隱形勝。向背臨法橋。松覆山殿冷。花藏溪路遙。珊瑚寶幡挂。焰焰明燈燒。遲日半空谷。春風連上朝。少憑水木興。暫忝身心調。願謝攜手客。茲山禪侶饒。

李順送綦毋三謁房給事云。夫子大名下。家無鍾石儲。惜哉湖海上。曾校蓬萊書。外物非本意。此生空澹如。所思但乘輿。遠適唯單車。高道時坎軻。舊交願吹嘘。徒言青瑣闥。不愛承明廡。百單人戶滿。片言諍訟疏。手持蓮花經。目送飛鳥餘。晚景南路別。炎雲中伏初。此行儻不遂。歸食廬洲魚。

趙謙光（賀遂涉）

唐諸郎中不自員外郎拜者。謂之士山頭。果毅便拜宗品。有似長征兵士。便授邊遠果毅。謙光自彭州司馬。入爲大理正。遷戶部郎中。戶部員外。賀遂涉詠曰。員外由來美。郎中望亦優。甯知粉署裏。翻作土山頭。謙光答詩曰。錦帳羅情設。金爐任意薰。唯愁員外置。不應列星文。

謙光登咸亨進士第。

李元操

和從叔祿愔元日早朝云。銅渾變秋節。王律動年灰。曖曖城霞旦。隱隱禁門開。衆靈湊仙府。百神朝帝臺。葉令雙鳧至。梁王駟馬來。戈鋌映林闕。歌管拂塵埃。保章望瑞氣。尙書免火災。冠冕多秀士。簪裾饒上才。誰憐張仲蔚。日暮反蒿萊。元操開元初詩人也。

薛令之

令之。閩之長溪人。及第。遷右庶子。開元中。東宮官僚清淡。令之題詩自悼曰。朝日上團團。照見先生盤。盤中何所有。苜蓿長闌干。飯澁時難縮。羹稀筯易寬。無以謀朝夕。何由保歲寒。上幸東宮覽之。索筆題其傍曰。啄木口喙長。鳳凰羽毛短。若嫌松桂寒。任逐桑榆煖。令之遂謝病歸。

肅宗爲太子。賀知章自右庶子遷賓客授祕書監。令之以右補闕兼侍讀。積歲不遷。故令之棄官。徒步歸鄉里。而知章自號祕書外監。晚節尤誕放。肅宗乾元初。以雅舊贈知章禮部尙書。亦以舊恩召令之。而令之已前卒。

張謹

謹官至刑部員外郎。善草隸。工丹青。與王維李頎等爲詩酒丹青之友。尤善畫山水。王維答詩曰。屏風誤點感孫郎。團扇草書輕內史。李頎詩曰。小玉破體閑支策。落日梨花照空壁。詩堪記室妬風流。盡與將軍作勁敵。

陶翰

塞下曲云。進軍飛狐北。窮寇勢將變。日落沙塵昏。背河更一戰。駿馬黃金勒。彫弓白羽箭。射殺左賢王。歸奏未央殿。欲言塞下事。天子不召見。東出咸陽門。哀哀淚如霰。

翰。潤州人。開元中爲禮部員外郎。以冰壺賦得名。商璠云。歷代辭人。詩筆雙美者。鮮矣。今陶生實謂兩全。兼之旣多興義。復備別有風骨。三百年以前。方可論其體裁。

燕歌行云。請君留楚調。聽我吟燕歌。家在遼水頭。邊風意氣多。出身爲漢將。正值戎未和。雪中凌天山。水上渡交河。大小百餘戰。封侯竟蹉跎。歸來羈陵下。故舊無相過。雄劍委塵匣。空門唯雀羅。玉簪還趙姝。瑤瑟付齊娥。昔日不爲樂。時哉今柰何。

出蕭關懷古云。駝馬繫長劍。行役至蕭關。悠然五原上。永眺蕭河前。北虜三十萬。此中常控弦。秦城亘宇宙。漢帝埤旌旃。刁斗鳴不歇。羽書日夜傳。五軍計莫就。三策議空全。大漠橫萬里。蕭條絕人烟。孤山當翰海。落日照祁連。蒼梧苦寒客。懷哉式微篇。更悲秦樓月。夜夜出胡天。

贈鄭員外云。驄馬拂綉裳。按兵遼水陽。西分雁門騎。北逐樓煩王。聞道五軍集。相邀百戰場。風沙暗天起。虜騎森已行。儒服護諸將。雄謀吞大荒。金門來見謁。未緩生輝光。數載侍御史。稍遷尙書郎。人生志氣立。所貴功業昌。何必守章句。終年事蒼皇。同時獻賦客。尙在東陵傍。

贈房侍御云。(房在新安)志人固不羈。與道同周旋。進則天下仰。已之能晏然。褐衣東府召。執簡南臺先。雄義乃特立。犯顏豈圖全。謫居東南遠。逸氣吟芳荃。適會寥廓趣。清波更寅緣。扁舟入五湖。發纜洞庭前。浩蕩臨海曲。超遙濟江壖。微寄忽忘反。遇興將彌年。乃悟范生智。

足明漁父賢。郡臨新安渚。佳賞此城偏。日夕對層岫。雲霞映晴川。閑居變秋色。偃臥含身堅。倚伏自相化。行藏互推遷。君期倦羽翮。歲晏欲冲天。

望太華贈盧司倉云。作吏至西華。乃觀三峯壯。削成元氣中。傑出大河上。如有飛動色。不知青冥狀。巨靈安在哉。厥跡猶可望。方此歎行旅。未由訪仙裝。葱隴記星壇。明滅數雲嶂。良友垂此契。宿心所微尚。敢投歸山吟。霞徑一相訪。

晚出伊蘭寄河南裴中丞云。退無燕息資。近無當代策。冉冉時歲暮。坐爲周南客。前登關塞門。永眺伊城陌。長川暗已空。千里寒氣白。家在渭水西。異日同所適。秉志師禽尚。微言祖莊易。一一林壑間。共繫風塵役。交朋忽先進。天道何紛劇。豈念嘉遁時。依依遇沮溺。

乘潮至漁浦作云。艤舟乘早潮。潮來如風雨。嶂高忽已界。峯暗莫及覩。崩騰心爲失。浩蕩月無主。風停浪始開。漾漾入漁浦。雲景共澄霽。江山相吞吐。倬哉造化工。此事已終古。流沫誠足誠。高歌調易苦。頗因忠信全。客念猶栩栩。

宿天竺寺云。松栢辭宮口。西山微徑通。天開一峯見。宮闈生虛空。正殿倚霞壁。千樓標石叢。夜來猿鳥靜。鐘梵寒雲中。峯翠映明月。泉聲亂溪風。心超諸境外。了與縣解同。明發唯改視。朝日長崖東。湖色濃蕩漾。海光漸暈曠。葛山心尚在。許氏道猶崇。獨往古來事。幽懷期二公。



早過臨淮云。夜泊三風渚。晨過臨淮島。潮中海氣白。城上楚雲早。清鱗漁浦帆。漭漭廬州草。川路日浩蕩。怒焉心如擣。且言任倚伏。何暇念枯槁。范子名屢移。遽公志常保。古人去已久。此理難足道。

顏舒

鳳樓怨云。佳人名莫愁。珠箔上花鈎。清鏡鴛鴦匣。新粧翡翠樓。擣衣明月夜。吹管白雲秋。唯恨金吾子。年年向隴頭。（顧陶取爲唐類詩。）

王琚

琚自荆湖入朝至岳陽。張說有送王十一及趙公入朝之作云。昔濫貂蟬長。同承雨露霏。今參魚鼈守。望美洞庭歸。浦樹懸秋影。江雲繞落暉。離魂似征帆。常往帝鄉飛。琚以詩奉別云。五載朝天子。三湘逢舊寮。扁舟方輟棹。清論遂終朝。遠樹煙門沒。長江地際遙。帝城馳夢想。歸帆滿風颺。（趙公冬曦也。）

琚遊澗湖上寺詩云。春山臨遠壑。水木自幽清。夙息懷微尚。茲焉一放情。雲間聽弄鳥。烟上摘初英。地僻方無悶。逾知道思生。

奉答燕公云。郡遠途且艱。宜悲良自得。胡爲心獨爾。惠好在南國。亦旣清顏披。問然良願

克與君蘭時會。羣物如藻飾。烟景惜歡賞。雲山起翰墨。接藝奇思微。偶談玄言直。永日不知倦。逾旬猶謂亟。如何酌離樽。移棹巴城側。浦口勞長望。舟中獨太息。疾風吹飛帆。倏忽南與北。目盡不復見。懷哉無終極。唯當衡峯上。遙辨湖水色。

琚以預誅太平公主之功。眷委特異。進戶部尚書。豫大政事。時號內宰相。宰臣不能無望。遂讒于帝。帝疏之。歷九刺史。故詩多感激之詞。時燕公亦以罪謫守岳陽。故送琚賦詩。亦有湘東股肱守心。與帝鄉期。舟楫中路塞。風波復來思之語。

王熊

張燕公在岳州。有宴別潭州王熊詩云。絲管清且哀。一曲傾一盃。氣將然諾重。心向友朋開。古木無生意。寒雲若死灰。贈君芳杜草。爲植建章臺。

又云。縉雲連省閣。溝水遶西東。然諸心猶在。容華歲不同。孤城臨楚塞。遠樹入秦宮。誰念三千里。江潭一老翁。

熊答云。長沙辭舊國。洞庭逢故人。故人敦久要。披霞轉相親。歲月空嗟老。江山不惜春。忽聞黃鶴曲。更作白頭新。

又云。平生共風月。倏忽間山川。不期交淡水。暫得款忘年。興逸方能釣。帆開欲解船。離心

若危旆朝夕爲君懸。

薛惟翰

聞怨云。美人怨何深。含情倚金闈。不笑復不語。珠淚紛紛落。

春夜裁縫云。珠箔因風起。飛蛾入最能。不教人夜作。方便殺明燈。

春女怨云。白玉堂前一樹梅。今朝忽見數花開。兒家門戶尋常閉。春色因何入得來。

維翰登開元進士第。

崔巨

春怨云。夜盡夢初驚。紗窗早霧明。曉粧脂粉薄。春服綺羅輕。妾有今朝恨。君無舊日情。愁來理絃管。皆是斷腸聲。

巨。開元二十四年登進士第。

朱珙

聞絨怨云。夫婿邊庭久。幽閨恨幾重。玉琴知別日。金鏡識愁容。懶寄雲中服。慵開海外封。年年得衣慣。且試莫裁縫。

王冷然

王丘傳云。開元初。爲吏部典選。獎用孫逖。張鏡微。張晉明。進士王冷然。皆一時茂秀。

冷然上相國燕公書曰。相公必欲選良宰。莫若舉前倉部員外郎吳太玄。爲洛陽令。必欲舉御史中丞。莫若舉襄州刺史靳能。清輦轂之路。非太玄不可。生臺閣之風。非靳能不可。僕非吳靳親友。但以其賢明。相公有而不知。知而不用。亦過深矣。抑又聞之。昔閔子騫爲政。曰。仍舊貫。如之何。何必改作。凡校書正字。一政不得入畿。相公會爲此職。見貞觀已來故事。今吏部侍郎楊滔。眼不識字。心不好賢。蕪穢我清司。改張我舊貫。去年冬。奏請自今已後。官無內外。一例不得入畿。卽知正字校書。不如十鄉縣尉。經明進士。不如三衛出身。相公復此改張。甄別安在。古人有坐釣登相。立籌封侯。今僕無尙父之謀。薛公之策。徒以仕於書苑。生於學門。小道逢時。大言祈相。僕也幸甚。幸甚。去冬有詩贈公。愛子協律云。官微思倚玉。文淺怯投珠。呂氏春秋云。嘗一櫛之肉。知一鼎之味。請公看此十字。則知僕曾吟五言。亦更有舊文。願呈作者。如公之用人。蓋已多矣。僕之思用。其來久矣。拾遺補闕。甯有種乎。僕雖不佞。亦相公一株桃李也。

冷然吟汴堤柳云。隋家天子憶楊州。厭坐深宮傍海遊。穿地鑿山開御路。鳴笳疊鼓泛清流。流從鞏北分河口。直到淮南種官柳。功成力盡人旋亡。代謝年移樹空有。當時綵女侍君王。繡帳旌門對柳行。青葉交垂連幔色。白花飛度染衣香。今日摧殘何用道。數里曾無一枝好。驛

騎征帆損更多。山精野魅藏應老。涼風八月露爲霜。日夜孤帆入帝鄉。河畔時時聞木落。客中無不淚沾衣。

萬楚

五月五日觀妓云。西施漫道浣春紗。碧玉今時鬪麗華。眉黛奪將萱草色。紅裙妬殺石榴花。新歌一曲令人艷。醉舞雙眸欲鬢斜。誰道五綵能續命。却令今日死君家。

李頎東郊寄楚云。漣落久無用。隱身甘采薇。仍聞薄宦者。還事田家衣。潁水日夜流。故人相見稀。春山不可望。黃鳥東南飛。濯足豈長往。一罇聊可依。了然潭上月。適我胸中機。在昔同門友。如今出處非。優游白虎殿。出入青瑣闈。且有薦君表。當看攜手歸。寄書不代面。蘭口空芳菲。

楚登開元進士第

胡皓

和宋之問寒食題臨江驛云。聞道山陰會。仍爲火忌辰。途中甘棄日。江上苦傷春。流水翻催淚。寒灰更伴人。丹心終不改。白髮爲誰新。

開元中張孝嵩出塞。張九齡韓休崔沔王翰皓賀知章所撰送行詩。號朝英集。

明皇錫宴樂遊園。皓應制詩云。五醑終宴集。三錫又歡娛。仙阜嵩高異。神州眺覽殊。南山臨皓雪。北闕對明珠。廣座鷓鴣滿。昌庭賜馬趨。綺羅含草木。絲竹吐郊衢。銜盃不能罷。歌舞樂唐虞。

袁瓘

惠文太子挽詞云。寒仗丹旄引。陰堂白日遠。暗燈明象物。晝水濕靈衣。羽化淮王去。仙迎太子歸。宜餘燕啣土。朝夕向陵飛。

瓘。明皇時人。惠文太子。睿宗之子。岐王範也。

柳識

許由先生。潁陽祠庭。獻酌文序云。識壬辰歲夏四月。自洛東遊。至先生遺廟。而顛水古風。舊山巋然。迫懷古蹤。慕美至道。以時酒敬酌千靈。既酌拜獻。言曰。天清既能久。地靜不能朽。先生清靜。天地全性。出於胚渾。入於鴻蒙。雲遊鳥還。蒼鬱和風。當時帝道。已半滋章。欲深大樸。散於人末。散於山林。乃有巢父。杳冥同心。堯齋公器。退然見推。遇聖相感。不得不知。耳雖濯於清流。道終播於無爲。所謂春膏時蒸。朽葉自滋。先生含德。唐堯發之。潁陽之仁德日大。天下之祿利日卑。且聖王所重者名器。至人所重者感通。推以大名義。同讓終廉。能感俗道。自爲功。任應。

會之偶然。生垂後之清風。人登雲嶺。多憶箕穎。猗歟先生。山水齊名。茲焉遺廟。萬古芬馨。

識弔夷齊文曰。洪河之東兮。首陽穹崇。側聞孤竹二子。昔也餒在其中。偕隱胡爲。得仁而死。青苔草木兮。雲秋水。魂兮來可。依兮去何止。掇澗磻之毛。薦精誠而已。初先生鴻逸中州。鸞伏西山。顧薇蕨之離離。歌唐虞之不還。謂易暴兮。又武。謂墨纒兮。胡顏。一吒兮。忘飢。若有諄兮。干崑之關。豈不以冠弊在於上。履新處於下。且曰。一人之正位。孰知三聖之純嘏。讓周之意。不其然乎。是以知先生所恤者偏矣。當昔夷羊在牧。殷綱解結。乾道息。坤維絕。鯨吞噬兮。鬼孽。王奮厥武。天意若曰。覆昏暴。資濬哲。於是二老歸而八百會。一戎衣而九有截。况乎旗錫黃鳥。珪命赤烏。俾荷鉅橋之施。俾申姜里之辜。故能岵雨集。電掃風驅。及下車也。五刃不礪於武庫。九駿伏轅於文途。雖二十不食。而兆人其蘇。旣而溥天周土。率土周人。吁嗟先生。逃將奚臻。萬姓歸飾兮。獨爵乎方寸。六合莽蕩兮。終跼乎一身。雖忤時而過周。終臣心而惻殷。所以不食其食。求仁得仁。然非一端。事各其志。若旁通以阜厥躬。應物以濟其利。則焉有貞節之規。君親之事。靈乎靈乎。雖非與道而保生。乃最爲臣之不二。

識字方明。工文章。最爲李華所知。其文與蕭穎士元德秀劉迅相上下。而識練理創端。往往詣極。雖趣向非博。然當時作者。伏其簡拔。

高力士

力士謫承州。山多薺。不食。因感之作詩。寄意曰。兩京作斤賣。五溪無人採。夷夏雖有殊。氣味都不改。其後會赦。因至武陵。遇開元中羽林軍士。坐事謫嶺南。停車話舊。方知明皇厭世。北望號慟。嘔血而卒。

段柯劬力士事證云。呼二兄。柯古。呼阿翁。張繼善。呼將軍。鄭夢復。呼父老。柯。五輪磴。繼。初施檠戟。夢。常臥簾林。柯。長六尺五寸。繼。陪葬太陵。夢。詠齊。柯。齒成印。繼。上國下國。夢。夢鞭。柯。呂氏生髭。繼。

高霽（韋瓘顛）

池陽九子山太白易以九華之目。因與二三子聯句。傳之將來。

妙有分二氣。靈山開九華。太白。層標過遲妙。有分明朝霞。高霽。積雪曜陰壑。飛流歎陽崖。韋瓘顛。青熒玉樹色。縹緲羽人家。

息夫牧

冬夜宴蕭十丈。因餞殷郭二子西上。詩云。冬有十二月。家君宰邑許。下。夫子問津穎。上。二賢將馳會府。皆適茲土。夜處狹室。列座有位。尊卑儼如。或捧觴上壽。或握衣請益。始崇詩以閱。



禮終講信而脩睦。然後文飽於德。義潤其身。頃夫子升堂之後。若盧賈劉尹之徒。半紀間接武鳴躍。實夫子訓之導之斯至也。今殷郭二子。天資才幹。而加之鏃羽。觀光王庭。俯拾地芥。其誰曰不然。飛霜寓林。寒氣惚至。月落匝戶。夜將向晨。座偶謙謙。畢醉溫克。則知孔門宴餞。異於他日。二三子終身識之。夫子以家君政事。百里無事。命門弟子賦詩鳴琴。亦以釋此離之怨焉。小子不敏。忝居門人之末。敢不敬書其事。詩曰。有琴斯鳴。于宰之庭。君子莅止。其心孔子。政既告成。德以永貞。鳴琴有術。于穎之畔。彼之才髦。其年未冠。聞詩聞禮。斐兮璨璨。鳴琴其怡。于穎之湄。二子翰飛。言戾京師。有鬱者桂。載攀其枝。琴既鳴矣。霄既清矣。烘燠有煒。酒醴惟旨。喟我寤歎。吁其別矣。

崔曙

曙穎陽東溪懷古云。靈谿氛霧歇。皎鏡清心顏。空色不映水。秋聲多在山。世人久疏曠。萬物皆自閑。白鷺寒更浴。孤雲晴未還。昔時讓王者。此地閉玄關。無以躡高步。淒涼林壑間。

試明堂火珠詩云。正位開重屋。中天出火珠。夜來雙月合。曙後一星孤。天淨光難滅。雲生望欲無。還將聖明代。國寶在京都。

曙以是詩得名。明年卒。惟一女。名星星。始悟其識也。

曙開元二十六年登進士第。

商璠云。曙詩言辭款要。情興悲涼。送別登樓。但堪下淚。途中晚發云。晚霽長風裏。勞歌赴遠期。雲輕歸海疾。月滿下山遲。旅望因高盡。鄉心遇物悲。故林遙不見。况在落花時。

送薛據云。無媒嗟失路。有道亦乘流。客處不堪別。異鄉應共愁。我生早孤賤。淪落居此州。風土至今憶。山河皆共遊。一從文章事。兩京春復秋。君去問相識。幾人成白頭。

早發交崖山。還太室云。東林氣微白。寒鳥忽高翔。吾亦自茲去。北山歸草堂。仲冬正三五。日月遙相望。蕭蕭過額上。嚶嚶辨少陽。川水生積雪。野火出枯桑。獨往路難盡。窮陰人易傷。傷此無依客。如何蒙雪霜。

